

中国古今医案类编

肺系病类

主编 鲁兆麟 严寄澜 王新佩

中国建材工业出版社



中国古今医案类编

肺系病类

主编 鲁兆麟 严寄澜 王新佩

中国建材工业出版社

图书在版编目(CIP)数据

中国古今医案类编. 肺系病类 / 鲁兆麟主编. — 北京: 中国建材工业出版社, 2001. 4

ISBN 7-80159-117-8

I. 中… II. 鲁… III. ①医案—汇编②肺病(中医)—医案—汇编 IV. R219.1

中国版本图书馆 CIP 数据核字(2001)第 021666 号

中国古今医案类编·肺系病类

鲁兆麟 严寄澜 王新佩主编

中国建材工业出版社出版(北京海淀区三里河路 11 号)

新华书店北京发行所发行 各地新华书店经销

河北省邮电印刷厂

开本: 850mm×1168mm 1/32 印张: 11 字数: 350 千字

2001 年 6 月第一版 2001 年 6 月第一次印刷

印数: 1—2000 册 定价: 24.00 元

ISBN7-80159-117-8/R·005

序

“医案”之书，古已有之。它有立体与直观的效果。能反映医家当时的辨证思维、选方用药之特长、治疗得失成败之所在，包罗万象，引人入胜。

“医案”通于史学。《史记·扁鹊仓公列传》载有淳于意 25 例“诊籍”，而使《汤液经法》的“火剂”由此而流传。

先圣张仲景读史于“越人人虢之诊，望齐侯之色”，缅怀先贤，奋起直追，终成泰斗。可见“医案”涵有史学之意义，岂可轻视之哉？

夫禅宗之有“语录”，兵家之有“阵图”，围棋之有“棋谱”类也。孟子曰：“出乎其类，拔乎其萃”，惟吾医家之“医案”有理有例，有案有戒，读之其味隽永，用之而又神奇，集名医先贤于篇帙之间，可以谈心，可以神游。无怪乎经学大师章太炎先生赞为“中医之成绩，医案最著”，而良有以耶！

鲁兆麟教授，重视“医案”之学，又虑其年代湮远，而濒于失传；不畏艰难，与医学同志严寄澜、王新佩诸君，历时数载，选出数百家名医医案，约有六百余万言洋洋大观。名为《中国古今医案类编》。

夫此书之著也，承前启后，使“医案”臻于完备，而又总其大成。不言而喻，对《内》、《难》、《伤寒》、《金匱》之要义，临证之经验，亦尽在其中矣。

余今年八十岁，垂垂老矣，喜读“医案”新编，不禁手舞足蹈而乐为之序也。

劉渡舟

编写说明

一、本书收集了《名医类案》、《续名医类案》及《续名医类案》成书之后至中华人民共和国建国初期已故的名医医案，也收录了《续名医类案》成书之前未收之医案。共收集医案专著 200 余部，选录医案 1500 余则。

二、为了准确地反映历代医家的学术思想，所收医案均摘自原始资料。

三、《中国古今医案类编》系列丛书的分类按：温病类、伤寒类、肺系病类、脾胃病类、心肾病类、肝胆病类、气血津液病类、经络肢体及杂病类、外科骨伤科病类、妇科病类、儿科病类、五官科病类划分。各病之医案均按成书年代先后编排。

四、本书中药物的计算单位均保持原著原貌，未予统一。

五、部分医案后附有按语、注解等，均为原著中所有。

六、所收医案均注明出处。

前 言

《中国古今医案类编》是汇集我国名医医案精华,反映各家丰富临床经验的医案学著作。

在我国医学史上,曾有两部医案名著问世:一为明·江瓘《名医类案》、一为清·魏之琇《续名医类案》,二书将先秦到清代中期的名医医案进行了系统收集整理,它们在祖国医学发展史上产生过重要影响。然而自清代中期以后,尚无人对名医医案作过系统地整理研究。

《中国古今医案类编》系列丛书是继《续名医类案》之后,将清代中期直到新中国初期谢世的各家名医的医案进行了广泛的收集,经反复筛选、整理成书,填补了这一历史时期医案收集整理的空白,同时,将《名医类案》、《续名医类案》按病症分类,归其各科分类书中。这套丛书共收集名医 400 余家,选录医案 4 万余则,涉及内、外、妇、儿、眼、五官、骨伤等科 400 余种疾病,按病症分类,每种病症有 30~70 个医案,内容极为丰富。从中可以尽窥各地名医宝贵的临床经验和医术之圆机妙法。对于广大中医工作者具有很高的临床应用价值。

医案凝聚着医家的心血和经验,最具有真实性和实用性,可以“宣明往范、昭示来学”。著名学者章太炎先生曾说:“中医之贡献,医案最著”作为一名中医工作者,若能掌握古今名家之医案,有如拿到祛病除疾的万能钥匙,可借鉴前人的经验,应用于临床。本书形成一个完整的医案学学术体系,为广大中医工作者提供一部较完整的医案学参考工具书。对于提高中医临床疗效和学术水平,将会起到重要的作用。

编 者

2000 年 10 月于北京

目 录

咳嗽.....	(1)
哮喘.....	(237)
呃逆.....	(258)
结胸.....	(386)
肺胀.....	(393)
肺痿.....	(396)
肺癆.....	(406)

咳嗽

孙兆

一人病吐痰，顷刻升余，喘咳不定，面色郁黯，精神不快。兆告曰：肺中有痰，胸膈不利，当服仲景葶苈大枣汤（泻中有补）。一服讫，已觉胸中快利，略无痰唾矣。

《名医类案》

钱仲阳

一人病咳，面色青而光，气硬硬。乙曰：肝乘肺，此逆候也。若秋得之可治，今春不可治。其人祈哀，强与药。明日，吾药再泻肝而少却，三补肺而益虚，又加唇白，法当三日死，今尚能粥，当过期，至五日而绝。

《名医类案》

滑伯仁

一妇妊五月，病嗽，痰气逆，恶寒，咽膈不利，不嗜食者浹旬。伯仁诊其脉浮弦，形体清羸。曰：此上受风寒也。越人云：形寒饮冷则伤肺。投以温剂与之，致津液，开腠理，散风寒，而嗽自安矣。

《名医类案》

张子和

常仲明病寒热往来，时咳一、二声，面黄无力，懒思饮食，夜寝多汗，日渐瘦削。诸医作虚损治之，用二十四味烧肝散、鹿茸、牛膝补养二年，口中痰出，下部转虚。戴人断之曰：上实也。先以涌剂吐痰二三升，次以柴胡饮子（柴胡饮子：人参、大黄、黄芩、炙甘草、归身、白芍、生姜、柴胡）降火益水，一月余复旧。此二阳病也，《内经》云：二阳之病，发

心脾，不得隱曲。心受之則血不流，故女子不月；脾受之則味不化，故男子少精。此二証名異而實同，仲明之病，乃脾受之味不化也。

一男子年二十余，病勞嗽數年，其聲欲出不出。戴人曰：曾服藥否？其人曰：家貧，未常服藥。戴人曰：年壯不妄服藥者，易治。先以苦劑涌之，次以舟車浚川丸大下之，更服重劑瘥。

一田夫病勞嗽，一涌一泄，已減大半，次服人參補肺湯，臨卧更服檳榔丸以進食。

一男子五十余，病傷寒咳嗽，喉中聲如鼾，與獨參湯一服而輕，再服而鼾聲除，至三、四服，咳嗽亦漸退，凡服參三斤而愈。

梅師后久患暇呬咳嗽，喉中作聲不得眠，取白前搗為末，溫酒調服二錢。（《析義》云：白前保定肺氣）

一婦人患肺熱久嗽，身如炙，肌瘦，將成肺勞。以枇杷葉、木通、款花、紫菀、杏仁、桑白皮等分，大黃減半，各如常制，治訖，同為末，密丸如櫻桃大，食后，臨卧含化一丸，未終劑而愈。

《名醫類案》

丹溪

一人，年五十余，患咳嗽，惡風寒，胸痞滿，口稍干，心微痛，脈浮緊而數，左大于右，蓋表盛里虛，問其素嗜酒肉，有積，后因接內涉寒，冒雨忍飢，繼以飽食酒肉而病。先以人參四錢，麻黃連根節一錢半，與二三貼，嗽止寒除，改用厚朴、枳實、青陳皮、瓜蒌、半夏為丸，與二十貼，參湯送下，痞除。（看他用藥先后輕重之法）

一人患于咳嗽，聲啞，用人參、橘紅各一錢半，白朮二錢，半夏曲一錢，茯苓、桑白皮、天冬各七分，甘草、青皮各三分；五貼后，去青皮，加五味二十粒，知母、地骨皮、瓜蒌仁、桔梗各五分，作一貼，人姜煎，再加黃芩五分，仍與四物，入童便、竹瀝、姜汁并炒黃柏，二藥晝夜間服，兩月，聲出而愈。（先以六君子加天冬、桑皮、青皮，后配入養陰清火潤肺之品。妙）

·壮年，因劳倦不得睡，患嗽痰，加黄白脓，声不出，时春寒，医与小青龙四贴，喉中有血丝，腥气逆上，两日后觉血腥渐多，有血一线，自口右边出，一茶顷遂止。昼夜十余次。脉弦大散弱，左大为甚，此劳倦感寒。强以辛甘燥热之剂，动其血，不治恐成肺痿，以参、芪、归、术、芍、陈、草、带节麻黄，煎熟入藕汁服之。二日而嗽止，乃去麻黄，又与四贴而血除。但脉散未收，食少倦甚，前药除藕汁，加黄芩、砂仁、半夏，半月而愈。

一人痰嗽，胁下痛。先以白芥子、姜汁、竹沥、瓜蒌、桔梗、连翘、风化硝、姜蜜丸，噙化茶清下。

仇山村少时尝苦嗽，百药不瘳。有越州学录者，教其取桑条向南嫩者，不拘多少，每条约寸许，用二十一枝，纳于沙石锅中，用水五碗，煎至一碗，遇渴饮之，服一月而愈。

一人嗽，但用香橡去核，薄切片，以酒煮熟，用蜜拌匀，睡起服。

一人事佛甚谨，适苦嗽逾月，夜梦老僧呼，谓之曰：汝嗽只是感寒，吾有方授汝，但用生姜一物，切作薄片，焙干为末，糯米糊丸芥子大，空心米饮下三十丸。觉如其言，数服而愈。

《癸志》

张致和

沈方伯良臣，患痰嗽，昼夜不能安寝，屡易医，或曰风、曰火、曰热、曰气、曰湿，汤药杂投，形羸食减，几至危殆，其子求治。张诊脉沉而濡，湿痰生寒，复用寒凉，脾家所苦，宜用理中汤加附子（谁谓痰症无附子之法，此土生金之法）。其夜遂得贴枕，徐进调理之剂，果安。或曰：痰症用附子，何也？殊不知痰多者，戴元礼常用附子疗治之。

《证治要诀》

汪石山

一妇，年三十，因夫买妾，过于忧郁，患咳嗽，甚则吐食呕血，兼

发热，恶寒，自汗。医用葛氏保和汤，不效。汪诊其脉，皆浮濡而弱，按之无力，晨则近数，午后则缓（午后则缓故可治）。曰：此忧思伤脾病也。脾伤则气结而肺失的养，故嗽。遂用麦门冬、片苓以清肺，陈皮、香附以散郁，人参、黄芪、芍药、甘草以安脾，归身、阿胶以和血，数服，病少宽。后每贴渐加参至五、六钱，月余而愈。

一人年二十余，病咳嗽，呕血盗汗，或肠鸣作泄，午后发热（此弱症也），汪切脉细数，无复伦次。因语之曰：《难经》云：七传者逆经传也。初因肾水涸竭，是肾病矣。肾邪传之于心，故发热而夜重；心邪传之于肺，故咳嗽而汗泄；肺邪传之于肝，故胁痛而气壅；肝邪传之于脾，故肠鸣而作泄；脾邪复传之于肾，而肾不能再受邪矣。今病兼此数者，死不出旬日之外矣。果如期而逝。

人一形长色苍瘦，年逾四十，每遇秋凉，病咳嗽，气喘不能卧，春暖即安，病此十余年矣。医用紫苏、薄荷、荆芥、麻黄等以发表，用桑白皮、石膏、滑石、半夏以疏内，暂虽轻快，不久复作。汪诊之，脉颇洪滑，此内有郁热也。秋凉则皮肤致密，内热不能发泄，故病作矣。内热者，病本也。今不治其本，乃用发表，徒虚其外，愈不能当风寒，疏内徒耗其津，愈增郁热之势。遂以三补丸，加大黄酒炒三次、贝母、瓜蒌丸服，仍令每年立秋以前，服滚痰丸三、五十粒，病渐向安。

一妇年逾五十，其形色脆弱，每遇秋冬，痰嗽气喘，自汗体倦，卧不安席，或呕恶心。汪诊之，脉皆浮缓而濡。曰：此表虚不御风寒，激内之郁热而然（表虚人皆知之，内有郁热知之者鲜矣）。遂用参、芪各三钱，麦冬、白术各一钱，黄芩、归身、陈皮各七分，甘草、五味各五分，煎服十余贴而安。每年冬寒，病发即进此药，次年秋间，滞下腹痛后重，脉皆濡细，稍滑。汪曰：此内之郁热欲下也。体虽素弱，《经》云：有故无损。遂以小承气汤，利两三行，腹痛稍除，后重未退。再以补中益气汤加枳壳、黄芩、芍药煎服（先攻后补而兼清），仍用醋烧热砖，布裹坐之而愈。是年遇寒，嗽喘亦不作矣。

一妇产后，咳嗽痰多，昼轻夜重，不能安寝，饮食无味，或时自汗。医用人参清肺汤，嗽愈甚。汪诊之，脉浮濡近驶，曰：此肺热也。令服保和汤，五贴而愈。

一妇怀妊七月，嗽喘不能伏枕，两臀坐久，皮皆溃烂。医用苏子降气汤、三拗汤、参苏饮，俱罔效。汪诊之，右脉浮濡近驶，按之无力，左脉稍和。曰：此肺虚也，宜用补法。遂以人参钱半，白术、麦冬各一钱，茯苓八分，归身、阿胶、黄芩各七分，陈皮、五味、甘草各五分，煎服，六、七贴而愈。

一童子八岁，伤寒咳嗽，痰少面赤，日夜不休。医以参苏饮。数日嗽甚。汪诊之，脉洪近驶。曰：热伤肺也。令煎葛氏保和汤，病如失。（保和汤方：知母、贝母、天冬、麦冬、款冬、花粉、米仁、杏仁、五味、甘草、兜铃、紫苑、百合、桔梗、阿胶、归身、生地、紫苏、薄荷）

一妇年三十，质脆弱，产后咳嗽，痰臭。或作肺痈治，愈剧，延及两脚，渐肿至膝，大便溏，小腹胀痛，午后发热，面红气促，不能向右卧（此弱症脉一数便不治）。汪诊脉虚小而数，曰：凡咳嗽左右向不得眠者、上气促下泻泄者，发热不为泻减者，皆病之反也。按：此皆原于脾。经曰：脾生诸臭，入肺腥臭，人心焦臭，人肝腐臭，自人为秽臭。盖脾不能运行其湿，湿郁为热，酿成痰而臭矣。经曰：左右者，阴阳之道路也。脾虚则肺金失养，气劣行迟，壅遏道路，故咳嗽气促，不能右卧也。脾虚必夺母气以自养，故以虚发热而见于午也。脾主湿，湿胜则内渗于肠胃为溏泄，外渗于皮肤为浮肿。（辨症精确）令用参、芪、甘草补脾为君；白术、茯苓渗湿为臣；麦冬保肺气，酸枣仁以安心神为佐；陈皮、前胡以消痰下气为使；用东壁土以受阳光最多用之以为引用，盖土能解诸臭，用以补土亦易为力矣。此取钱氏黄土汤之义也。服一贴，前症略减，病者喜甚。汪曰：未也。数服后无反复，方是佳兆。否则，所谓过时失治，后发寒热，真阳脱矣；泄而脚肿，脾气绝矣。何能收救。

一妇人患症同前，医作肺痈治，而用百合煎汤煮粥食，反剧。汪

诊其脉细弱而缓(缓则可治),治以参、芪甘温等剂,不数服而愈。此由治之早也。

一人年十九,面白质弱,因劳思梦遗,遂吐血碗许。自是微咳倦弱,后身忽大热,出疹。疹愈(郁热发疹故愈),阴囊痒甚,搓擦水流,敷以壁土,囊肿如盏大。遂去土,以五倍涂少蜜炙为末,敷之,遂愈。因感风寒,其嗽尤甚,继以左右胁痛。汪诊脉虚而数,见其畏风寒,呕恶倦动,粪溏气促。曰:此金极似火也。夫心属火而藏神,肾属水而藏志,二经俱属少阴而上下相通。今劳思则神不宁而梦,志不宁而遗,遗则水不升而心火独亢也。肝属木而藏血。其象震,震为雷,心火既亢,则同类相应,引动龙雷之火,载血而越出于上窍矣,肝脉环绕阴器,亦因火扰而痛痒肿胀也。火胜金,故肺经虚而干咳。皮毛为之合,亦为火郁而发疹。大肠为之府,故亦传导失宜而粪溏。然金虚不能平木,故木火愈旺而凌脾,脾虚则呕恶而食减。经曰:壮火食气,脾肺之气为壮火所食,故倦于动作而易感风寒也。经言两胁者,阴阳往来之道路也,为火阻碍则气不利而痛矣。然火有虚有实,有似火而实非火,故经言有者求之,无者求之,虚者责之,实者责之,此治火之大法也。前症之火皆虚,非水湿之可折伏,惟甘温之剂可以祛除,譬之龙雷之火,日出则自潜伏矣,若用苦寒降火,正如雨骤雷烈而火愈炽矣。世医治火,不惟不求之有无虚实,专泥咳嗽吐血皆属阴虚,误服参、芪不救之语,概用滋阴等剂,况此服滋阴已百余贴,而病反增剧,岂可仍以阴虚治之耶?且经言形寒饮冷则伤肺,又谓脾胃喜温而恶寒,今用甘温健其脾,则肺金不虚,而咳嗽气促自愈。肝木有制而胁痛吐血,自除虚妄之火亦自熄矣。遂以参、芪各四钱,神曲、山楂各七分,白术、麦冬、贝母各一钱,甘草五分,炒干姜四分(配黑姜炒),煎服十余贴,脉数减,嗽少除,精神稍健。但后又适新婚,不免耗损真阴,将何以制其虚妄之火耶?盖咳属肺金,数脉属火,咳而脉数,火克金也。冬月水旺而见数脉,亦违时也。大凡病见数脉,多难治疗,病久脉数,尤非所宜,故为之深虑耳。(论弱症之

案，未有如此篇精切详明者，当熟读。面纲领之临症自有得心应手之快）

《名医类案》

薛己

大参李北泉时吐痰涎，内热作渴，肢体倦怠，劳而足热，用清气化痰益甚。薛曰：此肾水泛而为痰，法当补肾。不信。更进滚痰丸一服，吐泻不止，饮食不入，头晕眼闭，始信薛言。用六君子汤数剂，胃气渐复，却用六味丸，月余诸症悉愈。

地官李北川，每劳咳嗽，薛用补中益气汤即愈。一日复作，自用参苏饮益甚，更服人参败毒散，项强口噤，腰背反张。薛曰：此误汗亡津液而变症矣。仍以前汤加附子一钱，四剂而愈。

司厅陈国华，素阴虚，患咳嗽，以自知医，用发表化痰之药，不应，用清热化痰等药，症愈甚。薛曰：此脾肺虚也。不信，用牛黄清心丸，更加胸腹作胀，饮食少思，足三阴虚症悉见，朝用六君加桔梗、升麻、麦冬、五味，补脾土以生肺金，夕用八味丸，补命门火以生脾土，诸症悉愈。《经》云：不能治其虚，安问其余？此脾土虚不能生肺金而金病，复用前药而反泻其火，吾不得而知也。

中书鲍希伏，素阴虚，患咳嗽，服清气化痰丸及二陈、芩、连之类，痰益甚。更用四物、黄柏、知母、玄参之类，腹胀咽哑，右关脉浮弦，左尺脉洪大。薛曰：脾土既不能生肺金，阴火又从而克之，当滋化源。朝用补中益气加山萸、麦冬、五味，夕用六味丸加五味，三月余，喜其慎疾得愈。

武选汪用之，饮食起居失宜。咳嗽吐痰，用化痰发散之药。时仲夏，脉洪数而无力（脉数不时则生恶疮，关内逢乳刚内痛作），胸满面赤，吐痰腥臭，汗出不止。薛曰：水泛为痰之证，而用前剂，是谓重亡津液，得非肺病乎？不信，仍服前药。翌日，果吐脓，脉数，左三右寸为甚。始信，用桔梗汤一剂，脓数顿止，再脐全止。而色顿白，仍以忧惶。薛曰：此症面白脉涩，不治自愈。（白，肺色也，涩，肺脉也。色脉得令故愈）。又

用前药一剂，佐以六味丸治之而愈。

儒者张克明咳嗽，用二陈、芩、连、枳壳，胸满气喘，侵晨吐痰，加苏子、杏仁，口出痰涎，口干作渴，薛曰：侵晨吐痰，脾虚不能消化饮食，胸满气喘，脾虚不能生肺金，涎沫自出，脾虚不能收摄，口干作渴，脾虚不能生津液。遂用六君加炮姜、肉果，湿补脾胃，更用八味丸，以补土母而愈。

上舍史瞻之，每至春咳嗽，用参苏饮加芩、连、桑、杏乃愈。一日复发，用前药益甚，加喉暗（少阴之脉循喉咙），就治，左尺洪数而无力，薛曰：此肾经阴火刑克肺金，当滋化源。遂以六味丸料加麦冬、五味、炒山栀及补中益气汤而愈。

一男子夏月咳嗽吐痰，用胃火药不应，薛以为火乘肺金，用麦门冬而愈。后因劳役复嗽，用补中益气加桔梗、山栀、片芩、麦冬、五味而愈。但口干体倦，小便赤涩，日用生脉散而愈。

韩飞霞旅寓北方，夏秋久雨，天行咳嗽头痛，用益元散葱姜汤调服，应手取效，日发数十斤。此盖甲己土运湿，今痰壅肺气上窍，但泻膀胱下窍而已，不在咳嗽例也。

《名医类案》

江篁南

一少年，患咳嗽潮热，诊之曰：病得之好内。饮以四物减芎，加麦冬、紫苑、阿胶、地骨皮，嗽热良已。既而不谨复作，他医以寒凉之剂投之，胸痞满，食减，下泄。江以甘温助其中气，病旋已。所以知病得之好内者。切其脉芤而驶，真阴损，热内生也，后缓而弱，脾重伤于苦寒也。

江应宿奉叔父方伯之滇南，抵任月余，叔父患痰嗽气喘，不能伏枕，腰痛，大便秘，小溲淋漓，胸膈痞闷，呕吐清水。召官医十余曹，治之罔效。素有痰火哮喘病，每遇天寒，或饮食起居失宜，即举发，动经旬余，不药亦愈。本欲不服药，则痞闷，二便胀急难当。命

宿疹之，六脉缓弱无力，右为甚（缓为脾脉，虚而协湿，故宜利小便而投四苓二陈）。即告之曰：叔父非往昔痰火，此属内伤，盖内科场选士劳倦伤脾，兼以长途雨露受湿，湿伤脾，脾气虚则肺金失养，清浊相干，阴阳反作。《经》曰：浊气在上则生腹胀，故痞满而呕清水，宜分利阴阳，（不得专执升清之说）渗湿利水（因喘而痞宜利小便）。进四苓散加陈皮、半夏、竹茹，一剂而大小便通利，呕水亦止，是夜伏枕安卧。次早换六君子加当归、阿胶、牛膝、麦冬、五味，诸症悉除。但觉倦怠，时吐稠浊痰一二口（痰滞肺上窍，宜泻下窍膀胱），再单用六君倍加参、术，少佐贝母、升麻、麦冬、五味，补脾，土调理。叔父笑曰：汝十年之后当以医显，吾几违首丘之愿。遂上疏弃官而归。途中日进前药一服，共服参斤余，抵家平复如初。

《名医类案》

张子和

东门高三郎病嗽一年半，耳鸣三月矣，嗽脓血，面多黑点，身表俱热，喉中不能发声，曰：嗽之源心火之盛也。秋伤于湿，冬生咳嗽。冬水既旺，水湿相接，隔绝于心火，火不下降，反而炎上，肺金被烁，发而为嗽，金煅既久，声反不发，医补肺肾皆非也。令先备西瓜冰雪等物，其次用涌泄之法，又服去湿之药，病日已矣。

刘氏一男子年二十余，病劳嗽咯血，吐唾粘臭不可闻，秋冬少缓，春夏则甚，寒热往来，日晡发作，状如疟疾，寝汗如水，累服麻黄根、败蒲扇止汗，汗自若也。又服宁神散、宁肺散止嗽，嗽自若也。张先以独圣散吐其痰，状如鸡黄、汗随涌出，昏愤三日不省，时时饮以凉水，精神稍开，饮食加进。又与人参半夏丸、桂苓甘露散服之，不数日乃愈。

赵君玉妻病嗽，时已十月矣。张处方用陈皮、归身、甘草、白术、枳壳、桔梗，赵以其不类嗽药，张笑曰：君怪无乌梅、罂粟囊乎？夫冬嗽乃秋之湿也，湿上逆而为嗽，此方皆散气除湿，解结和经，三服而

愈。

《续名医类案》

窦材

一人病咳嗽，盗汗发热，困倦减食，四肢逆冷，六脉弦急，乃肾气虚也。先灸关元五百壮，保命延寿丹二十丸，钟乳粉二钱间日服，金丹百丸，一月全安。

一人病咳嗽，脉症与上条同，但病人怕灸，止服延寿丹五十粒，金液丹百粒，钟乳粉二两，五日减可，十日脉沉缓，乃真气复也。仍服前药一月全安。盖此病早，不灸亦可。迟必加灸，否则难治。

《续名医类案》

凌汉章

里人病嗽，绝食五日，众投以补剂益盛。凌曰：此寒湿积也，穴在顶，针之必晕绝，逾时始苏。命四人分牵其发，使勿倾侧，乃针。果晕绝，家人皆哭，凌言笑自如，顷之气渐苏复，加补始出针，呕积痰斗许，病即除。

一中年妇人干咳，寸脉滑动似豆状，余皆散大不浮，左大于右，每五更心躁热有汗，但怒气则甚。与桔梗不开，诸药不效，遂以石膏、香附为君，芩、连、青黛、门冬、瓜蒌仁、陈皮、炒柏、归、梗为臣，五味、砂仁、川芎、紫菀为佐，凡二十余帖而安。

崔某疗久嗽熏法。每旦取款冬花如鸡子大，少许蜜拌花使润，纳一升铁器铛中，又用一瓦碗钻一孔，内安小竹筒，或笔管亦得，其筒少长，置碗铛相合及插筒处，皆面糊涂之，勿令泄气。铛下著炭火，少时款冬烟自竹管出，以口含筒，吸取咽之如胸中，稍闷须举头，即将指头捻竹筒头，勿令漏烟出气，及烟尽止。凡如是五日一为之，至六日则饱食羊肉馄饨一顿，永痊。（一法不用铛碗，用有嘴瓦瓶烧药，盖住瓶口，却以口于瓶嘴吸烟，咽之尤捷）

侍御谭希鲁咳嗽吐痰，手足时冷，以为脾肺虚寒，用补中益气，加炮姜而愈。（冥材以肢冷为肾气虚）

一妇人患咳嗽，胁痛发热，日晡益甚，用加味道遥散，熟地，治之而愈。年余因怒气劳役，前症仍作，又太阳痛或寒热往来，或咳嗽遗尿，此肺气虚，肝火盛，而尿脬失制也。用前散及地黄丸，月余而瘥。

表弟妇咳嗽发热，呕吐痰涎，日夜约五六碗，喘咳不宁，胸痞燥渴，饮食不进，崩血如涌，此命门火衰，脾土虚寒，用八味丸及附子理中汤加减，治之而愈。

一妇人久咳嗽，面色痿黄，或时皓白，肢体倦怠，饮食少思，稍多则泻，此脾土虚而不能生肺金，朝用补中益气汤，夕用六君子汤为主，间佐以八珍汤，三月余渐愈。后感寒邪喘嗽，胸腹作胀，饮食不入，四肢逆冷，此中气尚虚，不能充皮毛腠理，司开阖之所致也。遂用六君加生姜及桔梗而愈。

一妇人患劳嗽，晡热内热，寒热往来，作渴盗汗，小便频数，其经两三月一行。此肝脾气血虚损，用八珍汤、六味丸，六十余剂，诸症渐愈。其经两月一行，仍用前二药，间以加味道遥散，各三十余剂。后患怒适经行，去血过多，诸症悉至，饮食少思，腹胀气促，用十全大补汤数剂，渐愈。仍用前药调补，复因丧子，胸腹不利，食少，内热盗汗，便血无寐，用加味归脾汤仍兼前药而愈。

锦衣李大用素不慎起居，吐痰自汗，咳嗽发热，服二陈、芩、连、枳壳、山栀之类，前症不减，饮食少思，用四物、二陈、芩、连、元参、知、柏之类，前症愈甚，更加胸腹不利，饮食亦少，内热晡热。加桑皮、紫苏、杏仁、紫菀、桔梗之类，胸膈膨胀，小便短少。用猪苓、泽泻、白术、茯苓、枳壳、青皮、半夏、黄连、苏子、胸膈痞满，胁肋膨胀，小便不通。加茵陈、葶苈，喘促不卧，饮食不进。诊之六脉洪数，肺肾二部尤甚，曰：脾土既不能生肺金，而心火又乘之，此肺病之作也。当滋化源，缓则不救。不信，后唾脓痰，复求治。胸膈痞满，脾

土败也；喘促不卧，肺金败也。小便不通，肾水败也；胁肋膨胀，肝木败也；饮食不化，心火败也。此化源既绝，五脏已败，药岂能生已？而果然。

丝客姚荃者素郁怒，年近六十，脾胃不健，服香燥行气，饮食少思，两胁胀闷，服行气破血，饮食不入，右胁胀痛，喜用手按。彼疑为膈气痰饮内伤，曰：肝木克脾土，而脾土不能生肺金也，若内有瘀血，虽单衣亦不敢著肉，用滋化源之药四剂，诸症顿退，彼以为愈。曰：火令在迺，当补脾土，以保肺金。彼不信，后复作，另用痰火之剂益甚，求治。左关右寸滑数，此肺内溃矣。仍不信，服前药，果吐秽脓而歿。

嘉与周上舍每至夏患咳嗽，服降火化痰之剂，咳嗽益甚，脾肺肾脉皆浮而洪，按之微细，此脾土虚不能生肺金，肺金不能生肾水，而虚火上炎也。朝用补中益气汤，夕用六味地黄丸而痊。后至夏遂不再发。

一妇人不得于姑，患咳嗽，胸膈不利，饮食无味，此脾肺俱伤，痰郁于中。先用归脾汤加山栀、川芎、贝母、桔梗，诸症渐愈，后以六君加川芎、桔梗，间服全愈。

一妇人咳嗽胁痛，或用清气化痰降火等剂，久不愈，更加内热晡热，若两胁或小腹内热，其嗽益甚，小便自遗，此属肝经血虚火动，用六味丸加五味子，滋肾水以生肝血、用补中益气，生脾土以滋肺金而寻愈。

上舍陈道复长子亏损肾经，久患咳嗽，午后益甚，薛曰：当补脾土，滋化源，使金水自能相生。时孟春不信，乃服黄柏、知母之类，至夏吐痰引饮，小便频数，面目如绯。薛以白术、当归、茯苓、陈皮、麦冬、五味、丹皮、泽泻四剂，乃以参、芪、熟地、山茱为丸，俾服之，诸症顿退，复请视，以为信，遂用前药如常，与之仍泥不服，卒致不起。

《续名医类案》

陆养愚

吴氏妾寡居夜热，以烦劳感冒，干咳无痰，医与疏风药，反增呕恶，更以二陈症不减，而夜不能寐，若失神志，烦乱不安，脉之沉弦而数。曰：干咳乃火郁之甚，最为难治。况寡居多年，其郁可知，虽有风寒，但于调理养血，开郁清热，微加疏散，若竟发其表，升动阴火，则病反甚。重以二陈之燥，宜其烦乱不寐，神志若失也。用清养荣汤加黄芩、前胡、薄荷、杏仁、苏叶二剂，咳嗽烦闷俱减，第睡未安，脉微浮而数。去苏叶、前胡、杏仁，加贝母、知母、山栀、枣仁、竹茹、大枣二剂，诸症俱愈，但四肢懈怠，气乏不足以息，脉浮数而弱，此虚火已平，真气衰乏之候。仍用前汤加贝母、枣仁、更入人参一钱五分，数剂而愈。

陈曙仓室咳嗽，或时纯血，或时纯痰，或时痰血相半、夜热头眩，胸膈不舒，脚膝无力，服滋阴降火药已半年矣。饮食渐少，精神渐羸。脉之两寸关沉数无力，两尺涩弱微浮，此上盛下虚之症也。上盛者心肺间有留饮瘀血，下虚者肝肾之气不足。用人参固本丸，令空腹服之，日中用贝母、苏子、山楂、丹皮、桃仁、红花、小蓟，以茅根煎汁，入药同煎，十剂痰清血止，后以清气养荣汤与固本丸间服三日，后病痊而孕。

《续名医类案》

陆肖愚

吴逊齐患咳嗽，身热胁痛，日轻夜重，寢食俱废，咸以年高病重为虑，脉之左手浮弦，右手弦滑，曰：此病极轻，何必忧疑？特内有食积痰饮，外感风邪所致也。少为消导疏散即愈矣。用苏叶、柴胡以解其表，青皮、白芥以治其胁，桑皮、前胡、杏仁以治其肺嗽，陈皮、半夏以清其痰，山楂、枳实以消其食，二剂而减，四剂脱然。

《续名医类案》

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医

陆祖愚

费表母，生平酒饮多，而谷食少，酿成痰火，每至五更则疾作，喘嗽频并，气逆息粗，不能伏枕，由来久矣。年近七旬，其疾大作，日夜昏晕数次，四肢厥冷，自汗如洗，形容瘦削，六脉如丝，或与清火清痰，毫不应。乃用附子理中料，千杵蜜丸，淡盐汤服，以助下元。另以知母、贝母、桑皮辈煎汤，徐徐含咽，清其上膈，数剂嗽稀喘止，肢温汗敛，再用十全大补汤料丸服，数十年痼疾，从此遂瘳。

陈三农之室遇夜嗽甚多痰，作阴虚火动，以四物换生地，加知母、贝母、菱仁、杏仁、麦冬、五味，二剂而愈。

孙文垣侄妇喉中掀痒，咳嗽红痰，两寸关洪大，内热生疮、山梔、小蓟、生地、丹皮、滑石、青皮、麦冬、甘草、黄连、菱仁，水煎服，血止嗽除。后遇劳心即咳嗽，喉中血腥，总由上焦热甚而然，以枇杷叶、山梔、生地、白芍、甘草、丹皮、地动蜂、天花粉、滑紫菀，常服三五剂，两月而安。

温天衢冬月病目，医与发太过，至春间吐血碗余，及夏下午潮热，咳嗽胸膈胀疼，早晨冷汗淋漓，大便溏一日两行，饮食少，肌肉消十之七，脉数，孙曰：据症脉，法在不治。众恳不能辞，乃用泻白散加五味、白芍、贝母、马兜铃，服下其夜帖然而卧，不嗽，唯大便溏，前药加扁豆、山药、茯苓、汗亦渐止，复与泻白散加石斛、马兜铃、贝母、陈皮、苡仁、白芍、山药、五味、桔梗、调理三月而痊。

琇按：此与孙治吴肖峰内人注，夏误服参苏饮成咳嗽，同为发散所伤，世俗谓伤风不醒，变成劳者是也。不知此等，皆为市医不知虚实，恣用疏散，轻病变重，而病者至死，犹曰伤风不醒，哀哉！（吴案见痿门）

《续名医类案》

李士材

一人咳而上气，凡清火、润肺、化痰、理气之剂，几无遗用，而病不少衰。诊其肾脉大而软，此气虚火不归元，用人参三钱，煎汤送八味丸五钱，一服而减。后用补中益气汤加桂一钱、附子八分，凡五十剂及八味丸二斤而痊。

一人经年咳嗽，更医数十人，不绝口，而病反增剧，自谓必成虚劳。李曰：不然。脉不数不虚，惟右寸浮大而滑，必多服酸收，故久而弥甚。用麻黄、杏仁、半夏、前胡、桔梗、甘草、橘红、苏子，五剂止，十剂已。

《续名医类案》

冯楚瞻

李孝廉患咳嗽甚频，视其身长肥白，颊色常红，知为表有余，而里不足，上假热而下真寒，病必当剧，劝以重服药饵。时有通谱新贵，其精医药，乃托其治，所用乃山梔、黄芩、花粉、橘红、贝母、苏子、杏仁之类，止之勿听。数剂后嗽转甚，烦躁喜冷倍常，益信寒凉为对症，倍用之，转剧再进，烦躁更甚，粒不下咽，饮水无度。更以为实热，以三黄丸下之，利行不多，渐喘促，再剂夜半喘大作，有出无人，遍身麻木、渍汗如雨，神昏目直，口噤不言，委顿极矣。亟邀冯诊，两寸左关仅存，时当六月，欲与四逆理中，主人畏惧，改以人参一两、麦冬二钱，五味六分、肉桂钱许，始允。急煎服之，喘减片刻，奈病大药小，顷复大作，乃不咎寒凉之误，反以参桂为罪矣。因思尽吾之力，方可以活，若徇彼之见，必死而已。乃坚定一方，勒令服之，用炒白术三两、人参二两、炮姜三钱、五味子一钱五分、制附子三钱，煎浓汁灌之。下咽后，病人张口大声云心中如火烙，欲死。（此不与冷服故。）旁观疑怨交起，不为动，顷之又大声曰：脐间更疼更热，欲死矣。乃窃喜其阳能下达未之绝也。果少焉喘定汗收，手足温而神

思清，语言反甚无力，此方术多参少者，因中宫久困寒冷，不先为理中，则阳气难下达也。

《续名医类案》

吕东庄

徐鸾和内，病咳嗽，医以伤风，治之益甚。邀诊则中虚脉也，曰：鼻塞垂涕痰急，皆伤风实症，何得云虚？曰：此虚实真假所辨在脉，庸医昧此，误人多矣。彼不知脉，请即以症辨之，其人必晡时潮热，至夜半渐清，至晨稍安，然乎？曰：然。然则中虚何疑乎？所可喜者，正此鼻塞垂涕耳。乃投以人参、白术、当归、黄芪、白芍各三钱，软柴胡、升麻各一钱，陈皮、甘草，五味各六分，三剂而咳嗽立止，再诊谓之上症已去，唯带下殊甚，近崩中耳。惊应曰：然。即前方重用人参，加补骨脂、阿胶各二钱，数剂，兼服六味丸而愈。

《续名医类案》

柴屿青

陈氏甥女，咳嗽吐痰，夜间发热，众医以为必成劳症，诊其脉，虽稍洪尚有根柢，并非细数，何至不治，纯用滋阴之药，调养半年而愈。

同学蔡为章患痰嗽，夜难就寝，身不胜衣，卧床不能转侧，诊其六脉微弱，气血两亏，拟用参芪补剂，蔡以痰嗽不宜用补为疑，乃力任之，先用六君子汤加炮姜、桂附，数帖而嗽减，继用养荣汤十数剂，始能下床行动，调理月余而康。

张惕中咳嗽吐痰，医误认风寒，服药十数剂病增剧，身热喘嗽，夜不能卧，胸膈痞塞，困于床第，小便短缩。诊得人迎脉缓，绝非外感，气口空大，左寸弱甚，两尺沉微，此心肾不足，的系内伤之症，其小便不利者，三焦之气化不能运于州都也。从东垣治内伤条，师其意而变通之，旬日而痊。

左中丞夫人年六十余，形体瘦弱，痰喘息粗，夜不能寐，医频与消痰理肺，愈委顿。诊其脉甚微细，此气虚也。仲景云气虚有痰肾气丸补而逐之。遂用六味汤加麦冬五味，治之而愈，惟夜间尚未熟睡，再用养荣汤加茯神、枣仁，十数剂即加餐安睡，渐得复元。

丙寅新正同乡讳伊喇齐长郎贺节至寓，云咳嗽求方，诊其两脉细数，右寸郁结，断其难以收功。勉用麻黄汤，伊断断不可？曰：我患阴亏他医熟地人参，服过数两，柴曰阴亏诚然，但风邪闭塞肺气，补剂又从而壅遏之，非此不能去邪。力争不信，早决其不起，果然。

琇按：凡损症脉见右寸厥厥然如豆，按之梗指，其病原属不起，以肺金败也。今以右寸郁结，断为风邪闭塞。然必见鼻塞声重，或头痛痰浓，或咳嗽连续，方是其候。

《续名医类案》

王肯堂

一妇人咳嗽不已，服诸药不效，渐成劳瘵，诊之六脉濡弱，此血弱，又因忧戚太过，而成斯疾，合用当归等药，治之必愈。遂先《古今录验》橘皮汤，空心服苏子降气汤，徐用金钗煎熟地黄丸、当归丸，调理而安。（未入选）

《续名医类案》

张路玉

吴江郭邑侯喘嗽逆气，诊之两尺左关弦数，两寸右关涩数。弦者，肾之虚，涩者，肺之燥。夏暑内伏肺络，遇秋燥收之，令发为咳嗽也。自言每岁交秋连发四载，屡咳，痰不得出则喘，至夜不能卧，咳剧则大便枯燥有血。曾服越脾汤，嗽即稍可。张曰：公肾气数强，因水亏火旺，阴火上烁肺金，肺燥不能生水，咳甚则便燥有血者，肺移热于大肠也。（赖有此耳）合用千金麦门冬方，除去半夏、生姜之辛燥，易以葳蕤、白蜜之甘润，藉麻黄以鼓舞麦冬、生地之力，与越脾汤中

麻黄石膏分解互结之燥热，同一义也。郭曰：诸医咸诋麻黄为发汗重剂，不可轻试，仅用杏仁、苏子、甘、梗、前等药，服之咳转甚，何也？曰：麻黄虽云主表，今在麦门冬汤中，不过借以开发肺气，原非发汗之谓，麻黄在大青龙汤、麻黄汤、麻杏甘石汤方，其力便峻，以其中皆有杏仁也。杏仁虽举世视为治嗽通药，虚实混然，辛温走肺，最不纯良，耗气动血，莫此为甚，熬黑入大陷胸丸，佐甘遂等搜逐结垢，性味可知。遂用前方连进二剂，是夜便安睡，脉弦虽未退，按之稍软，气口则虚濡乏力。与六味生脉加葳蕤、白蜜作汤，四服嗽顿减，即以此方制丸，恒服至秋，无复嗽之虞。

何督学媳素常咳嗽不已，痰中间有血点，恒服童真丸不彻，以父歿哀痛迫切，咳逆倍常，痰中杂见鲜血，因与瑞金丹四服，仍以童真丸，乌骨鸡丸调补而安。

劳太夫人年五十余，素禀气虚多痰，数日来患风热咳逆，咳甚则厄厄欲吐，且宿有崩淋，近幸向安。法当治其咳。以桔梗汤加葳蕤、白微、丹皮、橘红、蜜煎生姜，四剂撤其标症，次与六君子加葳蕤以安胃气，继进乌骨鸡丸方，疗其固疾。以久不羶荤，不忍伤残物，命改用大温经汤加鹿茸、角腮乍丸药，虽异而功则一也。

《续名医类案》

陈三农

一妇咳嗽，痰喘饱胀，水火不通，眠食俱废，以人参、白芍为君，苏子炒研细为佐，枇杷叶三大片，白茯苓佐之，二服得眠，大小便通。

东坡《盖公堂》记云：始吾居乡，有病寒而咳者，问诸医，医以为蛊，不治，且杀人。取其百金而治之，饮以蛊药，攻伐其肾肠，烧灼其体肤，禁切其饮食之美者，期月而百病作，内热恶寒而咳不已，累然真蛊者也。又求于医，医以为热，授之以寒药，旦夕吐之，暮夜下之，于是始不能食，惧而反之，则钟乳，乌喙杂然并进，而漂疽，痈疥、眩

督之状，无所不至，三易医而病愈甚。里老父教之曰：是医之罪，药之过也，子何疾之有？人之生也，以气为主，食为辅，今子终日药不释口，臭味乱于外，而百毒战于内，劳其主，隔其辅，是以病也，子退而休之，谢医却药。而进所嗜，气全而食美矣，可以一饮而效。从之期月而病良已。（《容斋五笔》后文节）

《续名医类案》

薛立斋

甥范九迪咳嗽痰盛，胸腹不利，饮食少思，肢体倦怠，脉浮大，按之微弱，服二陈、枳壳等药愈盛，脾肺肾虚也，用补中益气汤，六味丸而愈。

《续名医类案》

万密斋

监生胡笃庵咳久不止，汗之不可，下之不可，因表里之邪俱甚也。为制方用苏叶、薄荷叶、桑白皮、杏仁霜、瓜蒌霜、桔梗、甘草，等分为末。虚者阿胶蜜丸，白汤下，或口中噙化，五日而安。后以治人多效。

《续名医类案》

立斋

一病妇咳而无痰，日晡发热，脉浮数，先以甘车汤少愈，后以地骨皮散而热退，更以肾气丸及八珍汤加柴胡、地骨皮、丹皮而愈。丹溪云：咳而无痰者，此系火郁之症，及痰郁火邪，在中用苦梗开之，下用补阴降火剂，不已，则成劳嗽，此症不得志者多有之。又《原病式》曰：人瘦者，腠理疏通而多汗，血液衰少而为燥，故为劳嗽之疾也。

一男子咳嗽气急，胸膈胀满，睡卧不安，以葶苈散二服少愈，更

以桔梗汤而痊。

男子咳嗽，项强气促，脉浮而紧，以参苏饮二剂少愈，更以桔梗汤四剂而痊。

《续名医类案》

马元仪

杨咸时咳嗽多痰，气逆作喘，自汗不食，已两月。脉之虚微无神，此劳倦致伤脾肺也。《经》云：劳则气耗，气与阴火势不两立，气衰则火自胜，土虚既不能生金，阴火又从而克之，故喘嗽自汗作矣。若行疏泄以定喘止嗽，是重耗其气也。用人参二钱，黄芪五钱，炙草五分，贝母一钱，杏仁、苏子各二钱，紫菀、桔梗、防风以佐之，兼进七味丸以培土母，归脾大造膏以实脾肺而愈。

《续名医类案》

来天培

一妇年六旬余，季夏酷热，患咳嗽，头疼发热，胸膈不舒，或以苏、杏、前、贝、生地、黄芩治之转甚。视其面色浮肿，懒言气怯，咳嗽声微，胸膈胀满，饮食不下，六脉微弱，此风寒内伏，里虚致感也。始宜以参苏饮倍姜枣，一二剂可已。今增虚矣，非姜附不能瘳也。以补中益气汤去升，柴，加川芎、炮姜、附子各一剂，汗出遍身、肿胀渐消，再剂热退，改用八珍加桂附，二剂而咳嗽除。终以归脾加熟地、炮姜，四剂声高食进矣。彼云旧有风症，两手不能举，今服药乃能举于头矣。此治病必求其本之谓欤。

《续名医类案》

沈明生

金斐文夏患咳嗽，清痰续续不绝，时风热嗽甚多，金谓所投之剂非疏风化痰，即清金涤热。及诊曰：是非温补不痊。金骇愕问故，

曰：君以外感盛行之际，必无内因者耶？初得之症，必无属虚者耶？是则时有一定之方，症有一定之药，人皆可以为医矣。夫嗽属外因，必肺气胀满，咳喘相属，或兼头疼鼻塞，涕唾稠浓，声壮气壅，脉浮数有力，或人迎脉大，此为外因。今脉不浮而沉，非风也；不数而缓，非热也；按之不鼓，非有余也。嗽虽频而气短不续，痰虽多而清薄不浓，若疏解则徒耗肺家之金，清凉则转瘠中州之上，是欲去病而反重病也。宜用补中益气与六君子参合服。方藉参、苓、术以补肺之母，使痰无由生；藉橘、半、升、柴以升清降浊，则嗽可不作。一二剂嗽微减，再服浹旬而愈。

吴桥治鄱阳王令领邑甫及期病咳嗽，唾痰稠粘而臭，且杂以血，久之潮热失声，食少肉消，闭户逾月，将乞骸骨归。幸桥至诊之，桥独任其无害，令为欣然，且问桥，桥曰：此肝气凌脾，治者谬以为阴虚火动，剂凉则脾益滞，津液不通，肝愈炽，而无所制矣。法当扶脾抑肝，三剂如脱，七剂而出视事。

《续名医类案》

程从周

陆永锡文学令婢年三十五岁，孀居二载。六月间，患咳嗽内热，夜不安寐，吐痰每次半碗许。若咳时痰不得出，则咳声不休，饮食减少，面色微黄。但觉膝内隐隐痛起，则延及遍身皆痛，如此半月余矣！初邀余诊视，六脉弦滑，约五至，两尺近弱，余曰：“此脾经湿郁而然，脾土受郁，久则为热，上蒸于肺，故令咳嗽，金虚则脾土弱，饮食不作，肌肤悉皆化痰涎矣。盖足膝内痛，起则延及遍身皆热痛者，乃足三阴血虚故也。经云：阴虚生内热。乃以加味逍遥散，倍当归，加二母、地骨皮、麦冬、陈皮、酒芩之类，未效。彼欲急于见功，更医。又用枳朴驱痰流气之剂，嗽愈甚，痛愈急。七日后，复请予诊视，六脉缓弱无力，余曰：“症属血虚，医反流气，所谓诛罚无过，宜乎病加重也！”乃以前方加入参一钱煎服，数剂咳止热除。再服十余剂，诸

症悉愈。仍复制丸药一料，调理以戒不虞。

《程茂先医案》

郑重光

张其相兄未出室令爱，首春咳嗽，乃恣食生冷，肺受寒邪，所谓形寒饮冷则伤肺也。前医初作伤风，以苏、前解表，殊不知邪不在表而直伤肺，不知温肺，致寒不解，咳甚吐血。前医见血，遂改用归、芍、丹皮、苏子、杏仁、贝母以滋肺热。服二剂，遂发寒战慄，手足厥冷，身痛腰疼，咳吐冷水，脉沉细紧，表里皆寒。正合小青龙加附子证，用麻黄、桂枝、细辛、赤芍、干姜、附子、半夏、茯苓、杏仁、甘草。二剂手足回温，四剂通身冷汗大出，咳止大半，再去麻黄、附子，二剂痊愈。若泥吐血阴虚，迟疑其间，安得有此速效耶？

李元亮，书吏也，因书守过劳，秋杪忽咳嗽火上逆，头面皆赤。前医苦寒直折，随吐粉红白血如肺肉，则火愈上逆，一日三、五次，火一逆则遍身皆赤，咳嗽益甚，间有白血，头面汗多。余往诊之，两手脉大而数，重取全无神力，若以失血之后，见此数大之脉，则为逆证，咳白血亦属不治。病者云：“卧则不咳，坐起则咳甚。”余熟思之，久视伤血，书写伤力，此气中虚火，宜人参、黄芪、甘草以退之。所谓虚火宜补，误用苦寒，虚以实治，则火愈炽。坐起咳甚，肺虚也；脉大无力，所谓劳则彰，亦气虚也；多汗面赤，乃虚阳上泛，非阴虚之火。遂用大剂黄芪为君，人参、当归、白芍、麦冬、五味子、甘草为臣佐，一剂汗收脉敛，三剂火息咳止。如此滋补，一月方能起床，火之阴阳，可不辨哉！

《素圃医案》

王三尊

鹤岑贵先生诒予曰：“予男振咳嗽数载，始而先生以散表愈，继而屡发。先生或仍以散表愈，或以理气下疾愈，或以清肺愈，或以补

肾愈，或以补脾愈，或以交心肾愈，或以补肺敛肺愈。然屡愈屡发终不尽愈。今春往雒皋，张加民先生谓左脉小于右，断为肝郁所致。君以白芍三钱，始而大效，及至家久服，又不见效，敢问何说也。”予曰：“令郎之恙。得自夏月当风洗浴，故始以散表而愈。愈后不善调摄，以致屡发屡愈。日久肺窍不清，已结窠囊，发则痰喘气急，俟服药多帖，痰消大半，则病愈大半矣。然痰根盘踞，如疮生管，不能尽去，窠囊渐渐积满，则又发矣。然无外感内伤致咳之由，则亦不发。其发之之由，又非一言可尽者。肺为娇脏，不容毫发。受寒咳，受热咳，饮冷咳，饮大热咳。又为五脏华盖。凡五脏六腑之水火浊气上干於肺者，皆致咳。故《内经》有五臟六腑之咳。咳则周身之气血上奔，最难遽止。咳为进少出多，吊动肾气，最易变虚。故致咳之由最多。而治咳之方鲜效也。令郎或仍受风寒而发者，故仍以散表愈；痰积既久，堵塞肺窍，喘急闷绝，忽然骤发，命在顷刻者，故以理气化痰愈；肺始受寒，久则变热，发时微寒既经表散，惟热独存。故以清肺愈；然肺为肾母，母虚不能生子，子虚令母益虚。金水不能相生，其咳愈甚。虚则补其子，故以补肾愈；但清肺补肾之剂，久服伤脾泥膈。饮食减少，脾为肺母，土虚不能制水，水泛为痰而更咳。虚则补其母，故以补脾愈；有读书作文用心太过，致夜不寐。心肾不交或梦遗，相火上炎而咳者，故以交心肾愈；久发不止，肺气虚耗，故以补肺敛肺愈；寒土境遇往往拂意，易动肝怒。故张先生又以抑肝愈；设若嗜烟酒炙煇，房色过度，势必又以涤荡中宫，或以独参汤，鹿茸丸，黑铅丹，八味丸等而愈也。既有痰根在肺，则凡所以致咳者，皆足以助之，故用药有如此转变也。张先生之方，不过一时偶中。至於病情变迁，窠痰复出，又不效矣。至言左脉小於右断然肝虚，若然则为肝之阳虚，何得又用白芍而效乎？还知是右大於左为肺家本病。痰火久嗽宜於酸寒，故奏效耳。若洞明此理则对证用药，无不获效。若执一隅之见，一时之方，故有始效而继不效。若再强进则疾痼而难救矣。欲愈之法，必须外避风寒暑湿，内戒七情六欲，

视世事如浮云，降心如槁木寒灰，纵发亦稀而且轻。渐渐窠囊消落，再以丸药培其根本，日久自然全愈；若不遵调摄，专恃药饵，或医者见闻不博，博而不化，化而不神，吾未见能全愈也。先生以为然否？”

大成贵纪兄，咳嗽二年，时发时止。发时气道阻塞，喘急不堪。服散风降气下痰润肺药数帖，咳去痰五六粉盒，方气平渐愈。今发未经一昼夜，服前药八贴，间有加参、芪者，毫不见效，伊父鹤岑先生医技已穷，商之於予。予诊左脉甚弱，右脉沉而有神，非死证。然手足冰冷，汗时出，痰只出一盒，余不能出，满腹痞塞。予思脾胃强，则五脏之气皆强；脾胃弱，则五脏之气皆弱。况脾为肺母，未有胃气充足旋转，而肺气终不行者。以香砂六君子汤，木香易沉香，砂仁易白蔻与之。服下果效，即减去白蔻，恐肺中伏火继出。仍加以旋花、桔梗、贝母、萎仁、杏仁等，再以他药转换收功。须知此证胃气虽不大实，亦不大虚，但不充足，不能激发肺窍之壅塞耳，故一帖肺气少输。前方即为之加減矣。

《医权初编》

周南

德左卫门，五十三岁。体瘦耐劳。素有嗽病。今冬因伤风更甚，夜分连咳，痰稠难出，脉沉而急。凡咳嗽之脉宜浮不宜沉，宜缓不宜急。浮缓之脉为风在表，散之犹易，以咳为肺病，肺主皮毛故也。若沉而急，病在里，治之为难。此之久嗽病，痰火蕴结，固无止息，新寒外束则内外合邪而益甚，不比寻常外感也。肺窍窒塞，呼吸促迫，脉之沉急也。固宜治之必得内外两解之方庶可奏捷，乃以仲景大、小青龙汤参而行之。麻、桂、杏仁以散表，石膏以清里，半夏、五味以逐饮而收阴，干姜、细辛以散结而分邪。投之辄效，盖无形之感从肌肤出，有形之痰从水道出，顷刻分解无余耳。

筵山甚左卫门，年仅三旬。稟体清弱，素嗜曲藥三年。咳嗽，今更声嘶；右胁痛连腰，不可着席，惟左一侧卧；饮食减少；脉弦而数。

此脾肺伤于湿热，渐成阴虚之候也。酒性辛热上行，熏烁肺金，清肃不降则咳，逆于经隧则痛，充斥于脾胃则妨食。津液久耗，化源不清，而阴日亏，则内热，脉数。脾肺道路通于右，故痛在右胁。宜先清肺理脾，使其痛止咳稀而音自清，然后壮水而热自退也。方用甘、桔、苏、橘以通肺道，白芥子以止痛，苓、苡、山药以健脾。皆甘淡纯粹之品，补土以生金，香燥非所宜也。连进九剂，脉缓，前症皆退。停药旬日，咳热复作，仍以前方加麦冬、百合，去芥子，以右胁已不痛也。又十剂咳止音清，乃以六味地黄汤加麦冬、百合，一月而安，再以地黄丸继之。

《其慎集》

任贤斗

易才文，病咳逆汗出，体倦神疲，饮食十减其九，前医服清火、化痰、下气及金水六君煎之类，致饮愈甚。饮食全不能进者数日，改服六君子加黄芪、姜、附，十余剂汗止，食颇能进，余症毫不能减，经余诊，见咳逆不已，毫无痰应，口又不渴，又无潮热，而色暗滞，体倦形羸，此肾中精气大伤之候，肾阳不能熏蒸，脾胃失生化之源而亦伤矣，所以气不流利，津液凝结而成干咳病也。先服芪、术、姜、附则脾颇健，食略进，此因久服寒凉，乍进温补，亦久雨逢晴之象，不过取效暂时，若不培补肾中真阳则病必反复，斯时余症不减者即此也。何以见其亏在肾也？又何以知其干咳而非火也？若干咳是火，必口渴身烦，今不渴不烦，体倦神疲，何火之有？若有火者，色必壮赤，今面色沉晦，阳衰显然。无火无痰而咳不已者何也？乃肾中水火俱亏也，水虚则不能滋肺，肺燥则痒，痒则咳不能已；水亏则阳气不达，故体倦色晦，而阴寒元气不能下降，得以上冲射肺而为干咳证也。是脾之虚乃是标，而肾之虚乃是本也，与归、地、枸杞、故纸补肾中之精气，仍如焦姜以理脾，略加北味以收耗散之金，如此水火并补，兼纳其气，诸证应当尽除，果渐服渐效，三十余剂其病大安。

王姓孀妇，年三十，素常体弱脾亏，咳嗽吐痰，常取效者，惟姜附六君子汤，倘久嗽不愈，乃于阴中补阳，用附桂理阴煎即愈，此二方乃常应效之最速者。是年病咳嗽吐痰甚多，日夜约吐三四碗之多，其痰色雪白，前得效之二方俱不能效。经云白血出者死，此是死证耶？然察其脉浮而无力，至数却又平如，食量较常虽减，尚能日进两碗，精神亦颇可，却又似不死之象。病既是不死，何常效之药毫无效耶？再四细察，较常新增头痛一症，其头痛只在额前，额前属于阳明，因湿痰聚于阳明胃腑，中虚不能使之下趋，势必上潮而咳嗽，此亦阴气上射之嗽也，法宜祛湿；痰色雪白者乃冰凝之象，中寒已极也，法宜补阳。然前药俱用于姜、桂、附而毫不效者何也？乃少逐湿之药耳，湿不去故药虽温而无济。此证正合古书云，邪去则补药始得力也。与附子理中汤兼五苓散以逐湿，服二剂头痛咳嗽俱减半，四剂十减其九，此时湿已去矣，只宜补正，以理中汤兼理阴煎并补脾肾，二十余剂而大安。

理阴煎

熟地 当归 干姜 甘草 或加附、桂

《瞻山医案》

北山友松

五旬男，患咳嗽。或饮食，或睡卧，身暖愈嗽，脉滑。

三子养亲汤对二陈汤 去半夏 加生半夏山楂子 香附子
神曲 栝蒌仁

西村氏患痰嗽，脚腿痹弱，腰腹沉重，及秋似伤风状。脉或滑数，或弦数。

除湿清热却痰丸对三妙散。

六旬男，自去冬，初觉伤风吐痰，咳嗽至夜尤甚，头汗如流，脉弦涩。

三拗汤对二母散 加制半夏 阿胶 五味子 款冬花 桑白

皮

伊达氏，五十岁，多年患痰嗽。日则少静，至夜半后，痰甚嗽多。或耳鸣目昏，腹胁冲弦气动，多食则嗽愈甚，大便秘，小便如常或涩。

三子养亲汤 加栝蒌实 海浮石醋制

《北山医案》

缪遵义

久咳嗽移，脓血交作，并非肺痈。此褚氏所谓难名之疾也。病涉少阴而阴火甚炽。以饮食消息之。

猪肤 蛤壳 海参 川贝母 米仁根 梨汁

脉数，咳嗽不止，带血，湿热下注，成漏，便溏泄。所赖胃气尚强耳，壮水清金，固属至要，但不得有碍脾阳，以资生之本在是也。

北沙参 鲜地骨皮 料豆衣 米仁 乌饭子 生哈蚧壳 淡菜 扁豆 梨汁

肾水上泛，连肺液而上出，故一咳而连咳不已。肯立斋云：气虚有痰，用肾气丸补而逐之。其自注云：肾气丸即今之六味也。今仿此意为之。

六味加麦冬 猪内肾 五味 莲须

咳失音。脉右部向内极微而涩。水竭金枯之象。姑变法治之。

炒熟地 麦冬 川贝 败叫子 海参 梨汁 紫菀 蝉衣
加鸡子清一个，囫圇煎。

另方。猪肺一个，煮烂。俟卧后将醒，不可开口说话，取肺及桐城秋石少许，食之即睡。

脉小微数，真阴不足。今既见血，旋复咳嗽，久烁肺金，不能无虑。温燥不可进，姑从金水二脏治之。

炒熟地 麦冬 料豆衣 北沙参 霍石斛 山药 藕
丸方

鳗鲤丸加

獭肝 人中白 熟地 川贝 全鳖 侧柏叶

女贞子 旱莲草 汁蒸晒

用十大功劳六斤，淡菜八两，红枣四两，煎膏丸。

诊脉左涩滞，右弦滑。饮邪为患，肝郁不舒。若以燥药治水，则阴伤；以滋药养肝，则饮滞。皆非策也。议用加减当归四逆，以养肝而利水。

健脾运痰。

蒸于术 霞天曲 酸枣仁 茯神木 半夏 橘红 石决明

辰砂 砂仁 沉香

淡菜胶丸。

《缪氏医案》

陈念祖

高年阳虚。咳嗽经年未愈，痰作黄色，结成顽块，常阻滞胸膈间，尽力始得吐出。此虚阳上冲，煎熬津液，故结为黄浊老痰。今索阅诸方，前医徒用消痰清肺之品，安能奏效？岂知年老孤阳用事，元气多虚，气虚则痰盛，痰盛则气愈闭。若治痰而不兼理其气，非法也。宜补阳调气佐以化痰之剂，庶合方法，用六君加减治之。

人参五分 炒白术三钱 白茯苓二钱 炙黄芪八分 陈皮八分
柴胡五分 炒白芍三钱 川贝母八分

诊得脉左细右虚，咳嗽日久，吸短如喘，肌表微热，形容渐致憔悴。虑成内损怯症，奈胃纳渐见减小，便亦带溏。若投以寒凉滋润之品，恐嗽疾未必能治，而脾胃先受损伤，岂云妥全？昔贤谓上损过脾，下损及胃，均称难治。自述近来背寒忽热，似应先理营卫为主。宗仲师元气受损，甘药调之之例，用建中加减法。

桂枝一钱 白芍药三钱 炙甘草八分 炙黄芪一钱 饴糖二钱
加大枣三枚

同煎服。

咳嗽日久未痊，前医历用补肾滋阴之品，反觉饮食少思，吐痰不已。诊得两关沉细，是脾胃虚寒，土不能生金，其邪留于中脘，因而作嗽。盖脾胃为肺之母，母气既衰，子何以生？今不补母以益金，反泻子以损土，邪虽外散，恐肺气亦难免受耗，况邪尚留于中脘而未散乎？久嗽不愈者，邪留故也。治法不可仅散其邪，必当先补肺气，尤当先补脾胃之土。然土生于火，益其母而子自生，生生之机，化源不绝，自然正可胜邪，不治嗽而嗽自平。此即君子道长，小人道消之理也。质诸高明，以为然否？拟立一方如下：

白术五钱，黄土微炒 白茯苓三钱 麦门冬三钱，不去心 陈皮一钱
人参五分 肉桂五分 紫苏子八分 法半夏一钱 桔梗一钱
紫苑一钱 炙甘草八分
水同煎服。

《南雅堂医案》

大司马潭石吴公，甲戌季春卧病两月。发热嗽咳，痰喘气急，胸膈痞满，手足面目俱浮肿。众惟清金宁嗽，又以脾胃久虚发肿，用利水兼补剂，其病益甚。予诊其脉，左寸浮而无力，左关弦长，推之于外，内见洪大而芤，侵过寸部一分，左尺沉弱无力，右寸沉而带芤，气口脉按之紧而且牢，时或一馀，右关中和无力，右尺隐隐不动。予以为心乃一身之主，肾为性命之源，二脉不病，虽危不妨，唯以右寸并气口诊断之。寸口沉而芤，非痰及血也。书云：弦馀而紧，沉细而牢，六部见之皆为积聚。今气口紧而馀，此积血在肺胃之间，壅滞其气，气滞则血凝，乃积血证也。时值季春，地气上升，因用越法治之，进以畅卫豁痰汤，苏梗四发，桔梗四分，香附五分，连翘三分，前胡六分，抚芎六分，赤芍六分，贝母五分，苍术四分，水煎服。辰时服药，至午未时，气急，小便全无。将暮，吐紫黑血二、三升，臭不可闻，证顿减八、九，六脉豁然，予曰：“半夜时当有汗，可预防之，无令太过。”至期果然。次日，脉平气和，惟咳嗽常有二、三声而已，以枳桔

二陈汤，加香附、归尾、茜根、茅根、童便，调治三日之间，上部之疾痊愈。但脾肾之脉无力，饮食少味，四肢倦怠。再用六味地黄丸，早晚百丸，午以补中益气汤，加麦冬、酒炒黄连，调其中。半月后，气体充实，而诸病悉痊矣。

《陈修园医案》

中神琴溪

一妇人，行年三十余，每咳嗽，辄小便涓滴污下衣裳者。数回医，或为下部虚，或为畜血，万般换术，百数日。先生切按之，其腹微满，心下急，按之则痛，牵两乳及咽，而至咳不禁。与之十枣汤，每夜五分，五六日差。

一妇人，年十八，形色瘦悴，咳嗽唾白沫，气郁郁食不进，所遇多忤其意。医皆治之以劳瘵。先生诊之脉沉微，而如闭，曰：“尝有他患乎？”答曰：“自幼鼻涕常流无歇，其歇后，久觉鼻内之燥，遂发病。”因与之吹鼻散，清涕脓血交出，不日诸症尽退。

有一男子，咳嗽吐臭痰，其中或交脓血，形色瘦白，音声欲出不出。居二年，病势愈进，百方不应。一日烦躁闷乱，痰喘冲咽喉，遂昏昧不省人事。众医环坐，技穷不知所为，乃迓师诊。呼吸纤纤，如断如不断，即令洒冷水于其口，作萝卜汁强饮者一盂。双眼忽开，呼吸徐续，于是浸巾冷水匝缠自颈至胸肋，窥其少有知，而问痛苦，则开口能答，一坐骇且喜。师曰：“此犹不可治，盖羁迟已久，病魔得志，精神遂乏，非药石所及。犹是而施药，医家之所耻也。”辞去。举家悲泣乞治不置，乃投石膏黄连甘草汤，翌日未及晡日而歿。

《生生堂治验》

程文圃

两寸关脉候俱大，左关尤急。据述前冬因情志抑郁，先见此脉，后觉心烦不安。旧春心烦稍定，咳嗽至今不止，舌苔时黄时退。此

肝为受病之源，肾为传病之所。夫肝之伤脾，人所易知，肝之伤肾，人所不识。譬如折花枝安插瓶中，花枝日茂，瓶水日为吸干。肝阳吸引肾阴，此之谓也。且肺为肾母，子虚必盗母气，不特金不制木，而木反得侮金。肝阳上升，冲心为烦，冲肺为咳。脉大不敛，舌见黄胎，要皆阳亢阴亏之所使然。所幸寝食如常，别无兼证。议以滋肾生肝，保金化液，辛温刚愎，似非所宜。

复诊脉急依然，连日嗽甚于前，夜卧欠安，头额手心俱热，是属挟有风湿外因。若云阴虚之热，当发于日晡，不应发在午前，且其来也渐，何骤若此？质虚恙久，固不能正从标治，然亦未可过补。仿汪广期前辈风湿汤方法。

晋翁乃媳，秋间咳嗽，不以为意，交冬渐甚，午后寒热。医云外感，服药不效，遂致形倦肌瘦，食少便溏。予视其行动气促，诊脉弦劲无胃，询其经期，三月未至。私胃恶翁曰：“此殆证也，危期速矣。”翁惊曰：“是病不过咳嗽寒热，何以至此。”予曰：“经云：二阳之病发心脾，有不得隐曲，女子不月，传为风消息贲者，死不治。矧脉弦劲无胃，乃真脏也。经又云：形瘦脉大，胸中多气者死。脉证如此，何以得生。辞不举方，逾旬而歿。

嘉庆甲子初秋，牧兄邀视伊母恙。云：“家慈年逾五旬，外腴内亏，病经八日，上热下冷，痰多汗少，咳嗽作呕。昔患淋痛，兹亦带发。医为散风清暑，治俱不应，又以为肝火，拟用龙胆泻肝汤。”求为决之。予曰：“淋证为本，感证为标，从本从标，当观病之缓急，未可臆断也。”比往诊视，脉细而青，身热足冷。时正酷热，病人犹盖毡被，舌苔白滑，胸腹胀闷，不渴不饥。谓牧兄曰：“尊堂之病，乃寒湿内伏，加感外邪，治宜温中逐邪，淋痛无暇兼顾。”方用苍白二陈汤，加姜附、白蔻以温中燥湿，桂枝、秦艽以彻其表。牧兄问：“服药以何为验？何期可愈？”予曰：“伤寒以舌为凭，舌苔退净，病邪自清，计非二候不可。”初服舌苔稍退，再剂已退其半，服至四剂，寒热全解，舌苔退净，淋痛亦止。惟腹闷食少，大便未行。次日忽便泻数次，金以

伤寒漏底为虑。予曰：“无妨。仲圣云：胃家实，秽腐当去也。”方易六君子汤加谷芽、苡仁、泽泻、神曲健脾渗湿。三日内共泻二十余行，始得胸宽食进。越日忽又发热，诊脉浮大。予曰：“此复感也。”牧兄曰：“病人日来，俱卧帐中，邪何由入？”予曰：“想因日前便泻，夜间下床，恙久体虚，易于感耳。”仍用六君子汤，加姜附秦艽，一服即平。

《杏轩医案》

李炳

江氏女病咳，羸瘠，两目畏日。医以地黄治之。翁曰：服地黄必厥。果厥，乃以甘草生、炙各半治之。八日愈。

病得之阴虚极，极虚者不可以重补。以炙草益阳以生阴，以生草缓阳以强阴也。

翁壮年，尝以岁暮避人于吴。有病咳者，吴医张亮葵治之，不应。翁诊曰：此可为也。治以川椒。明日咳止。

张使人问之。翁曰：寐则咳，醒则已。盖寐则肺气藏于肾，肾寒使之咳耳。通其阳，故愈。

《李翁医记》

齐秉慧

曾治周嘉兴每夏至患咳嗽，服降火化痰之药而益甚。诊之脾肺肾三部，脉皆浮而洪，按之微细，予曰：“此脾土虚不能生肺金，肺金不能生肾水，而虚火上炎也。”朝用补中益气汤，加麦冬。夕用八仙长寿丸而愈。

曾治一儒者，夏月唾痰，用清火药不应。予曰：“此火乘肺金。”用前麦门冬汤而愈。后因劳复嗽，遂与补中益气汤，加桔梗、黄芩、麦冬而愈。但体倦口干，小便赤涩，日服生脉散。多服八仙长寿丸，其后遂不复发。

又治一儒者，咳嗽壮热，自汗，口干便赤，予诊其脉虚而洪，先与白虎汤，以彻其热，热退遂用补中益气汤，加山梔、麦冬、五味煎服数剂。兼服八仙长寿丸而愈。

《齐有堂医案》

何世仁

内热咳呛，举动头晕，中虚气不归根，恐成劳怯。

西党参 麦冬 川贝 首乌 蛤壳 北沙参 丹皮 淮牛膝
橘红 加冬桑叶 红枣

复诊，据服药后诸病皆安，惟朝暮多汗。

前方去丹皮、川贝、蛤壳、桑叶、红枣，加炙黄芪、茯神、枣仁、大麦芽。

《清代名医何元长医案》

黄凯钧

倪氏，四六，咳呛有年，每到春时发作，入夏渐愈。今已小暑，其病反增，内热口苦，呕痰多汗，声喘背痛，两脉虚数微弦，此久嗽肺伤，必夺母气，治法宜补胃清金。

党参 白术 茯苓 半夏 橘红 杏仁 连翘 北沙参 炙草 茅草根

又四帖，病减其半，前方去连翘，再服四剂，照方制丸料，用茅根与大枣、葱汤泛丸，可冀来春不发。

僧，五八，倏寒倏热，咳呛气急冷汗，前医误作虚治，投人参、熟地，反见神昏谵语。时有客僧见源师，知余医理明确，放舟相邀，才按六部，即欲予决生死，切其脉浮弦，此风邪客肺，气不得泄，以致气急冷汗，自述初起吐泻发渴，小便短涩，自宜分利，如何遽补？若证候果虚，参、地何反添病邪？宜用轻剂，疏通肺气。

杏仁 香豉 薄荷 前胡 连翘 山梔 橘红 通草

两服而愈。

戴，二七，肌热盗汗咳呛，加味泻白散。

桑皮 地骨皮 甘草 杏仁 前胡 连翘 橘红 通草
三服愈。

钟，四八，老劳咳嗽多痰，不能倒卧，侧右尤觉气逆不安；此由水亏火升，胃虚不降，投都气丸加青铅，气急略减；自述气不上逆，可以伏枕安卧足矣，彻夜转侧，已经一月；人藉安息以养营血，其病至此，实属难当。即思一方，以左司升，右司降，是属东方肝木，西方肺金所主，乞逆不降，责在肺不清肃，秋令不行。

苡仁二钱 茯神二钱 通草六分 橘皮六分，秋石水炒
粉草二钱，以上五味色白行降令兼和肺气 钩藤三钱 菊花炭和肝阳，缓气上逆

立方在命意好，不在药之轻重，一服即效，病者喜出过望，酬予重值古玩，因彼家贫不受。回言尊恙非旦晚可愈，可售价病中调理，后因酒色不戒，仍归不起。

王，二卜，身热干咳，夜不思寐，自汗淋漓，两脉虚数无绪，一息八九至；当此病后，脉惟细数，是假实，确系营卫大虚，守护失宜，浪用疏肺，能免重虚之戒乎？

党参二钱 生地四钱 归身一钱五分 萸肉一钱五分 黄芪二钱
枣仁一钱五分 茯神一钱五分 白芍一钱五分 炙草四分 龙眼肉二钱
淮麦一钱五分

两服汗止热退嗽减，加五味子十粒，麦冬二钱，去白芍、萸肉、小麦、龙眼。十服痊愈。

万，三七，脉软咳嗽，法当补土。

党参 於术 黄芪 归身 橘红 茯苓 扁豆 苡仁 炙草
四服如失。

姚氏，二四，旧冬起咳嗽，延至二月复吐红痰而臭，脉来细数异常，自汗。屡次更医，皆谓阴虚，投四物六味之类；后一医以为肺痈，今往专科诊治。病家有亲，知予能治难病，相邀诊治，观其脉症，若

为阴虚必燥，焉得有汗，内痛胁上必痛，脉必洪大，今皆无有，以予观之，属肺受外邪，此脏最娇，久嗽必伤其膜，红痰因此而出，更土生金，子夺母气，臭痰属脾虚。试观世间腥秽浊物，土？一宿，其气立解，治法必须从标及本，先用疏散肺邪。

杏仁 薄荷 防风 橘红 桔梗 桑皮 连翘 甘草

两服咳嗽大减，改用培土生金法，稍佐利肺，六君子加苡仁，扁豆、山药、杏仁、前胡，四服痰少而腥气无矣，嗽痊愈。原方去后五品，加麦冬、归、地，调补复元。

赵，二十，夜热盗汗，咳嗽红痰，脉弦而数，证属劳怯，自宜保护，兼助药物，以冀延龄。

北沙参 麦冬 茯神 苡仁 牛膝 白芍 桑叶 钩藤 茅根

前投清金和肝之法，夜热盗汗愈。今但治其咳嗽。究其源，因劳而得，宜益土生金法，而培化源之意。

党参 蒸於术 茯苓 半夏 五味子 麦冬 苡仁 橘皮 炙草 茅根

古称嗽证用异功散收功者，可不复发，所谓补土以生金也。

吴，二一，前投解肌，汗出热退，咳血仍然，究其病因，深受寒邪，肺气不舒，致血妄行。姑再疏利元府，以解里逆。

杏仁 前胡 苏叶 防风 橘皮 石膏 甘草

此方代青龙汤，两服嗽缓，吐红止胸宽，食进，已得生机。

曹，五五，形寒咳嗽吐红，两脉弦软，是为劳倦伤脾，积寒伤肺，治当温补手足太阴肺脾，略佐疏理客邪。

党参 蒸於术 茯苓 橘皮 前胡 归身 苡仁 桂枝木 紫苏 炙草 煨姜 大枣

两帖血止嗽减。

蔡，三四，胸胀喘促，咳嗽吐红，脉大而数。古称脉大为劳，数为虚，证由劳伤脾元，土不生金，肺失清降，治当滋其化源。

党参二钱 黄芪三钱 生於术一钱五分 当归一钱五分，炒黑
橘皮一钱 麦冬二钱 苡仁二钱 五味子十粒 炙草四分

此方余出臆见，名培源益肺汤，治劳倦吐血有神功。

陈，三四，咳嗽吐血，或稠或稀，时觉左腹气升，卧着尤甚，形淡畏风，脉软微数。前医先用杏仁、薄荷，疏降肺气，其咳更频；或以燥火刑金，投洋参、麦冬之类，并纳大减，逆予诊治。此土虚不能生金，金虚不能制木，致肝气上逆，胃脘木侮，传导之失宜，饮食不化精微，而成痰涎，一派浊气薰蒸，凝行上腾。肺为华盖，焉得不为之病乎？所以疏散则愈耗其金，凉润则虚其母，治法必滋化源，平其所胜，方可奏效。

党参三钱，本应用人参，因价极贵姑用以代之 於术二钱 茯苓一钱五分
炙草四分 橘皮一钱 半夏一钱五分 牛膝一钱五分 通草七分
丹皮一钱五分 桑叶一钱

十帖病去大半，继进人参生脉散三服，仍用前方，去桑、丹，加肉桂、黄芪、苡仁而痊愈。按：此证治之不当，必致肌肉日削，痰涎日多，不消数月，危境立至，所以详论病情，俾业斯道者，得其涯涘焉。

唐，四八，发热咳嗽多汗，脉弦细。《经》云：形寒饮冷则伤肺。肺虚则脾气亦弱，诸症从此而生。治当调摄营卫，若作外感而投表散，失其本矣。

党参二钱 黄芪二钱，炒 归身一钱五分 於术一钱五分
茯苓一钱五分 半夏一钱一分 橘红一钱 白芍一钱五分 苡仁二钱，炒
苏子一钱五分，炒，研 炙草三分 老姜二片 大枣三个

又，前方只服三剂，热止嗽减汗无，此培植中气，肺疾亦痊。所谓虚补其母之法。

毛，五一，咳嗽八阅月，从前吐红，近日吐痰，消瘦失音，夜热脉数，积劳成损。

炒熟地 党参 归身 半夏 怀山药 橘皮 伏神 苡仁
丹皮

六服其病如失。

《肘后偶钞》

王九峰

久咳声哑，每咳痰涎盈碗，食减神羸，苔白厚，脉双弦。中虚积饮，土败金伤，水湿浸淫，渍之于肺，传之于脾，汪之于肾，三焦不治，殊属不宜。

真武汤。

复诊：连服真武，虽效亦非常法，第三焦不治，肺肾俱伤。当宗经旨，治病必求其本。从乎中治。崇土既能抑木，亦可生金，脾为生化之源，辅脾即能补肾。爰以归脾六君加减，徐徐调治。

归脾六君汤。

实火宜泻，虚火宜补，风火宜清宜散，郁火宜开宜发，格阳之火宜衰之以属，所谓同气相求也。水亏于下，火越于上。厥阴绕咽，少阴循喉，久咳音哑喉痛，口干不欲饮冷，脉豁，按之不鼓，格阳形证已著，清火清热，取一时之快，药入则减，药过依然，所谓扬汤止沸，终归不济，导龙入海，引火归源，前哲良谋无效者，鄙见浅陋也。小徒暂清肺气之法，尚属平稳可服，再拟金匱肾气，竭其所思，未知当否，多酌明哲。

金匱肾气丸。

脉滑而数，风伤肺，痰郁肺胃，夏令脉洪数。前月初诊，脉沉滑而数。沉者阴也，滑者阳也，痰也，数者火也。邪伏化热生痰，所以用苏杏甘桔开提，萎夏理肺胃。不治咳嗽而咳嗽自解，不治痰而痰自出。用萝卜汁以调肺，展其气化，清肃渐行，咳嗽稍缓矣。

苏梗 桔梗 杏仁 甘草 牛蒡 前胡 梨汁

言乃心之声，赖肺金以宣扬。肺如悬钟，配胸中为五脏之华盖，空则鸣，实则咳，破则哑。肺为仰脏，出而不纳，二十四节按二十四气，最娇之脏，不耐邪侵毫毛必咳。肺主气，为水之上源，受邪入络，

必顺归肾，为痿为咳为哑。凡如此者人不知，总之曰为癆证。六淫之邪不去，皆可成癆病，延今载余，声音不出，金已破矣。病者不知，医须揣其情本以木火通明，《经》以营出中焦，资生于胃，下益肾水，来济五火，火不灼金，金不泄气，燥不耗水为妙。今日喉痛已止，咳减痰少，喉声稍开，从原方加减候酌。

孩儿参 粉甘草 山药 马兜铃 牛蒡元米炒 茯苓 桔梗
苏梗 沙参 杏仁 猪肤 花粉 鸡子精 瓜子壳 霉干菜。

复诊：病原已载前方，叠次声明，不须再赘。金水难调之候，全在静养功夫。天命为重，非人力所为。叨属亲谊，敢不尽言。病由外感内伤，必由中而外达。郁久不达，非升麻不可，病将一载，声音不出，邪不出也，拟用补中益气加减候酌。

补中益气汤去芪加山药，陈干菜服三剂加儿参又服三剂加参须。

《王九峰医案》

顾金寿

汪，新阳，三十岁。右脉颇平，左手关尺稍见弦象。立春以后，吐血旧疾虽未举发，仍不可不加意防闲，预用安根之法。

大熟地五钱，炒松 川石斛三钱 沙苑子一钱五分 怀山药一钱五分
茯神三钱 北沙参三钱，米炒 当归须一钱，米炒 桑叶一钱，米炒
炙甘草五分

又。古人治虚怯、咳嗽等症，皆胃药收功。今春分节气，虽未见红，而夜间咳呛颇甚，胃不健纳，面色无华，肌瘦神倦，皆胃无液养之故，且脉见左强右弱，法以养胃和肝为法。

白扁豆二钱，去皮 生南楂一钱 白蒺藜二钱，炒去刺 北沙参三钱
大麦冬一钱五分，米炒 茯神三钱 鲜藿斛二钱 炒薏米三钱
南枣二钱 生谷芽一两 煎汤代水。

又。照方去鲜藿斛，加上党参三钱，蒸冬术一钱。

又。左脉颇佳，足臻静养，右脉少力。胃气不足，食虽强进，终欠香甜，土不生金，故咳呛虽减，而不能止，正须补土生金。当可更入佳境也。

人参五分，另煎 麦冬一钱五分 蒸冬术一钱 茯苓三钱
炙甘草五分 陈皮白一钱 川石斛三钱 白扁豆一钱五分
白蒺藜二钱 南枣二枚

又。照方加薏米三钱，炒 白花百合二钱

丸方，失载。

问劳嗽一证，收功极难，此人服药，未及一年，便能奏效。岂世之治劳嗽者，不足法欤？曰：吐血初起，总以散血为主。缪仲醇三法最佳，缘治者急于职效，过用苦降，两伤肺胃，血虽止而劳嗽已成。此时惟有补土生金一法，或可挽回，但脾喜燥，而胃喜清，其间必细心斟酌，方无貽误也，慎之，慎之。

毕。脉象细数，左关稍弦，阴虚阳越之证。失血后，燥剂助火，咳呛黄痰极多，入夜更甚，溲赤而短，内热未清，法宜育阴清上为治。

原生地三钱 细木通一钱 炒黑牛膝六分 北沙参三钱
麦冬肉一钱五分 炒归须一钱五分 瓜蒌皮一钱五分 怀山药一钱五分
炙甘草五分 米炒桑叶一钱

又。照前方去木通加白花百合三钱，瓦上焙 蜜拌款冬花一钱
茯神三钱

又。脉见浮数，按之无力，阴分虚而内热不清，故夜卧则气冲而上，咳痰浓黄，小溲赤短，宜清脾阴虚热，佐以镇纳为治。

怀山药三钱 粉丹皮一钱 茯神三钱 大熟地四钱，砂仁炒
炙龟板三钱 牛膝一钱五分 炒丹参二钱 川贝母一钱，米炒
生甘草五分 沉香三分，磨汁冲

又。脉象浮数稍减，镇纳已有小效，但肢战气逆，胃肠受伤。昔贤评血后以胃药收功，遵而行之。

北沙参三钱 怀山药三钱 稻豆皮一钱 白扁豆一钱五分
熟地炭五钱 赤苓一钱 川石斛三钱 炙龟板三钱 炒牛膝一钱
橘白一钱 北五味二十粒、蒸 生甘草五分 轻铅三钱

又。脉象颇平，但嫌少力，正合病后之脉，气虚行动则喘，小便
究不能清，此属余热伤气，不能归原之故，煎剂不利于胃，未可久
服，宜用丸药缓调，久服自愈，不可心焦，反生虚火，切切。每日空
心，淡盐开水送。

八仙长寿丸三钱，渐加至五钱，忌一切飞升助火等物。

问此症与新阳汪氏相同，彼则补土生金，此则育阴清上，治法
又似不同，何也？曰：汪因苦寒伤胃，故补土生金，此人以燥剂劫阴，
故育阴养胃，其实皆胃药收功也。

张妇。两关虚数而弦，肝胃两伤，虚火上蒸肺部，干呛恶心，气
促头眩，舌干而燥。此由水不制火，金不制木，营虚液少之故，若再
以苦寒伤胃，势必成瘵而后已，先用金水两调之法。

北沙参三钱 麦冬肉二钱 当归须一钱五分、米炒 甜杏仁二钱
原生地三钱 茯苓三钱 橘络一钱，蜜拌 鲜藿斛二钱 建兰叶二片

又。用金水两调法，脉象少平，气促头眩已解，惟干呛火升，痰
不易出，带下颇多，再用清滋端本一法。

肥玉竹三钱，米炒 北沙参三钱，米炒 瓜蒌皮一钱五分
川贝母一钱五分 原生地五钱，酒洗 钗石斛三钱 麦冬肉一钱五分
当归须一钱五分 炙甘草五分 煅牡蛎三钱 白螺蛳壳二钱
建兰叶二片

又。脉象渐平，俱嫌少力，咳呛头眩，胸闷脘痛，皆上焦虚火易
升，少腹有块，冰冷指尖，有时而清，赤白带下，皆下焦寒凝结。今用
引火下行一法，可以两顾。

大熟地七钱，姜汁炒 归身二钱，小茴香炒 大白芍一钱五分，桂酒炒
制半夏一钱五分，蜜水炒 陈皮一钱，盐水炒 茯神三钱 北沙参三钱，米炒
麦冬肉一钱五分，米炒 炙甘草五分 白螺蛳壳二钱，煅 炙龟板三钱

橘叶十片

丸方：上西党参四两 灸黄芪二钱 蒸冬术一两五钱
茯神四两，朱拌 远志一两，甘草水浸 酸枣仁一钱五分，炒
大白芍一两二钱，酒炒 归身一两五钱，土炒 炙甘草八钱 煨木香五钱
大熟地四两，砂仁炒 炙龟板三两

上药治末，先用真桂圆肉四两 麦冬肉一两 川石斛六两
金针菜一斤 合欢皮八两，熬浓汁，代蜜为丸，如桐子大，每空心，开水送四钱。

问此症似与梵门桥张妇相仿，何又不用养营交泰法，曰：梵门桥张妇，血虚气无所附，肝胃之不和，实由心脾两亏而起，此妇肝胃两伤，虚火炎金，干呕恶心，头眩脉促舌燥，渐有劳怯之状，气分急，而血分可缓，故始终用以金水两调，少佐清滋而俞，去桂不用者，恶其燥也，审机发药，取其中病而止，不可拘执古人陈法。

《吴门治验录》

张千里

新市郑，咳复作，痰少不厚，时有肝气左升，腹痛得呕泄始平，脉体本弦长，今弦兼滑，长兼洪，左尤甚，饮咳本宜甘温以和之，所谓饮家咳不治咳也，今既肺降不及，肝升有余，甚至痰滞凝血，宜从湿痰挟火之例也。

法半夏一钱五分 旋复花包，一钱五分 蛤壳三钱 竹茹七分
陈皮一钱五分 代赭石二钱 小川连三分 桑叶两张 茯苓二钱
海石粉二钱 炙草五分

又。咳势较缓，痰之厚者仍少，脉弦左仍带滑，不过洪滑较减耳，舌苔白里半犹黄腻，饮咳既久挟湿，又兼肝气，当先为清肝化湿，以衰其助，时届湿土，亦因时制宜之法。

法半夏一钱五分 陈皮一钱五分 蛤壳三钱 海石粉二钱
生冬术一钱五分 茯苓二钱 丹皮一钱五分 小川连三分 白蒺藜二钱

茵陈草一钱五分 桑叶两片 竹茹一钱

又。咳逆夜甚，晨则痰饮较多，近加喉糜，音欠亮，脉右较平，左仍弦滑，寸部尤甚，痰饮既未和，肺气失清，又挟时令之热，而为喉糜，人迎脉盛，必有外感，非必心阳上亢也，宜参金水化痰法。

元参一钱五分 马兜铃一钱五分 甘草四分 桑叶一钱五分
紫菀一钱五分 牛蒡子二钱 天竺黄二钱 竹茹七分 杏仁二钱
川贝母去心，二钱 丹皮一钱五分

石门吴，烦劳阳虚之体，加之嗜酒积湿，湿浊酿痰，故素有善咳，脚气等症。今因新寒外袭，宿饮内动，初起恶寒，鼻塞流涕，喘咳不得卧，痰虽来而气仍逆上，痰气壅于中，湿热脚气动于下，加之阳素虚而血又动，安内攘外，何恃毋恐，姑拟定喘化痰，顺气和络法。

潞党参二钱 驴皮胶一钱五分，分二次入 冬瓜子三钱 川贝母二钱
芦根五钱 橘皮一钱五分 旋复花包，一钱五分 炙甘草四分
丝瓜络三钱 云苓二钱 海石粉二钱 薏苡仁三钱 杏仁二钱

又。诸恙皆退，胃纳已增，脉象静小，舌色润泽，惟寐后干咳，得汤饮即痰出而嗽已，卧时又须倚枕，足见风燥之火易劫津气，甘凉濡润以益气存津，自是此证要旨，拟以前法中再参濡肺胃法。

潞党参二钱 驴皮胶二钱 麦门冬一钱五分 炙甘草四分
橘皮一钱五分 川贝母二钱 鲜生地三钱 榧子肉冰糖拌炒，七粒
茯苓二钱 杏仁二钱 金石斛二钱

杭州许，咳逆已久，的是肺分痰热未清，加以秋阳酷烈，肺气复伤，身热，舌干绛，苔厚黄，形瘦，脉弦，明属湿郁生热，热蒸成痰，既在肺家，只宜清化，表不合理，补亦壅邪也。

西洋参一钱五分 橘红一钱五分 连翘二钱 桑皮一钱五分
甜杏仁二钱 川贝母二钱 丹皮一钱五分 金石斛三钱 甘草四分
枇杷叶两片 桑叶一钱五分

因鼻衄，去桑叶，加犀角尖八分。

又。胃知味而渐思食，食后亦和，脉小弦，大便未畅，小便又浑，

自是湿热未曾净尽之证，非阳虚之体，补壅非宜，而湿热之邪又粘腻难化，静养缓调，自可渐臻安善，欲速反有弊也。

西洋参一钱五分 橘红一钱五分 炒谷芽三钱 霜桑叶一钱五分
甜杏仁二钱 茯苓二钱 粉丹皮一钱五分 荷叶一角 金石斛三钱
泽泻一钱五分 秫术二钱

此方服至便溏畅行，洩清热尽，始换后方。

又。养胃存津，清心补肺，是此证善后之大法。

西洋参一钱五分 茯苓二钱 白芍一钱五分 甘草四分
陈皮一钱五分 麦冬一钱五分 怀山药一钱 莲子十粒 金石斛三钱
枣仁三钱 稻豆衣三钱 南枣两枚

此方服至胃纳复旧之后，但有精神疲乏，可去洋参、茯苓、稻豆衣，加大生地三钱，服后妥适，可再加阿胶二钱。

又。仲秋伏气发病，迄今三月余，犹然身热畏风，胃钝，舌刺苔黄，口燥，脉弦，溺黄，便溏不爽，总属湿酿为痰，痰气与肝气相搏，阻遏于胆胃之间，所以左膺结肿，按之觉有酸痛也。积久不清，竟成痈，宜清肝胆，化湿痰、理气络法。

西洋参一钱五分 陈皮一钱五分 茵陈草一钱五分 泽泻一钱五分
炒山栀一钱五分 茯苓二钱 川贝母三钱 桑叶一钱五分
小川连四分 蛤壳三钱 白蒺藜二钱

又。细参脉症，不但肝胆火升，痰气上阻，且有秋燥之邪，乘虚而入，燥火劫金，痰气胶结愈甚，所以无形之病渐致有形左膺之肿，病异源同，前方五剂后，即以此方濡润通和。

西洋参一钱五分 驴皮胶二钱 郁金一钱五分 炙甘草四分
甜杏仁二钱 小生地三钱 白芍一钱五分 莲子十粒 川贝母二钱
白蒺藜二钱 丹皮一钱五分

《千里医案》

吴簾

大司冠韩桂舫有少妾咳嗽不已，气促痰喘，体瘦食减，泄泻畏寒，先服清火滋阴，继用补中收敛之剂，俱不见效。余曰：脉迟细弱，皆由金寒水冷，元阳下亏，生气不布，以致脾困于中，肺困于上而成此证。按此皆不必治咳。即用六味回阳饮加五味子，但补其阳，服数帖甚效。后以劫劳散，人参养荣汤，不两月而诸症悉愈。

端揆章桐门，脉浮滑大，此风寒邪气客于肺中，故咳嗽声嘎，痰壅上逆也。即服六安煎加前胡、桔梗、苏叶、当归以辛温散邪。越日，咳减痰少，声音如常。惟右寸数滑，乃邪气郁而为热，易用泻白散加黄芩、茯苓、山栀、麦冬而安。

相国董蔗林，述右鼻窍窒塞，不闻香臭，鼻孔山根燥痒，咽干咳嗽，目涩便燥。余曰：两寸虚数，皆由思虑耗伤心血，肺中津液不足。年老血衰，心火乘肺，则肺腕燥涩而干咳也。盖鼻为肺窍。又曰：天牝乃宗气之道，而实心肺之门户。按《内经》曰：心肺有病，而鼻为之不利。又云：肺气通于鼻，肺和则鼻能知香臭矣。当进泻白散加桔梗、知母、麦冬、茯苓、枇杷叶以清心肺虚热。遂服五剂，鼻窍稍通，燥痒痰嗽亦减。以原方去桔梗、知母、梗米，加熟地、当归、贝母，叠服十帖，病退过半。嗣加阿胶、沙参、苡仁、杏仁、石斛、人乳，梨汁，共熬成膏，每日开水点服。未及三月，凡目鼻虚火及燥结咳嗽悉瘳矣。

《临证医案笔记》

何书田

太阴冒寒，未经透泄，咳呛鼻塞，脉形弦紧，治宜疏泄。

青防风 炒苏子 生桑皮 川石斛 广橘白 光杏仁 象贝母 款冬花 生甘草 生苡仁

体怯冬温，燥火铄金，为咳也；右脉弦大。只宜清润肺金。然须

静养勿烦为嘱，否则恐其动血。

桑白皮 甜杏仁 川贝母 天花粉 广橘白 地骨皮 款冬花 生蛤壳 川石斛 枇杷叶

接方 西洋参 甜杏仁 川贝母 地骨皮 天花粉 冬桑叶 款冬花 肥知母 川石斛 甘蔗汁

向有哮喘，兼之好饮，积湿肺脾，两经俱已受病，自前月以来，感冒咳嗽，时寒时热，舌苔白厚。现寒热已止，舌白渐退，小便通，而大便艰难，咳痰粘腻，彻夜不能安卧，能食而不能运化。按脉左寸弦细，而右寸独见浮大，此肺家余热未退，郁而蒸痰；痰多则津无所生，而便时艰涩矣。年近七旬，操烦素重，肺金之液又为君火所铄，娇脏未由沾润，能无口渴思饮而下窍闭结乎？鄙意从手太阴及手足阳明两腑清养而滋润之，方可冀其下达而上平耳。肺有余热，以清润之品制其所胜，然后用人参以益气生津，乃为要策。

炙桑皮 麦门冬 甜杏仁 金石斛 橘白 花粉 肥知母 川贝母 款冬花 枇杷露 苡仁 梨肉

复方：据述咳嗽稍减，胃气亦开，入夜亦能安睡，惟口干，小便短数，大便艰难，时有欲解不解之象。仍宗前方加减。

人参条 麦冬肉 肥知母 桑白皮 金石斛 西洋参 生石膏 陈阿胶 甜杏仁 枇杷露

积劳内伤，感冒咳喘，脉虚数无力，表补两难之候。姑拟玉屏风参降气法。

生绵耆 旋复花 橘白 光杏仁 川贝母 橘白 青防风 炒苏子 桑白皮 川石斛 白前

咳呛间作，逢冬而发，现虽渐安，而咳终未除。按脉右和平而左软弱，此金水两脏失养也。当用滋补。

西党参 麦冬肉 甜杏仁 白茯苓 生蛤壳 大熟地 肥玉竹 川石斛 广橘白 枇杷露

复诊：胃气不减，而咳呛依然，喉干咽燥，肺家余热未清也。终

恐失血，以清燥救肺法主治。

西洋参 甜杏仁 地骨皮 天花粉 麦冬 橘白 陈阿胶
川贝母 冬桑叶 生石膏 知母

劳伤咳呛，肺病不浅。防失血成怯。

炙紫菀 桑白皮 甜杏霜 川石斛 橘白 款冬花 炒苏子
川贝母 炒怀膝

肺家伏热，久咳不止。防其失血成怯，慎之。

西洋参 地骨皮 川贝母 天花粉 橘白 桑白皮 光杏仁
肥知母 生蛤壳

喘咳根深，金水两有不足，当用滋补之剂。

西党参 枸杞子 麦冬肉 炒苏子 云苓 橘白 炒熟地
甜杏仁 五味子 法半夏 炙草

先患血崩，渐致阴亏发热，咳呛多痰，气不平而举动汗溢；脉形弦细而数。此从悲伤悵郁所积，不易治也。

西洋参 炒阿胶 麦冬肉 川石斛 橘白 炙龟板 川贝母
甜杏仁 枇杷叶 丹皮

复诊：用清肺养阴之法，咳呛略稀，饮食如常。但素体虚弱，脉细而数，终不离乎怯证之门。诸宜静养珍摄，药饵之功，只居其半耳。

炒阿胶 北沙参 麦冬肉 肥知母 广橘白 西洋参 甜杏仁
川贝母 地骨皮 枇杷叶

劳嗽已久，肺金大伤。现交盛暑，喘愈甚，脉沉微而数，神倦腰楚。金、水两亏矣，难愈也。

西党参 炒阿胶 麦冬肉 地骨 川贝 枇杷叶 西洋参
甜杏仁 款冬花 知母 牛膝

烦劳过度，君火内炎，周体发热，纳食无味。略有咳呛，延久即是本元之候，暑天务须静养。

生鳖甲 香青蒿 牡丹皮 川石斛 生苡仁 石决明 地骨

皮 肥知母 天花粉 橘白

复诊：骨热未除，咳痰转甚，形瘦削而脉数，近乎本元之候矣。

西洋参 甜杏仁 川贝母 天花粉 橘白 地骨皮 款冬花
川石斛 冬桑叶

年高，久嗽气虚，舌苔白裂，脉软胃困。此真津枯耗也，舍补无策。

西党参 麦冬肉 甜杏仁 金石斛 橘白 炒萸肉 淡天冬
款冬花 白茯苓

劳伤咳呛，畏冷多汗，脉弱无神。省力培养为要。

炙西青 麦冬肉 川贝母 白茯苓 橘白 冬桑叶 款冬花
金石斛 生甘草

木火蒸痰，滞于喉际而为咳。治宜清化。

羚羊片 施复花 甜杏仁 冬桑叶 广橘白 石决明 瓜蒌
皮 川贝母 海浮石 白茅根

木火刑金，咳呛不止，甚则呕恶，治以清润肝肺为主。

羚羊角 冬桑叶 麦冬肉 肥知母 广橘白 石决明 牡丹
皮 白杏仁 川石斛 枇杷叶

体素虚弱，骨热郁蒸，以致多痰咳嗽，甚则欲呕，气象咽痒。腹旁结痞有形，六脉虚软而数。此肝肺同病之象，延久必成怯证，不易平复也。

西洋参 甜杏仁 川贝母 冬桑叶 丹皮 陈阿胶 款冬花
地骨皮 石决明 橘白

劳嗽多痰，缘烟酒铄肺所致，岂易奏效耶！

旋复花 光杏仁 炙桑皮 金石斛 花粉 橘白 炒苏子
法半夏 瓜蒌皮 款冬花 竹茹

复诊：素嗜烟酒，以致辛辣伤肺，咳久音闪，痰声上壅，殊非浅恙，炎夏防失音嗑痛。

炒阿胶 光杏仁 马兜铃 天花粉 橘白 紫菀茸 炙桑皮

川贝母 海浮石 白前

产后阴虚，咳嗽，骨蒸，便溏，纳食作胀，脾肺两损，难愈矣。

香青蒿 款冬花 川石斛 冬桑叶 橘白 地骨皮 川贝母
川郁金 炒苡仁 红枣

久患咳呛，音闪不清，大便溏薄，土不生金之候，且脉形细软无力，已成劳怯矣。

炒阿胶 北沙参 川贝母 淮山药 广橘白 西党参 款冬花
生蛤粉 白茯苓 红皮枣

童体努力受伤，久咳不已，肋楚痰腻；六脉细数，近怯之候也。

金沸草 地骨皮 甜杏仁 款冬花 广橘白 冬桑叶 牡丹皮
川贝母 炒怀膝 枇杷叶

复诊：劳伤成怯之候，诸宜节力静摄是要。

生西耆 香青蒿 川贝母 花粉 川石斛 西洋参 地骨皮
生蛤粉 橘白 霜桑叶

丸方

西洋参 原生地 桑白皮 麦冬 花粉 橘白 西党参 炙
鳖甲 地骨皮 丹皮 知母 茯苓 红枣肉六两打和为丸

劳伤咳嗽，痰腻如胶；脉沉微而气喘急，肺阴大伤。当此盛暑，防其喘脱。

西洋参 桑白皮 甜杏仁 炒知母 广橘白 麦冬肉 地骨皮
川贝母 天花粉 枇杷叶

阴虚骨热，咳痰已及年余。肺津大伤，声音不亮；脉形虚数。已近怯疾，不易愈也。

西洋参 甜杏仁 肥玉竹 川石斛 广橘白 北沙参 川贝母
天花粉 生蛤壳 枇杷叶

水亏火旺，不时上炎，面赤耳鸣，时欲咳呛；脉细数而两尺大。真阴不足以制虚阳也。盛暑宜加意调养，否则防失血。

西洋参 北沙参 肥知母 蛤粉 枇杷叶 川斛 灸龟板

麦冬肉 天花粉 橘白 人中白

阴虚,火无所制,频咳不止,夏令火炎,防其加剧。

制洋参 北沙参 甜杏仁 人中白 花粉 知母 细生地
麦冬肉 生蛤壳 牡丹皮 川斛

积劳内伤,咳久不止,当用金、水两培之法。

炒熟地 麦冬肉 款冬花 煨牡蛎 茯苓 橘白 西党参
甜杏仁 炒怀膝 川石斛 胡桃肉

水不足而火上炎,积久即是喉痹之患,其可虞也。

炒阿胶 北沙参 麦冬肉 炒知母 盆秋石 制洋参 甜杏
仁 川石斛 天花粉 白茅根

久咳伤肺,金不生水;脉数促而音不清,将有喉痹之虞。

西洋参 麦冬肉 款冬花 天花粉 金石斛 北沙参 甜杏
仁 冬桑叶 生苡仁 橘白

肺络内伤,咳痰秽气。防失血肺痿。

马兜铃 紫苑 川贝 川石斛 橘红 真阿胶 桑皮 杏仁
天花粉

复诊:此肺劳之根。再用清养娇脏,以冀音亮为幸。

西洋参 麦冬 款冬花 川斛 桑叶 真阿胶 杏仁 天花
粉 橘白

《辘山草堂医案》

王孟英

携李陆集园,治寒湿暴侵,咳嗽不止,用猪肺管一条,入去节麻
黄二、三分,两头以线扎紧,配以杏、苑、橘、枳、苏子等品煎服,甚有
巧思。

《归砚录》

林佩琴

杨氏。秋间呛嗽，子午刻尤甚，咳则倾吐，晡后热渴面赤，经期错乱。此肺受燥邪，不司肃降为标；金受火克，不能生水为本。急则治标，先于润剂兼佐咸降。用杏仁、薤仁、苏子、半夏、丹皮、麦冬、百合。三服咳吐已止，能纳食而虚火已退。后用燕窝清补肺气，再用六味丸料，加白芍、五味、淡菜熬膏，蜜收服愈。

洪。冬季干咳，夜半特甚。医用杏、薤、橘、姜、桑皮等药，气促不止。诊其脉两尺洪而大，此阳失潜藏，金畏火炎象也。六味汤去黄、丹，加五味、百合、白芍，渐愈。此症若专治肺，延久不痊，必成上损，须壮水以制龙火之亢逆，而嗽自平。

族某。干咳无痰，卧觉气自丹田冲逆面上，则连咳不已，必起坐稍定，是气海失纳矣。诊脉右尺偏大，肾阳易旺，寐后肺气不敢下交于肾，延久即喘之萌，速固其根蒂为要。三才固本丸服效。按肺主气而气根于丹田肾部，故肺肾为子母之脏，必水能制火，而后火不刑金也。二冬清肺热，二地益肾水，人参补元气，气者水之母也。

钟。中年肝肾阴虚，尺脉偏旺，夜热咳嗽。医药数月，或以咳为肺有蓄水，或以嗽为外感寒邪，浸至头晕眩口干，下元乏力，近又憎寒减食，而色萎悴，足心如烙。据脉论症，必由梦泄伤清，渐成劳嗽无疑。今懔懔怯寒，食不甘味，毋使阴伤及阳，延及下损及中之咎。六味汤熟地炒用，加参、五味、贝、莲。七服热减嗽轻。又照六味汤去黄、泻，加石斛、麦冬、贝母、五味、潞参、莲子。煎服数剂，接服丸方，用前药加鱼鳔、淡菜等，蜜丸而愈。

毛。久嗽夜甚，晨吐宿痰酸沫，脉右虚濡，左浮长。已似木气贯膈犯肺，乃因臂痛，服桂枝、川乌等药酒。肺为娇脏，不受燥烈，呛咳益加，喘急上气，此为治病添病。当主以辛润，佐以酸收，经所谓肺苦气上逆，以酸补以辛泄也。清肺饮去桔梗，加白芍、苏子、桑皮、炙。数服痰咳稀，喘亦定，但纳谷少。用培土生金法，去桑皮、五味，

加山药、苡米俱炒、潞参、茯神、莲子、炙草、南枣、梗米煎汤，数服而食进。

王姓儿。秋凉感风，夜热，顿咳连声，卧则起坐，立即曲腰，喘促吐沫，汗出痰响。由风邪侵入肺俞，又为新凉所束，痰气交阻。法宜辛散邪，苦降逆。用桔梗、紫苏、杏仁、前胡、橘红、淡姜，热嗽减。一外科以为症感秋燥，用生地、五味、白芍、贝母等药。予曰风邪贮肺，可酸敛乎？痰涎阻气，可膩润乎？即单用姜汁一杯，温服可也。频以匙挑与而愈。

李。春温痰火壅肺，宵咳上气，卧不著枕，心神恍惚，脉浮洪，舌绛口干潮赤。治宜肃清太阴，兼佐除烦。杏仁、萎仁、桔梗、贝母、豆豉、山栀、连翘、枇杷叶、蔗汁。二服嗽稀得寐，因远客劳神，心营耗损，参用养营安神。生地、百合、枣仁、杏仁、茯神、贝母、沙参、甘草。二服心神安，胃阴亦复，可冀加餐，嗣因内人语言桎触，气郁生涎，改用温胆汤而痊。

巫氏女甥。年十四，干咳脉数，颊红，夜热无汗，此虚阳升动，肺金受烁，若不滋化源，阴日涸，损根伏矣。据述天癸未至，白带频下，始信真元不固。乃以潞参、山药、茯神扶脾元，白芍、丹皮泻阴火，甜杏仁、百合止咳，五味、诃子敛肺，炙草、红枣和中调营，一服嗽轻。加熟地、石斛而蒸热退。即用前药去百合、诃子、石斛，加芡实、莲子蜜丸。常服效。

糜。六旬，素患失血，今冬温夹虚，痰嗽气阻，咳则胁痛汗出，热烦口干，脉歇止。医用消散，痰嗽益剧。更医乃用炒术、半夏、朴、柴等味。余曰：术、夏守而燥，朴、柴温而升，此症所忌，况质本阴亏，温易化燥，宜辛润以利肺气则安。用杏仁、栝蒌、贝母、桑皮蜜炙、橘皮、钗斛、前胡、赤苓。一服安寐，嗽去八九，胁痛顿减，脉亦和。乃用燕窝汤煎潞参、茯神、杏仁、贝母、山药、栝蒌、桑皮。再服更适，转侧如意矣。

服侄。劳倦内伤嗽，用桔、苏、旋覆等剂，病加。诊脉小数，右尺

稍大，乃阴虚致嗽，忌服表散。以五味、甜杏仁、白芍、贝母、潞参、杞子、茯苓、莲、枣，二服嗽减。又三服，加熟地、山药等，尺脉乃敛。

鄙。冬阳不潜，龙焰上扰灼肺，呛嗽带红，剧在宵分。少年气促，脉虚数，懔寒夜热，损怯已成。想诵读阳升，寐中必有遗泄，心肾不交，精关失固，且口不甘味，食减于前，下损及脾，无清嗽治痰之理。燕窝清补，希冀嗽止痰消，恐初春气已交，懔寒必憎，安望嗽减。益脾肺，交心肾，调理如法，寒热可止，呛嗽可平。潞参、山药、茯神、生黄芪皮、桑皮蜜炙、甜杏仁、五味、枇杷叶、莲子、枣仁、阿胶、龙骨、数服嗽减寒止，痰血若失。去枇杷叶、龙骨、阿胶，加炒熟地、丹皮，热渐退。嗣用潞参、熟地、山药、茯神、远志、黄芪蜜炙、龙骨、白芍、枣仁、五味、龙眼肉熬膏。二料全愈。

畦。肝肾阴虚，损久不复，冬至后痰咳粉红，嗽声子夜特甚。想虚阳失藏，龙火不伏，交子时阳气一动，炎灼上凌，浸至娇脏受戕，身热喘促。近又食减无味，午后颊红，时觉懔懔憎寒，是阴伤及阳，非萸地酸腻可效。必用甘药培元，佐以介属潜阳，冀其封固蛰藏，至立春前后，地气上腾，症不加重为幸。潞参、山药、百合、甘草、五味、白芍、牡蛎、淡菜、阿胶、数服渐平。

《类证治裁》

方南薰

吾井轩叔季子祛繁，体气素薄，每因寒滞而咳嗽，因咳嗽而失血，医者投以六味地黄汤，戒食姜、椒、煎、炙，嘱以静而勿劳，喜而勿怒，然受寒则发，荤茹则发，一岁之中，少安而多病。庚子秋，嘱余诊治，时已合就六味丸矣。余曰：“古人论失血证，半由肺热、胃火，今人治失血证，专尚寒凉滋阴。不知血属阴类，位卑而亲下，今越中上二焦而从口咳出，是脾阳不运，胸阳不布，而阴血始得上僭。彼阳旺之人，任劳心、劳力、大恼、大怒，从未见有失血者，盖动则生阳，气血散于四肢；静则生阴，气血凝于脾胃。偶有所触，痰与血乘机而

出，虽欲止之而不能。千古以来，惟喻、舒二公专重理脾涤饮，今六脉迟弱，本属中寒痰饮，正宜补火生土，益气健脾，则血自安其位而不妄行，兼食姜、椒以助其阳，习劳动以鼓其气。”依方调治半载，者症悉除，喜吾弟坚信不疑，因识之。

此案论阳生阴长之义详矣。夫失血一证，皆由脾胃气虚，不能传布，当以理脾健胃为主，诚千古不易之法，膺司命之责者，当三沐三薰，铸金事之。颖莲王策勤注

南昌吴君式齐，患伤风咳嗽，恶寒发热，鼻流清涕，每日寅卯时，咳嗽更甚，屡食杏仁、海带清燥润肺之品，毫未见减。虽咳久，痰中带血，然守不轻服药之戒，令叔学山先生迎余诊视。两寸脉浮，两关脉滑，两尺俱迟，咳嗽重浊，三五声方有痰出，余曰：“此证初起属风邪伤卫，何至迁延两月？总由脾虚生痰，痰滞结胸，兼服一派清凉，阻遏肺气。肺旺寅卯而主皮毛，腠理密固，邪无出路，故发热恶寒，而平日咳甚。且饮食入胃所生之血，不俟传布周流，被咳掇出，昔贤所谓伤风不醒，变成癆是也。证系感冒风寒，非传经热邪，故久居太阳而不传他经。”因用桂枝汤去白芍，加苏梗、桔梗、防风、神曲、楂肉，热服三四剂，津津有汗，寒热俱解，惟咳嗽益勤。复诊，寸脉仍浮，及以苏桔二陈汤加白薏仁，接服三四剂，咳嗽始不费力，初吐浓痰，继吐白痰，未吐清痰。调治月余，服至二十剂，总以前方为加减，乃得脉静咳宁。处膏梁之家，能任余忌荤禁生冷，以收全功，何其快哉！

扬州江都祝晴湖先生三乃郎，于乙巳仲春，病患发热咳嗽，服药旬余未效，延余诊治。左手脉浮，右手脉弱，系风伤卫证而兼寒滞有痰，投以桂枝汤去白芍，加苏梗、桔梗、防风、半夏、陈皮、神曲、楂肉二剂，汗出热解，惟咳嗽更甚。复诊，知表邪已去，中寒宜温，用六君子汤加炮姜，服之而愈。丙午新春，又患发热咳嗽，复迎余诊，授以桂枝原方，汗出热退，而咳嗽不减，察其唇红口渴，大便五日未解，知为热伤津减，浊气上干清道，以致咳嗽不宁。因用肉苁蓉、油

当归、火麻仁、白蜜，服二剂而便通思食，但咳犹未止，仍然面赤唇红，口气粗莽，想是肺经郁久，蕴蓄为热，以泻白散加麦冬、梨汁，服之面痊。同一伤风咳嗽，而虚寒肺热证治各异，有如此者。

《尚友堂医案》

抱灵居士

大信，春病痿，五月脱衣，风吹，冷汗浸一日，曾服发表之药，间日顶腰痛，发热好眠，以神术汤一剂，腰顶痛好，两太阳痛，顶闷，吐绿痰极臭；以九味羌活汤一剂，臭痰好，一日三饮不觉醉，顶闷，太阳痛；以柴、芩、羌、藁、甘、桔一剂，吐血、吐臭绿痰；以凉膈饮泻一次，夜咳甚，畏寒，吐血；以参苏饮一剂，血止。或以百部、百合、芪、草、青陈之类，咳呕臭痰五次；又以正气、泻白、参苏、滚痰之类，头常出冷汗，咳红臭痰；或以二陈汤加苍、枳、桔、楂、白芥、桂枝、藕节、干姜一剂，汗止热退，身痛，早吐臭痰二次；以前方去藕节、桔梗，加青皮、厚朴一剂，五更大咳臭痰，药停胸，呃则快，间日以枳、桔、二陈汤加瓜蒌、南星、杏泥好；又以葛花、白芩、白蔻、三味丸服而愈。

魏大，咳嗽，吐浓黄痰，舌黄燥，便秘，溺赤，左脉浮洪，右濡细，不恶寒，或以泻白、金沸草、金水六君之类不应；以如圣汤加寸冬、黄芩、枇杷叶、牛子、木通、灯心又不应；以凉膈散去硝，加桔梗、瓜蒌、灯心、生军，饮柿饼汤，夜咳减，又一剂，泻二次，痰浓，舌燥；以麦冬汤加枇杷叶、紫菀、灯心一剂，夜得眠，右咽痒则咳；以利膈汤加黄芩、紫菀、瓜蒌二剂，早咳几口；以寸冬汤五剂而愈。

一中年，咳嗽，不恶寒，便秘，溺清，或服八味丸十日，日夜发热，盗汗，脉弦实；以紫菀膏一丸含化，夜热退起，又十丸，热自上而下退尽，咳减，溺涩，泻恭爽利，宜连进紫菀膏，却以紫菀汤六剂，溺尚涩痛；以甘露饮三剂，紫菀膏二丸，咳止，一夜下身冷汗，不兴，遗精，此心肝之火也；以六味丸加故纸，寸冬二剂，潮热；以清心莲子

饮去参、柴，加黄柏，用莲须一剂，阳强、梦遗二次，早泻三次，内却清爽；以清骨散去芩，加黄柏、莲须三剂，身腰振战，从下而上，一汗而散，失精；以莲子清心、虎潜珍珠粉丸，夜咳，潮热，舌燥，唇焦，咳血数口，此收涩之闭火邪也；以百合固金汤去归、芍，加紫菀、茯苓、地骨、枇杷叶五剂，咳减，血止。间服珍珠粉丸，咳在，恭黑，盗汗。予欲进紫菀膏，或以当归六黄汤三剂，左腋溺痛；或以小柴胡合二陈汤加黄连、胆草、枳壳一剂，左腋溺痛皆止，五更咳，潮热，盗汗热；或以甘露清润之品，终至咳血胸痛，喘慌而危，莫非热不下夺之咎？

刘子，二十岁。冷咳一年，或恶寒偏身痛，咽干，人倦，脉涩，左浮滑，以异功散加桔梗，寸冬三剂，咳咽痛好；以异功散芪代参加寸冬三剂，咳加发昏；以八仙长寿丸，咽干咳嗽；以麦冬汤咳止。数日又咳，以甘露饮去参，加紫菀三剂而愈。

江三，下疳半年，多服石膏凉药，愈后，或畏寒，恶食，咳嗽清痰，连左背季胁痛，暴失声，脉左浮长，右弦小，常粪后下血，此风热攻肺也，以利膈汤加连翘二剂，恶寒减，声开便秘，溺赤，咳不欠痛；以二陈汤加荆、防、翘、灯一剂，夜咳甚，便秘六日，溺赤，咽干，痰黄，脉沉滑；以麦冬汤一剂，四、五更咳甚，泻微恭鲜血；又一剂，晚进百顺丸三钱，不下，夜咳甚；中又进百顺丸三钱，泻七次，人倦；以枳桔二陈汤加紫菀、黄连、竹茹、生姜一剂，咳止，脉沉弱滑；以参苓白术散防其再泻，饥不能食；以香砂二陈汤加枳术、黄连、竹茹、生姜五剂，泻热恭，咳痰难出，进食；以玉竹饮子三剂，时窗风吹，右臂不能举，顶背强痛，咳连右腰亦痛；以消风散一剂好；又一剂，咳连肩并胸胁痛；以枳壳煮散不应；以导痰汤加羌、防二剂未好，呕痰；以玉竹饮子加竹茹、姜汁好；以二陈汤加香砂、术、连、姜、茹而愈，呃呃；以法半、青皮、寸冬、木通、丁香、枇杷叶、柿蒂、山楂、竹茹全愈。

宴子咳嗽发热或以解表之药热退，咳不止；以石膏黄芩之类反剧，予视脉左缓右紧盛，舌淡黄，不渴，作呕，背恶寒，足冷，喘不得

卧，溺赤，夜冷汗；以小青龙汤去麻黄，加杏、苓一剂，泻青色，溺清，右脉弦；以苏子降气汤一剂，恶寒好，足微温；以桂枝汤加生术、泽泻、桔梗、麻黄根一剂好，内觉有火、咳甚，脉滑；以止嗽散去百部，加桑皮一剂，咳止，夜热胸甚，溺清；以麦冬汤加柴、苓一剂，脉浮数，早以小柴胡汤加翘、枝、桔，夜以凉膈散去硝黄，加生地，夜热减，溺黄，恭黑，脉左濡、右滑数；以生四物汤加苓、梔、翘、滑、熟军、荆、防、草一剂，滑泻二次，眼花，人倦；以防、芷、连、梔、藿、草一剂，夜热，头汗，足冷，脉涩；以一阴煎，丹参换丹皮一剂，反热；以凉膈散去硝、黄一剂，热减，手拐冷；以小柴胡、四物汤之类不应，背恶寒，足冷，夜烦热去衣，唇焦鼻干，此阳明火郁也；以竹叶石膏汤加薄荷三剂，热退，便秘，加木通一剂，又热，右手大指肿痛，停药三日，食肉好，外敷药，五更热甚，屡以大连翘饮去利水药，指疮溃，以八珍汤加银花、连翘数剂而愈。

邓大，咳嗽，鼻塞恶风，以苏陈九宝汤好。劳力发热，腰股头痛，以九味羌活汤去苓、地、枳、姜、枣一剂，痛除，鼻塞咳嗽；以华盖散去桑皮，加细辛、防、芷、生姜二剂；以小青龙汤加杏仁二剂，鼻通咳减；以六君子汤加桔梗、桂枝、生姜愈。

予母，干咳难出，舌白厚润，黄苔，口渴，以华盖合凉膈散去硝，加桔梗一剂不应，延至十日，发热，手心甚，头痛不食，脉洪，以荆防败毒散一剂，热退，头痛止，咳痰，口涎、呃逆，心悸，咳甚则干呕；以小青龙汤，四七汤俱不应；以柿饼汤当茶，咳减，舌苔退，进食。二月干咳，痰难出，以麦冬汤，咳呕俱止。间日又干咳，鼻穿，口和，舌淡黄润苔，以柿饼汤，麦冬汤三剂不应；以华盖散加知母，鼻流清涕；以败毒金沸草散，咳呕清涎；以生枇杷叶煎服而愈。数日又咳，以玉竹饮子加芪，麦不应；以麦冬、陈米而愈。夜咳，以金水六君煎加杏、枣仁而全愈。

《李氏医案》

顾德华

落。产虚未复，郁怒动肝，肝火上熏肺胃。寅卯时咳呛缠绵，半载未能全止，纳谷勉强，五心烦热。脉细，左部虚细，右寸关弦数。虑涉损途，急挽可许向吉。

北沙参三钱 天花粉一钱五分 瓜蒌皮一钱五分 广郁金四分
羚羊角一钱五分 真川贝三钱 炙橘白五分 生谷芽三钱
制首乌四钱 怀牛膝一钱五分 滁菊瓣一钱 扁豆衣一钱五分

又诊：五更咳呛得缓，癸水先期而至，舌心露质，诊脉左见数象，助中刺痛。产后营虚肝郁也。

北沙参四钱 天花粉一钱 瓜蒌皮三钱 广郁金五分
羚羊角一钱五分 川贝母二钱 青蒿梗一钱五分 炙橘白五分
制首乌四钱 阿胶二钱 怀牛膝一钱五分 鲜稻叶五钱 怀山药三钱

又诊：前进平肝养阴，寅卯时咳呛渐稀。脉息左部弦数，右尺虚软。经事乍过，毓阴平肝为主。

生西洋参一钱五分 川贝母三钱 瓜蒌皮一钱五分
炒白芍一钱五分 制首乌四钱 元武版五钱 广郁金三分
怀山药三钱 金铃子一钱 鲜佛手一钱

又诊：郁火已化，阴血不致为其所耗矣。脾气尚弱，纳谷不多，大便少调。脾胃之根，在乎金水流行，水火升降，为佳。

参须七分 羚羊角一钱五分 炒木瓜五分 五味子三分
麦冬二钱 金石斛三钱 杜仲三钱 白芍一钱五分 怀山药三钱
橘白五分 生谷芽三钱 鲜佛手一钱五分

《花韵楼医案》

蒋宝素

脉来弦数无神，久咳音声不振，咽喉肿痛。阴分本亏，水不济火，清肃不行。清金保肺，引益肾水。

大生地 天门冬 北沙参 紫菀茸 大麦冬 川贝母 甜桔梗 生甘草 炒牛子

清金保肺，引益肾水，已服六剂。结喉肿痛全消，弦数之脉亦缓。每早咳嗽、痰多、音声未振，午后心烦，总属金水俱亏，依方进步。

大生地 大麦冬 北沙参 甜杏仁 甜桔梗 黄芩 白知母 大贝母 天花粉

依方进步，又服六剂。痰嗽虽减未平，音声稍振。脉仍弦数，口干唇燥，反觉胸中逆气上冲，咽喉又复肿痛。值暑湿司令，暂从清养肺胃。

北沙参 大麦冬 象贝母 肥桔梗 炒牛子 甜杏仁 白知母 薏仁米 生甘草 陈仓米 新荷叶

《问斋医案》

曹存心

咳嗽失血，音烁咽干，近来小有寒热，头痛喉疼，脉浮促而数。肺阴久伤，又兼燥气加临。补肺之中，当参以辛散。

补肺阿胶汤 加桑叶 枇杷叶

再诊：头痛咽疼已止，寒热亦轻，新受之燥邪渐得清散。无如金水两虚，失血久嗽，音烁咽干等证，仍如损象。即使静养，犹恐不及。

四阴煎合泻白散 加川贝 杏仁 阿胶 茯苓 石决明

原注：此病肺脏已损，再受燥邪，小有寒热，头痛咽疼，是其的据。先用补肺阿胶汤，以其中有牛蒡、杏仁，加桑叶、枇杷叶，去其燥邪外证，后用四阴煎加味，以图其本。

子后咳嗽，天明而缓，脉形弦数，声音不扬，肝胆之火未清，金受其刑，水必暗亏也。

补肺阿胶汤合四阴煎泻白散 加川贝 青黛 海浮石 橘红 竹茹

脉形细数，细属阴亏，数为有火；火上刑金，水即绝其生源，未可以咳嗽小恙目之。幸而气息未喘，脉象未促，如能静养，犹可以作完人。

生地 麦冬 沙参 石决明 地骨皮 桑皮 阿胶 枇杷叶
露

治按：此清滋金水两脏之平剂。但患阴虚而不挟别项邪机者，可仿此调之。

咳而腹满，经所谓三焦咳也。苔黄干苦，卧难着枕，肢冷阳缩，股痛囊肿，便溏溺短。种种见证，都属风邪湿热，满布三焦，无路可出，是实证也，未可与虚满者同日而语。

桑皮 骨皮 苓皮 姜皮 大腹皮 姜皮 防己 杏仁 苏子 葶苈子 车前子

治按：湿热壅盛，脾不输运，肺不肃降，故立方专用疏化，仿五皮五子法。

阳络频伤之后，咳嗽痰浓，内热嗑干，脉扎数，左关独弦。此肝火刑金，金气不清之候，容易成损。慎之。

四阴煎 加二母 羚羊

另琼玉膏地、冬、参、蜜、沉香、珀。

原注：肝火刑金，于左关独弦见之，所以四阴更加羚羊。

失血后，咳嗽梦遗，脉数左关弦急。必有肝火在里，既犯肺金，又泄肾气也。久延势必成劳。

四阴煎 加陈皮 川贝 海浮石 青黛 龙胆草 六味汤

原注：肝火上下交征，故加龙胆以泄之。

治按：六味汤，想系转方增入者。但其中有萸肉之酸温，专补肝阳，尚宜酌用。

失血久咳，阴分必虚，虚则不耐热蒸，食西瓜而稍退，脉数左弦，唇干苔白色滞，潮黄，加以咽痛，久而不愈，想是水不涵木，阴火上冲，胃气不清也。势欲成劳，早为静养，以冀气不加喘，脉不加促，

庶几可图。

生地 白芍 茯苓 泽泻 丹皮 花粉 元参 甘草 猪肤
青蒿露 枇杷叶露

再诊：浊痰虽少，咳逆仍然，阴分之火上冲于肺。肺属金，金受火刑，水之生源绝矣。能不虑其脉促气喘乎。知命者自能静以养之。

八仙长寿丸 加玄参 阿胶 陈皮 甘草 枇杷叶露

三诊：咳嗽夜来，有或重或轻之象，想是阴火，静躁不同耳。

前方加洋参 龟板 杏仁

四诊：所进饮食，不化为津液而变为痰涎。一俟水中火发，咳嗽作焉，权以化法。

玉竹饮子 玉竹、芩、草、桔、橘、菴、贝、姜。合麦门冬汤 加阿胶 百合
款冬

原注：前两方，六味加减法也。脉数左弦，咽痛，水不涵木，阴火上冲。惟苔白二字，为胃气不清之证。此病头绪甚繁，方中一一还他的对之药。

治按：此等证，本无必效之方，似此斟酌妥帖，即使难期必效，亦觉心苦为分明矣。

阳络重伤，咳无虚日，而于五更为甚，口干盗汗，溺赤便溏，脉数而身热，欲成损证也；咽中已痛，虑其加喘生变，权以清热存阴。

黄芩汤合猪肤汤加牡蛎

再诊：所见病情，与前无异，喜食藕汁，咽中干痛稍轻，大便溏泄更甚。虽属肺热下移于大肠，而实则中气已虚，失其所守也。

六味丸 加牡蛎 川贝 玄参 淡芩

治按：大便溏泄，虚证中所最忌者。此证给终大便不坚，故再三反复，终不复元也。

三诊：溏泄已止，咳嗽未除，咽痛盗汗，脉数。肺经尚有热邪。

补肺阿胶散 加白芍 生地 淡芩 玄参 山药

四诊：便泄稀，身热轻，咽喉干痛，亦渐向愈。而咳嗽腹鸣，神疲

纳少，脉小带数。想是风热递减，气阴两亏，而脾中之湿，又从而和之为患。补三阴、通三阳之外，更以崇土化湿佐之。

六味丸 加牡蛎 茯苓 干术 防风 陈皮 炙草

治按：阴虚而挟脾湿，阳虚而挟肺火，邪实正虚，彼此相碍。凡治此等证，总须权其轻重缓急，又须心灵手敏，方能奏效。若稍涉呆滞，则效未见而弊先滋。如此证屡用六味，虽于证情亦合，究嫌落笔太重，少灵动之机括也。

五诊：气阴得补渐和。不意又有燥风外感，袭入湿痰之中。微有寒热，咽痛咳嗽不止。权以清养法。

六味丸去萸 加桑叶 杏仁 陈皮 川贝 炙草

六诊：发热恶风汗多，是属伤风之象。但伤于壮者，气行则已；伤于怯者，难免不着而为患也。大为棘手。

六味丸合玉屏风散 加桑叶 玄参 川贝 橘红 甘草

七诊：多汗恶风之象渐轻，新风解矣。而咳嗽咽痛，大便溏，饮食少，仍是脾肺肾三脏皆虚之候。幸未气喘。

玉竹饮子玉竹 茯苓、甘草、桔梗、陈皮、川贝、紫菀、姜

合猪肤汤 玉屏风散 加麦冬 山药

八诊：脾虚则便溏，肺虚则咳嗽，肾虚则虚火上炎，咽喉干痛，脉弱无力，元气伤矣。急宜补气育阴。

人参 二冬 二地 黄芪 陈皮 阿胶 杏仁 百合 甘草

治按：此方究非便溏所宜。

九诊：精生于谷，肾之精气皆赖谷食以生之，而谷食之化，又赖脾土以运之。今便溏纳少，脾失运矣。急宜补脾为要。

都气丸合四君子汤 百花膏

另八仙长寿丸参汤下

治按：此方亦嫌少灵活之致。

温邪发痧之后，咳嗽失血，血止而咳嗽不减，所吐之痰，或黄或白，或稠或稀，舌质深红，其苔满白，喉痒咽干，脉弦带数，渐作痧劳

之象。

四物汤 加紫苏 桑皮 骨皮 川贝 知母 前胡 淡芩

原注：此痧后余邪，留恋营分，而成咳也。先生尝云：余自制两方，一为瘀热汤，一为此汤，尚未立名，以治痧后咳嗽极效。盖四物是血分引经之药，将温散化痰之品，纳入其中，引入营血中散邪清热，每用必灵。此可悟用四物之法。

痧子之后，咳嗽四月，颈旁痈串，咳甚则呕，纳少形瘦，肤热脉细。想是余邪内恋，阴分大虚，欲成损证也。

四物汤 加香附 川贝 玄参 牡蛎 麦冬 苏子一本作苏叶
治按：方中玄参、牡蛎，为项痈而设，无此证者可减也。

咳嗽五月有余，黄昏为甚，肌肉暗削，肢体无力，容易伤风，或头胀，或溺黄。总由阴分下虚，浮火夹痰上扰所致。

四物桔梗汤四物加桔梗 加桑皮 地骨皮 川贝 知母 甘草 青黛 蛤壳 枇杷叶

原注：此方之眼，在咳嗽黄昏为甚。毕竟风邪陷入阴分为剧，余目睹效者甚多。

治按：此四物合泻白，加二母、蛤、黛法也。

金能克木，木火太旺，反侮肺金，金藏尚受木克，则其吸取肾水，疏泄肾精，更属易易。此梦遗咳嗽之所由作也。

天冬 生地 党参 黄柏 甘草 砂仁 白芍 龙胆草

原注：此三才封髓丹加白芍、龙胆也。其入而必黑瘦，有一团阴火炽甚，克肺伤肾，用之极效。

治按：此方以清泄肝火为主，竟不兼用肺药，所谓治病必求其本也。

《柳选四家医案》

何平子

恶寒身热已退，现在咳呛口干，胃气不宣，诊得脉象虚弦无力，

可见中虚而肺气不清，兹拟和胃清肺法。

鲜石斛 茯苓 川贝 知母 橘红 冬桑叶 杏仁 蛤壳
米仁

复：畏风咳痰，举动喘逆，下午脚肿，脉象虚弦无力。可见肺虚而肾气奔逆，当从脾肺肾培补。

炙芪 北沙参 麦冬 枣仁 川贝 熟地 茯神 牡蛎 淮
山药 胡桃

接方：去黄芪 川贝 加入参

室女，内热咳呛，举动头晕，中虚气不归根，恐成劳怯。

西党参 沙参 川贝 橘红 淮膝 桑叶 首乌 麦冬 蛤
壳 丹皮 红枣

换方：据服药后诸病皆安，唯朝暮多汗。

去丹皮 川贝 蛤壳 桑叶 红枣 加炙芪 茯神 枣仁
大麦芽

风毒内蕴，传入血分，以致遍体发癩，口干咳呛，宜疏风凉血，
肺气自清。

荆芥钱半 大力子三钱 甘菊钱半 薄荷钱半 刺蒺藜三钱
防风钱半 桔梗二钱 花粉二钱 生草四分 元参二钱 豨莶钱半

复诊：

羚角 生草 荆芥 豨莶 连翘 茅根 薄荷 黄芩 地肤
赤苓 黑山栀

《壶春丹房医案》

费伯雄

某。经云：劳则气耗。故咳逆咽痒，每见痰红，阴分已亏，肝火
上乘金位，兼思虑伤脾，不时作恶也。宜清泄之。

南沙参三钱 郁金二钱 橘红一钱 蔻壳一钱 青盐半夏二钱
丹皮二钱 茯苓二钱 杏仁三钱 枳壳一钱 白蒺藜三钱 桔梗一钱

生甘草五分 生谷芽三钱

某。肺胃不和，呛咳痰喘。治宜肃降。

当归 茯苓 生苡仁 薄橘红 半夏 炙草 苏子 象贝
郁金 萎皮 大杏仁 蛤粉合欢 南沙参 佛手

某。呛咳气喘，交冬即发，肾虚脾湿不化也。

南沙参 茯苓 怀牛膝 川贝 瓜蒌实 女贞 炙紫菀 苡
仁 黑料豆 杜仲 旋覆花 橘红 沉香 甜杏仁 海蜇皮浸淡

某。脉来左弦右滑，肝风驱痰上升，呛咳气逆，喉闷作梗，系阴
分不足故也。宜清泄上焦法。

南沙参 桑白皮 苦杏仁 甘菊花 麦门冬 制半夏 象贝
母 杭白芍

二诊：脉来弦象渐平，呛咳亦减。宜宗前法更进一筹。

南沙参 陈橘红 瓜蒌皮 川杜仲 全当归 云茯苓 左牡
蛎 川贝母 旋覆花 桑白皮 怀牛膝 冬白术 甜杏仁 莲子
肉

三诊：肝营不足，肝气太强，上犯肺胃，呛咳日久。经治虽已获
效，旋于症后失于调养，肝营更亏。急宜调营柔肝，兼治肺胃。

当归身 川贝母 杏仁泥 大丹参 杭菊花 石决明 淮山
药 合欢花 漳沙苑 莲子肉 云茯苓 桑白皮 陈橘红 柏子
仁

某。痰气上升，呛咳气喘，宜降气化痰。

橘红一钱 半夏二钱 苏子一钱五分 茯苓二钱 桑皮二钱
沉香四分 萎皮仁炒、研，三钱 当归二钱 象贝三钱 川郁金二钱
海浮石三钱 杏仁三钱

某。风热咳嗽，漫热，咽喉作痛作痒。

萎皮三钱 川贝二钱 荷叶一角 牛蒡子二钱 桑叶一钱
薄荷一钱 前胡一钱 橘红一钱 煨葛根三钱 杏仁泥三钱
桔梗一钱

某。肺胃不知，痰气交阻，以致呛咳两载，甚则呕吐水谷，诊脉沉数。皆缘七情拂郁，寒暑失调所致。姑拟清金养胃，顺气化痰。

西洋参 川百合 象贝 山药 蛤粉 枇杷叶 石斛 茯苓
白薇 橘白 石膏三钱 桑叶一钱 蝉衣去翅足，一钱 生扁豆三钱
枇杷叶包，四钱 牛蒡子炒研，三钱 鸡蛋清一个 诃子皮一钱

某，脉来左弦右滑，肝风内动，驱痰上升，不时呛咳，入夜则厥，抱恙日久，不易速瘳。急宜养血祛风，化痰通络。

南沙参 大丹参 云茯神 石决明 麦门冬 川贝母 天竺黄
法半夏 明天麻 甘菊花 炙僵蚕 化橘红 光杏仁

某。肝火上升，肺金受克，咳嗽音暗，症入损门。急宜清养。

南沙参 瓜蒌皮 川贝母 女贞子 北沙参 杏仁泥 桑白皮
潼沙苑 生龟版 天门冬 麦门冬 淮山药 淡竹叶 鸡子清

《费伯雄医案》

李铎

李氏妇，年二十五，干咳半载，咽嗑干涸，肌肉消瘦，停乳不月，此明系内伤阴亏津涸，兼之肺肾不交，气不生精，精不化气，是以干涸如此，议金水同源之治。

沙参 麦冬 贝母 百合 桑叶 熟地 五味 玉竹 阿胶

又 进金水同源法咽嗑稍有润气，咳如原。思喻氏清燥救肺法，滋干泽枯，培养生气，于斯症正合宜也。

桑叶 石膏 芝麻 杏仁 高参 阿胶 枇杷 麦冬 生地
甘草

又 进喻氏法咳缓咽润，半年久病，大效已著，不必汲汲。以无月信，恐延成干血癆为虑，但宜培养肝肾真阴为本，俾真阴一足，则水到成渠矣。

复脉汤去姜桂加玉竹、麦冬。

津液枯竭，气化不行，所以无月，非深明内经者不辨。寿山

饶某，年逾五十，脉得气口盛于人迎一倍，病延十年之久，图之不易。且就目前之势而论，饮食不运，胃海窒塞可知，咳难出声，而治节不行已著，金土交病，将来难免倾泻之虞。若不早治，必有塌溃难御之虑。略陈大意，祈质高明是否。

高参 白蔻 木香 五味 麦冬 于术 川姜 云苓 陈皮
炙草 加大豆黄卷 不拘剂数。

按：胃为水谷之海，又为五脏六腑之海，人之所受气者谷，谷之所注者胃也。胃满则肠虚，胃病者腹膨胀，胃伤之证，不思饮食，此病重在胃海。若再以润肺清金治咳之药，窒塞胃海，则胃不能纳，肠虚倾泻，则难乎为计矣，故再陈于上，非好辩也。

久咳不已，必由冲脉伤犯胃府，法当培土生金。寿山

黄纸客，年三十余，经年久嗽，咳甚带红，咽痛不眠，气逆上喘，议金匱麦门冬汤。论曰：上逆下气，此汤主之。

沙参 麦冬 半夏 洋参 梗米 大枣 杏仁

喻氏曰：凡胃之津液干枯，虚火上炎之证，用寒凉药而火反升，徒知与火相争，不知胃者，肺之母气也。

陈，三二，秋凉燥气，久咳失音。据述初病凛凛怯寒，失于解表，服润肺治咳药，渐至失音，及寒客于肺，误投药饵填塞肺道使然，未必是金伤之候。仿叶天士金实无声议治。

麻黄 杏仁 薄荷 石膏 射干 橘红 牛蒡子 甘草

徐某，年四十，交冬咳嗽，人夜更甚，形肥痰多白沫。大病愈后，中气已伤，中虚则停湿，而为痰饮，饮邪上干，而为咳嗽，此病根也。《金匱》论咳嗽，必因之痰饮，斯证合符当遵是旨，无惑他岐。若论阴虚火盛，必干燥少痰，此理显而易明。丁医谓陈远公书，肾热火沸为痰，谬不可法，且饮为阴邪，若再以阴药附和其阴，必留邪为患也。

六君子加干姜、细辛、五味子。

陈修园曰：咳嗽症，方书最繁，反启人疑窦，其实不外虚实二

症，实者外感风寒而发，虚者内伤精气而生也，总不离乎水饮，《金匱》以小青龙汤加减五方，大有意义，小柴胡汤自注云：咳嗽去人参，加干姜、五味子。人多顺口读过，余于此悟透全书之旨，而得治咳嗽之秘钥。

老广，三七，咳嗽已久，痰多带红，夜间更甚，胸膈满闷，舌上黄苔，小便短赤，四肢麻木作痹，手足掌心灼灼，脉见两寸浮数，证属火旺克金之候。盖肺有郁热则咳嗽，甚则逼血上行，故咳血，肺本清肃之脏，因受心之火炎，故喘促。法宜清心泻火。

洋参 麦冬 知母 炒芩 杏仁 桑叶 茜草 川贝 甘草

又 前进清金泻火之剂，吐红稍减，各候差缓，足证清泻之验。第脉息如原，诚为火烁金伤之证，最忌辛温凝腻之药，动火生痰，填塞肺道，宜清燥救肺行瘀。

百合 麦冬 紫菀 冬花 天冬 川贝 元胡 侧柏 梔炭 壳 杏霜

傅，孀居，年四二，久嗽经年，痰多食少，身动必息鸣喘促，面色痿黄，黯瘁神夺，诊脉左搏数，左小急。自觉内火燔燎，寡居独阴，自多愁闷思郁，加以操持焦劳，五志厥阳烦煎，上熏为咳，非泛泛客邪干肺之嗽，实为内伤重病，且忧苦久郁，必气结血枯，五液内耗，是以经来涩少，色见紫黑，有延成干血劳嗽之累。议进琼玉膏，滋水益气，以制厥阳之火，暂用汤剂，益胃中之阴，以血海隶于阳明，勿损胃气为上。至治嗽救肺诸法，谅无益于斯病耳。

参条 云苓 怀山药 扁豆 苡仁 北五味 石斛 阿胶 百合 甘草

《医案偶存》

潘名熊

凤浦胡君易堂，夏患痰咳失血。医用胶、地等，作肝肾阴虚生内热治，不效，且痰增胃减，延余诊。脉得右坚左弱，余曰，前人主左坚

填肝肾，左坚理脾胃。今右坚，治胃为要。炎夏阳气方升泄，胃阴虚而无镇压之权，势必震动胃络，络伤则络中之血因随阳气上升。倘云三阴热蒸，脉必征于左部。据理论治，药宜选淡薄味，以调养胃阴，曾服腻药太多，须佐以宣畅腕气，方可消痰安谷。生扁豆（用粒不打）五钱，丽参一钱，麦冬、茯神各三钱、石斛、谷芽各二钱，陈皮、甘草各四分，服三帖。再诊，血止脉缓，惟时或心悸，或汗微泄，主兼理心营肺卫。黄芪、沙参各三钱，丽参、麦冬各二钱，五味、炙草各三分，麦仁、枣肉各四钱，多服调养，仍用归脾丸加杞子、五味，蜜小丸常服。精神自此日旺，体健胜于平时。吾因思胡冯二君，皆先服清，而后受补，故血不复发，实赖参、芪以回其气，气回血得守其常度而循行经络也。夫患血而畏补者多，是以终难了局，因存此二案醒之。

风浦冯君蕙庭，人瘦而长，咳嗽继以吐血。医与温胃劫痰药，血益甚，延余治。脉得左坚右弱，余曰，贵恙乃肝肾阴虚而生内热，熏蒸脉络，致血不得宁静。前肾谓瘦人之病，虑虚其阴，今服燥药，即犯虚虚之戒，阴愈亏，阳愈炽矣，故血益甚。愚见主先治肝。方用复脉汤去桂姜（参用丽参），加白芍二钱、生牡蛎块五钱。次日诊，仍用前方，加田三七末四分冲服，另用淡菜、黑豆、冬虫草煎猪精肉汤做饭菜。再诊，脉缓血止，惟咳痰难出，转用醒胃汁以涤痰饮一法，麦门冬汤加钗斛二钱（与丽参同先煎），五、六帖诸恙俱安，继用归脾去木香，加陈皮、白芍、五味、麦冬、杞子，为小丸常服，痰咳渐除，身体日健。

《评琴书屋医略》

徐守愚

新昌烟山梁东庐子字章，年十九。去岁六月，避难天台，途中受暑，夜眠精泄，次日身遂发热，服时令药而愈。至冬精神倦怠，午后潮热，咳嗽多痰，终日欲眠。医者咸谓湿邪未尽，屡用渗利之利，不知其为内伤也。迄今春病日加重。伊父东庐邀余医治，诊脉细数而

短，肌肉消瘦，面黑舌红，嗽则多痰，入夜更甚，其困于床褥者已二月有余矣。余谓东庐曰：“令郎病属内伤，阳分大亏，似难施治。”东庐谓迩来所服之方，俱是熟地等一派纯阴。先生独谓阳亏，何所见而云然耶？余答之曰：“卫气昼则行阳二十五度，且得太阳阳气之助，故交子至午，诸证皆轻，夜则行阴二十五度，且当太阴阴气之助，故自午至亥，诸证加重，与外感病之日轻夜重自是不同，就诊用方舍仲景人参建中汤，其无别法。”东庐固留旬日，按法调治，一日能食厚粥三碗，咳嗽潮热俱减，痰亦稀少。东庐改忧为喜曰：“此后有无虞耳？”余谓再过十日，立夏节到不致反复，可望全愈。谁知一交此节而胃气遂绝，东庐先立夏三日作札相邀，以为预防。余不得已，遂复往诊，初不料其病之至于斯极也。比余至，东庐向余曰：“小儿之病服先生药后，逐日生色，今交节虽变，余皆如常，只胃口不升耳。”余曰：“他变犹可治，惟胃败乃不可治。古人云：得谷者昌，绝谷者亡。病势至此，虽卢扁复生亦无如之何矣！”东庐欲侥万一之幸，再三索方。余勉书参附汤，聊尽人事，非真望其有济也。维时阳气将尽，奈何有同道犹有阴火窜上之说，而不自知其陋者，噫！医道之难矣！

达溪童岐山赋禀不足，斲伤太过。去岁冬季忽然痰饮咳嗽齐发，尔时明眼人见之，投以小青龙汤一法即愈。而医者皆挟虚损成见，用一派清润甘寒以止嗽消痰为事。不知肺畏火而亦恶寒，肺令人咳，多挟水饮，饮邪当以温药和之，圣法也。况久咳勿理肺，肺为娇脏，愈理则愈虚，甘温亦所必需。医昧此旨，所以欲止嗽而气反急，欲消痰而饮反增，且午后潮热，饮食顿减，怯证之渐也。春初尚可支持，迨清明节交，病日加重，乃急延余治。而暨与嵎路隔数百里，日夜悬望，真有迫不及待之势。越三日，余至，岐山仰卧在床，不能转侧。但开目注视，低声向余曰：“先生救我。”无力言他。顷刻吐痰饮数碗，咳嗽连声不断。身热便痢，粒米不进，如是者已十余日矣。余诊视甫毕，其母即哀求不已，自言寡居三十年，不辞艰辛，只

为此儿，望先生鼎力医治，倘得垂危复生，不独我母子感德，即童家宗支赖以不绝。言至此而涕交垂，不能自禁焉。余曰：“证固急矣，幸脉尚有根，非不可以救药者。但须数月奏功，莫嫌效迟。”遂以生黄芪、生甘草、干姜、细辛、五味子、姜半夏、桂枝、茯苓合为一方。频服二剂而咳嗽稍减；服四剂而痰饮渐退，粥饮可进；服十余剂而痰饮咳嗽俱十愈六、七、终日能食饭三碗，惟日晡潮热如故，间服小柴胡汤数剂而热以退。后仍以原方加潞党、仙居术，再服数十剂，又每日午后以薏仁煮粥作点心，闭户静养，谢绝一切，调理百日而病及霍然。

剡西丁家舜年乃郎安澜，自五月患咳嗽证，至七月医治罔效。渐加身热气急，胃减肉削，呕恶频频，医者咸谓癆瘵将成，不能遽疗。余诊脉浮弦而紧，兼见有力。其父问余曰：“小儿是癆病否？”余直决之曰：“非也。揣其病情，不过因见嗽治嗽，日以元参、沙参、麦冬、桔梗、阿胶、生地等味用事；见热治热，日以柴胡、地骨皮、黄芩、丹皮、龟板、鳖甲等味用事，不明《金匱》咳嗽多挟水饮之旨，所以愈治愈剧耳。”其父起而揖余曰：“小儿婚期在秋杪，贱荆一闻癆病之说，遂涕泣至今，日夜不安。先生云非癆病，乞赐一速愈良方，俾小儿脱然无累，得如期完婚，则幸甚。”余曰：“此证舍小青龙汤，另无别法。盖咳嗽必挟水饮，目下脉弦紧有力，弦则为饮，紧则为寒，其为水饮无疑矣。”小青龙汤日服一剂，每日继服杏酪一杯。四日之间嗽止热退，饮食渐加。调理月余而愈。

嵎邑小碛村赵咸林，口甜身热，咳嗽胃不开已有旬，日服之口甜如失，诸证得愈。七八方以佩兰叶为君。《书云》，脾热则口甜，惟佩兰叶可以治之。俗法五叶汤，时医所尚，余加生甘草、桔梗、生香附、茯苓，另有意义。

佩兰叶 苏叶 藿香叶 冬桑叶 薄荷叶 生香附 赤苓
苦桔梗 生甘草 葱白

《医案梦记》

徐麟

崇仁裘日林先生，咳嗽喘急，绵延二十年。每至秋冬一月一发，发则喘息抬肩，饮食不入，挨至春夏，喘虽稍可而痰嗽之根株终存焉。近来较前更甚，非第秋冬，即春夏亦多发作矣。迨至今秋，适余过其处而伊留诊，左关弦紧，右关弦细，幸得六部皆有胃气。犹堪医药，检阅从前方法，有用宁肺止嗽，消痰顺气等方，未有明《金匱》咳嗽多挟水饮之旨，若有和之以温药者，则滔天之水势自就于下，咳逆上气之证获效甚捷，何致经年累月？目下脾阳不振，肾阳式微，下焦之阴上泛而凌脾土，上被水侵，痰饮因之加增，坎中阳衰，龙雷升腾，须丽照当空，群阴始退也，先用苓桂术甘汤加味与服五、六剂后，复诊可也。

茯苓四钱 桂枝二钱 仙居术一钱 炙草一钱 姜夏三钱
杞子四钱 干姜一钱 五味子一钱 瓦楞子三钱 大枣十二个

次接来书稔知，服加味苓桂术甘六剂，喘嗽渐平，药似对证。不过略受风寒，痰声曳锯，黄昏就枕，朦胧不清，神飞魄舞，恍恍惚惚，觉来舌带燥气，少顷仍润，伊欲半夏易枣仁，余以为半夏为降逆上之饮邪而用，易之不可，枣仁安心神定魂魄。世俗所尚，古圣无是训也。盖半夏非但不可易，而且当重用耳。如《内经》半夏秫米汤，原为胃不和则卧不安而设。夫卧之不安者，由胃中之有痰贮也；神飞魄舞者，由痰气阻滞中脘，阴阳拂逆也；觉来舌燥俄顷，仍润者由痰涎粘滞于胃中，而津液艰潮于口也。医生不识五行生化，即昧五脏宣布之义，种种见症不外中土虚衰，肾水泛滥。余以半夏秫米汤先交阴阳，仍用苓桂术甘汤加味，俾堤防固，水不泛滥，阴霾敛藏，腹中安然。半夏一两 秫米三合 老姜三钱 大枣十二个

再书其病巔末，人生小天地耳，则天地能高时博厚，悠久无疆者。以其有氤氲之气充塞乎其间也，故真人至人洞达阴阳，调护斡旋之大气于胸中，则五脏六腑、大经小络，升降呼吸运用不竭，则能

寿敝天地，无有终时。一至大气亏损则天地风火四轮同时轰转，上凌太空。就人而论，即现畏寒就温之阴象，如喘呕自痢、腹胀、筋惕，诸凡凶恶之证叠起斯时也。禅宗有白浪滔天，劫火洞然，百川沸腾，山冢卒崩。一切可惊可怪之物，扬眉吐气，各显伎俩，天地谓之大千俱坏，人身谓之性命不保矣。乃千万年之支干一交戌亥，大气散竭，有如此之大变，大骇怪已哉。然此未免诞漫，今举一昼夜之戌亥，以喻阴盛阳衰之虚劳，乃毕真而确肖焉。凡终日每交戌亥，地中昏暗，露结为霜，群丑现形，诸鬼夜食。比鸡鸣于丑，阳开于子，太空始廓，世界光明。取此喻彼，则千万年之戌亥与一昼夜之戌亥，并人生毕生之戌亥比例而推，可知大气为保命之金刚，获阳为全身之灵丹也。夫且吾尝读《内经》有曰：“年六十阴痿，阳大衰，下虚上实。”又云：“营卫相得，其气乃行。”喻征君嘉言先生曾云：大气一转则久病驳劣之气始散。盖大气之关于性命者，有若斯之重且大也，而病者、医者詎堪忽乎？余每恨此旨湮泯已久，先贤谆谆详论，后人不知所宗，良堪慨焉。余尝每考陆地大动，而世界不即坏者，有立天真武坐镇于北方，故地虽有时震动，而龙蛇仍得摄伏于地下；则水中之火，火中之风，庶不得扰于太空。仲景所以称谓医中之圣人，一遇阳衰之怯证，必投真武者，良有以也。今先生年逾花甲，阳衰固不待言。假或不究此旨，日事滋阴一途，一旦阴寒之气上干阳位，即神水金丹恐亦无济。此方接服十余剂，仍服苓桂术甘加味不拘帖数。每至秋冬用毛鹿角数对，照此法调护，庶可延年益寿，弗以荒唐见弃，彼此幸甚。

仙居术三钱 茯苓四钱 淡附子二钱 化龙骨四钱 炙麻黄一钱
姜夏三钱 五味子一钱 生牡蛎四钱 北黑枣十二个 酒芍三钱
煨姜三钱

《医案梦记附案》

黄堂

周，五十五岁。操劳过度，咳痰几年，津液必伤，以致气不归原，形瘦怯弱，胃纳减少，脉虚芤数，损怯大著。姑拟养胃生金，宗《内经》聚于胃，关于肺之旨，望其一阴来复如何？

党参 茯苓 扁豆 紫石英 五味子 麦冬 宋半夏 炙草
生蛤壳 胡桃肉

二诊：脾为生痰之源，肺为贮痰之器，夫水谷入胃，精气游溢，输于脾，归于肺，《内经》之旨也。吐痰虽多，尚因生热久延，肌肉消瘦，气易上逆，脉形虚芤，皆是咎征。

六君子汤加紫石英 麦冬 沉香汁 地骨皮露

三诊：前方颇适，热减痰少，此为佳处，惟气易逆，脉短芤，总由元海根蒂不固，衰脱之机可虑。

党参 干术 麦冬 紫石英 地骨皮露 熟地 茯苓 五味子 沉香汁

四诊：诸恙虽觉安适，而热起辰巳，必先四末微寒，营卫造偏，实由脾胃之虚，虚不肯复谓之损，此最难奏效者。气之摄纳在肾，参景岳法。

六君子汤加熟地 五味子 怀膝 紫石英 十大功劳

五诊：连进扶脾化痰，补肾纳气之法，仅获小效，而神脉不旺，上午微热，中脘不畅，仍兼咳嗽，炎暑伤气奈何。

六君子汤加青蒿 丹皮 海石 沉香汁

《黄氏纪效新书》

王燕昌

同里张醒斋，贤孝著闻，工诗，豪饮，患咳兼便结，每以大黄置酒中，止之不从。数年后避乱，授读颖郡宁氏家，咳病忽作，言语无声，未久而危。

张畹香

感风肌热已久，今已有汗，而舌黄口燥，咳嗽痰如水，喉痒，诊脉弦数。据书风温日久，表里均热，当用甘寒。

苦杏仁三钱 生甘草一钱 桔梗二钱 羚羊角二钱，先煎
根生地六钱 地骨皮三钱 冬桑叶一钱半 橘红八分 麦冬三钱
生玉竹三钱 象贝五钱 竹肉一九

两太阳与腰痛，稍有咳嗽，喉哑痛，脉左关反大，而舌苔燥。当用从症不从脉法。

杏仁三钱 苏薄荷二钱半，净叶 冬桑叶二钱半 象贝母三钱
桔梗二钱 生甘草一钱半 射干一钱半 麦冬三钱 连翘三钱
酒黄芩一钱半 枳壳一钱半 竹叶廿四片

外感后，余邪总当凉解，况肺热怕反伤也。身凉后尚咳痰。左肋素有块，今自觉痰从此起，查左肋下是肝位，此块当属向来做工夫之故。然无形状，非真有瘀也，不过络中之气郁耳。古人云：清金可以平木，则但清其肺，而肝自可耳。

生玉竹四钱 桔梗二钱 象贝三钱 麦冬三钱 地骨皮三钱
根生地六钱 橘红八分 冬桑叶一钱半 炒丹皮一钱半 煅牡蛎五钱
阳春砂八分，同煎

《张畹香医案》

何游

咽痛咳痰，膈胀便溏。此中虚厥阴化风，宜调中润肺治之。

桑白皮 橘红 炒苏子 桔梗 薄荷叶 生芪 钩钩 大力
子 赤苓 冬瓜子

复诊：

炒苏子 炒扁豆 橘红 桔梗 生甘草 川石斛 生米仁

茯苓 郁金

元气素虚。疟后腠疏，喘咳转剧。脉数无力。劳怯之渐，愈期未许。

炙芪 北沙参 麦冬 橘白 煅牡蛎 红枣 玉竹 川贝母
山药 茯神 冬桑叶

接服方：

黄芪 北沙参 麦冬 橘白 煅牡蛎 杞子 熟地 川贝母
山药 茯神 款冬花 建连

膏滋方：

炙芪 五味 淡苡蓉 胡桃肉 熟地 牛膝 煅牡蛎

久嗽不止，中虚表弱也，以致盗汗，膈胀气喘，脉软。以建胃固表治，庶克奏效。

制于术 石斛 苏子 蛤壳 川贝 红枣 川百合 橘白
茯苓 米仁 桑叶

接服方

西党参 北沙参 山药 菟丝 茯苓 红枣 制于术 炒米
仁 橘白 牛膝 桑叶

先曾失血，由络伤所致。现患咳呛，脾泄痰多，肉削，中气不足之验。治宜涤痰健中，舍此无策。

制于术 淮山药 桑叶 北沙参 橘白 川石斛 茯苓 款
冬 川贝母 炙草

再诊：冲呛不止，比前减少，并脉象数势缓和。斯属佳境，但速愈不能。

炒生地 麦冬 川贝 元武板 丹皮 北沙参 橘红 杏仁
冬桑叶 青盐

《何澹安医案》

吴达

青浦县潘镜波先生，前年令少君患干咳，诸医视为劳，以为不可救药矣。偶于坊间，得余《求是集》，因买舟至江相访，抵青阳，知余已游沪，即移舟来诊。乃郎年仅十七，瘦弱白晰，身已长成。余谓此乃相火刑金之嗽，因发身而作也。人当发身之时，及于长定，五内运行之火，正值流动充满，升极于上，将下纳于肾中。白嫩之躯，肺金柔弱，火烁其肺，故见干咳，焉得谓之劳病乎？用润肺降火之药，半月全瘳。今岁又来，谓其毕婚后苦志攻读，时患中气不足。余因授以久服之方而去。镜翁颇觉感余，并谓病经余治者，即为有幸。未免誉之过情，惟治病贵能识其原，岂得因其瘦弱，而漫曰虚劳，以误人哉！

《医学求是》

雷丰

占黔刘某妇，素吸洋烟，清癯弱体，自孟冬偶沾咳逆，一月有余，未效来商丰诊。阅前所用之药，颇为合理，以桑、菊、萎、薤、杏、苏、桔、贝等药，透其燥气之邪。但服下其咳益增，其体更怠，昼轻夜剧，痰内夹杂红丝，脉形沉数而来，舌绛无苔而燥。丰曰：此属真阴虚损，伏燥化火刑金之候也。思金为水之母，水为金之子，金既被刑，则水愈亏，而火愈炽。制火者，莫如水也，今水既亏，不能为母复仇。必须大补肾水，以平其火，而保其金。金得清，则水有源，水有源，则金可保，金水相生，自乏燎原之患。倘或见咳治咳，见血治血，即是舍本求末也。丰用知柏八味除去山萸，加入阿胶、天、麦，连进五剂，一如久旱逢霖，而诸疴尽屏却矣。

鉴湖沈某，孟冬之初，忽患痰嗽，前医作冬温治之，阅二十余天，未能奏效。延丰诊治，右部之脉极滞，舌苔白滑，痰多而嗽，胸闭不渴。丰曰：此即《内经》“秋伤于湿，冬生咳嗽”之病，非冬温之可比

也。冬温之病，必脉数口渴，今不数不渴者非。冬温治在乎肺，此则治在乎脾，张冠李戴，所以乏效。遂用加味二陈法去米仁一味，加苏子、芥子治之。三剂而胸开，五剂而痰嗽减，后用六君子汤增损，获全愈矣。

南乡张某，左脉如平，右关缓滞，独寸口沉而且滑，痰嗽缠绵日久，外无寒热，内无口渴。前医用散不效，改补亦不见功。不知此证乃系伏湿酿痰，痰气窒肺而致嗽，即经所云“秋伤于湿，冬生咳嗽”也。当理脾为主，利肺为佐，即以制夏、化红、茯苓、煨姜、杏仁、绍贝、苏子、甘草治之。约服三、四剂，痰嗽遂减矣。后循旧法出入，调治旬日而安。

城南程某，患嗽月余，交冬未愈，始延丰诊。诊得脉形沉弱而滑，舌体无荣，苔根白腻，神气疲倦，饮食并废。丰曰：此赋稟素弱，湿袭脾，脾不运作，酿痰入肺所致。以脾湿为病本，肺痰为病标，即先哲云：脾为生痰之源，肺为贮痰之器。治当补脾为主。程曰：风痰在肺，补之恐增其闭。即出曾服十余方，皆是荆、防、枳、桔、杏、贝、苏、前等品。丰曰：此新感作嗽之药，与之伏气，理当枘凿。即用六君加玉苏子、生米仁治之，服五剂神气稍振，痰嗽渐疏，继进十余剂，方得全愈。

江诚曰：痰嗽之证，须知有新感，有伏气。新感之脉必多浮，伏气之脉必多沉。新感之嗽，必兼鼻塞声重，头痛发热；伏气之嗽而无诸证也。凡伏气之证，法当宣气透邪。前医以荆、防、枳、桔反未臻效，而吾师用六君补气，苏子降气，米仁渗湿，而反效者何也？盖山风、寒、暑、湿潜伏者，固宜透发，惟此则不然。当知湿气未成痰之先，可以透发，既成痰之后，焉能向外而解耶？因痰之源在脾，故用六君子扶脾以去其湿，而化其痰；苏子降气，毋使其痰上袭于肺；米仁渗湿，毋使其湿再酿成痰。倘用宣提之方，则痰益袭于肺，而嗽更无愈期矣。

杨毓斌

兰芝庭，呛咳，痰吐不畅，音哑而咳声清越。杂治半月余，症益重，问治于予。按六脉皆弦，右关尤大，乃湿郁已，土不能培木，木邪挟风火上触肺胃，肺胃被灼化燥，不能遂其清肃下降之令。亟宜清降肺胃，两和上木。音哑久延，防金破土崩，酿成癆嗽不治。立方三服，竟痊。

肥玉竹三钱 炒贝母二钱 苦杏仁三钱 盐水炒陈皮一钱五分
茯苓三钱 蛤粉炒阿胶二钱 生芪皮一钱五分

《治验论案》

朱增藉

族柳溪，甫及冠，得咳发疾。渠家闻吾师王平石公，治侄心衡咳血吐发，用六味合玉女煎加螳螂而愈，检方欲进而不敢，延余治以定从违。余诊之，体肥脉滑，咳嗽、吐白痰，痰中有发，由短而长，初四五分，今七八分，脚微白，上截淡黄，逐日而生。思索日夜，吾师成方难用。忆陈远公有怪病多生于痰之说，然犹豫不敢立方。适房兄杏村同寝，言及此子欲心早炽未遂，因获斯疾。余喜曰：“得之矣！”此病为欲火薰蒸痰涎而成，其发有脚，吾师案中载发生胃脘。凡物遇土而生，论解最确，第病原不同，此宜祛痰开郁。遂主三因四七汤，决服六剂愈，仅四剂痰除发灭矣。是疾吾师早有成方，弃而不用者，以病不属阴虚火燥，服之恐成癆瘵。今别生方法而取效如此，憾不起吾师于九原以相质证也。

按：师用螳螂治吐发疾者，盖螳螂善食发。螳螂目黄，食此即青色，从格物中悟出治法，故取效最捷。是亦谓令虎申，蛇令豹止，物有相制之义。

三因四七汤

半夏三钱,生姜汁炒 厚朴三钱,生姜汁炒 茯苓一两 紫苏二钱

《疫证治例》

过铸

王公少谷,吾邑之贤宰也。其署有石某者,患咳嗽证。春夏晏然,交秋则发,至冬更甚,咳呛而不能著枕,求治于余。余曰:“内证非所长,不敢强作解人也。”石某信余甚笃,再四固请,辞不获已,遂为之诊视。其脉沉数,系郁热不舒之故,方用生大黄一钱,当归五钱,川贝母、薄荷、荆芥、黄芩、桔梗各二钱,天花粉、白术各三钱,生甘草一钱,陈皮,建曲各五分。水煎服二剂,咳呛平,四剂已痊愈矣。值余进署,石某道谢王公。问故,余道其所以然。王公笑曰:“大黄亦能止咳嗽乎?”余曰:“此古方也。是病必藉大黄之力能治。夫人身之气血,一有闭塞则凝滞而变为热矣。热欲出而寒欲入,邪则乘间以进。时当春夏,肌肤疏而热易外宣;时届秋冬,腠理密而热难外达。所以春夏安而秋冬发也。治宜通其内郁之热,散其外入之寒,则永无咳嗽之证矣。大黄走而不守,祛火消痰通郁最速,用为前驱则味味得力。后遇证之同者,以此方投之无不愈。”

徐灵胎云:古方最为神效,病与证俱对者,不必加减。若病同而证稍异者,则随证加减。时医好为加减,故不效耳。淮商杨秀伦,年已七十四,外感停食。医因年高素封,俱用补中之药,待其自消,以致见饭即呕。徐君用生大黄,众医大骇。徐君强令服之,服半剂气平得寝而未泻。明日服一剂,下宿垢少许而愈俱详于《洵溪医案》。按古来神圣制方,良毒诸药,俱供医用。朴消、大黄无毒,俗医畏,不敢投,此不读《神农本草经》之过也。各种本草以《神农本草经》为最,后附徐灵胎、张隐庵、叶天士、陈修园诸家之说者更堪取法。

《过氏近诊医案》

陈知生

肺为五脏华盖，体本清虚，一物不客，毫毛必咳，有外感六气而嗽者，有内伤七情六欲而嗽者，治当先其所因。癸巳冬，余寓天津，高君诚齐之室，晨起即嗽，至暮尤甚，连咳不止，延余往诊。切其脉，浮虚细数，知是寒束于表，阳气并于胸中不得泄越所致。用利膈煎治之，下咽即安。又曹某，每日午后，必发干咳数声，病已年余，问治于余，切其脉，六部中惟左尺沉按则数，知阴分至深处有宿火内伏。故午后阴气用事时，上冲于肺而咳。朱丹溪所谓“火郁之干咳嗽”，证最难治也。余用杞菊地黄丸意，加减治之，十余剂而愈。丙申冬，余又至天津，周菁莪大令患咳嗽症甚剧，终夜不得卧，来速余诊。切其脉，六部细数，右关尺按尤有力，知是大肠温邪，上乘于肺而咳，用芩知泻火汤加减，十数剂而治愈。丁酉夏初，江君镜泉子后午前，咳嗽痰多，并见筋骨酸痛，食少神疲等症，余诊之，脉来缓弱，知是脾虚寒侵，用理中汤加味，温补而愈。此数证也，或表或里，或虚或实，或寒或热，如法施治，应手奏效，故先哲有言：“咳嗽虽责之肺，而治法不专在肺”，诚以咳嗽受病处，不尽属于肺也。今人但知咳不离乎肺，凡见咳嗽，即以辛药治之，一切咳嗽不因于肺者，缠绵不已，永无愈期，迨至劳证将成，乃归咎于肺气不充与肺阴不足。今试问气何以不充，阴何以不足，非缘过服辛药，肺经受伤之故欤？使能先其所因，不沾沾于治肺，则咳早平而金不受困。其得失为何如耶？

前哲云：久病咳嗽声哑者难疗。又云：左侧不能卧者为肝伤，右边不能卧者为肺损。新者可治，久者不可治。又云：久嗽脉弱者生，实大数者死。又云：咳而呕，腹满泄泻，脉弦急者死。又云：咳嗽见血，似肉似肺，如烂鱼肠，此胃中脂膜，为邪火所烁，凝结而成，方书咸谓必死。执此而论，似遇前项症情，万无生理，而抑知不然。丙申冬，余客天津，启泰茶叶店主人方君实夫之室，病经一年，医治已穷，其友许绳甫，是吾友也，代邀余诊，据云，初起咳嗽眩晕，继而头

痛，未几头痛减轻，咳嗽加重，面肿肢冷，自汗耳鸣，夜不能卧，痰中夹血如脂，音哑咽痛，胸前胀满，大便溏泄，每月经来，两旬始尽，色见淡红，腹必胀痛，症象颇危。余切其脉，实大而疾，知是伏火久积，阴不济阳，所谓难疗不治必死者近是。此时风散不能，温补不得，惟有滋清一法，然恐杯水车薪，终不能胜。遂合犀角地黄汤、羚角石膏汤，重剂投之，并饮冰雪水以佐之，共服羚角、石膏各斤余，犀角一两，冰水数碗，生地等药无数，而后病始霍然愈。或闻之，惊为异。余曰：“何异之有？所患者，世俗之庸耳。天下惟庸人最能误事，以迟疑为详审，以敷衍为精明，以幸免旁人之指摘为是，以迎合主人之意见为能，虽病至转重转危，犹莫求其所以然之故。此诚大可悯矣。夫症有轻重、有深浅，轻者浅者，略投轻剂，便可望愈；若来势极重，宿积尤深，非峻剂、多剂不能挽回。譬如衣服，新染油污，一洗即去；若系宿垢，即迭洗亦不能遂净，必净润之，更刷之括之，几费经营，而后洁然若更新焉。无他，新久之势殊也。是月也，同乡左某因小星病，亦邀余诊，据云，初起服龙胆草，以致病剧，继饮吴萸、桂枝等剂，稍间，延今缠绵数月，头痛目眩，卧不能起，稍坐即旋，畏寒特甚，暖气不已，腹满食微，病又转重，余切其脉，左弦数，右微缓，知是肝阴与胃肠两伤，合羚芍地黄汤、理中汤出入加减治之，诸症渐平。或问其故，余曰：“是症也，由误服龙胆所致，盖龙胆苦寒泻肝，误饮入胃，胃亦受戕，人第知龙胆寒肝，不复思其寒胃，恣用吴萸、桂枝，肝阴受灼，风阳以升，而胃中积寒仍不能化，所以见阴阳两虚之象。阴虚，用羚、芍、地黄以补之；阳虚，用参、术、干姜以补之，此正治也。所异者，汤药外，更用炭火炙腹，腹中有声如爆竹状，胀满即觉减轻，较之前症，用冰雪水，一寒一热，迥乎不同，故连类及之。

《诊余举隅录》

张乃修

简左，感风入肺，肺失清肃。咳嗽痰色黄厚，夜重日轻。脉象带

数。宜肃肺化痰。

粉前胡一钱 马兜铃一钱五分 牛蒡子三钱 茯苓三钱
橘红一钱 杏仁三钱,炒 竹沥半夏一钱五分 冬瓜子三钱 象贝二钱
肺露一两

二诊:咳仍不止,痰黄而厚,咽痒头胀,风温外薄,肺胃内应,气热而肺失肃耳。肃肺以清气热。

山梔皮三钱 川贝母二钱 粉前胡一钱 花粉二钱 桔梗一钱
冬瓜子四钱 马兜铃一钱五分 杏仁三钱,炒 枇杷叶四片,去毛

三诊:咳嗽渐疏,口燥咽干轻退。再清金润肺而化气热。

北沙参四钱 川贝母二钱 光杏仁二钱 枳壳一钱,炒 桔梗一钱
冬瓜子四钱 马兜铃一钱五分 竹茹一钱,炒 枇杷膏五钱

宋煜,冬藏不固,感召风邪,肺合皮毛,邪袭于外,肺应于内。咳嗽咽痛。宜清肃太阴。俟咳止再商调理。

川贝母二钱 桔梗一钱 杏仁泥三钱 花粉二钱 茯苓三钱
桑叶一钱 冬瓜子三钱 前胡一钱 川石斛四钱 菊花一钱五分
枇杷叶四片,去毛

二诊:清肃太阴,咳仍不减,夜重日轻,舌干咽燥。肺肾阴虚,虚多实少。宜兼治本。

北沙参三钱 川贝母二钱 甜杏仁三钱 川石斛四钱
青蛤散四钱 茯苓三钱 前胡一钱 桔梗八分 枇杷叶四片,去毛
琼玉膏四钱,二次冲服

陈右,肾本空虚,封藏不固,暴凉暴暖,感于肌表,肺辄内应,痰饮因而复发。气喘胸闷,痰不得出,痰从偏左而来,以肝用主左,肝气挟痰上逆,所以其势尤甚。药饵之外,务须怡情以条达肝木,使气不上逆,勿助痰势,其病自然少发也。

代赭石四钱 杜苏子三钱 制半夏一钱五分 橘红一钱
川桂枝四分 旋复花二钱 杏仁泥三钱 石膏四钱,煨 枳壳一钱
郁金一钱五分

陆左，肺有伏寒，至冬寒水行令，阳气不化，以致寒饮停于肺下，咳嗽右胁作痛。宜疏太阴之表，以观动静如何。

不去节麻黄三分，另煎去沫，冲 制半夏二钱 茯苓四钱
冬瓜子四钱 不去皮尖杏仁三钱 生香附一钱五分 橘红一钱
旋复花一钱，包 不去节甘草三分 炒苏子三钱 枳壳一钱
郁金五分，磨，冲

二诊：温疏太阴之表，咳略减轻。而脉象微数，营液不足之征。论病宜续进苦温，然肺虽恶寒，心则恶热，脉沉带数，朱便耗伤营分。再出之以和平。

粉前胡 广橘红 制半夏 云茯苓 旋复花 杏仁泥 炒苏子 炒黄川贝母 紫菀蜜炙

另附梨膏方：

麻黄四钱，蜜炙，去沫 茯苓四钱 煨石膏二两 桔梗八钱
枳壳八钱 姜汁二钱 大葶荠八两 甜杏仁七两，葶荠同打汁，冲
杜苏子四两，绞汁，冲 白菜菹一斤，打汁，冲 竹沥四两，冲 荆沥二两，冲
雪梨一斤

上药熬膏，每日服一调羹，开水送下。

杨左，咳嗽气逆痰多，遍身作痛。脉象弦滑。痰饮阻肺，肺失降令，络隧因而不宣。姑辛温寒以开饮邪。

川桂枝五分 白茯苓三钱 光杏仁二钱 苏子三钱，炒
石膏三钱，煨 广橘红一钱 葶苈五分 制半夏一钱五分

二诊：辛温寒合方，咳嗽气逆，十退五六。的是肝气挟饮上逆。再以退为进。

姜半夏二钱 炒苏子三钱 白茯苓三钱 猩绛五分 炙黑草三分
广橘红一钱 川桂枝四分 旋复花二钱 上川朴七分 青葱管三分

三诊：痰喘大退，咳嗽未定，两胁作痛亦止。再为温化。

白芥子四分，炒，研 广橘红一钱 茯苓三钱 旋复花二钱，包
光杏仁三钱 制半夏一钱五分 炒苏子三钱 枳壳一钱

广郁金一钱五分 猴绛五分

马左,肺有伏寒,感风咳逆。且疏新感,俟咳减再商。

制半夏 光杏仁 白茯苓 枳壳 砂仁 炒苏子 薄橘红
前胡 桑叶

二诊:咳嗽稍减。的是肺有伏寒,而肺气暗虚。前法出入再进。

光杏仁 橘红 制半夏 款冬花 生薏仁 炒苏子 茯苓
炒黄川贝 炙紫菀肉

另方:

川贝母一两,去心 炒莱菔子四两 豆腐锅巴八两 白果肉一两
白冰糖四两

五味研细末,每服四钱,开水调糊送下。或稍加糖霜。

张左,音塞不扬,两年之久,遂起呛咳,却不见红。脉象气口不调。寒热互阻于肺,然肺为水之上源,恐肺金日损而变假为真。

不去节麻黄三分 杏仁三钱,不去皮尖 煨石膏三钱 炒苏子三钱
不去节甘草三分 制半夏一钱五分 枳壳一钱 橘红一钱
茯苓三钱

三诊:用麻杏甘膏并不汗出,咳嗽音塞,尚复如前。肺邪伏匿既深,恐变假为真,拟重药轻服法。

麻杏甘膏加细辛、前胡、橘红、茯苓、枳壳其人竟服七剂未见过节

三诊:用辛温寒合方,音塞较开,咳嗽大减。然天气温燥,呛咳复甚。脉象左大。伏匿之邪,虽得渐解,而肺气阴液,早为并损。再清金养肺。

南沙参四钱 光杏仁三钱 炒天冬三钱 白茯苓三钱
生甘草三分 川贝母二钱 生扁豆衣三钱 水炒竹茹一钱
生鸡子白一枚,冲服

魏左,肺有伏寒,稍一感冒,咳嗽即甚。兹当天气渐寒,更涉重洋,咳嗽因而尤甚,动辄气逆。脉沉弦重按少力,舌红苔薄白,并不厚腻。此风寒痰饮有余于上,而肾本空虚于下。用雷氏上下分治法。

炒苏子三钱 制半夏一钱五分 川朴八分 橘红一钱
白茯苓三钱 熟地炭四钱 嫩前胡一钱五分 当归一钱五分，炒透
老生姜三片

二诊：上下兼治，喘咳稍减。的是上实下虚。前法扩充。

制半夏一钱五分 菟丝子三钱，盐水炒 巴戟肉三钱 白茯苓三钱
广橘红 怀牛膝三钱，盐水炒 紫蛤壳四钱 干术二钱，炒
苏子三钱，炒 附子都气丸三钱，晨服

张左，肺邪未彻，复感新风，与浊相合。头胀咳嗽身热，痰气带
秽，宜以疏化。

池菊一钱五分 橘红一钱 牛蒡子三钱，生打 光杏仁三钱
桑叶一钱五分 冬瓜子三钱 荆芥穗一钱 枳壳一钱五分
前胡一钱五分 生薏仁三钱 广郁金一钱

二诊：疏泄肺邪，咳仍不减，痰气带秽，脉大。风邪与浊交蒸，肺
胃热郁。厥阴之病，在脏为肝，在色为苍，而风气通肝，所以痰带青
绿也。

冬瓜子三钱 生薏仁四钱 云茯苓三钱 桔梗六分 桑叶一钱
光杏仁三钱，打 甜葶苈四分 粉前胡一钱 水炒竹茹一钱

三诊：咳嗽不减，痰不爽利，色带青绿。下虚上实。再清金润肺。

川贝母二钱 光杏仁三钱 蜜炙桑叶一钱 炒萎皮三钱
冬瓜子三钱 生薏仁三钱 黑梔皮一钱五分 白茯苓三钱
青芦管八钱，枇杷叶膏五钱，分二次服

四诊：痰色仍带青绿，心中空豁。脉象虚细，舌红苔心霉黑。痰
热上盛，真水下虚。再上下分治。

玉泉散三钱 川贝母二钱 光杏仁三钱 炒萎皮三钱
桑叶一钱五分 冬瓜子三钱 阿胶珠二钱 水炒竹茹一钱
枇杷叶四片，炙，去毛

五诊：心中空豁较退，苔霉、痰绿、呛咳俱减。的是风热痰郁于
肺胃，遂有火烁金伤之势。再用喻氏清燥救肺法。

阿胶珠三钱 生甘草三分 光杏仁三钱，打 浮石四钱
桑叶一钱五分 煨石膏三钱 冬瓜子三钱 川贝母一钱五分
枇杷叶四片，去毛 芦根一两

六诊：用喻氏法，病退十六，效方再望应手。

阿胶珠三钱 桑叶一钱五分 生甘草三分 地骨皮二钱
煨石膏三钱 川贝母二钱 冬瓜子三钱 干枇杷叶三片 肺露一两，冲

七诊：咳嗽较定，而痰阻肺之支络，欲咳稍舒。舌心灰润。再开痰降肺。

光杏仁三钱 冬瓜子三钱 海浮石二钱 炒蒺藜三钱
郁金一钱五 枳壳一钱 桔梗一钱 茯苓三钱 池菊一钱五分
桑叶一钱 枇杷叶四片

朱右，每至经来，辄先腹胀，兹则感风咳嗽痰多。先治新感，再调本病。

牛蒡子三钱 前胡一钱五分 橘红一钱 茯苓三钱 桔梗八分
桑叶一钱 光杏仁三钱 白蒺藜三钱 象贝二钱 丹参二钱
池菊花一钱五分

二诊：咳嗽稍减，音仍带涩。还是肺邪未清。经来腹胀，再商。

前胡一钱 橘红一钱 茯苓三钱 大力子三钱 丹参二钱
苏梗三钱 杏仁三钱 川贝二钱 蝉衣一钱 制香附二钱

三诊：音涩渐开，咳未全止。再拟清金润肺。

川贝母二钱 白茯苓三钱 炒蒺藜三钱 桔梗一钱 前胡一钱
光杏仁三钱 冬瓜子三钱 生甘草四分 生梨肉一两

邵左，夜卧受寒，咳嗽发热，即服酸收之品，肺邪因而不泄，咳经三月，仍然不止，痰出觉冷。伏寒不泄，恐致损肺。

不去节麻黄三分 不去皮尖杏仁三钱 白茯苓三钱
不去节甘草三分 炒杜苏子三钱，研 制半夏一钱五分 枳壳七分
橘红一钱 老姜二片

二诊：用三拗汤以搜太阴深伏之寒，咳嗽大退。然脉形仍然沉

细。不入虎穴，焉得虎子。

不去节麻黄三分 炒苏子三钱 新会红一钱
不去皮尖杏仁三钱 制半夏一钱五分 白茯苓三钱 不去节甘草五分
砂仁末三分，研，冲 蜜生姜八分

三诊：咳嗽递减，十退七八，而仍痰多稀白。前法改进化痰。

制半夏二钱 炒苏子三钱 白茯苓三钱 光杏仁三钱
生薏仁三钱 广橘红一钱 旋复花一钱五分 台白术一钱五分
糖生姜一钱

四诊：搜散太阴伏寒，咳嗽渐定。然三月来不寒而热，汗不畅达。脉数，右寸关独大。此外感新邪，与本病两途。拟用疏泄，不致引动伏气为止。

淡豆豉三钱 橘红一钱 荆芥穗一钱，炒 苏子三钱 生薏仁三钱
光杏仁三钱 桑叶一钱 制半夏一钱五分 白茯苓三钱
鲜佛手一钱

萧左，久咳曾经见红，两月前吐血盈碗。今血虽止住，而咳嗽暮甚，必致呕吐而咳无减，音塞不扬。脉形细数。经云：胃咳之状，咳而呕。良由肺肾并伤，中气亦损，损而难复，不可不防。

台参须六分，另煎，冲 盐半夏一钱 生扁豆三钱 生山药三钱
大麦冬三钱 生甘草三分 蛤黛散三钱，包 北沙参三钱 川贝母二钱
白粳米一握，煎汤代水

二诊：甘以益胃，咳嗽大减。然大便泄泻，临圉腹痛。偶然饮冷，损伤脾土，一波未平，一波又起。再参培土生金法，复入分消，以理水湿。

奎党参三钱 泽泻一钱五分 生熟草各二钱 砂仁五分
白茯苓三钱 炒扁豆三钱 炒山药三钱 生熟薏仁各二钱 木香四分
木猪苓二钱

三诊：水泻渐轻，便仍溏泄，胸脘痞满不舒。脾清不升，则胃浊不降。久病之体，未便遽投重剂。

陈皮一钱 生熟薏仁各二钱 木猪苓二钱 泽泻一钱五分
鲜佛手二钱 砂仁五分 白茯苓三钱 木香四分,煨 楂炭一钱五分

唐左,咳嗽半载不愈,咳则火升轰热,曾经见红。脉形虚细。不能收摄,其标在上,其本在下。拟金水双调法。

大生地 冬瓜子 川贝母 云茯苓 蛤黛散 甜杏仁 广郁金 都气丸

二诊:火升轰然已定,咳嗽略减。然每晨必咳尽稠痰,方得舒畅。脉象虚细。肾虚液炼成痰,上阻肺降。再作缓兵之计。

川贝母 蛤黛散 薄橘红 女贞子 炒竹茹 冬瓜子 茯苓块 炒苏子 粉前胡 都气丸

三诊:身热已退,咳嗽大减。然肺胃运化不及,水谷生痰,每晨必咳吐痰尽,方得舒畅。摄下之中,兼调脾胃。

奎党参 茯苓 制半夏 煨蛤壳 炒枳壳 野于术 橘皮 炒苏子 炒玉竹 都气丸

四诊:咳虽递减,而每至清晨,其咳必甚,寐则口干咽燥。脉形濡细。苔黄中心浊腻。阴虚于下,痰甚于上。拟和阴清金,兼化痰热。

细生地四钱 川贝母二钱 云茯苓三钱 冬瓜子三钱
北沙参三钱 海蛤粉三钱,包 水炒竹茹一钱 甜杏仁三钱
枇杷叶三钱,炙 肺露一两,冲

倪右,向有肝气,腹胀内热。兹感风燥,肺金失肃,致肝火逆犯于肺,咽中热冲,即作呛咳。舌红苔糙霉底。木叩金鸡,恐致人损。

梔皮 冬瓜子 蒺藜皮 竹茹 茯苓 蛤黛散 川贝母 川石斛 冬桑叶 地骨皮 枇杷叶

二诊:清气热而肃肺金,咽中热冲稍平,咳嗽大减。舌红苔糙霉底如昨。阴分耗残,再兼清养。

川石斛 南花粉 川贝母 细生地 丹皮 大天冬 北沙参

蛤黛散 枇杷叶

三诊：清肺气而化燥风，天时寒暄，封固不密，咳嗽转甚。脉形虚细，舌红苔糙。阴分亏损，不问可知。宜舍其标而治其本。

细生地四钱 蛤黛散三钱 甜杏仁三钱 白茯苓三钱
生白芍一钱五分 冬瓜子三钱 生甘草三分 都气丸三钱，先服
川贝母二钱 炙枇杷叶三片，去毛

张左，哮喘多年，肺伤吐血，渐至咳嗽痰多，痰色黄稠，兼带青绿，有时腹满，运化迟钝。脉形濡细，左部带涩。肺胃并亏，而湿滞中州。且作缓兵之计。

海蛤粉三钱 川贝母二钱 冬瓜子三钱 炙款冬二钱
淡秋石一钱 炙紫菀一钱五分 牛膝炭三钱 云茯苓三钱
煨磁石三钱 金水六君丸六钱，二次服

二诊：痰饮凭凌于上，肾阴亏损于下，饮聚则成痰，阴虚则生热，热痰交蒸，所以咳血频来，痰黄青绿，热蒸痰郁，痰带臭秽。脉形濡数。腹中不和。将成肺痿重症，再作缓兵之计。

南沙参三钱 川贝母二钱 橘红八分，盐水炒 冬瓜子三钱
海蛤粉三钱 炒枳壳一钱 沉香曲一钱五分 炙款冬二钱
清阿胶二钱 炒天冬二钱 生谷芽一钱五分

沈左，咳嗽不时带血，缠绵数载，肺肾久虚。兹以感受风湿，咳遂增剧。今身热已退，而每至寅卯之交，辄咽痒咳甚，口渴咽干，舌燥痰稠厚，纳少胃呆。脉形虚细，舌红苔糙。风邪虽解，而肺肾更虚，遂致冲阳挟痰上逆，证属本原，与痰饮攸殊也。拟金水双调法。

阿胶 川贝 炙生地 甜杏仁 枇杷叶 杭白芍 茯苓 青蛤散 橘红 都气丸

二诊：寅卯之交，咽痒呛咳已止，然胃气呆钝。脉象濡弦。口燥咽干，犹未全定。肾阴不复，中气下根于肾，所以肾愈虚则胃愈弱也。

阿胶珠二钱 橘白一钱，盐水炒 川贝二钱 甜杏仁三钱，炒香

金石斛三钱 海蛤粉三钱 茯苓三钱 杭白芍一钱五分，酒炒
肥玉竹三钱 生熟谷芽各一钱 七味都气丸三钱，分二次另服

夏左，痰饮阻于肺胃，胸次闷窒，痰多咳逆，甚则四肢不温。阳气为阴气所阻。宜为温化。

制半夏一钱五分 广皮一钱 茯苓三钱 瓜蒌霜四钱 桔梗七分
薤白头三钱 桂枝四分 枳壳一钱 炒莱菔二钱，研

二诊：胸次闷窒稍舒，四肢亦稍温和。然仍痰多咳逆。还是痰饮内阻，肺胃之气不宜。再化痰而开展气化。

制半夏一钱五分 瓜蒌霜四钱 桔梗七分 白蒺藜三钱
薤白头三钱 广郁金一钱五分 枳壳一钱 光杏仁三钱
枇杷叶四片，去毛，炙 白金丸四分，开水送下

三诊：四肢渐觉温和，痰亦稍利。然胸次仍窒闷。还是痰饮伏而不化，恐难杜绝根株。

制半夏 枳实 霞天曲 茯苓 陈南星 上广皮 郁金 薤白头 杏仁 白金丸五分

四诊：肢厥转温，咳嗽虽属和平，而胸次尚觉窒闷。无非痰气之阻，前法扩充，用千缙汤出入。

陈皮 竹茹 光杏仁 制半夏 茯苓 枳壳 郁金 薤白头
皂荚子

五诊：胸次窒闷稍舒，然仍不时呵欠。的是胸有伏痰，以致阴阳相引。再化痰以通阴阳。

制半夏 橘红 广郁金 茯苓 龙骨 陈胆星 炒枳壳 竹茹 姜汁

六诊：胸中之伏痰渐开，阴阳交通，呵欠大退，咳嗽痰多较盛。此痰饮之本态也。宜化痰和中降肺。

制半夏一钱五分 炒苏子三钱 光杏仁三钱 前胡一钱
郁金一钱五分 广橘红一钱 白茯苓三钱 陈胆星五分 枳壳一钱
姜汁三匙

七诊：外感寒邪，寒饮复聚，咳嗽复盛，胸又窒闷。再辛润滑利以化痰降浊。

菴白头三钱 橘红一钱 制半夏一钱五分 郁金一钱五分
砂仁五分 瓜蒌仁四钱，生姜汁炒，研 茯苓三钱 炒枳壳一钱
干姜三分 佛手一钱

吕左。癖染紫霞，日久伤气，气弱不能输运，聚饮生痰，上阻肺降，咳嗽痰多盈碗。脉象沉弦。虽属饮象，每先干咳，然后痰多。肺金渐燥，将成痰火之症。

川贝母三钱 桔梗二钱 苏子三钱 竹沥半夏一钱五分
枳壳七分 肥玉竹三钱 茯苓三钱 白蜜一钱五分 桔红一钱
老姜一钱五分，后二味少冲水炒干入煎

二诊：用石顽老人法，咳嗽痰多，尚复如是，寅卯为甚，甚则心烦汗出。脉象甚弦，而带微数。阴精不足於下，痰气凭凌于上，冲阳挟痰上升，所以寅卯为甚。然赋药难投，宜上下分治。

玉竹三钱 车前子一钱五分 冬瓜子三钱 炒苏子一钱五分
贝母一钱 怀牛膝盐水炒，三钱 白茯苓三钱 海蛤粉三钱
济生肾气丸三钱，淡盐汤送下

三诊：补水中之阴，助水中之火，利水中之滞，寅卯咳嗽已减，痰亦渐少。再上下分治。

制半夏一钱五分 炒苏子一钱 怀牛膝三钱，酒炒
车前子盐水炒，二钱 薄桔红一钱 白茯苓三钱 紫蛤壳五钱
炒香甜杏仁三钱 济生肾气丸三钱，淡盐汤送下

四诊：痰嗽渐轻，的属肾虚不能仰吸肺气下行。介宾先生谓熟地为化痰之圣药，其说虽偏，不为无意也。

炒萸肉二钱 白茯苓三钱 车前子盐水炒，三钱 炒香甜杏仁三钱
淮山药三钱 紫蛤壳五钱 怀牛膝盐水炒，三钱 七味都气丸三钱
济生肾气丸二钱，二丸和合，分二次服

左。久嗽不止，痰稠厚腻，甚则色带青绿，寒热往来。脉软而数。

此肝肾素亏，而脾胃之痰热，熏蒸于肺。阴阳开合之机，悉为痰阻，此所以为寒为热也。将入劳损之门，不易图治。

川桂枝 杏仁泥 制半夏 橘红 炒黄川贝 生石膏 肥知母 海蛤粉 郁金 云茯

二诊：湿痰稍退，而营卫流行，不能和协。再拟和中化痰。

人参须另煎冲，五分 制半夏 橘红 茯苓 川桂枝 炒枳实 干姜四分 郁金 野于术 煨石膏

三诊：升饮化痰和中，阴阳交并，寒热已止，纳增痰爽。足见痰阻营卫，与阳虚生外寒，阴虚生内热者迥异也。再从前法扩充。

人参须八分 云苓 制半夏 炒枳实 砂仁 野于术 橘红 川桂枝 石膏煨

梁左。叠进黄耆建中汤，咳嗽盗汗俱减。然痰湿不爽，每至半饥，其咳即甚，形体恶寒，脉象细弱。阴伤及阳，以甘药补中。

炙绵耆三钱 生甘草七分 甜杏仁三钱 茯苓三钱 橘红一钱 奎党参三钱 淮小麦五钱 胡桃肉一枚 南枣四枚

二诊：吐血之后，阴伤及阳，盗汗虽止，而形体恶寒，咽中如阻，即欲呛咳，胃纳不起，投以建中，中气仍然不振，脉象细弱。良由阴阳并虚，少阴之脉贯喉，中气下根于肾，所以肾阴虚而咽中不舒胃气不振也。汤丸并进，上下分治。

炙绵耆三钱 炙黑草四分 菟丝子盐水炒，三钱 怀牛膝盐水炒，三钱 奎党参三钱 白茯苓三钱 炒萸肉二钱 都气丸四钱，二次服

三诊：久虚不复，稍饥则咳甚，胃气不能振作。拟以麦门冬汤养其肺胃，仍以丸药入下，以摄肾阴。

台参须一钱 青盐半夏一钱 海蛤粉三钱 车前子盐水炒，二钱 大麦冬三钱 生熟草各二分 白茯苓三钱 牛膝盐水炒，三钱 左归丸三钱，先服

四诊：脉细弱少神，咳甚不减，痰多白膩，食入运化迟钝。阴伤

及阳，肺脾肾俱损。再撮其下。

桂枝四分	巴戟肉三钱	车前子二钱	五味子三分
左归丸三钱，先服	茯苓三钱	牛膝三钱	菟丝子三钱
炙草四分，二味另服			

《张聿青医案》

王旭高

卜。心咳之状，咳则心痛，喉中介介如梗状，甚则咽肿喉痹。盖因风温袭肺，引动心包之火上逆，故治法仍宜宣散肺经风邪，参入宁心缓火之品。仲景方法，略示其端，但语焉而未详，后人未细审耳。

前胡 杏仁 象贝 桔梗 射干 远志甘草汤制 麦冬 沙参

小麦一两煎汤代水，微妙在此一味。

渊按：非深入仲景堂奥不能道。用宣散肺金风温之方，加小麦一两，清心热，即补心虚，何等灵敏。

胡。咳嗽呕吐，痰浓头痛，风热上蕴，肺胃失降。

前胡 杏仁 苏子 橘红 款冬花 桑白皮 防风 桑叶 冬瓜子

丁。形寒饮冷则伤肺，两寒相感，中外皆伤，故气逆而为咳嗽。自秋冬历春夏，每每夜甚，气升不得卧。近来吐血数口，是伏寒化热，而阳络受伤矣。祛其伏寒，退其伏热，必兼降气化痰。

紫菀 杏仁 款冬花 橘红 川贝 茯苓 桂枝 淡黄芩 桔梗 半夏 桑白皮 枇杷叶

某。素有寒嗽，时发时止。上年岁底发时，寒热六七日方止。至春初，喉痛三日，声音遂哑，而咳嗽作。总因风湿袭于肺部。宜宣邪降气，冀免喘急。

旋复花 荆芥 杏仁 款冬花 前胡 苏子 枳壳 川贝

川芎 桔梗 蛤壳 枇杷叶

许。寒嗽交冬则发，兼患颈项强急。

大熟地六钱，麻黄一钱煎汁浸，炒松 茯苓三钱，细辛五分煎汁浸，炒
胡桃肉四钱 五味子八分，淡姜一钱同炒 陈皮二钱，盐水炒 半夏钱半，炒
川贝三钱 款冬花三钱 苡仁四钱 杏仁霜三钱 归身三钱，酒炒
党参三钱，元米炒

上药为末，炼蜜为丸。每晨开水送下三钱。

渊按：久嗽宜此方。若颈项强急，未免有外风袭三阳经也，何不以汤剂兼治之。

僧。咳嗽七八年，咳甚必汗出。近半年以来痰中见血两次，肺气肾阴亏损矣。虑加内热，延成劳怯。

大熟地 归身 蛤壳 北沙参 麦冬 川贝 甜杏仁 苏子
桑白皮 炙甘草 枇杷叶

又：久嗽肺肾交虚，犹幸胃气尚旺。法以金水同治，冀精气渐生。

大熟地 归身 炙甘草 潞党参 桂枝 款冬花 炮姜 麦冬 半夏 阿胶 蛤壳

此方炙甘草合麦门冬汤。病由寒伏肺底，致成咳嗽，日久伤及精气，故于滋补中兼化痰。

又：久嗽汗出，诸药不效。用宁肺散。

栗壳一两六钱，醋炒 炙乌梅肉四钱

共研末，每服三钱，下午开水调服。朝服金水六君子丸四钱，开水送下。

张。十年前三疰之后，盗汗常出，阴津大伤。去秋咳嗽气升，痰中带血。至今行动气喘，内热多汗，食少无力，脉虚细数，劳损根深。

四君子汤加五味子、熟地、焦六曲、栗壳、紫石英、熟附子、黄芪、白芍、麦冬。

又：肺主出气，肾主纳气。肾虚不能纳气，气反上逆而喘。痰饮

留中，加以汗出阳虚，咳血阴虚，内热食少，肺肾虚劳之候。

四君子汤加麦冬、紫石英、熟附子、丹皮、大熟地、半夏、白芍、沉香、五味子、莱壳、乌梅。

渊按：夺血毋汗，夺汗毋血。血，阴也；汗，亦阴也。何以言阴虚阳虚？盖汗出为阳气失卫，

咳血为阴火所迫，故有阴阳之分。

又：盗汗气喘，咳嗽脉细。精气两虚，舍补摄肺肾之外，更将何法以治！景岳云：大虚之症即微补尚难见效，而况于不补乎？

前方加归身、牡蛎、龙骨、黄芪。

姚。咳嗽将及一年，阴阳之气各造其偏。阳虚则外寒，阴虚生内热。夏令湿热用事，迨日寒暄不调，脾胃伤戕，恐致成劳，毋忽！

沙参 茯苓 五味子 麦冬 黄芪 川贝 苡仁 沙苑子
玉竹 枇杷叶

又：脉数未退，阴虚未复。咳嗽不止，肺气日虚。夏暑将临，病尚未稳，仍宜小心安养为要。

大生地 生洋参 麦冬 川贝 玉竹 五味子 黄芪 沙参
茯苓 枇杷露

李。咳嗽喉痒，痰或稀或浓，浓则腥臭。脉象右弦而滑，左弦小数。肝经有郁勃之热，肺家有胶粘之痰。此痰为火郁而臭，并非肺痈可比。当以乎肝开郁，参清金化痰。

沙参 橘红 苏子 杏仁 石决明 川贝 茯苓 丹皮 蛤壳 枇杷叶 陈海蜃_{漂淡} 地栗

许。咳嗽面白为金伤，脉数而洪属虚火，是脉克色而火胜金也。夏至一阴生，正属火令，为剥极则复之际。倘若剥而不复，颇有火灼金销之虑。

党参 黄芪 炙甘草 茯苓 怀山药 麦冬 沙参 五味子
紫苑 陈皮

此生脉散合六君子汤加紫苑。失四君去术加黄芪、山药、陈皮，

亦名六君,在《医方集解》中。

王。暑风从背俞而内薄于肺,湿热从胃脉而上注于肺,外内合邪,其气并于胸中,气不得通,因而上逆,气升作咳。舌苔薄白,口腻不渴,治属饮家。

半夏 陈皮 枳壳 马兜铃 杏仁 射干 通草 冬瓜子
枇杷叶

渊按:宜佐开泄暑风之药一二味,如香薷、苏梗之类。

阙。体弱素亏,频年屡患咳嗽。今春产后悲伤,咳嗽复作,背寒内热,气逆痰多,脉虚数,大便溏。延今百日,病成蓐劳。按产后血舍空虚,八脉之气先伤于下,加以悲哀伤肺,咳嗽震动,冲脉之气上逆。经云:冲脉为病,逆气里急。阳维为病苦寒热。频进疏风清热,脾胃再伤,以致腹痛便溏,食减无味,斯皆见咳治咳之弊。越人谓上损及脾,下损过胃,俱属难治。姑拟通补奇经,镇摄冲脉,复入扶脾理肺。未能免俗,聊复尔尔。

大熟地砂仁炒炭 当归小茴三分拌炒 紫石英 白芍桂枝三分拌炒
白茯苓 川贝 牛膝盐水炒

张。稚龄形瘦色黄,痰多食少,昼日微咳,夜寐则喉中嘎吼有声。病已半载,性畏服药。此脾虚湿热蒸痰阻肺也。商用药枣法。

人参 炙甘草 冬术 茯苓 制川朴 苍术 宋半夏 陈皮
川贝 榧子

上药各研末,和一处。用好大枣一百枚,去核,将药末纳入枣中,以线扎好。每枣一枚大约纳药二分为准。再用甜蒺苳一两,河水两大碗,用枣煮,候枣软熟,不可太烂,取出,晒干。候饥时,将枣细嚼一枚。一日可用五、六枚。余枣汤去蒺苳,将汤煎浓至一茶杯,分三次先温服。

此平胃、六君子汤加川贝、榧子也。制法极好。治脾虚湿热蒸痰阻肺。喉中痰多者,从葛可久白凤膏化出,颇有巧意。服之遂愈。

渊按:心思巧妙,触发后学不少。

毕。劳心苦志，耗损营阴。阴虚生内热，热胜则风动，由是心悸少寐，头眩咳嗽，晡热朝凉，种种病情，相因而至。前议甘凉生津，微苦泄热，服后热减咳稀，原得小效。而或谓外感，改投辛散，杂入消导苦寒，以致咳嗽汗多。犹云邪未尽达，再欲发汗。大言不惭，岂非痴人说梦耶！余今仍用甘凉，窃恐见此方者，又訾议于后也。呵呵！

沙参 玉竹 麦冬 地骨皮 茯苓 川贝 稻豆衣 茯神
钟乳石 雪梨肉 红枣

奚。风邪袭肺，肺气失宣。一月以来咳嗽，上引头痛，乃振动肝胆之阳也。幸胃旺能食，邪未延及于中。第久恋于肺者，势必渐化为热。乃咳而喉痛、音哑，肺阴为热耗矣。宣风散热，润肺化痰，是其治法。然非数剂所能治。盖风入肺系，祛之亦不易也。

牛蒡子 马兜铃 川贝 桔梗 杏仁 生甘草 海浮石 蛤壳 阿胶 桑叶 枇杷叶

另：蛤粉一两，青黛二钱，蝉蜕七分，共三味，研为细末。分七服，药汁调下，每日一服。

肺阴已伤，引动肝阳，咳作头痛，青蛤散颇合。皂荚子不可用，恐劫液也。

戴。五脏皆有咳，总不离乎肺。肺为娇脏，不耐邪侵，感寒则咳，受热则咳，初起微有寒热，必夹表邪。邪恋肺虚，脉形空大。前方降气化痰。保肺涤饮，俱无少效。据云得汗则身体轻快，想由肺气虽虚，留邪未尽。补虚而兼化邪，亦一法也。用钱氏法。

牛蒡子 元米炒 马兜铃 杏仁 阿胶 蛤粉炒 苏子 桑白皮
款冬花 炙甘草 茯苓 桑叶 枇杷叶

祝。咳嗽夜重，风寒伤于肺，劳碌伤于肾。肾气上逆，故重咳于夜也。

前胡 杏仁 象贝 橘红 半夏 旋复花 紫苑 茯苓 沉香 沙苑子

渊按：治风寒则可矣，治肾虚则未也。

平。病起伤风咳嗽，邪留肺系。久咳伤阴。

火起于肾，上冲于心，心中热痒则咳甚而肤热，迨火降则热亦退而稍平。其所以发热者，由于阴虚也。惟胃纳甚少，滋阴之药不宜过，当以金土水三脏皆调。立夏在前，冀其热减为妙。

大生地 蛤粉拌捣 阿胶 米粉拌炒 怀山药 炙甘草 川贝 五味子 茯苓 牛蒡子 丹皮炒焦 橘红 紫苑 枇杷叶

奚。黄昏咳嗽，肺热也。黎明气升，肾虚也。纳食倒饱，脾虚也。补肾纳气治其下，清金化痰治其上，运脾培土治其中，三焦并治。

大生地 沙苑子 麦冬 川贝 茯苓 怀山药 六神曲 沙参 牛膝 枇杷叶

冯。久咳痰稠，上午发热，面色青黄。左脉细数，右脉软弱。病属上损。幸大便不溏，尚未过中及下。加谨调养，交夏至节无变再议。

党参 炙甘草 怀山药 麦冬 五味子 青蒿酒炒 白芍桂枝三分，拌炒 川贝 茯苓 白扁豆 枣仁 煨生姜

又：咳嗽脉细数，前上午发热，今下午亦热，阴气渐伤。大便间或带血，脾气虚也。从景岳理阴煎例。扶过夏至节，一阴来复，病无增变，庶几可延。

四君子汤合生脉散，加生地、怀山药、白芍、白扁豆、川贝、阿胶、红枣。

高。脉沉取数，其阴内亏，其热在里，劳损之候。症见咳吐白痰，心腹不时疼痛，痛则气满，得矢气则稍宽。病兼肝郁。据云咳嗽已及三年，初无身热，则病从痰饮而始，宜从痰饮气郁例治之。

法半夏 炙甘草 桂木 茯苓 冬术 陈皮 川贝 神曲 归身 丹皮 白芍 香附 沉香 橘饼

又：痰饮咳嗽发热，肺肾两亏，湿热不化。用苓桂术甘合二陈治其肺脾，都气丸兼治其肾可也。

苓桂术甘汤合二陈，加沉香、杏仁、川贝。都气丸四钱，盐花汤

送下。

某。咳嗽成劳最难治，《十药神书》传葛氏。生津顺气化痰浊，补血安神分次第。病经一载元气亏，节届春分恐危殆。安谷则昌古所言，姑拟一方补脾胃。

玉竹 怀山药 生苡仁 白扁豆 川贝 茯苓 甜杏仁 款冬花 生谷芽 沙参

某。久病之躯，去冬常患火升。交春木旺，肝胆升，阳无制，倏忽寒热，头面红肿，延及四肢，焮热痒痛，殆即所谓游火、游风之类欤！匝月以来，肿热大减。四五日前偶然裸体伤风，遂增咳嗽，音哑痰多，口干舌白，续发寒热，胃气从此不醒，元气愈觉难支。风火交煽，痰浊复甚；阴津消涸，阳不潜藏。清火养阴，计非不善，抑恐滋则碍脾；化痰扶正，势所必需，又恐燥则伤液。法取轻灵，立方但求无过。

北沙参 知母 鲜生地 蛤壳 蝉衣 海浮石 豆卷 青果
海蜇 地栗 百合

另珠粉，朝晨用燕窝汤下三分。

上方《金匱》百合知母地黄汤合《本事》神效雪羹，取其清火化痰，不伤脾胃；生津养液，不碍痰湿。酌占参今，归于平正。

《王旭高临证医案》

姚龙光

吉安庐陵令江绍棠，号云卿，桐城人也。接篆后政绩劳心，抱病未能调摄，且医治多误，历三月未愈，始而咳嗽痰多，畏风、胸闷，饮食减少，两目干涩，继则精神疲惫，肢体软弱，左手足酸痛麻痹，胯骨亦痛，小便不禁，下体皆冷，自疑手足痹痛为血虚，小便自流，下体冷为肾虚，前服温补之剂已两月余，病反加剧，不知何故？今征治于予，其意亦在补虚也。诊得两寸脉滑如豆转，关濡，尺沉滑而小，重按搏指，面色黄白，苔黄滑满布，口亦不渴，余曰：以脉症言，非虚

也。血虚证当申酉潮热，脉浮数，或细数，或芤涩；肾虚证当面黑，尺脉虚微，或洪大而空。今皆不然，咳嗽胸闷，寸脉滑转如豆，均痰结上焦之故；食少神疲，四肢软弱，均中气不运之故。脾胃者，营卫之原；左右者，阴阳之路；脾胃健忘则营卫通利，阴阳出入之道自无阻滞，今脾胃为痰湿所壅，营卫不通，道路皆阻，此左体痹痛之由也；贵体阳本不旺，今上中二焦壅塞，气不下行，即阳不下达，此下体皆冷，小便不禁之本也。先为清肃上焦，化痰利气。以薏苡仁、蔻仁、枳壳、贝母、桑白皮、紫苏叶、苏子、前胡、姜黄连、川厚朴、加姜汁冲服，二剂咳止胸宽，复诊，云翁仍以下虚为虑，意在用补，余曰：贵恙本有余之候，壅遏不通，若温补，郁而化热，阳愈不能下达，遗洩畏冷更甚，且痰得热而妄行，其祸有不可胜言者，惟健运中焦，化痰通络为最合法，以姜黄连、川厚朴、枳壳、生薏仁、茯苓、白术、陈皮、法半夏、秦艽、乌药叶、威灵仙、牛膝、白僵蚕，与服数剂，诸症皆愈，竟脱然矣。

《崇实堂医案》

柳宝诒

史。咳嗽而兼泄泻，一年未愈，肺阴为湿热浊痰所伤，而舌红咽干；肺移热于大肠，则澀泄无度。脉象虚数。有金损之虑。

南北沙参各 紫菀 马兜铃 蛤壳 苡仁 丹皮 川百合
桑白皮 阿胶蛤粉炒 麦冬 枇杷叶

另：琼玉膏开水送下。

二诊：前与清肺养阴，咳嗽稍减，而阴伤不复，内热脉数。

仍当清养肺胃为主。

北沙参 川百合 麦冬 阿胶牡蛎粉炒 蛤壳 白芍 川石斛
生地 茯苓 炙甘草 生熟谷芽各 枇杷叶 红枣 干荷叶

三诊：得清养药，澀泄略止，而痰咳内热未减，脉象细数，肺胃阴液俱亏。法当清养肺胃。

金石斛 玉竹 南北沙参各 生地 阿胶蛤粉炒 麦冬 马兜铃 百合 丹皮 白薇 枇杷叶

金。久患淋浊，肾阴必伤。阴虚生热，上烁肺金，则干咳作矣。脉象细数，左手带弦，兼作盗汗梦遗，患属伤阴之证。治当以养阴为主，佐以肃肺化热。

生地 白芍 洋参 麦冬 川柏 砂仁 炙甘草 旋复花 苡仁 刺蒺藜 丹皮 牡蛎 莲子

另：三才封髓丹，空心开水送下。

沈。咯血之后，继以咳逆，两月不止。刻诊脉象虚数而急，舌光尖红，已见金损营伤之象。古人治虚证，多以保元建中为主；诚以损及中气，即投药亦难效也。幸此证纳谷尚佳，中气可持，所虚脉数过甚，阴气有就润之势，肺脏有日燥之虞。兹拟以保元为主，佐以清肺育阴。冀其脉数渐退，方可渐图恢复。

淡天冬 大生地 吉林参 炙甘草 上绵芪 东白芍 软白薇 紫蛤壳 川百合 枇杷叶 燕窝

另：青蒿露冲服。

二诊：前方用保元法，佐以清肺育阴，咳嗽内热，均能就减；惟脉虚数未退，每至六月有余。凡阴虚之损，皆因营气虚衰而起，渐至营行日迟，卫行日疾，而内热生焉。愈热则愈衰，因之脉象愈数。古人论虚证，每以脉数之进退，测病之轻重，职是故也。此证纳谷尚佳，中气未坏，尚有立脚地步，可图恢复。姑与大剂养阴和营，仍合保元之意，望其脉数渐退，方有把握。

吉林参另煎冲 绵芪 炙甘草 生地 阿胶蛤粉拌 净枣仁 左牡蛎 麦冬 白芍 丹皮 川百合 苡仁 柏子仁

又，止嗽方：枇杷叶 通草 橘络 竹茹 南沙参 洋参 煎汁沥清，加鲜生地汁、大生地汁、麦冬汁、梨汁、人乳、白蜜，熬膏，加冰糖、川贝去心研

末。咳嗽时作，痰出不爽，痰色胶粘光亮，间或声如拽锯，口苦

气短，肌肉日削。此由内热冒风，郁于肺络。肺主灌溉，百脉失其润下之性，则相火反夹诸经之火上蒸耳。左寸弦数，此肝失制而木火愈张，心失养而君火遂旺也。右关细数者，肺胃俱以下降为职，肺气郁而上升，则胃亦失其下行之性，不能降其浊热，而胃亦郁而不畅也。右寸更细者，本经既有郁热，又为诸经之火所灼，肺气郁遏不宜也。其或声如拽锯者，金实不鸣也。气短者，壮火食气也。前以清燥救肺汤加清络开郁之品，痰渐能也，声亦略清，而火势仍在，则以盛夏火令，炎蒸火位，郁伏之热蕴于中，炎蒸之气灼于外，病有助而药无助，所以无大效也。拟以麦冬、石斛、芦根之甘寒，以清肺胃之火；洋参以润燥益气；桑皮、旋复、枇杷以疏肺通络；杏仁、川贝以开郁消痰；蕴热素盛，以滑石、甘草导之。调理月余，定可就愈。

西洋参 麦冬 鲜铁斛 川贝 杏仁 桑皮 旋复花
滑石 水飞 生甘草 芦根 枇杷叶

加减：肝火旺则加焦山栀，甚则加蛤黛散。心火旺则加连翘，甚则加鲜生地。胃火旺则加重石斛，甚则加石膏，轻则减之。嗽止则去杏仁、川贝。痰多则加括萎仁、海浮石。肺气渐畅则去旋复花、桑叶，重加西洋参，或加吉林参以补气；若苦寒之品，化火伤阴者，则须忌之。

另：甘蔗、梨肉、芦根打汁炖热温服，人乳亦可服。

翁。壮热无汗，咳促痰多。伏热新寒，阻于肺胃。舌白尖红，中带微灰；大解不行，恐其热燔于胃。拟用疏表肃肺、清泄胃腑之法。

鲜沙参 鲜石斛 淡豆豉 广橘红 白杏仁 生枳壳 瓜蒌皮
淡芩 酒炒 前胡 象贝 连翘 桑白皮 霜桑叶 茅根肉
枇杷叶

二诊：汗泄热减，但咳逆未平。舌苔白厚，中灰。肺胃浊邪，蕴结未化。仍当肃肺疏浊，乃能得松。

鲜沙参 白杏仁 前胡 苡仁 郁金橘红 生枳实 瓜蒌皮
黄芩 豆豉 旋复花 绢包 桑白皮 茅根肉 枇杷叶

沈。风温犯肺，咳嗽发热无汗。法当辛凉疏泄。

豆豉 大力子 杏仁 象贝 桑叶 广橘红 荆芥 前胡
枳梗 连翘

钱。发热咳嗽，头痛脉浮数。温邪发于肺胃。当用辛凉疏散。

豆豉 荆芥 薄荷 大力子 杏仁 象贝母 橘红 淡芩
前胡 连翘 茅根肉 枇杷叶

又。风温郁于肺胃。咳嗽痰腥，偏卧，肺金为热所伤。宜清热肃肺。

鲜沙参 苡仁 冬瓜仁 桃仁 桑皮 银花炭 蛤壳 川贝
知母 丹皮炭 黄芩 枇杷叶 大葶苈

丁。温邪夹痰饮上逆，肺气不得清肃。内热咳嗽，痰色带黄。法当疏降。

南沙参 杏仁 象贝 前胡 苡仁 苏子 旋复花_{绢包} 牡
蛎 海浮石 枇杷叶 茯苓 橘络

赵。浊热蕴于肺胃，蒙及心包。热势晚重，时有谵语，咳嗽气逆，痰色干黄。姑与泄浊化热，冀得外解为幸。

鲜沙参 鲜生地 鲜石斛 生苡仁 冬瓜仁 紫蛤壳 桑白
皮 粉丹皮 丝瓜络 广郁金 石菖蒲 鲜芦根 枇杷叶

杨。时邪余热未清，蒸动胃中湿浊则口甜，新凉郁遏肺气则咳嗽。脉象软细弦数。当与疏肺清胃。

南沙参 前胡 杏仁 苏子 象贝 广橘红 佩兰叶 黄芩
苡仁 茯苓皮 尖槟榔 六神曲 麦芽

章。疹后余热，留于血络。蕴热上蒸，肺金被灼，壮热喘促。姑与清阴肃肺。

鲜生地_{薄荷六分同打} 归身 青蒿 丹皮 荆芥 蛤壳

钱。热邪郁燔于肺。壮热气促，脉数如沸，更兼咳逆胸痛。络伤吐血，金受火刑，须防喘促加重。

鲜沙参 鲜生地 丹皮 知母 滑石 黄芩 归须 橘络

桑白皮 连翘 银花 广郁金 参三七 茅根肉

某。形寒发热，咳嗽少汗。风温之邪，袭于肺胃。脉数苔黄。法当清泄。

淡豆豉 杏仁 淡子芩 青蒿 鲜沙参 前胡

朱。木火挟风温蕴热上升。左偏头目不爽，鼻流浊涕。宜清泄肝胆，兼佐宣上之意。

滁菊 黑山栀 鲜地 薄荷打 丹皮炭 桑叶 夜交藤 桔梗 辛夷 蔓荆子 苦丁茶 银花 鲜竹叶

马。鼻气上通于脑。下通于肺。今鼻塞涕多头痛，自有风邪内客。风为清邪，其在上，脑既不通，肺气自闭。肺主气，而与大肠相表里，此气阻便闭之所由来也。脉左关微弦，右涩滞。清上焦肺为主，勿急急峻通大通，致伤阴为要。

白杏仁 桑叶 菊花 淡芩 薄荷 苡米 郁金 川贝 黑山栀 桔红 火麻仁 蒺藜 莱菔子 鲜荷叶

又。老年风温屡清未尽，病经匝月，而仍有背寒头痛鼻塞等象。大便闭，小便少，口渴喜热饮，咳嗽喉痒，左脉弦数，右脉虚软。此必有余风内郁，干犯肺金，金气不宣，肃降无权而致。轻剂不见中病，重药又非所宜，拟疏风以澈余邪，宣肺以通腑气，未识能得中窍否？

苏梗 桔梗 桑叶 杏仁 紫菀 郁金 川贝 甘草 茯苓 蛤壳 荆芥 枇杷叶 青葱管

吴。风温作咳，必伤肺胃之阴。以阴虚之质，咳嗽两月乃平，熏灼无疑。脉象细而带数，舌色红而少苔，悉属阴伤见象。善后之法，当清养肺胃之阴，勿使余热留恋，庶几复原。

南北沙参各 西洋参 麦冬 金石斛 小生地 川百合 上毛燕窝 紫蛤壳 橘红 白苡仁 川贝

二诊：前方清养肺胃，是因病后而设。人身五脏属阴，主藏精而不泻。阴虚之体，脏阴必亏。凡阴之亏，心肾居多，而见病则肺胃为甚。平时调摄，当补益心肾以滋水，可以生木清心，即可以保肺也。

人参 丹参 生熟地各 天冬 白芍 山药 丹皮 泽泻
茯神 牡蛎 枣仁 莲子

陆。营阴亏耗，木火易浮。近因哀感过度，肝气上逆，肺气不降。向晚内热盗汗，肝阴伤而肝阳越也。咳呛不止，气从左胁上升，逆于胸臆，正属木火刑金之候。阴愈弱则热愈炽，金愈弱则木愈强，势必金枯阴涸，肝肺两损。调治之道，不外养阴清热，肃肺柔肝。务须虚怀调摄，乃能退出损途。

生地 白芍 洋参 沙参 麦冬 牡蛎 蛤壳 川贝 苡仁
旋复花 归须同包 丹皮 白薇 郁金 桑白皮 枇杷叶 竹二青

罗。咯红之后，咳逆不已，脉象虚数。近日大便溏泄，势将上损及中。当保元养阴，参入培土生金之意。

北沙参 麦冬肉 生地炭 白芍 丹皮 白薇 怀山药 白扁豆 炙甘草 蛤壳 百合 苡仁 湘莲子 枇杷叶

花。先患咳嗽，继而咯血。刻下血虽止，而仍作咳，痰色先浓后稀。脉象细数而软，左部为甚。因肺络先伤，引动木火，耗及阴液。细审病情脉证，是肺病而及于木，乃上损之象也。时当长夏，先与肃肺养阴。

南北沙参各 淡天冬 生地 丹皮 白芍 苡仁 川百合
冬瓜仁 桑叶皮各 旋复花 枇杷叶 芦根

二诊：咳痰未止，左脉细弦，右脉虚软而均数，其症本属上损之象。舌质偏红，向晚微热，究属阴热内熏，致肺金失其肃清。刻当长夏，拟于肃肺中兼用清阴之法，望秋令得愈为佳。

紫蛤壳 川百合 生苡仁 软白薇 白茯苓 北沙参 细生地 麦冬肉 粉丹皮

另：枇杷叶露、香青蒿露、地骨皮露冲服。

伍。按脉右手浮弦而数，左手浮软如绵。阳升阴弱，木火内浮。其上半多汗，干咳心烦，木火犯于心肺也；小溲不爽，木火注于膀胱

也。火愈燔，则阴愈少，延久必致阴损。法当上清心肺，下养肝肾，以滋阴熄阳法治之；而和络利水之法，即寓其中。

北沙参 淡天冬 大生地 牡蛎 白芍 丹皮 桑白皮 地骨皮 白薇 黑山栀 川石斛 泽泻 车前子包 枇杷叶去毛包

张。里热为凉风所遏。咳嗽内热，鼻流清涕。法当辛凉清上，疏泄风热。

蔓荆子 牛蒡子 薄荷头 连翘 桔梗 生甘草 荆芥 防风 苦丁茶 白菊花 黑山栀 粉丹皮 象贝母 竹二青

尚。咳痰不爽，喉中有声，痰为邪阻，法当润降。

南沙参 前胡 射干 象贝 杏仁 苡仁 苏子 冬瓜仁 旋复花 橘络 瓦楞子 枇杷叶

方。痰浊上壅，肺胃不降。舌色干白而厚。咳呕兼作，内热不解。当与疏降。

盐半夏 橘红 茯苓 南沙参 苡仁 象贝 杏仁 紫菀 苏子 桑叶皮各 前胡 枳壳 通草 竹茹 枇杷叶

杜。咳嗽内热，右脉浮数如沸，左脉细数。热蕴于上，肺脏受伤。急与清肺化热，冀其速退。

鲜沙参 前胡 杏仁 苏子 青蒿 白薇 丹皮 淡黄芩 旋复花 桑白皮 地骨皮 枇杷叶 芦根

二诊：肺中浊热未清。咳逆不剧，脉象左细数，右浮数，痰色粘黄。仍宜清金化热。

鲜生地 鲜沙参 丹皮 桃仁 连翘 银花炭 象贝 苡仁 冬瓜仁 川百合 蛤壳 枇杷叶 芦根

张。微邪伏于阴分，寒热兼作。近感新邪，复增咳嗽。当与清阴肃肺，疏泄邪机。

南沙参 前胡 杏仁 橘红 紫菀 青蒿 淡黄芩 白薇 丹皮 生鳖甲 槟榔 茅根 枇杷叶

二诊：肺气未复，复感新邪，咳嗽内热，再与清散。

南沙参 前胡 大力子 杏仁 象贝 桑白皮 冬瓜仁 紫菀 苏子 青蒿 瓜蒌皮 橘红 桑叶 枇杷叶

施。时邪之后，余热留恋，郁于肺络。咳逆缠绵，肺病及胃，兼作呕吐。脉象虚数。内热痰黄。热久阴烁则津枯，咳久肺伤则浊壅。病在虚实之间，当清肺胃，佐以养阴。

南北沙参各 旋复花 桑白皮 蛤壳 川贝 生苡仁 冬瓜仁 瓜蒌仁 白薇 丹皮 生地 竹二青

二诊：咳逆两减，脉象虚细而数。肺络之热未清，而阴气先虚，余热留恋，最易伤及肺金。用养阴清热，束肺和络之法。

北沙参 生地 丹皮 白薇 鲜南沙参 川贝 桑叶皮各 旋复花 冬瓜仁 橘红 蛤壳 枇杷叶 茅根

刘。络气不通，咳逆引痛，痰色腥黄而秽。浊热内壅，肺金不降。宜清肺和络。

鲜沙参 冬瓜仁 苡仁 桃仁 旋复花 归须 橘红 瓜蒌皮 桑叶皮各 滑石 杏仁同打，绢包 芦根 枇杷叶

柯。寒入肺俞，郁火不化，咳呛气逆，用温化法。

炙麻黄 盐半夏 茯苓 杏仁 冬瓜仁 款冬花 南沙参 苏子 橘红 苡仁 生甘草 枇杷叶 姜皮 紫菀

丁。春间发热，咳嗽经复，发热止而咳嗽不愈，痰色或稀或黄。病由外感与痰涎蒸结于肺，久而不化，熬炼熏灼，肺液被伤。脉象左手不和，渐露内热之象。舌苔根剥，胃液已伤。刻当燥金主令，宜清泄郁伏之邪。望其肺气得清，可以乘时调复，乃为至美。

南沙参 冬瓜子 苡仁 旋复花包 紫蛤壳 桑叶皮各 茯苓 橘红 紫菀 瓜蒌皮 海浮石 丝瓜络 枇杷叶 芦根

金。肺肝络脉不和，咳嗽胸板，肝气逆而肺不能降，重则有咯血之虑。

生地 白芍 归须 橘络 旋复花 郁金 麦冬 茯苓 北沙参 川百合 苡仁 蛤壳 紫菀 枇杷叶

王。肺金为浊热所伤，尚未清彻，复感时邪，寒热间作，左脉浮数，舌中干红。仍宜清养法，佐以疏泄。

鲜沙参 知母 淡黄芩 青蒿 郁金 川石斛 川贝 蛤壳
桑叶皮各 蜜梗 橘红 枇杷叶

《柳宝诒医案》

孙西台

治赖氏产后感寒作嗽。医者误为阴证，服熟地、鳖甲、地骨、沙参诸养阴润肺之药，服百余剂而嗽仍不止。延至三年，干咳无痰，问治于余。余曰：治病不穷其原无益也。盖寒邪感于产后，本入阴分，复以滋腻之品滞其邪，多服则邪益深，终无奏效。凡初感风寒者，可以表散从事。若延至多年，又宜另立治法矣，具方于左。

山东梨十片 生姜半斤，捣汁 半夏六钱 莲藕一个，捣汁
蜂蜜半斤 陈皮五钱 薄荷 以上合熬去渣，滴水成珠，贮之以罐，
每饭后开服一二匙。

《昼星楼医案》

张士驥

陆观察，脉弦细如丝，咳吐稀涎味咸，脐上气冲即呛咳，时有喘伏。已延数月，医者束手。《内经·论咳篇》最详，今参脉象症状，殆肾咳欤，按经治病，当不谬耳。

蛤蚧尾一对 女贞子四钱 云茯苓三钱 干杞子五钱
干地黄四钱 南杏仁三钱 沉香节五分 川贝母二钱 破故纸钱半
胡桃肉二钱

十剂后愈其半，嘱日以蛤蚧一对，杞子五钱，连服数十次遂痊。

《雪雅堂医案》

马文植

通州，顾左，三十六岁，两天不足之体，脾弱不能化津，变饮生痰，停蓄胃中，痰随气升，致生喘咳。不能右卧，咳急则涕泪交流，肺气亦亏，脉来弦疾，左关较大，谷减神羸，水弱肝强，积饮不化。拟养阴柔肝，扶脾化饮，兼肃肺金。

北沙参三钱 淮山药二钱 甜杏仁二钱 法半夏一钱五分
炙冬花一钱五分 海螵蛸一钱五分 橘红一钱 煅牡蛎三钱
炒香瓜子壳三钱 云苓三钱 黑料豆三钱 旋覆花一钱五分

又：法半夏四两，食盐五钱，共研细末，和匀，每服二钱，开水下。

复诊：痰气较平，咳嗽较减，右卧稍好。宗前法进治。

原方去旋覆花、北沙参，加参须一钱、於术一钱五分、红枣三枚。

某。咳呛经年，声重浊而痰不爽。寒邪恋肺，肺气不宣，日渐羸瘦，六淫之气亦可成痹，幸而饮食如常。宜畅气宣肺之法。

制半夏 淡干姜 射干 桂枝 枳壳 款冬花 清炙草 皂角炭

复诊：服之见效，原方去干姜、桂枝、皂角炭，加百部、紫菀、桔梗。

某。左关滑大之象已减，阴气稍复，数犹未平，痰热未尽。肝阳素旺，上贯于肺，频作咳呛，遇热亦咳。肺为清虚之脏，畏热畏寒，肺气亦虚，日来肢节不和，步履欠健。先为平肝肃肺，俟咳呛愈后，再进培养。

北沙参 半夏 杏仁 石斛 橘红 象贝 云茯苓 蛤壳
炙紫菀 合欢皮 枇杷叶

二诊：咳呛较平，脉亦较静，频有转机，惟喉际作干，语言未亮。肺肾阴亏，阴不上承。还宜清肺发声，兼清痰气。

南沙参 杏仁 桔梗 橘红 竹茹 半夏 炙兜铃 川贝
百部 石斛 梨汁 冬花 枇杷叶

广东,陈培之。脉弦大,左寸沉濡,关部沉滑。气虚寒客下焦,狐疝多年,劳则坠胀作痛。太阴脾有湿痰,冬令则气升喘咳,痰湿旁流于络,臂痛足肿。拟温肺化痰,兼纳肾气,先治其嗽。

法半夏 沉香 冬术 炙草 杏仁 旋覆花 橘红 苡仁
茯苓 黑料豆 紫菀 姜 白果

二诊:外寒外动内痰,肾气上浮,咳而微喘,胸膈不畅,喉际作痒,昨投温肺纳肾,逆气略平。仍昨法中加以宣畅。

蜜炙前胡 炙冬花 炙草 杏仁 苏子 茯苓 半夏 枳壳
橘红 紫菀 旋覆花 桂枝 白果 姜

三诊:脾有积湿,变饮生痰,渍之于肺。夜来则气升痰上,咳而作喘,足跗浮肿,肺气不降。拟三子养亲加味主之。

苏子 法半夏 冬花 杏仁 茯苓 炙草 苡米 莱菔子
橘红 白芥子 姜

四诊:进三子养亲,痰嗽较减,气逆较平。惟足肿未退,脉弦缓滑,脾湿不清。前法加减。

原方加桑皮

五诊:连日咳减痰稀,胸膈亦畅。惟夜分咳时,尚难平卧,脉弦缓滑。肺虚寒伏,积饮不清,肾气少藏。拟温肺饮主之。

法半夏 橘红 苏子 白前 炙草 炮姜 萆仁 桂枝 冬
花 茯苓 杏仁 旋覆花

六诊:寒痰喘嗽,已愈八九,足肿未退,右少腹气疝坠胀。用宜养肺为主,理气佐之。

参须 法半夏 白前 冬花 桂枝 苏子 云苓 萆仁 炒
黑干姜 橘红 炙草 杏仁

《马培之医案》

余听鸿

常熟瞿桥倪万泰染坊何司务,于庚寅除夕得病,寒热咳嗽痰

多。他医进以豆豉、栀子、杏仁、萎、贝、蛤壳、茅根之类，更剧，一日吐出稠膩之痰数碗。辛卯正月初四，邀余诊之。脉紧肌燥无汗，咳喘痰白如胶饴，日吐数碗，胁痛。余曰：此乃寒饮停胸，再服凉药，即危矣。进小青龙汤，原方略为加减，重加桂、姜。服三剂，症忽大变，猝然神识如狂，舌红口燥，起坐不安，即食生梨两枚。明晨又邀余去诊，症似危险，诊之脉紧已松，口渴舌红，又已化火，阳气已通，可保无虞。后转服化痰润肺之剂，仍每日吐稠膩白痰碗余，十余日后，再服六君子等和胃药十余剂而愈。痰寅冬温，愈于温药者多，死于凉药者广，然亦要临症活变，断不可拘执也。

《余听鸿医案》

沈祖复

琴雪轩某牙科之女病顿咳已四月，不咳则已，咳则百余声不止，气不接续，骨瘦如柴。先生用麻杏石甘汤两剂而愈。年余又病寒热咳嗽，痧点隐约不透。先生偕门人丁士鏞同去诊视，脉象闷郁，舌苔光红，壮热口糜，神情模糊。曰：“此邪热炽盛，故痧点不能透达也。时医只知透发，但余须用犀角、紫草清凉一派，此药非君家不开，防时医之訾议也。”其家信，服之大便得解，痧点外达；再剂点齐；三剂而愈。

水警厅第一队长，合肥刘姓媳年十七岁，容貌雅秀，躯干不长，自结婚后，日渐瘦削，寒热咳嗽，言语音低，经事不利，已五月矣。他医用肃肺之药，不效。先生以为破瓜太早，有伤正元，此虚咳也。用黄芪、党参、归身、首乌、桂枝、白芍、鸡血藤、续断、甜杏仁气血并补等品出入，两服而寒热退，咳嗽减，形容亦转丰腴。复方加细生地、丹参、藏红花、月秀花、阿胶、蜜炙马兜铃等以通其月事。

蒋右。肺主气，脾主运，肝主疏泄。客冬感受寒邪，以致咳嗽。今已久嗽伤阴矣，金伤不能制木，两胁撑痛；疏泄不利则大便艰结；木乘上位则脾阳不振，湿痰所由生也。若用养阴以肃肺，恐碍脾胃；

用温燥以平木，以恐劫阴。愚见先行培土生金，金胜则本能制矣。

淮山药 北沙参 当归身 橘络 茯苓 光杏仁 神曲 谷芽 白蔻仁 萸肉 香附

《医验随笔》

方耕霞

王。遗精伤肾，肾上连肺，故久咳不已。尺脉弦。拟益肾养金。

熟地 杜仲 宋半夏 白芍 代赭石 五味子 茯苓 左牡蛎 旋覆花 胡桃肉

濮。咳较松，脉仍数，肺肾之阴虚未复。滋水清金不可废，而苦降未可多服，恐伤胃气也。

生地 萸肉 北沙参 芡实 白芍 黄芪 川贝 金樱子 百合 萸皮 枇杷叶

陈。冷嗽喘不得卧，宗仲景意。

苓桂术甘 干姜 五味子 姜半夏 款冬花 代赭石 旋覆花

二诊：仍然咳不得卧，据述病从胎前而得。伏寒恋肺无疑。姑再法苓甘五味姜辛意。

细辛 茯苓 干姜 五味子 炙草 苏子 款冬花 石英 沉香 白果

三诊：苓甘五味姜辛既效，且勿纷更。

原方加莱菔子适量。

李。咳嗽痰少，左关数大，乃肺虚火盛感邪之象。宗钱氏意。

补肺阿胶去粳米 加冬瓜子 桑叶 前胡 川贝 旋复花 枇杷叶

再诊：数脉大退，肺经之虚热松矣。前方散而兼润，与病吻合。今减散品。

前方去牛蒡 加玉竹

高。伤风咳嗽小恙也。然舌干而裂，肺肾津气大亏，慎勿渺视。

桑叶 杏仁 前胡 川贝 桔梗 沙参 归身 荆芥 生草
蛤壳 冬瓜仁 枇杷叶

濮。咳嗽鼻衄，虽然初起，而见弦数之脉，肺肾阴虚。肝火独旺已著，最易涉怯。

桑叶 地骨皮 杏仁 生草 前胡 川贝 细生地 丹皮
黄柏 知母 莲心 鲜藕节

二诊：左尺弦，肾水亏也。右寸数，肺金热也。咳嗽遗精，虚劳已见一斑，极宜谨慎为嘱。

生地 川贝 桑皮 生草 丹皮 白芍 黄柏 麦冬 沙参
金樱子 枇杷叶

三诊：右部数象大减，左尺弦涩仍在，肺热虽退，肾阴未复，尚宜谨调。

原方去生草 沙参 白芍 黄柏 加浮石 萸肉

王。寒伏肺俞，气逆不降，致咳嗽积年不愈，甚则吐血，此非肝肾阴亏，乃胃逆伤其络也。宗仲圣法。

桂枝 白芍 炙草 苏子 干姜 半夏 茯苓 浮石 款冬
五味子

再诊：前以小青龙加减，咳阵较少，痰中带红未尽，夫胃逆少降，久咳伤络而血溢。当治其咳不当治其血，温降既合，不必数数更方。

桂枝 白芍 干姜 五味子 炙草 茯苓 款冬花 旋覆花
代赭石 半夏 沉香汁

高。肺与大肠相表里，干咳而且便血，秋燥伤金。宜清肺润肠为治。

瓜蒌皮 桑皮 槐米 川贝 黛蛤散 前胡 归身 杏仁
阿胶 秦艽 枇杷叶

花。寒邪似热，头疼鼻塞，咳嗽痰涕多浓，拟与轻泄。

辛夷 川芎 桑叶 薄荷 象贝 荆芥 连翘 陈皮 通草
杏仁

某。湿去燥来，疟止而转咳嗽，立方宜变化湿为清燥矣。

萎皮 杏仁 桔梗 桑叶 元参 川贝 生草 陈皮 前胡
茅根 枇杷叶

再诊：燥气去而未尽，再润养手阴以清胃气。

桑叶 元参 生草 川贝 石斛 前胡 杏仁 神曲 谷芽
枇杷叶

严。右大左小之脉，红刺裂纹之舌，虽泄泻伤风，亦属肺胃有热。法在清而化之。

桑叶 石斛 麦冬 沙参 木香 茯苓 砂仁 甘草 白芍
橘白

蒋。风热郁肺，咳嗽鼻衄，不必治血，邪去而血自去。

麻黄 桑皮 杏仁 防风 川芎 黄芩 象贝 旋覆花 前
胡 茅根

再诊：鼻衄不来，咳犹未已。再与疏风清肺。

荆芥 防风 杏仁 象贝 桑皮 桔梗 前胡 川芎 蔓荆
子 茅根

陈。甲木偏于春阳之位，金气受困，故咳嗽特甚。亢龙有悔，宜滋水以养之。

生地 龟板 麦冬 沙参 牛膝 川贝 百合 杏仁 归身
陈皮 枇杷叶 女贞子

谈。咳而右脉浮紧，风邪寒邪伏于肺经，须宣之、散之，否则延成冷嗽。

麻黄 杏仁 甘草 桔梗 苏叶 荆芥 款冬 象贝 前胡
旋覆花 生姜

某。咳嗽久而究是风邪恋肺也。肾阴虽虚，且勿作阴虚治。

细辛 甘草 茯苓 五味子 干姜三分同打 象贝 归身

冬瓜子 杏仁 桑皮

吴。音闪不亮，喉中水鸡声，脉左尺弦搏，良由风留肺管不去也。

白前 桂枝 旋覆花 细辛 茯苓 白芍 桔梗 炙草 萎皮 杏仁

谈。阳旺阴虚之体，感受秋燥，咳嗽带红，今痰血虽止，而咳犹未已。脉细搏，深虚涉怯。

补肺阿胶汤去牛蒡 加川贝 桑叶 萎仁 沙参 枇杷叶

二诊：咳痰仍浓，夜来鼻塞，病久肺热且虚，大节在迩，殊恐呛极而带血。

桑叶 杏仁 萎皮 北沙参 生草 梨肉 旋覆花 川贝 蝉衣 知母 地骨皮 芦根

三诊：痰稀咳松，脉数退弦未退。再拟清养。

桑叶 川贝 沙参 知母 生草 萎皮 白芍 蝉衣 地骨皮 芦根 梨肉

陈。寒邪束肺，肺气逆而不降，喘急咳嗽，治以散降。

麻黄 款冬 杏仁 苏子 葶苈 前胡 象贝 细辛 五味子 桑皮

再诊：咳松喘减，再从前议。

前方去葶苈 加旋覆花

张。嗜酒伤肺胃，热沸腾致咯血咳嗽。姑先清降。

鲜生地 萎皮 海浮石 川贝母 黑栀 陈皮 旱莲草 知母 丹皮

《倚云轩医话医案集》

凌矣

王，湿郁气滞，肝肺不和，咳呛气逆，宜用清泄。

米仁 旋复花 路路通 丝瓜络 冬瓜仁 生蛤壳 赤苓

车前草 白杏仁 炒白痰 通草

兼肺热合泻白散。

如面黄加茵陈。

如胀加莱菔子。

《凌临灵方》

张锡纯

天津张某某，年二十六岁，得肺病咳嗽吐血。

病因：经商劳心，又兼新婚，失于调摄，遂患劳嗽。继延推拿者为推拿两日，咳嗽分毫未减，转添吐血之证。

证候：连声咳嗽不已，即继以吐血。或痰中带血，或纯血无痰，或有咳嗽兼喘。夜不能卧，心中发热，懒食，大便干燥，小便赤涩。脉搏五至强，其左部弦而无力，右部浮取似有力，而尺部重按豁然。

处 方：生怀山药一两 大潞参三钱 生赭石六钱，轧细
生怀地黄六钱 玄参六钱 天冬五钱 净萸肉五钱 生杭芍四钱
射干三钱 甘草二钱 广三七二钱，轧细

药共十一味，将前十味煎汤一大盅，送服三七末一半，至煎渣重服时，再送服其余一半。

复诊：此药服两剂后，血已不吐，又服两剂，咳嗽亦大见愈，大小便已顺利，脉已有根，不若从前之浮弦。遂即原方略为加减，俾再服之。

处 方：生怀山药一两 大潞参三钱 生赭石六钱，轧细
生怀地黄六钱 大甘枸杞六钱 甘草二钱 净萸肉五钱 沙参五钱
生杭芍二钱 射干二钱 广三七钱半，轧细

药共十一味，将前十味煎汤一大盅，送服三七末一半，至煎渣重服时，再送其余一半。

效果：将药连服五剂，诸病皆愈，脉已复常，而尺部重按仍欠

实。遂于方中加熟怀地黄五钱，俾再服数剂以善其后。

《医学衷中参西录》

陈莲舫

青浦，诸。咳嗽绵延，痰多气急，胸皖窒塞，纳微神倦，脉息濡细，治以和降。

旋覆花 粉前胡 炙桑皮 川贝母 淮牛膝 橘红 光杏仁
家苏子 炙款冬 冬虫夏草 白茯苓 枇杷叶

周庄，某。咳呛半年，痰多气逆，脉息沉弦，右手带数，恐由伤成劳，治以和降。

旋覆花 粉前胡 炙桑皮 川贝母 淮牛膝 橘红 叭杏仁
家苏子 炙款冬 冬虫夏草 白茯苓 枇杷叶 沉香屑 西芪
皮 白石英

周。肝肺内伤，有时咳嗽，有时痞攻，脉见浮弦，延久恐防失血，治以和降。

旋覆花 川贝母 淮牛膝 白茯苓 细香附 淡秋石 生白
芍 光杏仁 冬虫夏草 乌沉香 炙桑皮 广橘络 丝瓜络

杨。哮喘，产后感邪复发，脉息细弦，治以和降。

旋覆花 家苏子 炙款冬 白石英 炒归身 白茯苓 光杏
仁 冬瓜子 炙桑皮 淮牛膝 生白芍 新会皮 枇杷叶

施。咳嗽气急，寒热无汗，邪无出路也。

冬桑叶 淡豆豉 粉前胡 炙款冬 白茯苓 沉香屑 黄防
风 光杏仁 家苏子 姜竹茹 川通草 广橘红 葱头

陈。上为咳喘，下为溺多。《内经》虽有膀胱之咳，咳究出于肺也。考膀胱与肾为表里，肺与肾又属相生。就述病情，摄纳肾气之主，肺、膀胱兼顾之，拟方候商。

生绵芪 广蛤蚧 光杏仁 抱茯神 菟丝子 炒粟壳 北沙
参 冬虫夏草 炙款冬 花龙骨 广橘红 枇杷叶

冉直，王。肺肾两失相生，肾不摄肺，肺气为逆，哮喘有年，近发更甚，痰多气喘，脉滑无力，拟用和降。

生绵芪 广蛤蚧 旋覆花 白石英 细白前 炙款冬 北沙参 乌沉香 光杏仁 淮牛膝 炒苏子 广陈皮 枇杷叶

振先兄。肝肺不调，干咳虽减，形寒形热，寒热，盗汗，再从清养。

西芪皮 北沙参 旋覆花 炒丹参 川石斛 绿萼梅 黄防风 冬虫夏草 白石英 柔白薇 白茯苓 广橘红 枇杷叶

徐。气液两亏，咳呛屡发，脉息细数，治以和养。

生绵芪 冬虫夏草 旋覆花 白茯苓 淮牛膝 橘红 北沙参 白石英 光杏仁 粉前胡 生白芍 枇杷叶

上洋，金锡生。先饮后痰，现在痰与饮混淆内生，当脘作痛，气喘少纳，咳呛频频。痰饮久发伤中，中气不振，肺气为弱，肝邪内炽。脉右寸浮濡，左关弦劲，余部滑，尺软。防肝肺日为劫烁，有失血进怯门径。

北沙参 北五味 旋覆花 法半夏 沙苑子 白茯苓 广蛤蚧 生白芍 光杏仁 抱茯神 川杜仲 广陈皮 姜竹茹

八帖后去沙参、茯苓，加吉林须、伽喃香，再服八帖。

沈竹臣兄。肺肾两亏，生痰积饮，春冬每发咳呛，入冬为尤甚，腰酸，气逆痰多，脉象浮濡，治以甘温降纳。

生绵芪 花百合 紫石英 旋覆花 炙款冬 川杜仲 紫胡桃 北沙参 乌沉香 淮牛膝 生白芍 炒苏子 白茯苓 枇杷叶

八帖后加吉林参、枸杞子、去款冬、苏子。

嘉兴，某。咳呛绵延，痰薄气怯，心悸头眩，属虚多邪少，治以清降。

生绵芪 白石英 冬瓜子 旋覆花 粉蛤壳 淮牛膝炭 北沙参 冬虫夏草 家苏子 光杏仁 生白芍 广橘红 燕窝屑

初复：咳嗽稀痰，中有积饮，饮邪射肺，娇脏受伤，治以清降其肺，摄纳其肾。

吉林须 生绵芪 广蛤蚧 淮牛膝 光杏仁 粉蛤壳 广橘红 淡秋石 北沙参 冬虫夏草 生白芍 冬瓜子 炙款冬 枇杷叶

二复：咳嗽，夜半为甚。肝肺之气，有升少降，再从和养。

旋覆花 北沙参 淮牛膝 杜苏子 粉蛤壳 白茯苓 毛燕窝 光杏仁 冬虫夏草 白石英 细白前 炙桑皮 广橘皮 枇杷叶

陈先生。咳呛绵延，头蒙恶风，心悸不宁，脉息浮细，肺失清肃，心肾并亏，拟以和养。

吉林须 淮牛膝 光杏仁 粉蛤壳 生白芍 元生地 毛燕窝 川贝母 白茯苓 橘红 枇杷叶

丁。咳呛痰多，服肤焦灼，病情秋后消烁，脉见弦数，舌剥，法以清降。

北沙参 光杏仁 炙桑皮 生白芍 白茯苓 陈皮 淡秋石 川贝母 地骨皮 淮朱膝 粉蛤壳 枇杷叶

芝山兄。咳嗽咽痛，脉息细数，气阴两亏，必须调补。

吉林须 北沙参 川贝母 川石斛 白茯苓 橘红 阿胶珠 冬虫夏草 光杏仁 黑料豆 花百合 枇杷叶

本镇，毛。哮喘，渐肿，恐肿势随气而升。

川桂枝 细白前 白茯苓 粉草薹 炙款冬 沉香屑 生白芍 家苏子 冬瓜皮 木防己 广橘红 荷叶

练塘，金。咳呛，早晚为甚，气急痰多，脉浮大不敛，两手皆弦，属上热下寒，肺肾为之失扭，肝阳亦失静敛，中蓄痰饮，拟以能调肝肺，摄纳封藏。

吉林须 广蛤蚧 乌沉香 淮牛膝 生白芍 白茯苓 胡桃肉 北沙参 叭杏仁 冬虫夏草 粉蛤壳 冬瓜子 新会皮 枇

杷叶

张。咳呛，旧根势有发展，痰多气急，脉石浮弦，再从和肺调中。

旋覆花 北沙参 粉前胡 炙桑皮 白茯苓 生白芍 光杏仁 冬虫夏草 粉蛤壳 新会皮 冬瓜子 枇杷叶

同里，朱。寒热渐除，咳呛气怯，脉息弦细，再从和降。

生绵芪 旋覆花 家苏子 炙桑皮 白石英 白茯苓 紫胡桃 北沙参 光杏仁 细白前 炙款冬 生白芍 广橘白 枇杷叶

嘉善，福堂兄。中气不振，积湿蓄饮，饮与湿并又成胶痰；营卫伤则为寒热，俯仰失则为喘急。脉息细弦，恐转瞬成劳。

吉林须 旋覆花 白木耳 粉蛤壳 生白芍 白茯苓 淡秋石 光杏仁 冬虫夏草 淮牛膝 制女贞 广橘红 冲琼玉膏

硃石，蒋。肾不摄肺，肺气为逆，清晨气急，痰亦上壅，脉见弦数，拟以清养。

旋覆花 北沙参 白石英 冬瓜子 炙桑皮 广橘红 光杏仁 冬虫夏草 淮牛膝 家苏子 白茯苓 枇杷叶

丁。咳呛绵延，营卫偏胜，肌肤焦灼，见风畏寒。脉息弦数，虚怯症最不易调扶，过秋分大节，以冀由凶化吉。

生绵芪 旋覆花 元生地 白茯苓 白石英 粉蛤壳 北沙参 甜杏仁 淮牛膝 白木耳 生白芍 广橘红 枇杷叶

程。咳呛，渐发渐重。脉象濡滑，尺软，肾不摄肺，肺气上逆，治以和降。

旋覆花 淡秋石 冬瓜子 淮牛膝 白石英 白茯苓 光杏仁 川贝母 家苏子 广蛤蚧 乌沉香 新会皮 枇杷叶。

嘉兴，李。咳呛未减，厚痰薄痰杂吐，寒少热多，日无间断，脉息细滑，舌黄带剥，治以清养。

吉林须 银柴胡 旋覆花 淡秋石 冬虫夏草 冬瓜子 北沙参 西芪皮 粉蛤壳 白茯苓 淮牛膝 环粟子 枇杷叶

周庄，某。肿胀于大腹，未退，脾胃不复，由阳耗阴，有时烦躁，有时疲困，喘咳纳倒，恐逢节变迁，治宜和养。

西洋参 毛燕窝 淡秋石 制丹参 淮牛膝 川杜仲 新会皮 川贝母 川石斛 北五味 抱茯神 白茯苓 生白芍 枇杷叶

吴。频发吐血，咳嗽，骨蒸，脉数，肝肺皆伤，节力少食，忌咸冷，免春中重发。

生黄芪 粉丹皮 肥知母 秦艽 款冬花 广陈皮 细桑枝 细生地 制丹参 肥玉竹 天花粉 生蛤壳 生甘草 藕节

徐。气营两亏，风痰俱为用事，胸痹，腹鸣，头眩，腰酸。现在吃紧咳嗽，脉息细迟。治以和降。

炙苏子 制香附 生白芍 炙款冬 川杜仲 淮牛膝 冬瓜子 新会皮 白茯苓 沉香曲 法半夏 姜竹茹 枇杷叶

孔。咳呛绵延，致肺伤而为痿躄，经有明文，从此调治。

西党参 叭杏仁 制女贞 粉蛤壳 旋覆梗 白茯苓 生绵芪 冬虫夏草 川石斛 炙款冬 沉香屑 广橘红

朱。肝升太过，肺降无权，咳呛痰腥，秽气上冲，恐成肺痈，脉息滑数，有方兴未艾之势。

北沙参 冬瓜子 淡秋石 川贝母 广橘红 白茯苓 光杏仁 生米仁 炙桑皮 生白芍 粉蛤壳 川通草 枇杷叶

乍浦，吴。肝肺郁热，左目起星，咳呛痰多，灼势汗出，风邪湿邪内蒸，致肝肺受患，治以清泄。

羚羊片 木贼草 光杏仁 柔白薇 粉蛤壳 冬桑叶 肥知母 密蒙花 川贝母 淮牛膝 橘红 枇杷叶

复方：西洋参 草决明 光杏仁 晚蚕砂 粉蛤壳 钩藤 生白芍 元生地 密蒙花 川贝母 淮牛膝 炙桑皮 橘红 枇杷叶

邵兰荪

安昌高。舌白滑，脉细数，咳嗽痰迷，咯不易出，气逆，周身骨节痛。宜防损。五月初三日

北沙参三钱 生石决明六钱 甜杏仁三钱 炙甘草八分
茯苓四钱 川贝二钱 怀药二钱 冬瓜子三钱 生地三钱 紫菀钱半
盐水炒橘红一钱

清煎五帖。

又：咳不减，喉中贮痰不爽，咳不易出，脉濡细，舌滑，头晕肢楚。宜清气熄风，利湿化痰。六月初五日

瓜蒌皮三钱 煨天麻八分 冬瓜子三钱 生石决明四钱
川贝三钱 白蒺藜三钱 茯苓四钱 通草钱半 甘菊钱半
光杏仁三钱 广橘红一钱

清煎四帖。

又：湿酿成痰，喉中咯不易出，舌滑，大便不快。仍遵前法损益。

瓜蒌皮三钱 金沸花三钱，包煎 川贝二钱 通草钱半
广橘红一钱 广郁金三钱 杏仁三钱 焦山栀三钱 茯苓四钱
紫菀钱半 桑叶三钱

清煎四帖。

史介生评：肝阳上越，挟湿化痰，阻滞气机，以致咳嗽而咯痰不爽。初方健脾养胃、清肺渗郁，继则参以平肝熄风，终则清宣肺气，兼渗湿热。三方之中，以次方尤为灵动。

大西庄宋。呛咳喉痒，脉弦细，舌转微白，潮热较差，食入恶心。宜清肺胃化痰。四月十六号癸卯廿九日

紫菀二钱 光杏仁三钱 炒谷芽四钱 白前钱半 川贝钱半
茯苓四钱 蔻壳一钱 橘红一钱 仙半夏钱半 青蒿梗一钱
通草钱半

清煎三帖。

又：潮热不清，脉弦细数，咳嗽如前，溲溺赤。宜清热、通肺、化痰。防血溢。四月念三号甲辰初七日

秦艽钱半 霜桑叶三钱 白前钱半 焦山栀三钱 丹皮二钱
川贝二钱 广橘红一钱 通草钱半 青蒿梗一钱 地骨皮三钱
杏仁三钱

清煎三帖。

史介生评：阴虚热盛，灼液成痰而为咳嗽。今以舌转微白，继则溲溺变赤，是属更感新邪之候，肺胃叠次受戕，肝阳上越莫制。前后两方，既清内热，又祛新邪，但阴液骤难恢复，已属难治之症，后闻斯人于六月望边竟至不起。录之以为辨证之一助。

安昌李妇。呕减热缓，呛咳渴饮，脉滑数，经停月余，小溲稍利，偶有呃逆，脘痛。宜宣肺、和中、化痰。九月初五日

瓜蒌皮三钱 射干钱半 广橘白一钱 白前二钱 广郁金三钱
光杏仁二钱 焦山栀三钱 柿蒂七只 川贝母二钱 霜桑叶三钱
天花粉三钱 引枇杷叶五片

三帖。

又：呕逆已差，脉小滑，经停月余，呛咳脘闷，气冲欲呕。宜清养肺胃化痰。九月初九日

黄草斛三钱 川贝钱半 大腹绒三钱 藿梗二钱 橘白一钱
扁豆衣三钱 广郁金三钱 绿萼梅钱半 桑叶三钱 炒谷芽四钱
蔻壳钱半

鲜枇杷叶七片，去毛

三帖。

又：呛咳未除，舌红，潮热，脉滑数，经停，胸闷心惕，宜清养肺胃为主。九月十三日

南沙参三钱 冬桑叶三钱 橘红一钱 炒知母钱半 地骨皮三钱
川贝母钱半 谷芽钱半 绿萼梅钱半 银胡一钱 紫菀二钱
黄草石斛三钱 鲜枇杷叶七片

三帖。

史介生评：肝经郁热上升，犯胃则呕恶呃逆，冲肺则咳呛脘闷，日久而痰气凝滞，经隧不宜。初方宣肺化痰，继则养胃清肝，终则又参入滋液退热，方法颇有次序。

闺女虫气作痛，夹杂风邪，呛咳面浮，舌心光，非轻貌之症，防剧。

川楝子一钱五分 金沸花三钱 桔梗一钱五分 光杏仁三钱
延胡三钱 橘红一钱 赤苓三钱 丝通草一钱五分 炒青皮八分
仙半夏一钱五分 前胡一钱五分 引鲜竹肉一九 三帖

清窍未和，睡即呛咳，胃气稍振，脉小数，音犹嘶，还防变幻。

杜马兜铃一钱 白前一钱五分 淡竹叶一钱五分 炒黄芩一钱五分
苦丁茶一钱五分 川贝一钱五分，不杵 光杏仁三钱 生米仁四钱
谷芽四钱 射干一钱 炒栀子三钱 紫苑一钱五分
引鲜枇杷叶三片，去毛 三帖

温邪未清，身热口燥，痰壅气塞，脉弦数，苔黄腻，呛咳便利，症尚重险，宜防变幻。

前胡一钱五分 象贝四钱 银花二钱 赤苓四钱
老式天竹黄二钱 原滑石四钱 焦山栀二钱 光杏仁三钱
炒黄芩一钱五分 赖橘红八分 丝通草一钱五分 引鲜竹肉一九 三帖

上咳嗽，下便泻，癸水不调，脉弦细。最重之证。

北沙参三钱 石莲子三钱 桑皮三钱 诃子肉三钱 茯苓四钱
怀药四钱 炒米仁四钱 玫瑰花五朵 新会皮一钱五分 扁豆壳三钱
砂壳一钱五分

久嗽不已，喉有血腥。脉小数潮热，癸水不调，宜防损怯之虑。

北沙参三钱 秦艽一钱五分 金沸花三钱，包 桑叶三钱
川贝二钱 橘红一钱 白石英三钱 光杏仁三钱 紫苑一钱五分
丹皮一钱五分 谷芽四钱

呛咳未除，头晕目暗，脉虚右弦滑，苔滑微灰，便结。宜清肺安神为主。

南沙参三钱 冬桑叶三钱 炒枣仁三钱 麻子仁三钱 茯神四钱
蕤仁一钱五分 广橘红一钱 谷芽四钱 夜交藤三钱 川贝一钱五分
白前一钱五分 鲜枇杷叶五片 三帖

《邵兰荪医案》

何长治

左。力伤气屏，致咳呛痰凝滞，气逆肋痛，脉细软无力。金水交困，调理非易也。

潞党参二钱 焦冬术二钱 五味子四分 炒苏子钱半
款冬花钱半 瓦楞壳三钱 茯苓三钱 川朴八分 佛手柑八分
炙甘草四分 陈皮八分 加姜汁炒竹茹钱半 海粉四分，洗

左。腹痛便泻，脉来浮濡带数，咳嗽音哑，风邪湿滞为病。

生白术二钱 赤茯苓三钱 广藿梗钱半 防风钱半 泽泻钱半
神曲三钱 川朴八分 大麦芽三钱 猪苓三钱

左。风邪外感，以致肺气失宣。痰多而咳不甚爽，宜辛泄法。

生黄芪钱半 左秦艽钱半 玉桔梗一钱 象贝母三钱
天花粉三钱 青防风钱半 生蛤壳三钱 款冬花钱半 冬桑叶二钱
广陈皮八分 生甘草四分 生姜二片 加青葱管一支

复诊：咳呛止。近感风热，目痛发肿，脉浮数。暂从祛风和营法。

青防风钱半 蔓荆子钱半 赤芍药钱半 炒枳壳钱半 生草四分
荆芥穗钱半 生归尾钱半 白蒺藜二钱 炒麦芽三钱 木贼草钱半
加荷蒂四枚

杨，二十七岁。壬申五月二十五日复。咳呛骨热虽减，脉细数未除。踵前法滋化。

生黄芪钱半 北沙参钱半 中生地四钱 生甘草四分
湖丹皮钱半 款冬花钱半 麦门冬二钱 广橘白一钱 干百合二钱

秦艽钱半 煅牡蛎三钱 加枇杷叶二片,去毛

李,二十岁。壬申六月十六日复。骨热减,咳呛不已,脉细弱。金水交亏,秋冬恐重发。

生黄芪钱半 北沙参钱半 中生地四钱 生甘草四分
麦门冬二钱 款冬花钱半 湖丹皮钱半 橘白一钱 远志钱半
鳖甲四钱 加枇杷叶二片,去毛

孟右,二十一岁,壬申六月二十六日复。骨热咳呛已减,脉有数象。肝肺皆虚,秋冬不重发为得。

生黄芪钱半 中生地四钱 湖丹皮钱半 桑白皮钱半
麦门冬二钱 秦艽钱半 鳖甲四钱 生甘草四分 干百合二钱
钗石斛三钱 橘白一钱 加枇杷叶二片,去毛

镜台兄,丙子七月十八夜戌刻复。咳呛止,骨热未除,兼有腰痛耳鸣,脉仍细数。当用滋养。亟宜静息。

生黄芪钱半 原生地四钱 秦艽肉钱半 怀牛膝二钱
远志肉钱半 煅龙齿三钱 钗石斛四钱 地骨皮钱半 广陈皮八分
辰砂拌茯神三钱 生甘草四分 加细桑枝五钱 荷蒂两枚

陆,苏城,二十七岁。丙子闰月十一日巳刻。咳呛久,音哑,骨热甚炽,脉细数不和,心荡,骨脊痠楚。肝肺交伤,暑令不重发为得。

北沙参钱半 细生地四钱 秦艽钱半 地骨皮钱半 款冬花钱半
肥玉竹二钱 鳖甲四钱 怀牛膝钱半 远志肉钱半 生甘草四分
橘白一钱 天花粉二钱 加枇杷叶二片,去毛 蝉蜕十只

改方:去沙参、牛膝。加生黄芪钱半

严,孔宅,二十四岁。丙子闰五月三日戌刻。清肝肺之热,以理咳呛,骨热甚炽,脉细数。亟宜静息。

中生地四钱 生黄芪钱半 地骨皮钱半 橘白一钱 秦艽钱半
生鳖甲四钱 款冬花钱半 远志钱半 肥玉竹二钱 天花粉二钱
生甘草四分 加细桑枝六钱 藕节六枚

曹,歇马桥,三十六岁。丙子闰月三日酉刻。咳呛咽痛,音哑骨

热，脉数不驯，多汗。系木火刑金，炎夏恐其增剧。

北沙参钱半 细生地四钱 秦艽肉钱半 湖丹皮钱半
生鳖甲四钱 款冬花钱半 天花粉钱半 肥知母钱半 桑白皮钱半
生甘草四分 橘白一钱 元参钱半 加枇杷叶二片，去毛 蝉蜕十只

改方：去沙参。加羚羊角片钱半

金石，三十一岁。甲戌腊月十三日巳刻复。咳呛略减，而脉数骨热未除。踵肝肺滋化，未可遽补也。

生黄芪二钱 原生地四钱 秦艽肉钱半 湖丹皮钱半
款冬花钱半 肥玉竹二钱 干百合二钱 桑白皮钱半 生甘草四分
远志钱半 钗石斛三钱 广陈皮一钱 加枇杷叶二片，去毛 海粉四分

周，二十二岁，壬申七月十一日。虚热久，咳呛，脉细数。当从肝肺滋化。少食为要。

生黄芪钱半 制首乌钱半 秦艽钱半 广陈皮一钱 鳖甲四钱
款冬花钱半 干百合二钱 茯苓二钱 桑白皮钱半 地骨皮钱半
生甘草四分 加冬瓜子三钱 枇杷叶二片，去毛

生黄芪钱半 中生地四钱 款冬花钱半 湖丹皮钱半
生鳖甲四钱 生甘草四分 肥知母钱半 麦门冬二钱 广橘皮七分
远志肉一钱 秦艽肉钱半 加海粉四分，洗 枇杷叶二片，去毛

金秀兄，丁丑二月二十七日午刻。咳呛久，脉数，骨热殊甚。肝肺皆伤，怯候已深。入夏恐重发吐血。

生黄芪钱半 中生地四钱 湖丹皮钱半 生鳖甲四钱
款冬花钱半 远志肉一钱 肥玉竹二钱 天花粉二钱 桑白皮二钱
生甘草四分 橘白一钱 干百合二钱 冬虫夏草钱半
加枇杷叶二片，去毛

二月三十日改方：去黄芪、花粉、冬虫夏草。加潞党参钱半
藕节四枚

陈。骨热虚咳，气逆多痰，脉扎无力。当从补摄。并须省劳是要。

潞党参二钱 山萸肉二钱 款冬花钱半 生黄芪二钱
象贝母三钱 炙甘草四分 麦门冬三钱 原生地三钱 炒苏子钱半
桑白皮三钱 广陈皮八分

加胡桃肉二钱，去油

二诊：咳呛骨热虽减，而汗泄，肺分不固。脉扎无力。金水两伤，前方虽合，不可恃为安境也。

生黄芪二钱 原生地三钱 鳖甲三钱 地骨皮钱半 女贞子三钱
陈皮白八分 麦门冬三钱 秦艽钱半 款冬花钱半 煅牡蛎三钱
桑白皮三钱 生草四分 加青箬二片 蛤壳四钱

三诊，改方：去蛤壳。加蝉蜕十只 羚羊片五分，另煎 干百合三钱
左。暑热痰凝，咳呛，气逆不舒，脉细数。暂从清化法。忌生冷。

生黄芪钱半 秦艽钱半 赤苓皮三钱 桑白皮钱半
煅瓦楞壳三钱 川贝二钱 冬瓜皮三钱 青防风钱半 款冬花钱半
炒苏子钱半 广橘红八分 生甘草四分

加盐水炒竹茹钱半

左。络伤失血，脉细数，发咳。当从肝脾柔养。

炒党参二钱 川郁金钱半 生鳖甲三钱 象贝母三钱
生甘草四分 生归身钱半 秦艽钱半 款冬花钱半 桑白皮三钱
陈皮八分 加枇杷叶二片，去毛

志亭兄，壬申十一月初九日晨复，惊泄已减，兼发咳呛多痰，脉细数。是木火刑金。暂用滋养法。

生黄芪二钱 鳖甲二钱 湖丹皮钱半 款冬花钱半 干百合二钱
桑白皮钱半 生甘草四分 远志钱半 钗石斛三钱 广陈皮一钱
冬虫夏草钱半

加枇杷叶两片，去毛

蔡，五十三岁。丙子五月十三日已刻复，咳呛减，音哑略清，脉细软无神。金水交困，当从滋养。节烦为要。

潞党参钱半 原生地四钱 秦艽钱半 怀牛膝钱半 肥知母钱半

款冬花钱半 肥玉竹三钱 生鳖甲四钱 干百合二钱 生甘草四分
橘白一钱

加枇杷叶二片,去毛 蝉蜕十只

沈左,四十七岁。丙子八月十二日巳刻复。咳虽减而气机不平,脉弱。金水交困矣。亟宜节养。

潞党参钱半 焦冬术钱半 五味子四分 枸杞子二钱
煨瓦楞四钱 炒苏子三钱 款冬花钱半 佛手柑四分 广陈皮一钱
茯苓三钱 炙甘草四分 加煨姜二片 旋复花钱半,绢包

吴,三十五岁,辛巳正月初八日巳刻,咳呛久,近发较甚,气逆多痰,脉细弱。金水交亏。先宣理肺。

潞党参钱半 中生地四钱 款冬花钱半 炒白苏子钱半
肥玉竹二钱 桑白皮钱半 煨牡蛎三钱 干百合二钱 生甘草四分
象贝母三钱,勿研 秦艽一钱 广陈皮八分

加枇杷叶两片,去毛 海粉四分,洗

孙,六十岁。辛巳正月初三日未刻,寒热久缠,咳呛时作,啜酸,脉细数。暂从和理。忌生冷,少食为妙。

生黄芪钱半 生归尾钱半 款冬花钱半 怀年膝钱半
煨牡蛎三钱 肥玉竹二钱 茯苓三钱 地骨皮钱半 广陈皮八分
秦艽一钱 生甘草四分 加银柴胡四分 藕节四枚

胡右,正月十八日。咳呛仍作,而脉来芤数。关真阴受损,劳怯之根,非易脱然。

生黄芪钱半 潞党参二钱 麦冬二钱,去心 生甘草四分
秦艽钱半 鳖甲四钱 款冬花钱半 干百合二钱 象贝母二钱,去心
桑白皮钱半 广陈皮一钱

加枇杷叶两片,去毛

左。病后真阴未复。喉痛咳呛,脉来虚细带数。细属藏阴之亏,数乃营液之耗,此皆阴虚之见端也。况肾属水,虚则生热;肺属金,热则生咳。一水能济五火,肾水也;一金能制诸气,肺金也。按症而

论，须淡欲节劳，俾药有济焉。

熟地三钱 山药二钱 知母钱半 蛤壳四钱 沙参三钱
川贝母钱半 桔梗一钱 人中白四分 炙草四分 糯稻根须三钱
加鸡子清一枚，冲

左。久嗽，肺肾两虚。气逆，背冷，艰寐，脉弦。以清上实下法。

熟地三钱 桂枝五分 茯苓三钱 款冬钱半 半夏钱半
归身二钱 苏子二钱 炙草四分 银杏四枚，打 海石二钱

左。饮邪痹肺，遇寒即发。咳逆，气急多痰，脉弦，舌白溺黄。病属下虚上实，先治新邪。

苏子二钱 银杏四枚，打 紫苑钱半 茯苓三钱 米仁三钱
桂枝五分 款冬钱半 冬瓜子三钱 杏仁三钱 加海石二钱

左。失血虽止，肝胃络伤。咳呛甚于寅卯木旺之时，咽干舌光，脉孔大，甚于右部。治宜滋养。

熟地三钱 枣仁三钱 女贞三钱 白芍钱半 生地三钱
洋参一钱，另煎 丹皮钱半 天冬二钱 麦冬二钱 茯苓三钱 早莲钱半
贝母二钱

左。咳呛减，气逆未平，足冷形热。此下虚不摄，肝阳上扰也。

海浮石拌熟地四钱 菟丝三钱 归身二钱 肉桂四分 萸肉二钱
牡蛎三钱 石英三钱 牛膝三钱 银杏四枚，打 炙草四分
加沉香五分

左。咳逆气急痰多，脉沉细。舌白。下虚上实，治以摄纳。

熟地三钱 归身二钱 茯苓三钱 款冬钱半 姜半夏二钱
石英三钱 炙草四分 陈皮八分 加银杏四枚，打

左。咳嗽呕吐，脉来虚脉。肺胃同病也。

沙参三钱 生地三钱 山药二钱 蛤壳四钱 川贝母二钱
半夏钱半 冬瓜子三钱 广皮八分 紫苑钱半 生草四分

左。金为水母，肾为水源。五更喉痒咳嗽，脉来虚细兼弦。肺虚不能下荫于肾，肾虚阴不上潮，腰间不舒，肺肾同病也。

熟地三钱 归身二钱 沙参三钱 天冬二钱 山药二钱
紫苑钱半 桔梗一钱 甘草四分 桑叶钱半

加甜梨肉一枚,去皮核

左。咳呛久,近发较甚,多痰,气阻,脉细弱。金水交困,先宜理肺。忌生冷油腻,少食为要。

潞党参二钱 五味子三分 炒苏子钱半 煨瓦楞子三钱
佛手柑五分 炙草四分 焦冬术二钱 款冬花钱半 白茯苓三钱
炒枳壳钱半 广陈皮八分

加姜汁炒竹茹钱半 沉香片四分

复诊:咳呛已久,近发较甚,痰凝,气机不舒,脉细弱。金水交困,须节力,忌咸冷为要。

潞党参二钱 焦冬术二钱 五味子五分 炒苏子钱半
广木香五分 制川朴八分 茯苓三钱 款冬钱半 瓦楞壳三钱
橘红八分 炙草四分

加姜汁炒竹茹钱半 沉香片五分

左。向有咳呛气逆,近发更甚,脘闷气机不降,脉细弱无力。衰年金水交困,节力、柔养为要。

潞党参二钱 焦冬术二钱 五味子三分 炒苏子钱半
款冬花钱半 瓦楞壳三钱 云茯苓三钱 木香五分 炒枳壳钱半
炙甘草四分 陈皮八分

加姜汁炒竹茹钱半 代赭石三钱,研细末冲

复诊:咳呛气逆不减,脉细弱不振。金水交困,殊恐气升痰窒耳。

潞党参二钱 制於术二钱 麦门冬三钱 煨龙肉三钱
炒苏子钱半 广陈皮八分 枸杞子三钱 炙草四分 五味子三分
辰茯神三钱 佛手柑五分

加胡桃肉二枚,去油 煨姜五分

左。咳呛虽减,而腰疼骨楚,足冷,脉见歇止。衰体,恐难以药

餌見功。

炒党参三钱 当归身二钱 怀牛膝三钱 制附片五分
煨牡蛎三钱 茯苓三钱 焦冬术二钱 枸杞子三钱 山萸肉二钱
炮黑姜四分 广陈皮八分 炙甘草四分 加胡桃三枚 佛手柑五分

左。咳呛，气逆多痰，脉弱数。当用补养。节力为要。

潞党参二钱 焦冬术二钱 枸杞子三钱 五味子三分
款冬花钱半 煨瓦楞子三钱 炒苏子钱半 茯苓三钱 广陈皮八分
佛手柑五分 炙甘草四分

加胡桃肉二枚，去油 煨姜五分

左。温肺脾，以理咳呛腹痛。

炒党参二钱 炒苏子钱半 广木香五分 干百合三钱
炮黑姜四分 陈皮八分 焦冬术二钱 款冬花钱半 煨瓦楞子三钱
茯苓三钱 五味子三分 炙甘草四分

加胡桃肉二枚

左。食咸伤肺，咳呛痰凝，脉细数弱。先从理肺。

潞党参钱半 炒苏子钱半 白茯苓三钱 煨瓦楞壳四钱
象贝母钱半 焦冬术钱半 款冬花钱半 炒枳壳钱半 佛手柑钱半
生甘草四分 橘红五分 莱菔子三钱

加姜汁炒竹茹钱半

左。咳嗽入夜较甚，鼻塞，脉来虚细。肺失清降，素体不足，玄府疏而风邪易入也。

党参二钱 冬术钱半 半夏钱半 蛤壳四钱 茯苓三钱
苏梗八分 桑叶钱半 甘草四分 紫苑钱半

加红枣三枚

左。失血后形寒身热，咳嗽，艰寐，盗汗神疲，脉数。肺肾已伤，劳怯之重候也。

生地三钱 沙参三钱 鳖甲三钱 川石斛三钱 地骨皮钱半
麦冬二钱 丹皮钱半 川贝母二钱 茯苓三钱 柴胡五分

复诊：咳呛减，惟大便尚结，胃纳未舒，脉来虚数。肺脾肾三经同病也。

党参二钱 沙参三钱 首乌三钱 川斛三钱 玉竹二钱
山药二钱 扁豆三钱 甘草四分 糯稻根须三钱
加红枣三枚

左。下体向有痼毒，近发咳呛，音哑咽梗，脉细数无力。右关更数。有木火刑金之象。忌生冷油腻，节烦，免入冬重发。

羚羊片五分，另煎 细生地三钱 湖丹皮钱半 款冬花钱半
天花粉三钱 人中白五分 生甘草四分 京元参三钱 蝉蜕十只
橘红八分 肥知母钱半 生蛤壳三钱 加鲜竹茹二钱 飞青黛三分，冲
左。失血后咳呛气逆，痰咸，脉数，胃呆，溺赤。有木火刑金之象。治宜清化。

沙参三钱 生地三钱 麦冬二钱 丹皮钱半 地骨皮钱半
川石斛三钱 蛤壳四钱 谷芽三钱 川贝母二钱 加枇杷叶二片，去毛
左。痰阻气痹，肺气不肃。咳逆，艰寐，形寒，脉迟弦滑。以泄降化痰。

川桂枝五分 苏子二钱 前胡钱半 杏仁三钱 萎皮钱半
姜夏钱半 茯苓三钱 橘红六分

左。咳逆多痰，久发脘痛，骨楚，脉细软无力。当从脾肺两经疏理。少食盐冷为要。

炒枳壳钱半 炒苏子钱半 广木香五分 瓦楞壳三钱，煨研
五味子三分 款冬花钱半 煨益智钱半 白茯苓三钱 紫苑钱半
炮黑姜五分 广陈皮八分 麦芽三钱，炒 加冬瓜子三钱
旋覆花钱半，包

左。风邪外感，以致肺气失宣。痰多而咳不甚爽。宜辛泄法。

生黄芪钱半 左秦艽钱半 玉桔梗一钱 象贝母三钱
天花粉三钱 青防风钱半 生蛤壳三钱 款冬花钱半 冬桑叶二钱
广陈皮八分 生甘草四分 加生姜二片 青葱管一支

左。寒热后咳呛，脘闷多痰，小溲短涩，脉细数。暂从清宣。忌生冷，少食为妙。

生黄芪二钱 秦艽钱半 象贝三钱 炒枳壳钱半 橘红八分
生甘草四分 防风钱半 款冬花钱半 花粉三钱 煅瓦楞壳三钱
地骨皮钱半

加枇杷叶二片，去毛 佛手柑八分

复诊：腹热得减，咳嗽痰不易出，口渴，脉细数无力。因春寒肺气不扬。再从理肺化痰法。

生黄芪 沙参 花粉 炒山栀 紫苑 玉竹 石斛 桑皮
川贝 元参 甘草 橘红 加枇杷叶 海浮石

左。有吐血之根，近发咳嗽多痰，骨热，脉细数无力。肝肺液亏。分节、春融，恐致重发。暂从滋化法。

生芪 细生地 丹皮 款冬花 玉竹 花粉 蛤壳 元参
辰砂拌茯神 桑白皮 生甘草 橘红 加竹叶 海粉

左。咳嗽痰多，心跳，寒热已缠两月。风邪未化，正气已亏也。法当扶正以化之。

党参二钱 冬术钱半 山药二钱 茯苓三钱 玉竹二钱
川贝母二钱 半夏钱半 陈皮八分 炙草四分 桑叶钱半
加红枣三枚

右。操烦木火烁金，咳嗽痰凝，嘈杂头眩，腹痛腰疼，肢木；经有黑色，日昏而蒙；脉数不调，左关尤紧。木火上乘，脾失健运，卦属未济。当此烁金之令，拟和肝化热，参以导滞之法。

焦冬术 归尾 秦艽 蒺藜 炒枳壳 荆芥 黑姜 甘草
山查炭 炒青皮 山栀 辰砂拌茯神 建曲 竹茹

左。昨午因饭饼，食滞脘闷，疏化乃通。昨夜热咳殊甚，痰闷艰出；脉细数，舌干。天吋寒燥失宜，病亦因之而变。暂从滋化法。

沙参 生地 丹皮 款冬花 玉竹 花粉 煅瓦楞 桑皮
山栀 远志 甘草 橘红 竹茹 海粉

左、向有头眩，近感风热。咳呛多痰，耳不聪听，脉浮数。暂从和营祛风化痰法。

生黄芪钱半 秦艽钱半 款冬花钱半 炒山栀钱半 生蛤壳三钱
远志钱半 生归尾钱半 青防风钱半 天花粉三钱 生甘草四分
肥知母钱半 橘红八分 葱白二管 加盐水炒竹茹钱半

《何鸿舫医案》

王仲奇

华。小东门，三月五日。咳嗽，腰俞作酸，体常畏寒，神疲乏力，卧起面浮，午夜足肿，脉濡滑。从脾、肺、肾兼治，但须慎摄为贵。

生于术二钱 茯苓三钱 川桂枝钱半 生苡仁四钱 白茯苓三钱
橘红衣一钱 杏仁去皮尖，三钱 续断炒，二钱 十大功劳二钱
紫菀钱半 白前钱半 陈赤豆四钱

二诊：三月九日，咳嗽见瘥，体仍畏寒，神疲力乏，卧起面浮，午夜足肿，脉濡滑而弦。仍从脾、肺、肾兼治。

生于术二钱 茯苓三钱 川桂枝钱半 橘红衣一钱 白茯苓三钱
淫羊藿二钱 续断炒，二钱 生苡仁四钱 桑白皮炙，钱半
杏仁去皮尖，三钱 益智仁一钱 陈赤豆四钱

三诊：三月十三日，咳嗽见瘥，卧起面浮、午夜足肿业已获愈，惟心悸，头眩，日花闪发，皆肾亏之象，脉濡滑。再以强肾清脑可也。

潼沙苑三钱 金钗斛二钱 甘菊花钱半 甘甘枸杞炒，二钱
龙齿煨、先煎，三钱 茯苓三钱 野料豆三钱 冬青子三钱
续断炒，二钱 石决明煨先煎，三钱 谷精草三钱

四诊：三月十七日，咳嗽，卧起面浮，午夜足肿，皆已见愈，心悸、头眩亦安，惟偶或日花闪发，夜寝间有汗出，脉濡滑。仍从心、肾两治。

潼沙苑三钱 金钗斛二钱 甘菊花钱半 甘甘枸杞炒，二钱
远志肉炙，一钱 茯神三钱 野料豆三钱 冬青子三钱

左牡蛎煨先煎,三钱 龙齿煨先煎,三钱 石决明煨先煎,三钱
谷精草三钱

五诊:三月廿一日,寝汗已戢,视物亦清,头眩、心悸较安,面浮、足肿已退,惟气力尚弱,神疲形瘦,脉濡缓而滑。仍从心、肾两治。

潼沙苑三钱 金钗斛三钱 甘菊花钱半 甘甘枸杞炒,二钱
远志肉炙,一钱 大有耆三钱 归身蒸,二钱 茯神三钱
左牡蛎煨煎,三钱 龙齿煨先煎,三钱 橘红衣一钱 谷精草三钱

黄。嘉定,八月廿八日。肾气失纳,阴不上承,咳嗽痰多,行动气急,嗓音不扬,恐肺痿肾急之渐,脉弦滑。及早补救可也。

海蛤粉包,三钱 金钗斛三钱 冬虫夏草一钱二分 甘草炙,一钱
野料豆三钱 女贞子三钱 北沙参三钱 百部蒸,一钱
款冬花炙,钱半 生苡仁三钱

喉咙亦痛,咳嗽痰多,咳剧气坠,便溺亦有不固之象。脉濡弦。且拟宣上。

霜桑叶二钱 鼠粘子炒,钱半 杏仁去皮尖,三钱 川贝母去心,钱半
甘草一钱 紫菀钱半 生苡仁三钱 地骨皮炒,二钱 香白薇炒,二钱
射干一钱 枇杷叶三钱

二诊:十一月廿六日。外因风邪已渐见却动,肾气微弱,下失固摄,上难运痰,致咳痰未能爽适,时泄气而便溏,脉濡滑。再以纳下清上,固本为主,兼清余邪可也。

鹅管石煨透,一钱 冬虫夏草钱半 参贝陈皮一钱 金钗斛二钱
紫菀钱半 百部蒸,八分 款冬花炙,钱半 远志肉炙,八分
甘草炙,八分 生苡仁三钱 银杏肉炒去壳,六枚

三诊:十一月晦。肾脏有亏,元海摄纳无权,致未老就衰,殊少安内攘外之力,咳嗽气急,咳剧即难安枕,行动转侧尤觉气逆喘促,背俞偶觉畏寒,脉濡滑。再以纳肾宣肺,益气运痰,为安内攘外之计。

于术蒸,钱半 海蛤粉布包,三钱 鹅管石煨透,一钱
远志肉炙,一钱 冬虫夏草钱半 款冬花炙,钱半 金钗斛三钱
潼沙苑三钱 罌粟壳钱半 白部蒸,八分 银杏肉炒去壳,两枚
化橘红八分

王。豆市街,嗜饮曲蘖,右肋下痛,时发时愈,深吸痛甚,近来咳嗽痰沫多,胃呆纳少,脉弦滑。从肺胃两治。

法半夏 全瓜蒌 陈枳壳炒 川郁金 旋复花布包 玉苏子
杏仁去皮尖 射干 海蛤粉布包 鸡距子 赖橘红 泽兰

二诊:咳嗽见稀,痰沫较减,食欲稍启,惟右肋下仍稍引痛,深吸痛甚,大便时爽时不爽,脉弦滑。嗜饮曲蘖,守原意出入治。

海蛤粉布包 鸡距子 佩兰 新绛 法半夏 全瓜蒌
陈枳壳炒 川郁金 白豆蔻 降香 射干 旋复花布包

施左。气候寒暄失常,往往易感。头脑昏蒙,鼻窍不利,即由于此,但鼻为肺窍,与喉息相关,所以咳嗽亦常有之,且一咳即缠绵难愈,今喉痒而咳痰不爽,日来曾见血少许。治以轻宣润降。

冬桑叶钱半 杏仁去皮尖,二钱 丝瓜络不去子,三钱 甘草炙,一钱
生苡仁三钱 茯苓二钱 瓜蒌衣二钱 白前钱半 紫菀钱半
款冬花炙,钱半 仙鹤草炒,二钱 藕节炒,三钱

二诊:食欲稍健,便溺如常,眠亦甚安,惟咳嗽未辍,晨起痰黄,特痰红已静,咳声亦较缓和,是向愈之征。但头脑昏蒙,记忆力减退,则为脑力不赡之象。仍以宣肺,待咳瘳再图补益。

冬桑叶蒸,钱半 甘菊花一钱二分 川贝母去心,一钱
杏仁去皮尖,二钱 金扁斛二钱 生苡仁三钱 广皮白一钱 白前钱半
紫菀钱半 款冬花炙,钱半 甘草炙,八分

三诊:痰红已静,眠食如恒,惟日前晨起稍早,气候寒冷,又觉鼻塞咳甚,此皆由肉门薄弱,脑力不赡之过,今虽见愈,特恐轻车就熟耳。

桑叶蒸,钱半 杏仁去皮尖,二钱 金钗斛二钱 野料豆三钱

生苡仁三钱 茯苓三钱 玉苏子钱半 甘草炙，一钱 杭白芍炒，钱半
紫菀蒸，钱半 款冬花炙，钱半 生谷芽四钱

程。七浦路，七月廿二日。新秋感凉，痰气壅逆，咳嗽宿恙既发且剧，痰黄膩，气急、喘息，呼吸不舒，卧难安枕，脉濡滑。速以泻肺豁痰，以防痰闭肺胀。

鹅管石煅透，一钱 甜葶苈隔纸炒，一钱 远志肉炙，一钱
桑白皮炙，钱半 杏仁去皮尖，三钱 川贝母去心，钱半 射干一钱
白前钱半 橘红衣一钱 旋复花布包，二钱 佛耳草布包，钱半
玉苏子二钱

二诊：七月廿四日。咳嗽痰多，较前易起，面容亦稍清爽，惟气逆喘急，卧难安枕，腰俞、软肋俱痛，稍有寒热，脉濡滑。清邪中上，肺布叶举。再以苦辛宣泄。

法半夏钱半 茯苓三钱 橘红衣一钱 佛耳草布包，钱半，
桑白皮炙，钱半 鼠粘子干姜四分同拌，钱半 玉苏子二钱
甜葶苈隔纸炒，一钱 射干一钱二分 杏仁去皮尖，三钱 马兜铃炙，钱半
鹅管石煅透，一钱

三诊：七月廿九日，痰既豁然，气亦平静，咳嗽气逆向瘥，亦得安枕而卧，腰俞、软肋咳仍震痛，腿肢作酸，皆从前喘逆作闭劳动太过之过。守原意小其制。

桑白皮炙，钱半 鼠粘子炒，钱半 白芥子六分 杏仁去皮尖，三钱
甜葶苈隔纸炒，一钱 鹅管石煅透，一钱 射干一钱 茯苓三钱
百部蒸，八分 佛耳草布包钱半 款冬花炙，钱半 银杏肉炒去壳，六枚

四诊：八月初六日。痰豁，风邪未除，傍晚仍有寒热，咳嗽两软肋引痛，已能安枕而卧，偃卧右肋痛而欠适，脉浮濡而滑。仍以宣肺、豁痰、化风。

桑白皮炙，钱半 地骨皮炒，二钱 鼠粘子炒，钱半
杏仁去皮尖，三钱 法半夏钱半 生苡仁三钱 茯苓三钱 射干一钱
前胡一钱 百部蒸，八分 佛耳草布包钱半 款冬花炙，钱半

五诊：八月十一日，寒热业已轻微，软肋、腰俞痛愈，咳嗽未已，神疲欲眠，纳食难于运化，时暖酸腐，脉濡。再以宣肺调胃。

法半夏钱半 生苡仁三钱 橘红衣一钱 茯苓三钱
旋复花包，二钱 苏梗钱半 杏仁去皮尖，三钱 益智仁八分
陈六神曲炒，三钱 鸡内金炙，三钱 百部蒸，八分 款冬花炙，钱半

六诊：八月十七日，寒热已瘳，咳嗽轻减，精神略强，惟纳食仍难运化，至夜则吞酸暖腐，小溲欲解往往中止半晌方止，此皆精气委靡不振之过。

鸡内金炙，二钱 干术炒，钱半 益智仁一钱 法半夏钱半
生苡仁三钱 白芍炒，二钱 款冬花炙，钱半 百部蒸，一钱 茯苓三钱
橘红衣一钱 陈六神曲炒，三钱 蒲公英三钱 生熟谷芽各五钱

七诊：八月廿八日，咳嗽已愈，暖腐吞酸亦瘳，谷食仍难磨化，小溲较畅，大便微溏。仍以运脾健胃立方。

鸡内金炙，二钱 益智仁一钱 肉果煨，一钱 青防风炙，一钱
干术炒，一钱 杭白芍炒，二钱 茯苓三钱 橘红衣一钱 宣木瓜一钱
蒲公英三钱 荷叶米炒，三钱 陈六神曲炒，三钱

汪右。小南门。感风受凉，肺失外卫，苦气上逆，喉痒咳呛，昼轻夜甚，胸闷头胀，脉弦滑。治以宣豁。

霜桑叶 杏仁去皮尖 鼠粘子炒 射干 紫菀 款冬花炙 白前
百部蒸 玉苏子 马兜铃炙 茯苓 生苡仁

二诊：咳呛向安，喉痒胸闷见愈，但腰仍酸，头胀且眩，脉濡滑。胃气已动，守原意出入可也。

霜桑叶 杏仁去皮尖 百部蒸 蔓荆子 白蒺藜 续断炒 白前
紫菀 款冬花炙 金钗斛 生苡仁 茯苓

三诊：喉痒胸闷见愈，咳嗽或作或辍，头胀且眩，腰俞作酸，脉弦滑。胃纳尚不馨，守原意出入。

蔓荆子 白蒺藜 金钗斛 生苡仁 玉苏子 杏仁去皮尖
橘红衣 白前 百部蒸 紫菀 款冬花炙 茯苓 生谷芽

胡。打铁滨，七月初九日。清邪中上，鼻流清涕，清窍不爽，气冲咳嗽，胸部稍觉隐痛，脉濡，有失血宿恙，恐轻车就熟。治以轻宣可也。

冬桑叶二钱 杏仁去皮尖，三钱 甘草八分 薄荷三分 橘络八分
玉苏子二钱 生苡仁四钱 料豆衣二钱 茯苓三钱 白前钱半
鼠粘子炒，钱半

二诊：七月十二日，清涕喷嚏较愈，鼻窍稍有未爽，咳嗽清晨仍剧。清邪中上，肺失清肃。仍以轻宣肃降之剂。

冬桑叶三钱 甘草一钱 薄荷三分 射干一钱 茯苓三钱
鼠粘子炒，钱半 玉苏子二钱 白前钱半 紫菀钱半 杏仁去皮尖，三钱
生苡仁三钱 枇杷叶去毛炙，三钱

王君。大东门，形瘦体弱，风邪乘虚而入，留而不去，治节失司，发热咳嗽，头胀且眩，胸中烦闷难过，唇吻绛赤，腰俞作酸，交睫欲寐即有呓语，心肺原相依为用也；脉浮滑数。治以轻宣，毋使滋蔓。

霜桑叶 杏仁去皮尖 香白薇炒 地骨皮炒 茯苓 生苡仁
白前 紫菀蒸 百部蒸 款冬花炙 川贝母去心

二诊：热已见退，头目较清，睡眠较安，惟咳嗽未罢，痰唾多，胃气未醒，食欲不启，右脉半反关、弦滑。再以宣肺止咳，参以和胃。

霜桑叶 杏仁去皮尖 生苡仁 射干 玉苏子 野茯苓 白前
紫菀蒸 橘红衣 白鲜皮 通草 枇杷叶去毛，布包

三诊：热退，头目较清，食欲较启，惟咳嗽痰唾多，精神仍疲敝乏力，右脉半反关、弦缓而滑。再以扶元肃肺。

海蛤粉包 金钗斛 生苡仁 野茯苓 淮山药 广皮白 无花果
杏仁去皮尖 紫菀蒸 百部蒸 款冬花炙 谷芽炒

王，北苏州路，二月廿六日。咳嗽气逆，形寒畏风，大便溏泻，日有数起，脉濡弦。脾、肺并病，年刚弱冠，肾气方盛之时，见证如此，有加剧之虑，幸勿疏忽。

生干术二钱 茯苓三钱 川桂枝钱半 白芍炒，二钱 白前钱半

法半夏钱半 生苡仁三钱 橘红衣一钱 紫菀钱半 陈六神曲炒,三钱
陈大麦炒去粗皮,三钱

二诊:二月廿八日,溏泻见愈,肠鸣未息,咳嗽气急、形寒畏风,仍如曩昔,脉濡缓而弦。仍从两太阴治,但弱冠肾气方盛之时,见证如此,殊属弗宜。

生于术二钱 茯苓三钱 川桂枝钱半 白芍炒,二钱 佩兰三钱
法半夏钱半 生苡仁三钱 紫菀钱半 罂粟壳钱半 杏仁去皮尖,三钱
陈六神曲炒,三钱 陈大麦炒去外层粗皮,三钱

三诊:三月三日。溏泻见愈,肠鸣亦息,咳嗽气急,形寒畏风较安,脉濡弦。仍从两太阴嗽气急,形寒畏风较安,脉濡弦。仍从两太阴治,弱冠肾气方盛,宜慎毋忽。

生于术二钱 茯苓三钱 法半夏钱半 生苡仁三钱 佩兰三钱
橘红衣一钱 白前钱半 紫菀钱半 款冬花炙,钱半 陈六神曲炒,三钱
白鲜皮二钱 罂粟壳钱半

鲍,歙县埭田。屡经失血,肺脏久伤,肺为呼吸出入之道,而吸人之气则藏于肾,肾气失纳,肺苦气逆,咳嗽,喉系不爽,右卧较逸,形瘦肤着,日来腹痛便溏,脉弦数而濡。姑两治可也。

海蛤粉包 金钗斛 淮山药 白扁豆炒 生苡仁 茯苓
肉果煨 茜根炒 马兜铃炙 白前 紫菀蒸 款冬花炙 十大功劳

二诊:屡经失血,肺脏受伤,高源之水不下,阴精不足上承,咳呛声欠清利,喉系不爽,脉濡滑而弦。仍以金水相生意,滋肾保肺可也。

海蛤粉包 金钗斛 淮山药 茯苓 潼沙苑 续断炒
白扁豆炒 生苡仁 紫菀蒸 百部蒸 款冬花炙 罂粟壳
白石英煨 冬虫夏草

三诊:精神稍振,谷食略强,咳呛较减,惟晨起及傍晚咳甚,大便结,更衣后肛微脱,肺与大肠原相表里,又肾开窍于二阴也。照述再拟一方。

海蛤粉包 金钗斛 潼沙苑 续断炒 北沙参 淮山药 冬虫夏草 苏芡实 茯苓 紫菀蒸 款冬花炙 无花果 罌粟壳

方右，南市，三月十六日。咳嗽白沫，气紧作闭，气候寒冷较甚，纳食则胸脘胀闷，脉濡弦。治以温肺调胃可也。

法半夏钱半 广皮二钱 茯苓三钱 陈枳壳炒，钱半
桑白皮炙，钱半 玉苏子二钱 厚朴花钱半 佩兰三钱
杏仁去皮尖，三钱 旋复花包，二钱 白前钱半 陈六神曲炒，三钱

二诊：三月廿二日。咳嗽白沫，气紧作闭，且常畏风，纳食则胸脘胀闷，或有清水上涌，脉濡缓而弦。仍以温肺调胃。

法半夏钱半 新会皮二钱 茯苓三钱 桑白皮炙，钱半
甜葶苈隔纸炒，二钱 杏仁去皮尖，三钱 射干一钱 白前钱半
玉苏子二钱 莱菔子炒，二钱 厚朴花钱半 旋复花包，二钱
陈六神曲炒，三钱

三诊：三月廿九日。咳嗽稍减，白沫仍多，气紧作闭较瘥，胸脘胀闷未舒，仍有清水上涌，咳甚则腰酸头眩，脉濡弦。仍以温药和之。

法半夏钱半 淡干姜一钱 茯苓三钱 桑白皮炙，钱半
甜葶苈隔纸炒，二钱 厚朴花钱半 玉苏子二钱 化橘红一钱
杏仁去皮尖，三钱 马兜铃炙，钱半 旋复花包，二钱 紫菀钱半
白豆蔻一钱

黄，绩溪梅溪。初诊（佚）。

二诊：咯血既愈，咳呛稍减，痰亦略爽，左侧难得安卧，左肋仍稍隐痛，脉濡滑而弦。仍以清络、保肺、宁金。

海蛤粉包，三钱 川贝母去心，一钱 金钗斛二钱 生苡仁四钱
霜桑叶二钱 茜根炒，钱半 杏仁去皮尖，三钱 紫菀钱半 野粉豆三钱
冬青子三钱 藕节炒，四钱 玫瑰花两朵 琼玉膏冲，四钱

三诊：咯血既愈，咳亦稀微。左侧已得安卧，形色亦较充旺，惟左肋仍稍隐痛，脉濡缓弦滑。仍以清络保肺宁金可矣。

海蛤粉包,三钱 茜根炒,钱半 金钗斛三钱 橘络八分
玉苏子二钱 旋复花包,二钱 新绛八分 茯苓三钱 杏仁,去皮尖,三钱
蒲黄炒,钱半 紫菀钱半 藕节炒,四钱

肖右,老西门,三月四日。经事二、三月不转,咳嗽,胸痛,头疼,体酸,发热汗自出。脉濡数。病起已将匝月,蔓延亦殊弗宜。

霜桑叶二钱 甘菊花钱半 紫菀钱半 杏仁去皮尖,三钱
香白薇炒,二钱 青蒿三钱 地骨皮炒,三钱 茯苓三钱 续断炒,二钱
款冬花炙,钱半 橘红衣一钱 枇杷叶去毛皮布,三钱

二诊:三月六日。经事三月不转,咳嗽胸痛,面浮头疼体酸,发热汗自出,神疲纳少,脉濡弦数。病经一月,脾肺俱伤,胞脉为闭,殊属可虑,慎旗切切。

霜桑叶二钱 紫菀钱半 款冬花炙,钱半 地骨皮炒,三钱
香白薇炒,二钱 金钗斛二钱 橘红衣一钱 茯苓三钱 丹参二钱
泽兰三钱 续断炒,二钱 谷芽炒,四钱

三诊:三月八日。据述咳嗽胸痛面浮如旧未愈,发热汗自出,经事三月不转,惟日来稍能安谷,精神略振。守原意出入。

香白薇炒,二钱 地骨皮炒,三钱 生苡仁四钱 茯苓三钱
金钗斛二钱 杏仁,去皮尖,三钱 款冬花炙,钱半 紫菀钱半 泽兰三钱
芫蔚子炒,二钱 续断炒,二钱 谷芽炒,四钱 月季花三朵

四诊:三月十一日。热虽减而汗出未戢,腹痛未已,稍能安谷,力乏神疲,色少津泽,咳嗽向安,脉濡弦。经事已三阅月不转,再从心脾两治,以冀应机为幸。

左牡蛎煨先煎,三钱 香白薇炒,二钱 金钗斛二钱 茯苓三钱
续断炒,二钱 全当归三钱 白芍炒,二钱 泽兰三钱 橘红衣一钱
芫蔚子炒,二钱 谷芽炒,四钱 月季花三朵

五诊:三月十四日。热减未尽,近仍有盗汗,咳嗽向安,胃纳略强,腹痛未已,面微浮,神疲力乏如故,经事未来,脉软弦。仍从心脾两治。

银柴胡炒，钱半 香白薇炒，二钱 青蒿三钱 鳖甲炙先煎，五钱
石斛二钱 左牡蛎煨先煎，三钱 白芍炒，二钱 橘红衣一钱
生于术二钱 茯苓三钱 月季花三朵 谷芽炒，四钱

六诊：三月十七日。咳嗽见减，胃纳略强，腹中仍痛，月事不来，面微浮，夜热寝汗未戢，脉濡弦。仍从心脾两治。

银柴胡炒，钱半 香白薇炒，二钱 左牡蛎煨先煎，三钱
鳖甲炙先煎，四钱 青蒿三钱 泽兰三钱 橘红衣一钱 川楝子煨，钱半
茯苓三钱 獭肝一钱 月季花三朵 谷芽炒，四钱

七诊：三月廿日。咳嗽向安，夜热寝汗未戢，腹中仍痛，面部微浮，经事已三阅月不来，脉软弦。仍从心脾两治。

银柴胡炒，钱半 香白薇炒，二钱 左牡蛎煨先煎，三钱
鳖甲炙，先煎，五钱 川桂枝钱半 白芍炒，二钱 茯苓三钱 泽兰三钱
红花八分 归身蒸，二钱 青蒿三钱 獭肝一钱 橘红衣一钱

八诊：三月廿五日。咳嗽获愈，夜热亦退，惟腹中仍痛，寝汗未戢，经事三阅月不来，脉濡弦滑。仍以心脾两治。

左牡蛎煨先煎，三钱 杭白芍炒，二钱 川桂枝钱半 全当归三钱
橘红衣一钱 丹参二钱 泽兰三钱 川楝子煨，钱半 柏子仁三钱
红花八分 羌蔚子炒，二钱 茯苓三钱 獭肝一钱

左，初诊（佚）

二诊：心肺相依为用，肺气逆而叶举，心血瘀而脉急，颈项及胸腹筋脉暴露拘急如弦索，颈项有膨胀感，息急音窒，卧难安枕，耳窍失聪，跗肿面浮。前以宣畅肺气，通行血脉尚可，应守原意为之，但病痼根深，难望速效。

海蛤粉包，三钱 甜葶苈隔纸炒，一钱 射干一钱 橘红衣一钱
生苡仁四钱 桑白皮炙，一钱二分 杏仁去皮尖杵，三钱 络石藤三钱
伸筋草三钱 茯苓四钱 西血珀屑研细饭丸吞，三分 功劳叶二钱

三诊：颈项膨胀感、胸腹筋脉暴露如绳索业已较愈，声音已畅，息急已平，亦能着枕安卧，惟卧起面部微浮。守原意拟丸调理。

海蛤粉两半 紫贝齿煨，一两 新绛六钱 桑白皮炙，一两
甜葶苈隔纸炒，二两 茯苓二两 生苡仁二两 旋复花一两
杏仁去皮尖，二两 射干八钱 紫菀一两 伸筋草一两 络石藤两半
橘红衣八钱 西珀屑三钱 十大功劳叶两半

上药研末，用丝瓜络二两熬汤法丸，每早、晚开水送下二钱。

王。小西门，三月廿三日。咳嗽气急作闭，喉息有音，声欠清扬，未能偃卧左眠，易于动怒，咳痰有黄点，脐中有黄水溢出，秽恶异常，脉濡弦。肾伤肺坏，务宜慎摄为妙。

桑白皮炙，钱半 甜葶苈隔纸炒，二钱 射干一钱 生苡仁四钱
玉苏子二钱 马兜铃炙，钱半 杏仁去皮尖，三钱 鹅管石煨透，一钱二分
茯苓三钱 忍冬藤三钱 枇杷叶去毛布包，三钱 木蝴蝶四分

二诊：三月廿九日，咳嗽气急较瘥，声音稍亮，睡眠仍只偏着右边，脐中秽恶黄水溢出时有时无，脉软弦。肾伤肺坏，证药相安，守原意以治。

桑白皮炙，钱半 甜葶苈隔纸炒，二钱 射干一钱 茯苓三钱
海蛤粉包，三钱 杏仁去皮尖，三钱 马兜铃炙，钱半
鹅管石煨透，一钱二分 紫菀钱半 玉苏子二钱 生苡仁四钱
陈赤豆三钱 远志肉炙，一钱

三诊：四月十六日，脐中秽恶黄水业已见弭，咳嗽气急见减，声音稍亮，惟小溲赤而浑浊，睡眠仍只偏着右边，脉濡弦。仍以强肾肃肺可也。

鹅管石煨透，一钱二分 金钗斛三钱 远志肉炙，一钱
杏仁去皮尖，三钱 马兜铃炙，钱半 茯苓四钱 猪苓三钱 生苡仁五钱
玉苏子二钱 紫菀钱半 木蝴蝶四分 枇杷叶去毛布包，三钱

《王仲奇医案》

徐，东有恒路。肾亏肺伤，阴少上承，液难荣溉。久咳不已，动辄气急，声音嘶哑，悬雍下垂，形瘦色夺，大便坚结。两脉反关弦滑。水竭金枯，难以补救，姑以滋液养阴，音通则吉。

海蛤粉三钱,包 白药煎一钱五分 生地黄四钱 野料豆三钱
白药子三钱 柿霜二钱 金钗斛三钱 诃子皮一钱五分,蜜炙 玄参二钱
甘草八分 紫荆皮三钱 阿胶珠三钱

《近代中医流派经验选集》

王堉

邻人郭某之女,再醮于邻村,归宁恒数月不返。一日忽患咳嗽,初略不为意,久而增盛,延人治之,则曰,此虚劳也。始而补气,继而行瘀,又转而理脾疏肝。药屡易而病不减。一日其母偕之来,挽余治。因问曰,嗽时作时止乎?抑咳则面赤气急声声接续乎?曰急甚。观其面色红润,知非虚证。乃诊其脉,则右寸浮滑而数,余则平平。告曰,此痰火郁在肺经,常苦胸膈满闷,发则痰嗽俱出,不但非虚劳,且大实热证也,进以芩连二陈丸加桑皮,木通以疏之,三日而嗽减。再请余治,则数象减而滑则依然。余曰,热退而痰仍在,不去之,恐复作。因用平陈汤加枳实、大黄下之。凡二进,下顽痰数碗胸膈顿宽,而嗽亦止矣。

咳嗽一症,风寒暑热,饮食郁滞,思虑劳倦,皆能致之。《医宗必读》阐《内经》之旨,讲此症最为详尽,学者当究心,若一概施治,未有不致悖谬者。

同乡郝某号秀山,在都作银商,自秋发嗽至十一月,数医之尚未愈也。余侨寓襄陵馆,与郝某素昧生平。一日梁其偕之来求余治,问何病?对以咳嗽四月矣。问,曾治否?对以药以百计而嗽如故。言次探手于怀,出药方隆然一裹。细检之,皆参、苓、芪、术等类。盖郝素弱,又富於财,俗医皆作虚论也。乃诊之,余平平,肺独浮滑。告之曰,浮者风象,滑者痰象。君素积痰,复感於风,风痰相搏,而嗽作矣。又以参芪固其腠理,腠理不开,风无去路,嗽何时已乎。数药可愈。郝见余言易,进曰,年少时有唾血疾,体本虚,故畏克伐药。晓之曰,此他医之所以用参芪也。要知少年唾血,未必虚证。即虚,而

此时血止而嗽作，医不治嗽而治血，请问君见我为治嗽乎？为治血乎？病者笑而是之。乃以杏苏饮加山楂、枳实进。嘱曰，不过五服病必愈，无烦再来也。病者持而去，越五日，投帖请余观优戏，晚则筵席丰隆，殷勤周至。时余方以分发赴秦，因遣其同类，随之到秦，开设银肆，听苛过从称莫逆焉。

商友王定庵，幼在京，权子母，工于心计而贪诈猥琐，兼嗜面食，年四十后，得脾劳病，遇冬更甚，医药数年矣。余常劝其节食节劳，而以经营生息，刻无暇晷。每食过饱，则痰嗽喘满，终夜不寝。壬子冬，疾增剧，乃挽余治。余进以健脾诸品，痰嗽少止，而狂啖如故，因之时发时愈。病甚则服药，稍痊则不肯，余以其不能调摄，置之不问。年终，岁事匆匆，劳扰更甚，一日早起，则面目四肢俱浮肿，而烦满益不堪，余告其同事曰，脾绝矣。尚未立春，虽交木令，尚可到家，立春后，则不能矣。盖肝木克脾土，仲春必难过也。同事者不为意，延之。继请一同乡医视之，则曰：此水病，下之则愈矣。问用何药？则曰：舟车丸。余力陈不可，而病者误信之，急服三钱，肿未减，而卧不能兴。诊其脉若有若无。同事惟恐其殁于铺，急觅车倩人送还，出京甫数日，殁于松林店。计其时，立春后五日也。吁！人生固有命，而始则不知爱养，继则不信良言，迨疾不可为，又信庸医，以速其死，亦愚之甚矣。故录之，以为不知调摄者戒。

《醉花窗医案》

张芝田

陈，风温夹痰，湿热郁肺。咳呛不畅，痰鸣如锯气粗，舌黄苔薄，脉浮滑数，面黄色眦，口腻，溲少。因循两句，防其喘闭增变。

旋复花 嫩前胡 壮紫菀 橘红 马兜铃 牛蒡子 枳壳
象贝母 冬瓜子 苦枳梗 甜杏仁 茯苓 老枇杷叶

二诊：咳呛不畅，阵作稍稀，暮分尚甚，甚则痰鸣气粗，舌苔根腻尖红，脉数。风温顽痰郁化，防顿咳哮喘。

桑白皮 马兜铃 杜苏子 竹茹 冬瓜子 生蛤壳 象贝
甜杏仁 海石 赤苓 橘红 老枇杷叶

《勤慎补拙方案集》

袁焯

曹韵笙先生如君，年三十余，素患肺病及头痛病，每劳、怒、啖粘腻肥甘等物即发，发则头痛目昏，咳嗽喉中如水鸡声，胸闷不饥，舌苔薄腻，寸关脉滑。盖孕育已多，脑筋衰弱而又吸阿片，喜肥甘粘食，痰滞阻塞为病也。每次均用桑叶、杭菊、薄荷、杏仁、贝母、桔梗、前胡、橘皮等药奏效，今已数年，皆赖此方之力。现悉粘腻肥甘之患，已改用他种食品，而病发亦轻，不复如前此之剧矣。

镇郡陶骏声君令阍，肿胀呕吐，缠延月余。先是胎前足肿，产生肿益甚，咳嗽呕吐，经此间诸名医治之，叠进舟车丸、五皮饮、栝蒌薤白白酒汤及八珍汤等弗效，且面目肢体悉肿，腹胀如鼓，咳喘不得卧，呕吐痰水，辄盈盆碗，吐后亦能饮食。诊其脉弦滑而有胃气，言语亦甚清晰，初用小半夏汤，加干姜、五味子及厚朴半夏甘草人参汤，枳术汤等，无大效，且呕吐大发。其时有人荐他医治之，亦无效。陶君复延予治。询得其情，则从前延诸名医时，亦时发时止，或吐或不吐。但每觉胸膈闷塞，则知病将复发。必吐出痰水数碗，然后始觉宽畅。近日又觉闷塞异常，呼吸几不能通，今虽吐后，犹嫌闷塞，咳嗽不得卧。予沉思久之，恍然曰：此肺中气管为痰饮闭塞不得通也。气管之所以闭塞者，缘腹胀尿少，胃中及膈膜均为痰饮充塞之地。膈中痰饮充塞，则溢于肺中气管，肺中气管亦充塞，则满而闷塞不通，呼吸不利，内既充满，则激而上出而为呕吐，以故盈盆，盈碗，皆痰涎水沫。痰水既出，则膈膜肺胃等处皆松，故知饥能食。待数日后痰水聚多，又复作矣，是则此病之真谛也。治法以驱痰饮为要，而驱肺中气管之饮为尤要。苦思半晌，为立一方，用三子养亲汤，合二陈汤加麝香五厘和服，以白芥子能横开肺中之饮，麝香香

窜，能通气管及膈膜间之闭塞，且能止吐。明日复诊，述昨药服后，觉药性走窜不已。上窜至咽，下窜至小腹，胸部尤觉窜走，随窜随呕，吐出痰涎甚多，半夜未能安枕，而胸闷觉宽，呼吸便利，呕吐亦止，盖气管之闭塞通矣。遂以原方去麝香，接服三剂，而胸次大舒，咳嗽亦减，仍以原方加冬虫夏草、北沙参、生姜、红枣。又三剂而浮肿亦消，咳嗽大定，但腹胀如故，坚满不舒，乃停煎剂，每日单服禹余粮丸二次，每服三钱，忌盐酱等物，五日后胀渐消，十日后胀消及半，而精神疲惫，自觉心内及脏腑空虚。盖饮滞消而气血虚也。令以前丸减半服，并以参、术、归、芍、山药、茯苓等煎剂相间服之，不十日而胀全消，病竟愈。闻者莫不叹服。迄今六年，病未复发，且已经孕育矣。

《丛桂草堂医案》

费承祖

徽州张芝圃，咳嗽半年，所奇者每咳痰内必带毛如毫毛。诊脉右寸细如蛛丝。经谓肺合皮毛，此岂肺气大虚，不能托毛外长，而倒生于里耶！人有毫毛，犹地有草木，全是生生之气敷布于外。此症非大补肺气不为功。

潞党参四钱 绵黄芪三钱 大白芍一钱五分 粉甘草一钱
连服三十剂而全愈。

佚名，进养阴清火，兼化痰热法，肝阳升腾之势渐平，入夜咯血已止，咯痰略易，痰色黄多绿少，病情似乎减轻。惟痰热蕴结，肺胃阴伤，呛咳内热，口干汗多，舌绛目光，胸脘偏右懊恼，难以名状，饮食减少。阴虚而气怯，中无砥柱，倘用甘温益气，未免助火劫阴，荣阴无康复之机，木火有燎原之势。正气充满于阴液之中，培阴液即是固正气。脉弦略退，细数如常。宜宗前法更进一筹。

女贞子四钱 生甘草五分 南沙参四钱 京玄参二钱
鲜生地三钱 明天冬三钱 大麦冬三钱 川贝母三钱 瓜蒌皮三钱

川石斛三钱 天花粉三钱 冬瓜子四钱 生谷芽四钱 鲜竹茹一钱
鲜竹沥二两 梨五片

二诊：上方服三剂后，肝阳上亢之势渐平，胃气下降，咯血已止，饮食加增，绿痰已清，黄痰尚多。呛咳内热，口干有汗，舌绛而光，胸脘偏右懊恼，难以名状。肺阴久虚，清肃无权，痰热内蕴，灼阴耗气，益气未免助火劫阴，正气充满于阴液之中，必先液润而后气散，培阴液即是固正气，倘用滋腻填阴，诚恐禁铜痰火，阴液更受燔灼。治必清火豁痰，令火平痰化，阴液或可暗长潜滋。名臣医国，兴利必先除弊也。脉弦已减，细数仍然，势未出险，宜宗前法进治。

女贞子四钱 生甘草五分 西沙参二钱 京玄参二钱
鲜生地三钱 天花粉三钱 川石斛三钱 明天冬三钱 川贝母三钱
瓜蒌皮三钱 冬瓜子四钱 鲜竹茹一钱 生谷芽四钱 甜杏仁三钱
梨五片 荸荠五枚

三诊，痰色本白而发黄者，火盛也，内热口干者，阴液干枯不能上济也。舌绛而光者，阴虚及气，中无砥柱也。呛咳咯痰难出，胸脘偏右懊恼，难以名状，夜寐因此不安者，肺胃阴伤，痰火交煽，清肃无权也。丹溪谓阳常有余，阴常不足，阳虚易治，阴亏难调，治当育阴制阳，论极精切。惟喜用苦寒坚阴泻火，未免伤中。叶天士、徐灵胎木火刑金，每用甘润，与喻嘉言所论甘寒能培养脾胃生生之气，最合机宜。脉来细数，阴液虽枯，痰火尚炽，益气补阴，反为痰火树帜。治宜养阴清火润肺。

冬青子四钱 生甘草五分 南沙参四钱 京玄参二钱
鲜生地三钱 云茯神二钱 川贝母三钱 瓜蒌皮三钱 川石斛三钱
天花粉三钱 生谷芽四钱 鲜竹茹一钱 甜杏仁三钱 梨五片
荸荠五枚。

四诊，痰热蕴结肺络，积久竟成窠囊，如蜂子归于房中，莲实嵌于蓬内，生长则易，剥落则难，叠进清火豁痰法，痰热已化，随化随生，窠囊中之痰热尚未扫除，每逢日晡，胸脘偏右懊恼，即热势沸

腾，周身皆热，呛咳痰黄，舌绛破碎，口干引饮，小溲甚少，肺胃阴伤不堪，痰火销灼，补阴犹恐助痰，痰热无从宣化，养阴清火与痰无碍，似合机宜。肺位最高，轻清上浮，必须气味轻扬，搜剔肺中痰热，尽从下泄，肺气自有肃降之权，脉来细数。宜宗前法更进一筹。

冬青子四钱 粉甘草五分 鲜生地三钱 北沙参四钱
京玄参二钱 川贝母三钱 瓜蒌皮三钱 天花粉三钱 甜杏仁三钱
海浮石三钱 冬瓜子四钱 生谷芽四钱 熟谷芽四钱 鲜竹茹一钱
鲜竹沥一两 生梨五片 荸荠五枚

五诊，天下无倒流之水，而有时倒流者，风激之也。人身无逆行之血，而有时逆行者，火迫之也。火迫血溢，吐血属痰火交煽者居多。现吐血已止多日，今又复发，其色鲜红，吐出自觉舒畅。荣热外泄，痰黄味辣，舌刺口干，胸脘偏右懊恼，内热小溲气秽，痰热蕴结肺络，如抽蕉剥茧，层出不穷。气液皆受燔灼，中无砥柱之权，饮食入中，咯痰较易，培补气液，未免助火碍痰，清化痰热，又恐将来气液难复，脉来细数，势未出险，补救颇难。姑拟养阴清火，豁痰润肺。

冬青子四钱 粉甘草五分 马兜铃五钱 鲜生地三钱
北沙参四钱 京玄参二钱 川贝母三钱 瓜蒌皮三钱 川石斛三钱
天花粉三钱 牡丹皮一钱 冬瓜子四钱 生谷芽四钱 甜杏仁研三钱
鲜竹茹一钱 鲜竹沥一两 荸荠五枚 生梨五片

六诊，肝阳升腾之势渐平，津液宣布，咯血已止，舌润苔布，入夜肌热，脘右懊恼皆退。惟胸间胀痛不舒，呛咳痰色微黄，神倦力乏，气液皆虚，中无砥柱，已可概见。人参益气，未免甘温助火，犯缪仲醇肺热还伤肺之戒；阿胶熟地填阴，又恐滋腻碍痰，犯叶香岩阴未生，徒令凝滞在脘之戒。必须气味轻清，补而不膩，与痰无碍，方合机宜。脉来数象已减，右寸关细滑。治宜补阴清火，兼化痰热。

西洋参一钱 京玄参二钱 鲜生地三钱 大麦冬二钱
杭白芍一钱五分 生甘草五分 女贞子四钱 川贝母三钱
瓜蒌皮三钱 川石斛三钱 天花粉三钱 甜杏仁三钱 冬瓜子三钱

生谷芽四钱 广皮白五分 鲜竹茹一钱 鲜竹沥一两 梨五片
荸荠五枚

七诊：气液极虚，法当益气滋液，益气未免甘温助火，滋阴又恐滋腻碍痰。当痰火猖獗之时，惟有清火豁痰，釜底抽薪，方合法度。若扬汤止沸，无济于事。现蕴结肺络中痰热，已宣化及半，尚有痰热凝结肺络，清肃无权，呛咳痰黄，胸腹作胀，入夜肌热，是有形之痰阻无形之气，清化痰热，气自肃降，诚恐将来火清痰化，液涸气散，补救不及，却有险关在后，不得不思患预防。培养将枯之阴液，清泄未尽之痰热，两面兼顾，似合机宜，脉来细数。宜宗前法进治。

女贞子四钱 鲜生地三钱 北沙参四钱 京玄参二钱
云茯神二钱 瓜蒌皮三钱 川贝母三钱 川石斛三钱 天花粉三钱
甜杏仁三钱 冬瓜子四钱 生谷芽四钱 鲜竹茹一钱 鲜竹沥一两
灯心五尺 梨五片 荸荠五枚

《费绳甫医话医案》

吴鞠通

甲子四月廿四日，吴，二十岁。六脉弦劲，有阴无阳，但咳无痰，且清上焦气分。

沙参三钱 生扁豆三钱 连翘一钱五分 麦冬三钱 冬霜叶三钱
玉竹三钱 冰糖三钱 茶菊花三钱 杏仁三钱 煮三杯，分三次服。三帖。

廿六日：于前方内去连翘，加丹皮二钱 地骨皮三钱

《吴鞠通医案》

曹沧洲

某左。受风作咳，表热自汗，脉数，宜从上焦泄化。

冬桑叶一钱半 生蛤壳一两 冬瓜子一两 茯苓四钱
白杏仁四钱，去皮 白芍三钱 橘白一钱，炙 白前一钱半 川贝母三钱

淮小麦三钱，包 生甘草三分 竹茹三钱 生石决明一两

某左。体虚易感，不时背寒发热，咽痒咳窒，腰酸背痛，脉濡，法当表里两治。

苏梗二两 紫菀一钱半 川断一钱半，盐水炒 白蒺藜四钱，去刺
荆芥一钱半 白杏仁三钱，去尖 金毛脊三钱，盐水炙去毛 桑枝二两，切
大豆卷三钱 象贝四钱，去心 陈皮一钱 归身一钱半

某右。脉细数右弦，咳逆气急痰多，耳失聪，胃不醒，少寐，肺胃两病，治之不易。

西洋参一钱半，生切 川贝三钱，去心 橘白一钱 白芍一钱半
朱麦冬一钱半，去心 生蛤壳二钱，杵 竹茹二两 紫石英四钱，煅
川石斛四钱 朱茯神四钱 生草四分

某左。脾为生痰之源，肺为贮痰之器，脾弱则生湿，湿蕴则蒸而为痰，痰气涌肺，则为喘粗咳呛，舌中黄尖绛，口干不欲多饮，夜不安寐，二便俱通，暮则肢冷，火升有汗，脉弦数，痰湿热无从散布，痰者火之标，火者痰之本，今方拟润肺降气、涤痰安神并进之。

旋复花一钱半，绢包 川贝三钱，去心 辰茯神四钱 赤芍二钱
代赭石四钱 知母三钱 辰连翘三钱 鲜芦根一两 川石斛三钱
海浮石四钱 瓜蒌皮四钱，切 瓦楞壳一两 竹茹三钱

某左。舌白口干，卧则气呛，作咳便少，金不克木，木反袭金，最虑见红。

南沙参五钱 白石英七钱 丝瓜络三钱 玉蝴蝶三分
桑白皮三钱 黛蛤散一两，绢包 竹茹三钱 款冬花三钱
旋复花一钱半，包 橘络一钱

某左。表热五日，咳嗽胁痛，脉数，防痰气升塞，骤生变端，不可轻视。

旋复花一钱半，绢包 白杏仁四钱，去尖 茶叶三钱 橘络一钱
青葱管一尺，后下 象贝五钱，去尖 牛蒡三钱 通草一钱
真局红新绛一钱 前胡一钱半 丝瓜络三钱 枇杷露一两，温服

某幼。风郁化热，咳久渐转顿咳，鼻衄，脉数，宜清润肺胃。

桑白皮一钱半，蜜炙 杏仁四钱，去尖 煅瓦楞壳一两 茯苓四钱
款冬花一钱半，蜜炙 川贝三钱，去心 海浮石四钱 白前一钱半
苏子一钱半 冬瓜子一两 橘白一钱 川石斛三钱 枇杷露一两，温服
《吴门曹氏三代医验集》

陈良夫

金女。肺为华盖，诸经之火，皆能乘肺而为咳。少阴之脉，上络于咽，肝脉亦循咽络肺。上升之气自肝而出，气郁则生火，气盛则克金，此自然之理也。失血之后，咳呛咽干，气升若逆，面赤耳鸣，痰薄粘而其味带咸，每至寅卯之时，咳呛较甚，纳食未能充旺，脉象细滑兼数，舌苔薄糙，尖边脱液。其为阴血内乏，肝木失于涵养，遂致气火郁勃，冲扰肺金，而津液被熬炼成为痰沫，少阴真水不得上潮，肺金失于润养，肝木遂有升而无制。考肝为刚脏，是气火所从出，肾水既亏，不能涵养肝木，斯木火内逆，而诸疴蜂起矣。治之之法，计维壮水以涵木，清火以保金，俾金水相生，庶肝木有制而气火得以填平，可免积虚成损之虑。

北沙参 京玄参 沙冬青 炙紫菀 奎白芍 黛蛤壳 细生地
煅石决 川贝母 谷芽 桑白皮

虞男。肝为刚脏，体阴而用阳，肝气有余，即是肝火。平素肝胃不谐，近因脘膈作疼，渐至呃逆气升，咳呛频作，咳痰粘而不豁，舌糜旋去旋生，口干咽痒，多食甘味，便觉胀满，按脉弦细滑数，舌光色绛。拙见是木郁化火，火复生痰，津液受其劫损，所谓肝火太过，肺降不及，即此候也。古云，肺属金，最畏火刑。厥阴之脉挟胃而贯膈，支者循咽络肺，今咳呛气逆，咯痰粘薄，当责之肝火犯肺，然肝旺太过，肝亦自伤，所谓旺者，气与火也，所谓伤者，阴与液也。此证明液不复，肝经之气火郁勃冲扰，肺胃之津液熬炼为痰，柔金失于润降，后天生化之机又未勃发。计维润肺化痰，熄肝清火，参以和胃

为治，务使阴液来复，痰热肃清，加以胃纳能旺，庶可徐图效力，否则阴液不复，肝阳内燔，便有阴不济阳之虑。

霍石斛 煅石决 煅蛤壳 玄参心 广郁金 海浮石 制女贞 肥知母 淮牛膝 沙参 川贝母 辰灯芯

二诊：肺为金脏，最畏者火，心为火之主，肝为火之母也。咳呛甚于夜分，咳痰不豁，有时痰中带红，左肋引痛，自觉少腹气升，即欲喘逆，口干寐少，胃纳呆而舌糜屡起，脉来弦滑细数，舌本色绛。拙见肺胃津液不克速复，心肝之火，依然郁勃，致有水不济火之象。今火升即咳，牵及左肋少腹，当属肾阴先伤，木火亢而乘肺，津液炼为痰沫，柔金之肃降失司。欲保其金，当清其火，欲平其木，当益其阴，能得阴液渐复，火受水涵，斯刚亢之威不致窜伤阳络而咯血，方为佳境。爰拟润肺化痰，清火熄肝，参养阴为治，冀其肺降有权，肝升有制，水与火自然两得其平，而尤在加意静摄，勿摇其精，勿劳其形，庶可达火降气平之目的也。

北沙参 真川贝 炒白芍 黛蛤散 广郁金 煅牡蛎 生石决 煅磁石 制女贞 玄参心 原石斛 辰灯芯

陶男。肝经之脉挟胃贯膈，咳声嘶而腕闷如窒，脉弦、舌红而干，恐系肝络内伤，气火升逆乘肺，法宜和降，不致咳血为佳。

旋复梗 煅石决 光杏仁 焦山栀 川贝母 根生地 桑白皮 炒白薇 广郁金 炙紫菀 沙参 黛蛤壳

金男。初诊：肺胃之阴津液是也，非用清润，无以复已耗之液，痰与热相合，即成燥热之气，又易内劫其阴液。前诊用清润化降之法，于养正中参入化邪，即于化邪之中，参寄养正之意；求其利，防其弊，恰合此证治法。顷诊脉象弦细滑，验舌边糙中剥，咳呛虽间，而咯痰未豁，纳食未克如常。良由津液递伤，痰热余邪，留恋不净，肺胃之肃降仍乖。爰再以清养为主，佐以化痰泄热，扶其本，祛其邪，望其再得应手为佳。

孩儿参 京玄参 辰茯神 煅蛤壳 天花粉 灯芯 金石斛

冬青子 紫菀 炙桑皮 冬瓜子

二诊：肺胃之阴，谓之津液，《内经》谓阴精所奉其人寿。饮食入胃，游溢精气，上归于肺，于是诸脏皆赖其灌溉。心主火，居于肺中，必恃肺阴充足，则心阳乃得充展，昔人是以有心肺同居上焦之说。叠进润养阴液以祛邪降火为治，迨日咳呛递减，咯痰亦少。惟寐时多语，大都是记忆之谈，纳食未旺，诊得脉尚弦细数，苔薄糙，阴液未能尽复，心阳失藏显然也。其疲乏不支者，亦即邪去正虚所致。应易滋养为主，化降为佐，望其阴液徐复为佳。

孩儿参 生地炭 制女贞 川百合 地骨皮 辰麦冬 金石斛 辰茯神 炙款冬 瓜蒌皮 北秫米 灯芯

少男。肺为娇脏，得热着寒皆能致咳，咳痰不豁，脘闷、气急，脉弦滑，苔糙腻，昨更寒热交作，肺经本有留痰，表着寒邪，致肺卫失于宣降，宜宣达疏化之。

旋复梗 光杏仁 细白前 前胡 炙紫菀 瓜蒌皮 广郁金 象贝母 苏叶子 炒枳壳 桑叶皮 丝瓜络

陈男。初诊：丰伟之体，正气素弱，痰湿自然内胜。先患痔血，阴血内伤，近则咳嗽痰多，频泛涎沫，脘闷暖气，甚则肢体拘急，语言带窘，便下艰涩，诊得脉象细缓而滑，验苔满腻淡黄。合参症因苔脉，尚属积湿生痰，失于宣达，络气因之痹阻显然可知也。昔人有厚者为痰，薄者为饮之说，今积痰尚盛，三焦流行之气乖失常度。目前治法，计维涤痰理气，冀其痰豁气调而少变迁。

旋复梗 仙半夏 菖蒲 炒陈皮 广郁金 滁菊 全瓜蒌 川贝母 炒枳壳 姜竹茹 光杏仁 钩藤

二诊：进理肺化痰之剂，咯痰渐豁，痞闷抽痛亦得递舒，而纳呆寐少，时或暖气，脉缓滑，苔薄糙。气分尚有留痰，再拟前法增减治之。

杏仁 川贝 制半夏 菖蒲 橘红 旋复梗 蛤壳 钩藤 女贞子 滁菊 辰茯神

三诊：举动气逆为中气之虚，气虚则聚湿而酿为痰饮，脘痞渐舒而易于作噎，纳呆苔糙，脉来细滑，留痰虽得遶楚而未净，再拟清疏化理为治。

潞党参 炒白芍 法半夏 新会皮 云苓 米仁 旋复梗
蛤壳 川贝母 谷芽 厚朴

《陈良夫专辑》

萧伯章

周某，年近六十，患咳嗽一月有奇，昼夜不能安枕，杂治不效，肩与就诊。喘急涌痰无片刻停，舌苔白而暗，脉之浮缓。余先后计授三方，亦不应，沿吟久之，意其阴虚而兼冲逆，姑以张景岳金水六君煎与之，已而一剂知，二剂愈，乃知其方亦有可采者，非尽如陈修园氏所论云。

按金水六君煎，张氏自注治肺肾虚寒，水泛为痰，或年迈阴虚，血气不足，外受风寒，咳嗽呕恶，多痰喘急等症。陈氏砭之是矣。窃意张氏当日对于咳嗽等症，用以施治，或有偶中奇验之外，求其说而不得，遂囫圇汇注，不知分别，以致贻误后世。若云年迈阴虚，久嗽喘急痰涌，由于冲气上逆，非关风寒外感者，服之神效，则毫无流弊。余所以取用者，盖以归地能滋阴液而安冲气，法夏从阳明以降冲逆，辅之茯苓、生姜、广皮疏泄痰饮，导流归海，以成其降逆之功，获效所以神速。但方各应更为降冲饮，庶俾沿用者，知所取裁云。

又按方药分量，亦宜变更，庶轻重方为合法，兹故另载于后，庶免错乱。

附降冲饮，治年迈阴虚久嗽不瘥，喘急痰涌，由于冲气上逆，非关外感风寒者，服之神效。

熟地五钱 当归三钱 法夏三钱 茯苓三钱 广皮一钱
甘草一钱 生姜三片

矿工扬州黄某妻，患咳嗽，久而不愈，据云：毫无余症，惟五更

时喉间如烟火上冲，即痒而咳嗽，目泪交下，约一时许渐息，发散清凉温补，备尝之矣。率无寸效，脉之弦数，舌色红而苔白，曰：此有宿食停积胃中，久而化热，至天明时，食气上乘肺金，故咳逆不止，医者不究病源，徒以通常止咳之药，施之，焉能获效？为授二陈汤加姜汁、炒黄连、麦芽、莱菔子一帖知，二帖已，上症验案甚多，聊举其一，不复赘云。

《遁园医案》

徐锦

北濠许延诊案云：火洒烁肺，痰热内阻，咳嗽经年，发于夜半，天明咽痛、音闪。近增纳胀、头晕、腰疼、足冷、便泄、魄门反痛，三阴俱竭。当此烁石流金之令，何以支持！犀角地黄汤去丹、芍，加元参、沙参、海石、杷叶、人中白、麦冬、贝母、花粉、骨皮、生草、桔梗。

再诊：痢下臭秽殊甚，此水不生膀胱而入大肠也。腹鸣而痛，胸痞不纳，咳嗽口渴，咽痛内热，肺气大伤，不能通调水道。金水两亏，又逢酷暑，下利而上不纳，防脱。沙参、白芍、麦冬、生地、川贝、丹皮、山药、生草、桔梗、泽泻、茯苓。

三诊：痢下稍止，咳嗽，咽痛颇甚，中虚少气，头目昏晕，大渴引饮，尚恐增剧，照昨方，去丹、泽、桔、药，加元参、骨皮、梗米、米粉炒麦冬。

《心太平轩医案》

金子久

经过病情，遗泄失血，现在病状，咳呛气急，左咽作痛，右喉起燎，胃不思食，豁痰粘韧，六部脉象，均见弦细，多年经营失利，中年情志失畅，日积月累，致成七情，加以久嗽，致成劳损。正值春旺，木火用事，金被木扣，上受木侮，越人所谓上损过中，治法拟以调养上中。

磁石 川贝母 杏仁 橘红 淮牛膝 半夏 炒白芍 洋青
铅 茯苓 淡秋石 白术 谷芽 冬虫夏草

《金子久专辑》

丁泽周

风石。年届花甲，营阴早亏，风温燥邪，上袭于肺，咳呛咯痰不利，咽痛干燥，畏风头胀，舌质红，苔粉白而腻，脉浮滑而数。辛以散之，凉以清之，甘以润之，清彻上焦，勿令邪结增剧乃吉。

炒荆芥一钱 薄荷八分 蝉衣八分 熟大力子二钱 生甘草八分
桔梗一钱 马勃八分 光杏仁三钱 象贝母三钱 炙兜铃一钱
冬瓜子三钱 芦根去节，一尺

复诊：前进辛散凉润之剂，恶风头胀渐去，而咳呛不止，咽痛口渴，苔粉腻已化，转为红绛，脉浮滑而数，此风燥化热生痰，交阻肺络，阴液暗伤，津少上承。今拟甘凉生津，清燥润肺。

天花粉三钱 生甘草五分 净蝉衣八分 冬桑叶三钱
光杏仁三钱 象贝母三钱 轻马勃八分 瓜蒌皮二钱 炙兜铃一钱
冬瓜子三钱 芦根去节，一尺 生梨五片

冯石。咳呛两月，音声不扬，咽喉燥痒，内热头眩，脉濡滑而数，舌质红，苔薄黄，初起风燥袭肺，继则燥热伤阴，肺金不能输化，津液被火炼而为稠痰也。谚云：伤风不已则成癆，不可不虑。姑拟补肺阿胶汤加减，养肺祛风，清燥化痰。

蛤粉炒阿胶二钱 蜜炙兜铃一钱 熟大力子二钱 甜光杏三钱
川象贝各二钱 瓜蒌皮三钱 霜桑叶三钱 冬瓜子三钱
生甘草五分 胖大海三枚 活芦根去节，一尺 北秫米包，三钱
枇杷叶露代水煎药，半斤

二诊：咳呛减，音渐扬，去大力子。

三诊：前方去胖大海，加抱茯神三钱，改用干芦根，计十二帖而愈。

程右。肺素有热，风寒外束，腠理闭塞，恶寒发热无汗，咳呛气急，喉痛音哑，妨于咽饮，痰声漉漉，烦躁不安，脉象滑数，舌边红，苔薄腻黄。邪郁化热，热蒸于肺，肺炎叶举，清肃之令不得下行。阅前服之方，降气通腑，病势有增无减。其邪不得外达，而反内逼，痰火愈亢，肺气愈逆，症已入危！急拟麻杏石甘汤加味，开痹达邪，清肺化痰，以冀弋获为幸。

净麻黄五分 生石膏打，三钱 光杏仁三钱 生甘草五分
薄荷叶八分 轻马勃八分 象贝母三钱 连翘壳三钱 淡豆豉三钱
黑山栀二钱 马兜铃一钱 冬瓜子三钱 活芦根去节，一尺
淡竹沥冲服，一两

二诊：服药后得畅汗，寒热已退，气逆痰声亦减，佳兆也。惟咳呛咯痰不出，音哑咽痛，妨于咽饮，舌质红苔黄，脉滑数不静，外束之邪，已从外达，痰火尚炽，肺炎叶举，清肃之令，仍未下行。肺为妖脏，位居上焦，上焦如羽，非轻不举。仍拟轻开上焦，清肺化痰，能无意外之虞，可望出险入夷。

净蝉衣八分 薄荷叶八分 前胡五钱 桑叶皮各二钱
光杏仁二钱 象贝母三钱 生甘草八分 轻马勃八分 炙兜铃一钱
冬瓜子三钱 胖大海三个 连翘壳三钱 活芦根去节，一尺
淡竹沥冲服，一两

三诊：音渐开，咽痛减，咳痰难出，入夜口干，加天花粉三钱，接服四剂而痊。

文左。肺若悬钟，撞之则鸣，水亏不能涵木，木扣金鸣，咳呛已延数月，甚则痰内带红，形色不充，脉象尺弱，寸关濡数，势虑入于肺癆一门。姑拟壮水柔肝，清养肺气。

大麦冬各二钱 南北沙参各三钱 茯神二钱 淮山药二钱
川贝母二钱 瓜蒌皮二钱 甜光杏三钱 潼蒺藜三钱 熟女贞二钱
旱莲草二钱 茜草根二钱 冬瓜子三钱 枇杷叶膏冲，三钱

复诊：服三十剂，咳呛减，痰红止，去大麦冬、枇杷叶膏，加

蛤粉炒阿胶二钱、北秫米三钱，又服三十剂，即愈。

蔡右。旧有肝气脘痛，痛止后，即咳嗽不已，胁肋牵痛，难于左卧，已延数月矣。舌质红苔黄，脉弦小而数。良由气郁化火，上迫于肺，肺失清肃，肝升太过，颇虑失血！姑拟柔肝清肺，而化痰热。

北沙参三钱 云苓二钱 淮山药三钱 生石决六钱 川贝二钱
瓜蒌皮二钱 甜光杏三钱 海蛤壳三钱 丝瓜络二钱 冬瓜子三钱
北秫米包，三钱 干芦根去节一两

复诊：服二十剂后，咳呛胁痛大减，去干芦根，加上毛燕三钱包煎。

董左。失血之后，咳呛不已，手足心热，咽干舌燥，脉细数不静，此血去阴伤，木火刑金，津液被火炼而为痰，痰多咯不爽利，颇虑延入肺癆一门。姑拟益肾柔肝，清养肺气。

蛤粉炒阿胶三钱 茯神三钱 淮山药三钱 北沙参三钱
川石斛三钱 生石决六钱 川贝三钱 瓜蒌皮二钱 甜光杏三钱
潼蒺藜三钱 熟女贞三钱 北秫米包，三钱

复诊：十剂后，咳呛内热均减，加冬虫夏草二钱。

《丁甘仁医案》

丁泽周

何老太爷。昨投药后，虚寒虚热已见轻减，咳嗽痰多，夜梦纷纭，纳谷减少，肢节痠疼，头眩眼花，舌质红，苔微腻，脉弦小而滑。高年气阴本亏，肝阳升腾，湿痰留恋肺胃，肃降失司。今宜柔肝潜阳，和胃化痰，尚希明正。

仙半夏 煨天麻 生牡蛎 青龙齿 朱茯神 远志 稻豆衣
旋覆花 川象贝 甜光杏 炙款冬 橘白 嫩钩钩 炒谷麦芽

二诊：寒热已退，咳嗽痰多，甚则气逆，头痛眩晕，舌质红，脉弦小而滑。高年气阴两亏，肝阳升腾，痰饮留恋肺胃，肃降之令失司。再宜柔肝潜阳，和胃化痰。

南沙参三钱 炙白苏子一钱五分 川贝母二钱 象贝母二钱
朱茯神三钱 炙远志一钱 仙半夏二钱 煨天麻八分 生牡蛎四钱
稻豆衣三钱 炙款冬一钱五分 嫩钩钩三钱 旋覆花一钱五分
生熟谷芽各三钱 甜光杏各三钱

《丁甘仁晚年出诊医案》

吴右。清晨略痰不爽，胸膈牵痛，午后头眩，肝气肝阳上升，燥痰袭于上焦，肺胃肃降失司。宜清肺化痰，清泄厥阳。

川贝母二钱 抱茯神三钱 生白芍二钱 瓜蒌皮三钱
竹沥半夏钱半 金沸花包，钱半 黑稻豆衣三钱 生牡蛎四钱
福泽泻钱半 嫩钩钩后入，三钱 潼白蒺藜各钱半 炒杭菊钱半
荷叶边一围

韩左。肺为脏腑之华盖，主清肃之令，灌溉百脉。风寒之邪，由皮毛而入，内蕴于肺，肺气窒塞不宜，咳痰不爽，音暗无声。舌苔薄白，脉象浮濡而滑。已延二十一天，先哲云：伤风不醒便成癆，即此症也。今仿金实不鸣，治宜轻开法。

蜜炙麻黄三分 光杏仁三钱 象贝母三钱 抱茯神三钱
炙远志一钱 生甘草六分 轻马勃八分 瓜蒌皮三钱 净蝉衣八分
嫩射干八分 炙兜铃一钱 冬瓜子三钱 胖大海三枚 竹衣三分

三诊：咳嗽已有三候，音暗不能出声。舌中薄白边淡红，脉象浮濡而滑。风寒包热于肺，痰浊交阻，肺气窒塞。肺为娇脏，位于上焦，治上焦如羽，非轻不举，理宜轻开伏邪，宣肺化痰，失机不图，致客邪愈伏愈深，金实不鸣。前投华盖汤加减，尚觉合度，仍宜原意出入，尚希裁正。

净蝉衣八分 嫩射干八分 光杏仁三钱 抱茯神三钱
炙远志一钱 象贝母三钱 轻马勃八分 福橘络一钱 冬瓜子三钱
炙紫菀八分 炙兜铃一钱 瓜蒌皮炒，三钱 胖大海三枚 竹衣三分

候左。外感风邪，引动湿痰，逗留肺、胃，形寒咳嗽，纳谷减少，舌苔薄腻，脉象濡滑。先宜疏邪化痰，宣肺、和胃。

嫩前胡钱半 仙半夏二钱 炒黑荆芥一钱 冬桑叶三钱
赤茯苓三钱 炙远志一钱 陈广皮一钱 光杏仁三钱 象贝母三钱
炙款冬钱半 炒谷麦芽各三钱 佩兰梗钱半

施右。怀麟五月，胎火逆肺，清肃之令不行，咳嗽咯痰不爽，胸膈牵痛，宜清胎火润肺金。

桑叶皮各，钱半 光杏仁三钱 川象贝各，二钱 炒条芩钱半
抱茯神三钱 炙远志一钱 生甘草五分 肥知母钱半 瓜蒌皮二钱
炙兜铃一钱 冬瓜子三钱 北秫米包，三钱 干芦根一两
枇杷叶膏三钱，冲服

邱右。怀麟八月，风寒包热于肺，咳嗽音声不扬，内热口干，宜轻开肺邪，而化痰热。

净蝉衣八分 嫩射干八分 光杏仁三钱 象贝母三钱
抱茯神三钱 炙远志一钱 瓜蒌皮二钱 炙兜铃一钱 冬瓜子三钱
炒条芩一钱 鲜竹茹二钱 轻马勃八分 胖大海三枚

吴右。怀麟七月，手太阴司胎，胎火上升，风燥之邪袭肺，咳嗽两月，甚则吐血。宜祛风清金，而降肝火。

冬桑叶三钱 炒条芩一钱 光杏仁三钱 川象贝各二钱
瓜蒌皮二钱 茜草根二钱 侧柏炭钱半 鲜竹茹二钱 冬瓜子三钱
白茅花包，一钱 活芦根去节，一尺 枇杷叶露后入，四两

卢右。产后四旬，营血亏虚，虚阳迫津液而外泄，入夜少寐，盗汗甚多；加之咳嗽，风邪乘隙入肺也。宜养阴潜阳，清肺化痰。

白归身二钱 光杏仁三钱 炒枣仁三钱 浮小麦四钱
稻豆衣三钱 朱茯神三钱 象贝母三钱 苦桔梗一钱 霜桑叶三钱
炙远志一钱 瓜蒌皮二钱 冬瓜子三钱 糯稻根须一两 煎汤代水。

胡右。血虚有热，经事行而不多，风邪袭肺，清肃之令不行，咳嗽痰多，先宜祛风化痰，和营调经。

炒黑荆芥钱半 净蝉衣八分 嫩前胡钱半 冬桑叶三钱
朱茯神三钱 炙远志一钱 光杏仁三钱 活贯众炭三钱 象贝母三钱

紫丹参二钱 青龙齿三钱 羌蔚子三钱 冬瓜子皮各三钱

二诊：伤风咳嗽，轻而复重，昨晚形寒，经事行而太多，有似崩漏之状。冲任亏损，血不归经，虚气散逆，为面浮足肿也。今拟标本同治。

炒黑荆芥炭一钱 冬桑叶三钱 象贝母三钱 炙远志一钱
朱茯神三钱 青龙齿三钱 炒扁豆衣三钱 生白术钱半 阿胶珠钱半
炮姜炭四分 焦查炭三钱 炒谷芽三钱 炒苡仁三钱 莲蓬炭三钱

吴左。阴虚质体，津少上承，内热口燥，咳嗽咯痰不爽。宜祛风清金而生津液。

冬桑叶二钱 光杏仁三钱 象贝母三钱 抱茯神三钱
炙远志一钱 天花粉三钱 瓜蒌皮二钱 炙兜铃一钱 广橘白一钱
冬瓜子三钱 生熟谷芽各三钱

戴左。外感风邪，引动湿痰，逗留肺、胃，咳嗽气逆又发，舌苔腻布，脉象浮滑。姑拟疏邪化痰，宣肺和胃。

嫩前胡钱半 仙半夏二钱 旋覆花包，钱半 光杏仁三钱
象贝母三钱 炙兜铃一钱 赤茯苓三钱 水炙远志一钱
鹅管石煅，一钱 橘红一钱 炙款冬钱半 冬瓜子三钱

何先生。湿温初愈，湿痰未楚，肺、胃宣化失司，咳嗽咯痰不爽，纳谷减少，夜不安寐，胃不和则卧不安；脉象濡滑。宜理脾和胃，安神化痰。

仙半夏二钱 生熟苡仁各三钱 新会皮钱半 云茯苓三钱
水炙远志一钱 白蔻壳八分 泽泻钱半 光杏仁三钱 象贝母三钱
佩兰根钱半 炒谷麦芽各三钱 旋覆花包，钱半 生姜一片

上桂心一分，川雅连一分，二味研饮丸吞服。

邵老先生。初起寒热，继则蜜煎通便而致泄泻，痰多气逆，汗多肢冷，谵语郑声，咳嗽胁肋牵痛，脉象濡细，舌苔灰腻。汗多亡阳，神不守舍，湿痰上泛，互阻肺、胃，肃降之令失司，脉症参合，颇虑正气不支，致虚脱之险，勿谓言之不预。姑宜回阳敛阳，安神化痰，未识

能得挽回否？尚希星若道兄政之。

吉林参须八分 熟附子块八分 煅牡蛎三钱 花龙骨二钱
朱茯神三钱 姜半夏二钱 生白术二钱 炙远志一钱 炙款冬钱半
川郁金钱半 旋覆花钱半 炒谷芽三钱 炒苡仁三钱 鹅管石煨，一钱
浮小麦四钱

另用牡蛎粉合龙骨料等分，以绢包，拍汗处。

二诊：阳已渐回，四肢渐温，脉亦渐起。惟痰多咳嗽，肋肋牵痛，口干不多饮，舌苔灰腻。气阴暗伤，蕴湿酿痰，逗留肺胃，清肃之令不行。神志时明时昧，谵语郑声，一因神不守舍，一因痰浊上蒙清窍也。恙势尚在重途，仍宜和胃宣肺，安神化痰。

仙半夏二钱 炙远志一钱 紫贝齿三钱 朱茯神三钱
薄橘红一钱 生苡仁四钱 象贝母三钱 炙款冬钱半 冬瓜子三钱
旋覆花包，钱半 川郁金钱半 方通草八分 浮小麦四钱
鹅管石煨，一钱

三诊：阳回之后，身热复作，汗多不解，痰多咳嗽，肋肋牵痛，口干欲饮，神志时明时昧，谵语郑声，精神萎顿，舌苔糙腻而黄，脉濡滑而数。气阴两伤，客邪湿热蕴蒸募原，痰浊逗留肺胃，上蒙清窍，神明无以自主。虑正不胜邪，致内闭外脱之险。

冬桑叶三钱 金银花三钱 连翘壳三钱 朱茯神三钱
象贝母三钱 通草八分 淡竹沥二两 鲜竹茹二钱 浮小麦四钱
枇杷叶去毛，四张 仙半夏二钱 旋覆花包，钱半 光杏仁三钱

陆左。风燥之邪袭肺，清肃之令不行，咳呛咯痰不爽，已有一月。宜祛风清金而化痰热。

冬桑叶三钱 光杏仁三钱 象贝母三钱 瓜蒌皮三钱
抱茯神三钱 炙远志一钱 福橘络一钱 炙兜铃一钱 冬瓜子三钱
炒竹茹二钱 干芦根去节一两 枇杷叶膏三钱，冲服

郑老太太，年逾耄耋，阴血亏耗，肝阳易于上升，头痛眩晕，时轻时剧、咽喉干燥，加之咳嗽，风燥之邪乘虚入肺也。肺左弦细，右

浮濡而滑。先宜养阴柔肝，祛风清金。

川石斛二钱 霜桑叶二钱 滁菊花二钱 光杏仁三钱
云茯苓三钱 炙远志一钱 象贝母三钱 嫩前胡钱半 冬瓜子三钱
粗豆衣三钱 薄荷炭八分 焦谷芽三钱 荷叶边一圈
嫩钩钩后入，三钱

吴左。阴虚质体，风燥伏邪，蕴袭肺、胃，身热晚甚，咳嗽鼻红。
宜辛凉清解，宣肺化痰。

清水豆卷四钱 嫩前胡钱半 薄荷叶八分 净蝉衣八分
江枳壳一钱 苦桔梗一钱 冬桑叶三钱 光杏仁三钱 象贝母三钱
熟牛蒡二钱 连翘壳三钱 冬瓜子三钱 活芦根去节，一尺

廉左。痰火内郁，风邪外束，肺气窒塞，失其下降之令，咳嗽气
急又发，口干舌黄，脉弦滑带数。先拟疏邪化痰，肃降肺气，俾得邪
解气顺，则痰火自平。

嫩前胡钱半 仙半夏二钱 光杏仁三钱 象贝母三钱
炙白苏子二钱 云茯苓三钱 炙远志一钱 桑叶皮水炙，各，三钱
瓜蒌皮三钱

何左。痰火内郁，风燥外束，肺、胃为病，咳嗽咯痰不爽，腑行不
实，脉象濡滑而数。姑拟疏邪化痰。

炒黑荆芥一钱 光杏仁三钱 象贝母三钱 炙白苏子钱半
赤茯苓三钱 炙远志一钱 竹沥半夏二钱 炙款冬钱半 炙兜铃一钱
旋覆花包，钱半 炒瓜蒌皮三钱 冬瓜子三钱

董左。风燥之邪，挟痰热逗留肺、胃，临晚潮热，咳嗽呕恶，甚则
鼻红，脉象濡滑而数。宜和解枢机，清肺化痰。

银柴胡一钱 冬桑叶二钱 嫩前胡二钱 冬瓜子三钱
抱茯神三钱 炙远志一钱 光杏仁三钱 鲜竹茹二钱 象贝母三钱
瓜蒌皮三钱 炙兜铃一钱 白苑花钱半 枇杷叶露后入，四两

《丁甘仁医案续编》

张咸斋

孙左。年甫十五，寒热盗汗，咳痰微带红丝，春秋举发，已历数载。先天不足，后天不振，脾为生痰之源，肺为贮痰之器，未冠先衰，上紧调养，精通天年，尤关为要。

南沙参三钱 冬术三钱 杏仁三钱 制半夏一钱半
肥桔梗一钱半 赤苓三钱 甘草四分 橘红一钱 钗斛三钱 藕一两
小麦七钱

二诊：后又加蜜炙苏梗一钱半。服后寒热已解，咳痰亦减。又丸方拟六君合六味，去萸肉，加六神曲、楂肉、莲肉、陈仓米，和胃，藕粉化痰打糊为丸。

《张咸斋医案》

黄衮甫

吴右，年三十四岁，雇工，住杨秀浜。

病名：风嗽。

原因：风水交袭，表里不宣所致。

症候：咳嗽渐作，咯痰粘腻，气逆不舒，额上略有微汗。

诊断：脉右浮弦，左迟，舌上白苔，辨症察脉，知属风水之咳嗽症也。夫肺主皮毛，皮毛者肺之合也。风水由皮毛而侵及肺，风邪既不外解，水邪又不下渗，壅闭上焦，窒碍呼吸，动则始咳，咳极则喘。

疗法：方用杏仁宣表，细辛、干姜、半夏化饮，五味子、茯苓、紫苑、款冬降气肃肺，治风水嗽之未化热者，非辛温之药，其孰能愈之。

外方：苦杏仁三钱 淡干姜五分 白茯苓三钱 生白果十粒
北细辛三分 五味子五分 款冬花三钱 炙甘草三分 制半夏三钱
炙紫苑三钱

效果：服药三剂而咳全愈。

廉按：风寒外搏，水饮上冲，小青龙汤加减，却是对症良方。额上既有微汗，去麻黄加紫苑、茯苓宣肺利水，调剂亦有斟酌。

《全国名医验案类编》

何拯华

单增康，年三十六岁。

病名：凉燥犯肺。

原因：秋深初凉，西风肃杀，适感风燥而发病。

症候：初起头痛身热，恶寒无汗，鼻鸣而塞，状类风寒，惟唇燥溢干，干咳连声，胸满气逆，两胁串疼，皮肤干痛。

诊断：脉右浮涩，左弦紧，舌苔白薄而干。

扪之戟手，此内经所谓“大凉肃杀，华英改容，胸中不便，嗑塞而咳”是也。

疗法：遵经旨以苦温为君，佐以辛甘，香苏葱豉汤去香附，加杏仁、百部、紫苑、前胡、桔梗等，温润以开通上焦，上焦得通，则凉燥自解。

处方：光杏仁三钱 枳叶梗钱半 新会皮钱半 紫苑三钱
前胡钱半 鲜葱白四枚 淡香豉三钱 炙百部钱半 桔梗一钱
炙草六分

次诊：两剂后，周身津津微汗，寒热已除，胁痛亦减。惟咳嗽不止，痰多气逆，胸前满闷大便燥结，脉右浮滑，左手弦紧已除，舌苔转为滑白，此肺气之贖郁，虽已开通，而胸腹之伏邪，尚多闭遏也。治以辛滑通润，流利气机，气机一通，大便自解。用五仁橘皮汤加萎、薤。

次方：甜杏仁四钱，去皮，并 柏子仁三钱，并 生姜四分
拦捣全瓜蒌五钱 松子仁三钱，去皮，并 栝蒌仁四钱，并
干薤白二钱，捣 蜜炙橘红一钱

效果：一剂而便通咳减，再剂而痰少气平，后用清金止嗽膏，日服两瓢，调养数日而痊。

附清金止嗽膏方

藕汁 梨汁各四两 姜汁 萝卜法 白蜜各三两
巴旦杏仁去皮 川贝去心各二两 磁瓶内炭火熬膏，不时噙化。

廉按：春月地气动而湿胜，故春分以后，风湿暑湿之症多，秋月天气肃而燥胜，故秋分以后，风燥凉燥之症多。若天气晴暖，秋阳以曝，温燥之症，反多于凉燥。前哲沈氏日南谓性理大全，燥属次寒，感其气者，遵内经“燥淫所胜，平以苦温，佐以辛甘”之法，主用香苏散加味，此治秋伤凉燥之方法也。叶氏香岩谓秋燥一症，初起治肺为急，当以辛凉甘润之方，气燥自平而愈，若果有暴凉外束，只宜葱豉汤加杏仁、苏梗、前胡、桔梗之属。此案初方，悉从叶法加减，接方五仁橘皮汤加萎、薤，方皆辛润滑降，稳健有效。惟初起虽属凉燥，继则渐从热化，故终用清金止嗽膏，以收全功。

罗守谦，年三十八岁。

病名：肺燥脾湿。

原因：凉燥外搏，暑湿内伏，时至深秋而晚发。

症候：一起即洒淅恶寒，寒已发热，鼻唇先干，咽喉燥痛，气逆干咳，肢懈身疼，胸胁串疼，脘腹灼热，便泄不爽，溺短赤热。

诊断：脉右浮涩，关尺弦滞，舌苔粗如积粉，两边白滑，此喻嘉言所谓秋伤燥湿，乃肺燥脾湿之候，即俗称燥包湿，湿遏热伏是也。

疗法：先与苦温发表，轻清化气，葱豉桔梗汤加减，辛润利肺以宣上，使上焦得宣，气化湿开。

处方：光杏仁三钱 苦桔梗一钱 前胡钱半 紫苑三钱
鲜葱白四枚 牛蒡子钱半，拌 苏薄荷一钱 炙甘草五分 栝蒌皮二钱
淡香豉三钱

次诊：连进苦温辛润，开达气机，周身津津微汗，恶寒胸胁痛除。惟灼热口渴，心烦恶热，咳痰稠粘，便溏溺赤，脉转洪数，舌苔粗

糙，此凉燥外解，湿开热透之候，法当芳透清化，吴氏三仁汤加减。

次方：光杏仁三钱 牛蒡子钱半，杵 丝通草一钱 淡竹叶二钱
焦栀皮二钱 生苡仁三钱 青连翘三钱 香连丸一钱 拌飞滑石五钱
栝蒌皮二钱

先用活水芦笋二两 灯心五分 北细辛二分 煎汤代水。

三诊：两进芳透清化，胸背头项，红疹白痞齐发，心烦恶热渐减。惟仍咳稠痰，口仍燥渴，腹尚灼热，大便反秘，溺仍赤涩，脉转沉数，舌赤苔黄而糙，此下焦湿热伏邪，依附糟粕而胶结也。治以苦辛通降，宣白承气汤加减，使伏邪从大便而解。

三方：生石膏四钱，打 光杏仁四钱 小枳实钱半
鲜石菖蒲汁一小匙，冲 生川军二钱 栝蒌仁五钱，杵 汉木通一钱
广郁金汁两小匙，冲

四诊：一剂而大便先燥后溏，色如红酱，二剂而燥渴腹热均轻，舌苔黄糙大退，脉转软而小数，此伏邪渐从大便下泄也。下虽不净，姑复其阴，叶氏养胃汤加减，以消息之。

四方：北沙参二钱 鲜生地汁两瓢，冲 鲜石斛钱半 原麦冬一钱
雅梨肉汁两瓢，冲 建兰叶三片，切寸，后入

五诊：咳嗽大减，稠痰亦少，溺湿渐利，大便复秘，频转极臭矢气，腹热如前，脉仍小数，按之坚实，此浊热粘腻之伏邪尚多，与肠中糟粕相搏，必俟宿垢下至四五次，叠解色如红酱，极其臭秽之溏粪，而伏邪始尽，姑用缓下法以追逐之。

五方：野茭白根一两，童桑枝一两，煎汤送陆氏润字丸，每吞钱半，上下午及晚间，各服一次。

六诊：据述每服一次丸药，大便一次，色如红酱而秽，然不甚多，便至四次，色转酱黄，五次色转老黄，六次色转淡黄，腹热已除，胃亦思食，诊脉软而不数，舌转嫩红，扪之微干，此胃肠津液两亏也。与七鲜育阴汤以善后。

六方：鲜生地五钱 鲜石斛四钱 鲜茅根一两

鲜枇杷叶五钱,炒香

四味煎汤,临服,冲入鲜稻穗露、蔗浆、梨汁各两瓢。

效果:连进四剂,胃纳大增,津液精神复旧,后用燕窝冰糖汤,调理旬余而痊。

廉按:秋日暑湿踞于内。新凉燥气加于外,燥湿兼至,最难界限清楚,稍不确当,其败坏不可胜言。盖燥有寒化热化,先将暑湿燥分开,再将寒热辨明,自有准的。此案先用苦温发表,辛润宣上,以解凉燥外搏之新邪,俟凉燥外解,湿开热透,然后肃清其伏热,或用芳透清化,或用缓下清利,必俟伏邪去净,津液两亏,改用增液育阴以善后。先后六方,层次颇清,为治燥夹伏暑之正法。

许君,年三十二岁。

病名:燥咳动冲。

原因:内因肾虚肝旺,外因秋燥司令,一感触而冲动作咳,前医连进清燥救肺汤加减(方中人参用太子参),约八剂,而终归无效,来延予诊。

症候:初起咳逆无痰,喉痒咽干,夜热咳甚,动引百骸,继则脐旁冲脉,动跃震手,自觉气从脐下逆冲而上,连声顿咳,似喘非喘。

诊断:脉左细涩,右反浮大,按之虚数,舌红胖嫩,比喻嘉言所谓时至秋燥,人多病咳,而阴虚津枯之体,受伤独猛,亦即王孟英所谓肺气失降肾气失纳之冲咳也。

疗法:首当潜阳镇冲,故以三甲、石英为君,其次育阴滋燥,故以胶、麦、地、芍为臣,佐以款冬,使以冰糖,为专治干咳而设,庶几潜镇摄纳,纳气归原,则气纳冲平,不专治咳而咳自止矣。

处方:左牡蛎四钱,生打 龟甲心四钱,生打 生鳖甲四钱,打
生款冬三钱 陈阿胶钱半,烊冲 生白芍五钱 原麦冬二钱
奎冰糖三钱

先用大熟地八钱(切丝)用秋冰三分开水泡四汤碗,同紫石英一两,煎取清汤,代水煎药。

次诊：每日两煎，连投四剂，使水升而火降，故咽干喉痒均除，俾气纳而冲底，故顿咳连声大减。惟脉仍虚数，舌尚胖嫩，此伏燥之所以难滋，而阴虚之所以难复也。仍守原方，重加石斛，耐心调补，以静养之。

次方：原方去石英，加鲜石斛五钱，同切丝大熟地，煎汤代水。

三诊：连进六剂，冲动已平，夜热亦退，胃纳大增，精神颇振，晨起略有单声咳，脉虽虚而不数，舌虽红而不胖，病势幸有转机，药餌尚须调补，议以六味地黄汤加减，善其后以复原。

三方：春砂仁二分 拌捣大熟地五钱 野百合二钱
大蜜枣两枚，劈 山萸肉三钱 生淮山药三钱，打 原麦冬三钱
金橘脯两枚，切片

效果：连服十剂，单声咳止，饮食精神，恢复原状而痊。

廉按：燥咳动冲，梦隐谓之冲咳。凡水亏木旺者，一逢秋燥司令，每发此病，予恒数见不鲜，仿毛氏治冲咳方（如牡蛎、龟板、鳖甲、紫石英、茯苓、熟地、归身、牛膝、冬虫夏草、胡桃肉等品，或用西洋参、熟地、茯苓、二冬、茯苓、龟版、牡蛎、紫石英、玉竹、枇杷叶、橘皮等品），屡投辄验。此案从吴氏三甲复脉汤加减，大旨相同，竟奏全功。此叶吴王三家学派之所以盛行，到今不衰也。

许姓妇，年三十余岁。

病名：燥咳头晕。

原因：素体血虚肝热，时逢秋燥，燥气逗引，陡发干呛而兼晕。

症候：燥咳恶心，气逆头眩，鼻中气如火热，咽干神烦，夜寐盗汗，汗出即醒，醒则气咳，咳甚则晕。

诊断：脉右寸浮涩，左关虚数而弦，细按两尺，尚有根气，舌干少津，此由时令之燥气，挟肝经之燥火，互相上蒸，冲肺则气逆干咳，冲脑则头晕目眩，病热甚为可虑，幸而脉尚有根，两颧不红，声不嘶而音不哑，不致酿变癆瘵，耐心调养，尚可挽回。

疗法：欲保肺藏之气液，当先清肺经之燥热，泻白散合清燥救

肺汤加減。

处方：生桑皮五钱 冬桑叶三钱 生石膏三钱 原麦冬一钱
生甘草五分 地骨皮五钱 甜杏仁三钱，杵 毛西参一钱
枇杷露一两，分冲 雅梨皮一两

次诊：两剂后，鼻中气热已除，气逆干咳亦缓，惟夜寐仍有盗汗，神烦头晕依然，脉舌如前。姑用吴氏救逆汤，甘润存津，介潜镇摄。

次方：陈阿胶钱半，烊冲 生白芍五钱 细生地三钱
化龙骨三钱，生打 原麦冬钱半 炙甘草八分 炒麻仁二钱
左牡蛎五钱，生打

三诊：三进甘润介潜，头晕已除，盗汗亦止。惟火升气咳，痰不易出，即强咯出一二口，稀沫稠粘，喉中有血腥气，右寸脉转浮数，左弦软虚数同前，舌两边润，中心仍干，正如绮石所谓肺有伏逆之燥火，膈有胶固之燥痰也。姑仿顾松园先生法，清金保肺汤以消息之。

三方：桑白皮五钱 生甘草七分 野百合钱半 京川贝四钱，去心
地骨皮五钱 原麦冬一钱 款冬花三钱 牛薏仁三钱

先用鲜枇杷叶一两（去毛筋净） 鲜白茅根二两（去皮） 煎汤代水

四诊：连投清金润燥，降气化痰，咳虽减而不除，痰已松而易出，血幸不咯，神亦不烦，脉转滑数，舌变嫩红。病者云：恐久呛成癆，何不用人参以益肺气？愚谓参固为益气正治之药，然今尚肺火炽盛，骤进人参，最防肺热还伤肺。故前投清金润燥之药，清肺热，即所以救肺气，亦为益气之法也。仍守前方，加西洋参钱半，鲜石斛三钱。

五诊：四剂后，余症均减，仅有早起咳痰，惟不食则嘈，得食则缓，食后咳呛全无。诊脉右关虚弱，左关沉细微数，此由胃阴肝血两亏，中虚无砥柱之权，仿仲圣诸虚不足，先建其中，去过辛过温之

品，但用建中之法，而变建中之方，庶不致助肝阳以烁肺津矣。

五方：淮山药三钱，生打 提麦冬钱半 炒白芍二钱 陈南枣二枚
青皮廿蔗两节 川石斛三钱 广皮白一钱 清炙草五分 饴糖三钱
鲜建兰叶三片，后入

效果：六进建中方法，胃健咳止，精神复旧，后用人参固本丸（潞党参、生熟地各四两，天麦冬各二两，蜜丸如小桐子大，玫瑰花三朵，泡汤送下。）调补一月而痊。

廉按：此即喻西昌所谓身中之燥，与时令之燥，互结不解，必缓调至燥金退气，而肺乃得宁，咳可全愈。案中前后五方，悉本前哲成方脱化而来，无一杜撰之方，殊堪嘉尚。

王敬贤，年三十五岁。

病名：温燥伤肺。

原因：秋深久晴无雨，天气温燥，遂感其气而发病。

症候：初起头疼身热，干咳无痰，即咯痰多稀而粘，气逆而喘，咽喉干痛，鼻干唇燥，胸膈肋疼，必烦口渴。

诊断：脉右浮数，左弦涩，舌苔白薄而干，边尖俱红，此内经所谓“燥化于天热反胜之”是也。

疗法：遵经旨以辛凉为君，佐以苦甘，清燥救肺汤加减。

处方：冬桑叶三钱 生石膏四钱，冰糖水炒 原麦冬钱半
栝蒌仁四钱，杵 光杏仁二钱 南沙参钱半 生甘草七分 制月石二分
柿霜钱半，分冲

先用鲜枇杷叶一两，去毛筋 雅梨皮一两 二味煎汤代水。

次诊：连进辛凉甘润，肃清上焦，上焦虽渐清解，然犹口渴神烦，气逆欲呕，脉右浮大搏数者，此燥热由肺而顺传胃经也。治用竹叶石膏汤加减，甘寒清镇以肃降之。

次方：生石膏六钱，杵 毛西参钱半 生甘草六分 甘蔗浆两瓢，冲
竹沥夏钱半 原麦冬钱半 鲜竹叶卅片 雅梨汁两瓢，冲

先用野菰根二两 鲜茅根二两，去皮 鲜刮竹茹三钱 煎汤代水。

三诊：烦渴已除，气平呕止，惟大便燥结，腹满似胀，小溲短涩，脉右浮数沉滞，此由气为燥郁，不能布津下输，故二便不调而秘涩，张石顽所谓燥于下必乘大肠也。治以增液润肠，五汁饮加减。

三方：鲜生地汁两大瓢 雅梨汁两大瓢 生莱菔汁两大瓢
广郁金三支，磨汁约二小匙 用净白蜜一两，同四汁重汤炖温，以便通为度。

四诊：一剂而频转矢气，二剂而畅解燥矢，先如羊粪，继则夹有稠痰，气平咳止，胃纳渐增，脉转柔软，舌转淡红微干，用清燥养营汤调理以善其后。

四方：白归身一钱 生白芍三钱 肥知母三钱 蔗浆两瓢，冲
细生地三钱 生甘草五分 天花粉二钱 蜜枣两枚，劈

效果：连投四剂，胃渐纳谷，神气复元而愈。

廉按：喻西昌谓内经生气通天论：“秋伤于燥，上逆而咳，发为痿厥。”燥病之要，一言而终，即“诸气贲郁，皆属于肺。”“诸痿喘呕，皆属于上。”二条指燥病言明甚。至若左肢胁痛不能转侧，嗌于面尘，身无膏泽，足外反热，腰痛筋挛，惊骇，丈夫癰疽，妇人少腹痛，目眦眦疮，则又燥病之本于肝而散见不一者也，而要皆秋伤于燥之征也。故治秋燥病，须分肺肝二脏，遵内经“燥化于天，热反胜之”之旨，一以甘寒为主，发明内经“燥者润之”之法，自制清燥汤，随症加減，此治秋伤温燥之方法也。此案前后四方，大旨以辛凉甘润为主，对症发药，药随症变，总不越叶氏上燥治气，下燥治血之范围。

《全国名医验案类编》

钱存济

陈周溪，年近四旬，身体强盛。

病名：燥咳。

原因：时值秋燥司令，先患房事，后宴会，酒罢当风而卧，醒则发咳。

症候：干咳无痰，胸膈板闷，胃脘拒按，口干喜冷，日晡发热，夜不安寐。

诊断：六脉强直有力，舌苔黄燥，合病因脉象断之，乃肺燥胃实也。先以清燥活痰药投之，不应。继以消旨豁痰药治之，转剧。此由时值燥令，胃肠积热化燥，燥火横行，宜其无济也。

疗法：大承气汤合调胃法，君以苦寒荡积之大黄，佐以咸寒润燥之芒硝，臣以苦辛开泄之朴实，少加甘草以缓硝黄之峻为使。

处方：川锦纹一两，酒洗 川卷朴三钱 炒枳实三钱 玄明粉三钱
生甘草钱半

右药先煎，后纳玄明粉，俟玄明粉融化，去滓顿服。

效果：服一剂，下燥屎数十枚，其病霍然。改用清燥救肺汤二剂，以善其后。

廉按：燥之一症，有由风来者，则十九条内“诸暴强直，皆属于风”是也；有由湿来者，则十九条内“诸痉项强，皆属于湿”是也。风为阳邪，久必化燥，湿为阴邪，久亦化燥，并且寒亦化燥，热亦化燥，燥必由他病转属，非必有一起即燥之症，内经所以不言燥者，正令人于他症中求而得之，由是而症以经文，及伤寒论各病，则凡六经皆有燥症。嘉言所制清燥救肺汤一方，独指肺金而言，断不足以概之。若言六经之燥，则惟阳明一条，最为重候。盖手足阳明之胃大肠，正属燥金，为六气之一，而可独指肺金为燥哉？嘉言惟不识十九条之皆可以求燥症，故不知十九条之所以无燥症耳。至补出秋燥一层，自有卓见，不可没也。此案却合胃大肠燥金为病，清燥清滞，其何济乎！断症既明，放胆用三一承气汤，苦温平燥，咸苦达下，攻其胃肠燥实，善后用清燥救肺，先重后轻，处方用药，步骤井然。

《全国名医验案类编》

柳贯先

郎君，年六十三岁。

病名：燥咳。

原因：中年失偶，身长而瘦，木火体质，适感秋燥而发病。

症候：干咳喉痒，胸胁刺痛，头胀肌热，鼻流浊涕。

诊断：舌红苔干，脉浮而数，乃温燥引动肝热冲肺也。

疗法：润肺清肝，用桑叶、二母、萎、芦为君，以清燥救肺，竹茹、瓜络、夏枯、苏子为臣，以清络平肝，佐以薄荷、梨皮之辛凉甘润，以疏风燥，使以生甘草、调胃和药。

处方：霜桑叶二钱 紫苏子一钱 苏薄荷五分 生甘草五分
夏枯草二钱 栝蒌皮二钱 肥知母钱半 川贝母三钱 淡竹茹三钱
水芦根一两 雅梨皮五钱 丝瓜络三钱

效果：服二帖，即热退咳减。原方去薄荷、苏子，加鲜石斛三钱，青蔗浆两瓢，增液养胃而痊，嘱其日服藕粉，以调养而善后。

廉按：此外感温燥之咳，故专用清泄以肃肺，方亦轻灵可喜。

《全国名医验案类编》

高纮云

魏国安，年二十二岁，工界，福建。

病名：暑咳。

原因：素嗜姜辛味，后因感冒暑气。

症候：头身发热，咳嗽痰粘，气逆胸闷，两手厥冷。

诊断：左关数涩，右寸浮数，余脉亦数，舌边尖红，此暑热犯肺也。夫肺为暑热所烁，而失清降之能，气反上逆，故咳，肺失清肃之职，故胸闷，其手厥冷者，热深厥亦深也。

疗法：用牛蒡子、连翘、银花、贝母、兜铃，清其肺热。杏仁、萎皮、桔梗，宣清肺气，桑叶、菊花，平肝清热，防其升逆太过，桑白皮、枇杷叶，以降其肺气。

处方：牛蒡子钱半 济银花二钱 青连翘二钱 川贝母一钱
杜兜铃钱半 甜杏仁二钱 栝蒌皮二钱 桔梗一钱 冬桑叶二钱

滁菊花一钱 桑白皮钱半 鲜枇杷叶一两，去毛，抽筋

效果：二剂热退喘减，原方去杏、桔，加陈阿胶钱半、鲜莲子十粒，三剂两手转温，咳嗽亦止。终用吴氏五汁饮，调理而痊。

廉按：暑气从鼻吸入，必先犯肺，因之作咳，故用轻清之药，专治上焦，方颇灵稳，愜合时宜。

《全国名医验案类编》

陈在山

陈董氏，五五，脉来沉数无力，素有阴虚喘咳之患，近日咳甚，痰多胁痛，拟用清肃肺金法治之。

第一方：玉竹 沙参 寸冬 橘红 杏仁 甘草 当归 醋芍 双叶 阿胶 枳壳 生地 茯神 焦枣仁

第二方：玉竹 生地炒 莲房炒 橘红 杏仁 桑叶 寸冬 莲肉 山药 芡实 元参 当归 醋芍 藕节 甘草

第三方：玉竹 桑叶 杏仁 橘红 当归 寸冬 山药 莲房 藕节 莲子 芡实 甘草 香附 醋芍 天冬

第四方：蜜百合 皮苓 广木香 桑叶 寸冬炒 杏仁 橘红 熟地炒 玉竹 山药 莲子 莲房炭 芡实 甘草

以上数方自服之后，诸症已经全愈，饮食加餐，惟肺嗽未能利，便言及汤药实属难进，欲求丸药服之，以防病后。

羚羊三钱、 当归身四钱 玉竹四钱 山药四钱 百合四钱
橘红四钱 杏仁二钱 桑叶三钱 炒生地四钱 莲肉四钱 芡实三钱
莲房炭三钱 寸冬三钱 贡胶四钱 甘草三钱 淡寸蓉四钱 细末
蜜小丸，每服二三钱，开白水送下。

陈董氏，夏日之嗽，业经治愈，又逢秋凉，动作不慎，咳嗽复发，脉来惟右寸关小数，余皆虚缓之极，此阴虚之证也，仍用清理法。

毛橘红 杏仁 桑叶 玉竹 生地炒 寸冬 莲房炭 百合
山药 芡实 甘草 阿胶 珠

又丸药方：羚羊尖 玉竹 山药 百合 化橘 杏仁 桑叶
莲子 莲房炭 芡实 寸冬 贡胶 甘草 寸冬 生地 枸杞
东洋参共末蜜丸，三钱重

冯致安，脉弦涩微数，舌白口渴，多嗽少食，此暑邪客于肺胃二经，闭寒不出之故也，当清暑利气。

厚朴 广皮 薄荷 苏叶 汾草 枳壳 天水散 山楂 藿香 木香 仁米 杏仁 花粉 茅术 竹叶

服前药，诸症皆效，惟咳嗽无功，系肺经邪热，留连不解之故，再用清肺解热法。

橘红 杏仁 枳壳 皮苓 厚朴 仁米 汾草 薄荷 天水散 双花 竹叶 火香

李广海，四五，脉来弦数，咳血少痰，中满气喘，心悸头眩，小水黄，便溏，夜间无眠。以上诸症是内伤心神，神伤则气败，肺心虚，虚久自然化热，致令心肾不交，阴亏于下，阳沸于上，拟以解热补阴，交通心肾之治。

茯神 玉竹 节蒲 莲须 丹参 莲子 寸冬 生地 藕节 汾草 丹皮 橘红 莲房炭 枳壳炒 枣仁 灯心

李广海自服药后，除咳嗽未效，余皆霍然，饮食亦加餐，纯用清痰理肺一方，多服则嗽自止矣。

化橘红 沙参 玉竹 杏仁 百合 枳壳 厚朴 香附 半夏 甘草 寸冬 薏米 山药 建莲肉 皮苓 生地

《云深处医案》

张仲寅

戈，脉弦为饮家，呛咳气逆，白痰粘腻。此脾弱不能摄涎，肺虚不能摄气。宗《金匱》外饮治脾法。

川桂枝 法半夏 焦秫米 光杏仁 生白术米泔汁浸 广皮 益智仁 款冬花炙 云茯苓 瓜蒌皮 海浮石 川蛤壳 镑沉

香

二诊：咳逆已减，痰有化机。《金匱》云：饮家当以温药和之。

川桂枝 云茯苓 盐半夏 炒秫米 焦白术 潞党参 炙款
冬花 广皮 生甘草 叭杏仁 炒白芍 川蛤壳 海浮石 镑沉
香

三诊：呛咳少减，脉弦细数，再当蠲饮和中。

南北沙参 广皮 益智仁 海浮石 炒麦冬 盐半夏 橘红
川蛤壳 炒白芍 炙款冬花 叭杏仁 焦秫米 镑沉香

《张氏医案》

缪芳彦

王，遇雨滂沱，背受寒，咳久不止，变法治之。

猪肺管一个，用去节麻黄三分，入肺管内，两头缚好 紫苑一钱

苏子一钱五分 橘红一钱 桔梗一钱

服十五帖而愈。

《缪芳彦医案》

曹惕寅

永年里沈忆椿君素有痰咳痰，疾作必来诊，每诊必立愈。某岁复发，其戚绍以皖医，重表不足，继以针砭，一时喘咳之险，实所仅见。其夫人惶惶来寓云：“此番弄糟了！”以急诊为请。余曰：“忆翁之病知之素矣。彼乃肺热痰厚，痰利则喘平，痰堵则喘剧。只须清泄肺气，流畅痰浊，则不难迎刃而愈。盖肺主皮毛，又为清净之腑。今为痰气壅塞，故气化失其自然，而致鼻塞额热。误用伤寒重表之法，厚痰盖见胶扞，艰咯引动气急，加之气弱之躯，更觉无力运行。”付以桑叶、枇杷露、白前、紫苑、杏仁、象贝、冬瓜子、竹茹、橘红、通草、茅根、瓜蒌，一剂而咽润痰活。略事清养，即得痊愈，亦轻可去实之意也。

寓苏谭筱君肺脏本热,加以肾虚过甚,乃致元海无根,气机塞逆,咳呛不已。迭进三才贞元加减法,乃得气平喘定。然每发必始为鼻塞,继则咳嗽,非鼻气畅通,咳不得愈。盖咳不离乎肺,肺有二窍,一在鼻,一在喉,喉窍常闭,鼻窍常开,鼻窍宜开不宜闭,喉窍宜闭不宜开。今鼻塞不通,则喉窍将起而为患。爰嘱其每遇鼻塞欲咳,急以纸捻蘸卧龙丹取嚏,嚏后则畅吐痰浊而平。

《翠竹山房诊暇录稿》

陈约山

久病未复,虚邪袭腠,致肺气不能清肃,多痰咳逆,寒热迭更。金滞水旺,连及左肋痛剧,诊脉右部弦滞带数,右部较突。肺家失化,显然拟专手太阴治之。

法夏 杏仁 通草 前胡 橘红 金沸草 姜皮 草郁金

二诊:脉息已和,唯脾气未平,舌本尚胖。脾气未宜,拟养肝和脾法,冀自安。

生牡蛎 赤芍 金石斛 橘白 桑叶 沙参 制首乌 法夏
生谷芽

三诊:气亏肝逆,失输津液,反复,阳微,畏冷,减食,滋燥疏利,未见大效。诊得脉象甚是软弱,拟温润健中。阳旺开纳,清气自利;附方鉴政。

中熟参 淡苡蓉 生益智 茯神 炒白芍 新会皮 肉桂
炒杞子 黑芝麻

《陈氏医案》

孔继炎

张甥存政,长妹之次子也。丁巳新正,偶冒风寒,咳嗽发热,不以为意。积三月,嗽热渐重,兼之腰股痛楚,肩膊尤甚,饮食几废。予适过之,诊其脉,浮劲而数,责问长甥存吉,弟病胡不早治?存吉曰:

久欲为治，弟固言无妨，迟日自愈，不料一旦疼痛如此。予曰：初病时，绝不疼痛乎？曰：彼时止言头项痛，止缘数日之后，头项痛止，故冀嗽热之自愈，不然，亦久为调治矣。予曰：头痛项强，太阳病也。此症起自正月，彼时天寒衣厚，风不能入，缘风池，风府两穴在项后发际，风寒由此而入，故痛现于头项。夫太阳受病，止应发热，不应咳嗽。其同时而嗽热俱起者，必更有风寒之邪，从口鼻而入，中于肺脏也。一日之感，从后人者中于经，从前人者中于脏，内外俱病，不为不重，不借药饵而望其自愈也难矣。且风寒在肺，正气不能外运，而太阳之邪乃得由头项而串于肩膊，抵于腰股，此皆其经络之所及也。头项之痛自止者，邪迁于他处也。夫邪在太阳，浸淫至于三月之久，此不可以言感，盖已着而为痹矣。再复不治，入于腑则膀胱病，必为胞痹；入于里则少阴病，将为肾痹；重以肺甲之邪，变寒化热，生死何可预料？养痾貽患，莫甚于此。吾为搜而去之，非多药不可也。两甥唯唯。乃为订疏风散寒之方，服二剂，漠若不知。予曰：脉来浮劲，本应温散，以浮中带数，内热已成，故不用温而用清。今邪气不解，不得不用温热，姑以甘寒为监制，勿令内伤肺脏，俟痛止之后，咽喉不愈，再为清解可也。盖此时存政已患咽痛矣。乃用桂、麻、参、附、归、芍、杏仁等，而以石膏为反佐。服二剂，汗出甚多，疼痛尽止，热清嗽亦减，而咽喉之痛则浸加重矣。转用清解，二剂遂愈。数日复病，视之，则风寒复感，太阳又病矣。复与发散乃归。其后又病，二弟辉照愈之。其后又病，予复往视，因谓之曰：汝病已五月，时轻时重，嗽热尚未全止，外感已经四次，若复不慎，虚弱之体，岂堪屡感？转成弱症不难矣。此番愈后，必谨避风寒，勿更犯也。书方与之，病良解。至六月初旬，嗽热俱止，自谓无患矣。一日大风骤雨，披衣不及，寒颤交作，顷之大烦大燥，一夜不宁。予闻往视，则所感更重于前。长妹泣曰：此子屡痊屡犯，将来势必不起。渠祖父以来，皆以发热死。此子前日发热作嗽，吾家老人已谓与祖父同病，今复如此。若真系外感，犹尚可为，若阴虚作热，则鬼篆中人矣。奈何？

予曰：汝家前人吾不及知，止妹夫当日确系风寒外感，得之马上，误用庸医，一见嗽热，便为阴虚，补而又补，遂致热者益热，其后吐脓吐血，肺胃俱伤，避人畏客，心窍已迷。乌有内伤发热之症而迷罔如此者？此予前日发热作嗽，本太阳与肺甲之病，辗转既久，阴亦未尝不虚。然由外感累及阴分，病本不起于内，故外邪解而阴亦易复。其所以屡痊屡犯者，汗解之后，腠理虚疏，风寒易得乘间内侵。究之人者甚易，出亦不难，故稍一发散而风寒尽解。若系阴虚作热，其能屡当汗剂乎？且阴虚之嗽，发于下焦，其音中空而近于燥。此子之嗽，发于胸中，其音中实而近于湿。阴虚之热盛于晚间，扪之热自内泛，愈久而愈重。此子之热，盛于午后，扪之热在皮肤，愈久而愈轻。其他恶食恶烟，作满作疼种种现症，俱属外感所有，而为阴虚所无。若作阴虚治，此时久已难言矣。况前日热嗽已止，可知不是阴虚。此番久病之后，暴受风寒，来势凶猛，安得不热？又且风邪内郁，寒气外束，烦躁无汗，与伤寒大青龙汤症同。阴虚中有此症，则天下阴虚之人皆旋病旋危，必无有历半载一年者矣，有是说乎？此病仍是外感，无可疑者。乃用甘寒解表之品，一夕连与二剂，汗出津津，热减大半。次日书方毕，适以事归，数日复返，则余热郁为斑疹，已隐隐满身矣。因指谓其家人曰：阴虚中有此症乎？皆曰无。复与透表之药。次日，热清食进，以胁下痞硬，小便不利，用旋覆代赭汤加猪苓、泽泻等，促令急服。长甥曰：病已愈，缓调不可乎？曰：此系积水，必非一日之故，故若不立为解散，非上而作呕作喘，则停而为胀为疼，甚则溢为肿胀矣。涓涓不塞，尚令积为江河乎？服一剂，满腹水响，漉漉有声，从胁下直趋小腹。予曰：可矣，此必大小便俱利。促令再服，乃归。盖风寒之邪，至是尽解无余，予亦以为无患矣。五日复感，凶危弥甚，气促胸满，殆不可支。病数日，予始知，急驰往视，则病势弥留，不可为矣。噫！长妹孀居二十余载，仅得二子成人，复夭其一，多病之躯，何以能堪！予之悲是甥也，又不仅在甥矣。

皋立王姊丈，自去腊出门得病，发热、咳嗽，自是风寒外感。其

所以久而不愈，一曰迁延失治，二曰内有积病，三曰忧思过甚，其四则吾辈治之未必尽合法度，而中款窍，此亦不可不思也。何也？风寒之感，至于发热咳嗽，外则足太阳一经，内则手太阳一脏，同时俱病，非表里双解不能愈。彼时适值腊尽春初，未及延医，而邪之在内者，日益蔓延，在外者渐且内逼，久而外感之风寒，与身中之正气，混为一处则感也，而近于痹矣。此痞闷、烦热等症之所以作也，是迁延之失也。然自用药调治，人人皆识为风寒，亦既屡经解散矣。而绵延至今者，新病牵连旧病，新病退而旧病未痊也。《金匱》曰：夫病痼疾，加以卒病，当先治其卒病，后乃治其痼疾，夫痼疾何以言治？可知卒病一起，痼病未有不发者。皋翁有痼疾在心下，腹中累累成块，接肋连脐，尽属正虚邪盛之区，风寒入里，未有不乘虚而凑于此者，此时治新邪，则牵动其旧邪，新邪之根未久，去之犹易，旧邪盘踞已深，拔之实难。以故热屡平而复发，嗽屡痊而又起，吐痰唾血屡止而更见。若系新伤，岂能堪此？此正旧邪之上泛也，一处动则一处开，所以既吐之后，胸膈反觉清爽也。然以渐而吐，则非一日所能告罄矣，此内积之害也。夫内积渐开，最属病家美事。每见小儿积聚及妇女癥瘕，往往因伤寒时疫，暴热蒸灼，随汗下而解散者，皋翁正在此例。且病经半载，肌肉不减，饮食无碍，何妨安之如常？而皋公心地窄狭，念上顾下，时存隐忧。予每见其平日无病时，偶逢一时不顺，辄垂首咨嗟，眉如山压，笑比河清，双搓两手，无片刻安。今病已积久，户庭不出，死生存亡之见，岂能一息去诸怀乎？积虑伤脾，积忧伤心，病之出于身者，虽见减，病之结于心者，恐但见增矣，此忧思之累也。至于治此病者，皆吾至亲，兄弟三、四人，有事则去，获间辄来，原无彼此之殊。然时疫病变，难拘一格，其中寒热温补亦有不容不商者。前日辉照欲用大黄，予持疑不决，其后卒用，且屡用，且与芒硝同用，而病人未尝不支，则予之见浅也。今外邪量已无余，内积亦见开尽，所未动者，当脐之久病耳。此已自具窠囊，决不轻自浮动，在病人亦不敢言去，在治者又谁肯妄攻？揣情度理，此时用

药，止宜清养调和之品，寒凉非所宜也。盖皋翁平日之脉，虽不足四至，凉亦在三至以外，以目下言之，病脉也，亦才四至耳，较之平时则少羸，较之四五月病盛之时，则退已多矣。夫天下未有脉退而病不退者，亦未有脉来四至，而发热不止者，其所以发热之故，必由于阴不和阳，其所以阴不和阳之故，必由于寒凉少过。何也？寒凉之药，其性主于肃清，其用归于凝闭，人之脏腑之中，无本之邪热，得借清肃以自解，天真之正气，亦每因凝闭而不宣，然而阴气可闭，而阳气卒不可闭也。夫阳者本乎天而主动，阴者本乎地而主静，静者可闭，动者岂能常闭乎？唯阴气凝然内伏，阳气充而外散，于是遂行周流之处，有熏炙而无濡润，是以口鼻气热，皮肤作蒸，上有痰嗽之迫，下有亢阳之征也。且夫伤于寒而必作热者，谓寒闭而阳气郁也。伤于外寒，阳既郁而为热，伤于内寒，而谓阳必不郁而不热，有是理乎？及其犹能作热，寒凉犹未甚过，若今日芩、连，明日翘、连，至全无热意，则周身皆固阴沍寒之境，恐有不可言者矣。治有款窍，药有法度，所以必待商酌者，正恐此事之未尽合也。虽然，予为此说，将谓皋翁之病，遂可以温补济乎？非也。其始病也以外邪，其久病也以内积，胡可言补？惟是人非有余之人，脉非有余之脉，必病者先自去其嗽啾之心，治者亦尽化其偏执之见，温补固不轻投，寒凉亦勿姿意，庶几与时消息，可以无误。则谓予之说为姑备一解可也，为意外多虚亦可也。夫存彼此之见，专己而自用其智，与有言而不以告人，岂吾侪之用心哉？

徐姓者，居湖滨，耕而且渔，勤劳作家人也。以病诣予，再至不遇，遂留弗去，居二日，予归，遂求诊。予视其人，肌肉未脱，而咳嗽音哑，息短而喘。问病几日，厥症云何？曰：自去岁八、九月间，始觉咳嗽，不以为意。其后日重一日，益之发热，畏风恶寒。求医诊视，以为感冒，用发汗药，两剂不愈，反攻破腹作泻，自此时泻时止，药亦未敢再用。人春以来，饮食渐不能进，腹中结聚一块，硬结臌疼，医亦不复立方矣。予诊其脉，虚大无力，中部微有搏结之象，而未越

五至。问：医云何症，遂不立方？曰：医未说病名，但云破腹音哑，药不能治。其实腹不常破，止偶尔大泻一、二次，然每逢泻后，咳嗽反觉减轻。时表丈王公在座，予谓之曰：丈知之乎？此病又是医家误认。其始发热致泻，药中必有麻黄，近日不与立方，则以为阴虚，不可救也。其人曰：然。去岁药中果有麻黄。予曰：此即医之误也。去岁秋热太甚，金行火令，咳嗽者多，并非风寒感冒，乃肺金为时令之燥所伤也。其所以发热者，金病于上，气不下行，肾水绝生化之源，故孤阳内燔，蒸而为热也。畏风恶寒者，肺主皮毛，肺病而卫外之气不固，故不任风寒也。此时止宜清金养肺，数剂可以全愈，治不出此。而用麻黄，大热大燥之肺，岂堪益以热燥乎？肺热不支，奔注而下，移热于大肠，此所以破腹作泻，一泻而咳嗽反觉轻减也。然虽暂时轻减，病本依然未退，特值三冬寒水之令，势不加重尔。至春而肝木用事，木挟风火，又乏水润，其亢燥不平之气，乘时横行，乃益以重，肺家之燥，而如火益热矣。此所以音为之哑，息为之短，甚则气逆而为喘，甚则热结而成块，以至作疼作胀，饮食不进也。夫饮食脾胃之事，非肺病之所及也。然肺燥而子不扶母，脾胃犹可自持，肝燥而木来乘土，饮食安能强进？此病若不急治，一交夏令，火旺刑金，肝病未必见退，肺病因而益深矣。然此时言治，较前已大费手，前止清金，今当并益其水，以肝气方亢，并借水力不能化刚为柔也。前止润肺，今当并养其脾，以肺金已萎，非借土气培养，不能变柔为刚也。吾为君立一方，必多服乃可。王丈曰：养脾必用参、术，其阴不虚乎？予曰：其阴安得不虚？然由阴分而病及阳分者，阳病终轻于阴；由阳分而病及阴分者，阴病终轻于阳。此病虽水亏肝燥，而病本终在肺家。观其息短音哑，且喘且咳，肺经诸症俱急，而大肉未脱，尤能步行二十里，来此就诊，若使阴亏已极，岂能徒步来去乎？且阴虚之不可为者，脉细且数也。此症脉来虚大，犹胜于细，未过五至，不可言数，其中部搏结之象，则肝经之燥气，结于胁腹也，皆非不治之症，何惮之有！特参术则宜斟酌，未可放胆大用耳。遂为书方，用

地黄、芍药、当归、麦冬、黄芩、菊花、生甘草，而少加参、术，兼用陈皮以和之。嘱令十剂之后，再来易方。其人归，服五剂，嗽止热退，饮食倍进，遂理旧业，不服药也。月余，其邻人王姓病，指令求予，兼寄一信云：病愈，不须易方也。然王姓为予言，其音尚未尽复云。

《孔氏医案》

贺季衡

施男。肺主出气，肾主纳气，寒痰久阻于中，出纳渐失其职，咳逆有年，遇寒尤甚，痰多质厚，气粗不平，脉濡细而滑，舌苔白。延有积饮及哮喘之害。

茅白术各二钱 淡干姜五分，五味子五分合拌 大杏仁三钱
薄橘红二钱 大白芍二钱，桂枝三分拌炒 云苓四钱 生诃子肉二钱
姜半夏三钱 黑苏子二钱 炙桑皮三钱 白果七粒，姜一片共研汁冲

范女。病由一夏操劳，感风而起，呛咳失音未解，遽行凉降，风邪遂伏肺部，继又清养润肺，邪气更无出路，肺之治节无权，于是气多痰壅，痰为气薄，间咳无声，痰难出，面浮目窠肿，渐及遍体，两胁作胀，脉弦滑细数，舌红根黄。此下虚上实，肝木横中候也。有攻之则不及，补之则不化之弊。

甜葶苈三钱，炒 川贝母二钱 金苏子二钱 法半夏三钱
贡沉香四分，人乳磨冲 鲜姜衣四分 旋覆花二钱，包 生桑皮二钱
橘红二钱 连皮苓四钱 大白芍三钱

二诊：昨为开肺达邪，降气化痰，面部目窠肿见退，两眼已能睁视，脉之数象亦减，转为细滑少力，舌苔转白就形腐腻，咳声略扬，痰仍难出，肢肿腕满，拒按作痛，两胁俱有胀意。种种见证，痰湿久留于脾，肺气壅仄，下元虽虚，不宜亟补，以原方更增温运之品为是。

甜葶苈三钱，炒 川朴一钱 金苏子二钱 旋覆花二钱，包
贡沉香四分，磨冲 大杏仁三钱 桂枝木一钱 桑白皮二钱

连皮苓四钱 姜半夏三钱 新全皮二钱 鲜姜衣四分

同日午后又诊，午后以开化中更增温运，颇能安受，舌上白腐苔更多，几将满布，痰声较起，而仍难出，咳则火升而绯，右脉亦略数。中宫久积之痰，正在化而未化之间，再以三子养亲汤合二陈汤降气化痰，以补前药之不逮可也。

莱菔子三钱，炒 白芥子一钱五分，炒 金苏子二钱 大杏仁三钱
姜半夏二钱 陈皮二钱 云苓四钱 旋覆花二钱，包

郭女。春初呛咳痰多而粘，曾经带血，入夏咳减而胃呆，日来气从上逆，腕闷，呼吸引痛，不得平卧，便结口干，舌红中黄，切脉右手小数。胃之宿痰壅遏，左升太过，右降无权。亟为清肝润肺，降气化痰，毋令痰鸣气粗为要务。

大麦冬三钱 大白芍三钱 竹沥半夏三钱 金苏子二钱，蜜炙
川贝母二钱 黄郁金二钱 煅龙齿八钱 青蛤壳八钱 旋覆花二钱包
沉香二分，梨汁磨冲 云苓神各四钱 玉蝴蝶一钱五分

改方：去龙齿，加南沙参三钱。

二诊：进清肝润肺、降气化痰一法，尚合病机，气之上逆就平，渐能平卧，粘痰亦吐去不少，脉息止渐调，惟久按尚有息止伏，余部较前略浮而滑，痰气之纠结初化，而又适感新邪，表分微热，两腿清冷不和，舌苔顿转滑白满布。一派新感见象，当先从标治。

蜜炙前胡一钱五分 川郁金二钱 薄橘红二钱 旋覆花二钱，包
云苓四钱 炒竹茹一钱五分 金苏子二钱 竹沥半夏三钱
大白芍三钱 大杏仁三钱 姜皮三分

三诊：经治来，烦扰、腕闷及诸多枝节俱退，夜分不得久卧，卧则气逆懊恼，必得呛咳吐去痰涎而后快，胃纳未复，大便燥结，舌心及根端板腻而黄，两足肿，越夜则退。胃失和降，加以肝家气火本旺所致。未宜滋补，当再降气化痰润肃肺胃。

南沙参三钱 竹沥半夏二钱 大杏仁三钱 全瓜蒌三钱，打
白苏子二钱 炙桑皮二钱 淡天冬三钱 旋覆花二钱，包

川贝母一钱五分 连皮苓四钱 海浮石四钱 枇杷叶三钱

服二三剂后，如大便见调，原方加青蛤壳五钱。

润肠方：白芝麻二两炒研 松子肉二两 大杏仁二两
胡桃肉二两 白苏子一两，炒 捣泥，瓷罐收贮，每晨白蜜调服五六钱。

拟方从下虚上实立法。

南沙参三钱 法半夏三钱 川贝母一钱五分 生牡蛎八钱，先煎
大白芍三钱，沉香二分煎汁炒 焦谷芽四钱 生诃子肉一钱五分
白苏子二钱炒 大麦冬三钱 云神四钱 薄橘红二钱 玉蝴蝶一钱五分

符男。咳经一年，近三月尤甚，气逆不平，痰极难出，或呕吐食物，胃纳因之减少，脉浮弦滑，舌苔腐白，肺气已伤，胃复不和，酒湿化热生痰也。根株已深，殊难速效。

南沙参三钱 法半夏三钱 大杏仁三钱 川贝母一钱五分
淡天冬二钱 炒苡仁四钱 金苏子二钱 海浮石四钱 旋覆花二钱，包
坚白前三钱 薄橘红二钱 枇杷叶三钱 另止咳保肺片

二诊：进清养肺气，兼化酒湿，久咳已减，呕吐食物酸水亦折，胃纳未复，多食则呛，可见肺气已伤，脉浮弦已减，舌苔腐白已化。当守原意，更增葆肺益气可也。

南沙参三钱 白苏子二钱，炒 法半夏三钱 炙冬花二钱
川百合三钱 枇杷叶三钱 生诃子肉二钱 旋覆花二钱，包
炒苡仁四钱 云苓四钱 陈橘皮一钱五分 另琼玉膏、百花膏

三诊：经治以来，久咳已十去八，呕吐食物酸水亦止，惟咳甚则作恶，或带血色，劳则气粗如喘，脉转细数而滑，舌白已化。肺胃初和，肾气之亏未复耳！

生诃子肉一钱五分 云苓四钱 炙紫菀二钱 五味子八分
法半夏二钱 佛耳草三钱 白苏子二钱，炒 川贝母一钱五分
叭杏仁三钱 青蛤壳八钱 陈橘皮一钱五分

《贺季衡医案》

赵文魁

十月二十七日，赵文魁请得端康皇贵太妃脉息：左关稍弦，右寸关滑而近数，肺胃蓄饮较减，惟肝热尚欠清和。今拟清肝调中化痰之法调理。

杏仁泥三钱 栝蒌六钱 浙贝三钱 胆草三钱 莲子心三钱
丹皮三钱 竺黄三钱 橘红三钱 腹皮子各二钱 枳壳三钱
酒军一钱五分 青皮三钱，研

引用焦三仙各三钱、枯芩三钱。

按：浮风虽解，但肝胃饮热未解，肺热未净，仍需清肝调中化痰之法治疗。方中杏仁、栝蒌、浙贝、竺黄、橘红宣肺清热化痰；胆草、莲子心、酒军、丹皮清肝泄热；腹皮子、枳壳、青皮理气和胃；引用焦三仙消食和胃，枯芩泄肝肺蕴热，用之为引以求肺、胃、肝并调，气道宣通，痰热自易清化。

十一月十九日，赵文魁请得端康皇贵太妃脉息：左关沉弦，右关沉滑。诸证均愈，只上焦浮热未清。今拟清上调中抑火之法调理。

甘菊花三钱 桑叶三钱 薄荷八分 胆草三钱 青皮子三钱，研
姜连二钱，研 姜朴三钱 枳壳三钱 腹皮子四钱 酒军一钱五分
酒芩三钱 木通二钱

引用橘红三钱、焦楂四钱。

按：肝经郁热化火上犯，肺气不利，中州蓄饮。前方服后，诸证轻减，但上焦浮热未清，中焦停饮化而未尽，胆经郁热仍有；故仍需以清上调中抑火之法调理。甘菊花、桑叶、薄荷清肃上焦浮热；青皮子、姜朴、枳壳、腹皮子调中理气化痰；胆草、酒军、酒芩、木通清泻肝经火热，使肝经火热不致上犯；引用橘红、焦楂和胃化痰、以治肺胃。

二月初八日，赵文魁请得端康皇贵妃脉息：左关弦而近数，右寸关滑数。肝肺结热，痰饮不宜，以致左臂作疼，时有咳嗽。今拟清

肝理肺化痰之法调理。

酒胆草三钱 姜朴三钱 羚羊角六分，面 丹皮三钱 苏子叶四钱
杏仁三钱，炒 橘红三钱 栝蒌八钱 辛夷仁二钱，研 黄芩三钱
枳壳三钱 酒军二钱

引用钩藤三钱、桑叶一两熬汤煎药。

按：肝肺结热，痰饮不宣，痰热互结，阻于络脉，故有左臂作疼，时咳嗽等证；痛在肝肺，而又有痰热，治当以清肝理肺化痰之法。方中酒胆草、羚羊角、丹皮、黄芩、酒军人肝经清肝热；姜朴、苏子、杏仁、橘红、栝蒌、辛夷仁、枳壳，理气宣肺化痰；引用钩藤，桑叶入肝经，平胆热，使本方重在清肝热，则肝热清，肺气宁，痰自易化。况且病本在肝，而肺为标，故以其二味为引药恰合病机。

二月初九日，赵文魁请得端康皇贵妃脉息：左关弦数，右寸关滑数。肝气渐舒，肺热湿饮未化。今拟清肝理肺化痰之法调理。

小生地四钱 胆草三钱 羚羊角八分，面煎 生梔四钱，仁研
炙桑皮四钱 栝蒌六钱，捣 杏仁四钱，研 苏子四钱，研 枯黄芩三钱
广红三钱 薄荷三钱 甘菊三钱

引用酒军一钱五分。

按：肝气虽渐舒，但肺热湿饮未化，治当续以疏肝清肺化痰饮之法。方中薄荷、甘菊入肝肺二经，能疏泄二经之热；小生地、胆草、羚羊角、生梔养肝阴而清热；炙桑皮、栝蒌、杏仁、苏子、枯芩、广红清热肃肺化痰；引用酒军，酒制则入肝经，且能增强行气活血之功，《大明本草》称它有“通宣一切气，调血脉，利关节”的功用，可见酒军之功主要在于宣气活血，作为本方之引药，调肝和肺，理气和血，是很恰当的。

二月初十日，赵文魁等请得端康皇贵妃脉息：左关弦而近数，右寸关沉滑。肝气较舒，惟肺热痰饮不化。今议用理肺调中化痰之法调理。

清栝蒌六钱，捣 杏仁四钱，炒 辛夷二钱，后下 苏子三钱，炒

苏薄荷二钱 姜朴三钱 枳壳三钱 橘红三钱 羚羊角面六分,煎
枯芩三钱 生梔四钱,仁研 甘菊三钱

引用炙桑皮三钱。

按:服前方后,肝气较舒,惟肺热痰饮欠化,病变重点在肺,故治疗以理肺化痰为主,佐以调肝;方用甘菊、薄荷、辛夷疏风泄热调气;溤栝蒌、杏仁、苏子、姜朴、枳壳、橘红、黄芩清热宣肺化痰和胃;羚羊角,黄芩,生梔清泄肝热;引用炙桑皮甘寒,泻肺化痰,引药入于肺经,重在泻肺化痰,符合病情。

二月十一日,赵文魁等请得端康皇贵妃脉息:左关弦缓,右寸关沉滑。诸证均愈,惟肺热痰饮欠清。今议用理肺清热化痰之法调理。

南苏子三钱,炒 杏仁四钱,炒 栝蒌六钱,捣 桑皮三钱,炙
旋复花三钱 枯芩四钱 羚羊角六分,面 生梔四钱,仁研
青皮子三钱,研 枳壳三钱 橘红三钱 酒军一钱五分

引用法半夏三钱,研。

按:诸证均愈,惟肺热痰饮欠清,故重在理肺清热化痰,又素体肝热气郁,故当佐以清肝理肺,方中苏子、杏仁、栝蒌、桑皮、旋复花、枯芩清热宣肺化痰;羚羊角、山梔、枯芩清其肝经郁热;酒军入血调气,青皮子、枳壳、橘红理气开郁,共调气血。引用法半夏辛温入肺经,能化痰消痞散结,作为引药旨在使全方之功用重在理肺化痰。

二月十三日,赵文魁等请得端康皇贵妃脉息:左关弦缓,右寸关沉滑。诸证均愈,惟肺经浮热未清。今议用清上理肺化痰之法调理。

甘菊花三钱 薄荷二钱 防风二钱 杏仁四钱,研 苏叶子各二钱
栝蒌六钱,捣 枯芩三钱 生梔四钱,仁研 酒胆草三钱 橘红三钱
枳壳四钱 酒军一钱五分

引用金沸草三钱。

按：诸证均愈，惟有肺经浮热未清，故以清上理肺化痰为法。方用菊花、薄荷、防风疏风泄热；杏仁、苏叶子、桔萎、橘红、枳壳宣肺化痰；虽病重在肺，但素体肝热，故用枯芩、生栀、酒胆草、酒军清降肝热而和肺，肝热得降则肺热易清；引用金沸草，金沸草为旋复花之全草，入肺经能降气行水消痰；用之为引旨在加强全方理肺化痰之功。

宣统十四年正月二十一日，赵文魁诊得春格脉息：左关稍弦，右部浮滑。浮风袭肺，致令伤风作嗽。今用疏风清肺止嗽之去调治。

木笔花二钱 白芷二钱 薄荷一钱五分 杏仁三钱，炒
炙桑皮三钱，炒 陈皮二钱 枳壳三钱 前胡三钱 清夏片二钱
粉葛二钱 酒军一钱五分

引用酒芩三钱。

按：肺主气，司呼吸，外合皮毛，主宣发肃降，其气以下行为顺，性属娇脏，不耐邪侵，无论外感六淫，抑或内生痰浊饮热，均能阻碍肺气宣降，使之失却治节之令，气逆于上，咳呛作矣。以内因言，每以痰热阴滞为多，以外因论，辄以感受风邪为最。《内经》云：“风者，百病之长也”，其性轻扬，中人多伤人之上部，肺居上焦，外合皮毛，故必首当其冲。脉浮主风邪在表，脉弦滑主痰热内蕴。从病机推论，当有发热、恶寒、头痛、鼻塞、流涕等症。故治疗当用疏风清肺、化痰止嗽方法。

方中白芷、木笔花（即辛夷），辛温芳香，入肺经善散肺中风邪而通鼻窍，入胃经能引胃中清阳之气上达头脑以止头痛。薄荷辛凉入肝肺，疏散上焦风热，清头目，利咽喉，芳香透窍。葛根辛甘性平，升阳生津，解肌退热。黄芩、桑皮清泻肺中实火，兼行肺中痰水。肺与大肠相表里，故用大黄走大肠，荡积滞，导肺热下行。杏仁苦温，入肺和大肠，《本草求真》谓：“杏仁，既有发散风寒之能，复有下气除喘之力。”前胡，苦辛微寒，入肺经，《本草纲目》谓其能“清肺热，化痰热，散风邪。”《本草逢原》称其“功长于下气，故能治痰热喘嗽，

痞膈诸痰，气下则火降，痰亦降矣。本品为痰气之要味，治伤寒寒热及时气内外俱热”。前、杏合用，则散风下气，祛痰止咳之力尤著。陈皮、半夏，健脾和胃，理气燥湿化痰，以绝生痰之源。枳壳理气宽胸，运中焦而助肺气升降，内外兼治，上中齐调，用心可谓良苦矣。

正月二十二日，赵文魁诊得春格脉息：左部微弦，右部滑而近缓。浮风渐解，只肺热尚欠清和。今用化风清肺止嗽之法调治。

木笔花一钱 薄荷一钱五分 白芷二钱 杏仁三钱 炙桑皮三钱
枯芩三钱 陈皮三钱 法夏三钱 大栝蒌六钱 前胡三钱
苏子三钱，炒

引用炒梔仁三钱。

按：上药服后，脉已不浮，弦势亦减，说明药已中病，风邪渐解，痰热已轻。但病势尚未尽退，肺热尚欠清和，故仍宗前法出入，旨在尽逐穷寇也。

今方仍有木笔花、薄荷、白芷疏散上焦风邪。桑皮、黄芩清泻肺热。陈皮、半夏燥湿化痰，健脾和中。复配栝蒌宽胸理气，化痰清热。梔子宣泄三焦郁火。前胡、苏子下气利膈，消痰止咳。俾热尽清，痰尽消，肺气清和，咳痰乃瘳矣。

十月二十三日，赵文魁请得端康皇贵太妃脉息：左关尚弦，右寸关滑而近数。肺热较减，惟肝木欠舒。今拟用清肺舒肝化痰之法调理。

溱栝蒌六钱 杏仁四钱，研 桑皮四钱，炙 酒芩四钱 酒胆草三钱
生梔四钱，仁研 竺黄三钱 浙贝三钱，研 青皮子三钱，研 枳壳三钱
酒军二钱 前胡三钱

引用生石膏八钱，研、橘红三钱。

九月二十四日，赵文魁诊得老太太脉息：左关滑数，右关沉弦。肺经郁热，蓄滞痰饮，以至鼻干口燥，咳嗽有痰。今用清肺止嗽化痰之法调治。

杏仁泥三钱 前胡三钱 莱菔三钱，炒 苏子二钱，研 炙桑皮三钱

夏曲三钱 广皮二钱 条芩三钱 栝蒌仁四钱,研 川柏三钱
礞石四钱,煅

引用炙麻黄二分。

老太太清肝化湿代茶饮方:

龙胆草三钱 青皮二钱 枳壳二钱 姜朴三钱 葶苈子三钱,包
半夏曲二钱 广皮二钱 木通一钱

水煎代茶。

按:本案脉象,左关滑数,为痰热蕴郁之象。右关沉弦,脉主里证,单手脉弦,亦主内有痰饮。痰饮所得,以脉象分析,非从外感,而由内伤。痰热壅阻肺气,肺失清肃,故咳嗽气粗,痰多,质粘厚或稠黄,咯吐不爽。肺热内郁,灼伤津液,则见鼻干口燥。其舌苔当薄黄腻,舌质当红。因此,清热肃肺,止嗽化痰是其正治。

方中杏仁,能散能降,“缘辛则散邪,苦则下气,润则通秘,温则宣滞行痰”(《本草求真》)。前胡亦长于下气,“故能治痰热喘嗽,痞膈诸痰,气下则火降,痰亦降矣,为痰气之要药。”两药配伍,均归肺经,以降气为主,又都具疏散之性,一温一凉,相益得彰。莱菔子、苏子并用,取《韩氏医通》三子养亲汤意,降气消痰,止嗽平喘。桑白皮、黄芩,清泄肺热,陈皮、半夏、有二陈汤燥湿化痰顺气止嗽之功。栝蒌仁,润肠通便,上下同治,大肠火泄,肺气亦得肃降。方中尚用了黄柏、青礞石二味,乍看似与病状有隙,但与下述清肝化湿代茶饮对照互参,即可了然。以药测证,患者当有肝经湿热之象,如胸胁胀痛、口苦易怒、小溲短赤等等。因肝脉布两胁,上注于肺,肺经痰热,燔灼肝经,使其络气不和。疏泄失司,而致金木同病。因此除内服清肺化痰方外,亦以龙胆草、青皮、木通等组方,清泄肝胆经热,频服常饮,加强疗效。

诸药配伍,热清肺肃,痰化嗽平,效得益彰。

九月二十五日,赵文魁请得老太太脉息:右关滑数,左关沉缓,肺热轻减,痰滞亦清,惟有时咳嗽,痰热犹盛。今用清肺止咳化痰之

法调治。

杏仁泥三钱 苏子二钱,研 广红三钱 法夏三钱 炙桑皮三钱
条芩三钱 川柏三钱 苦梗三钱 枇杷叶三钱,炙 寸冬三钱
川贝三钱

引用煅礞石四钱。

按:详析脉证,可知为痰热壅肺之证,初诊药后,症状已轻,但脉仍滑数,时有咳嗽,知其痰热未尽,仍用清肺化痰止咳方法调治。杏仁、苦梗、杷叶宣肺止咳,苏子、法夏、桑皮肃肺化痰,升降相因,理其肺脏。臣以条芩、川柏、广红、贝母清化痰热。佐以寸冬养阴护肺且“能泻肺火化痰”(《本草从新》),更引用青礞石清化痰热以为使。

十月二十四日,赵文魁请得端康皇贵太妃脉息:左关略弦,右关沉滑。肺热轻减,惟稍有咳嗽。今拟用清肺止咳化痰之法调理。

大栝蒌四钱 酒芩三钱 生梔三钱,仁研 竺黄三钱 杏仁泥三钱
浙贝三钱,研 前胡三钱 枳壳三钱 天花粉四钱 橘红三钱
胆草三钱 熟军二钱

引用鲜青果五个打。

十月二十二日,赵文魁请得端康皇贵太妃脉息:左关尚数,右寸关缓滑。肺热较减,惟痰饮欠清。今拟照原方加减调理。

甘菊花三钱 薄荷二钱 防风二钱 杏仁四钱,炒 大栝蒌六钱
桑皮四钱,炙 酒芩四钱 生梔四钱,仁研 生石膏八钱,研 竺黄四钱
浙贝三钱,研 元参六钱

引用橘红三钱、风化硝六分。

按:郁热内蕴,浮风外受,则肺热痰嗽,前服清上理肺化痰之剂,肺热得以轻减,既然得效当以续前方之法,以清肝调肺化痰浊。方中甘菊花、薄荷、防风疏风清热以调肝肺;杏仁、大栝蒌、桑皮宣肺化痰;酒芩、生梔、生石膏、竺黄清宣肺热以化痰;浙贝、玄参理肺清热化痰结;引用橘红理肺化痰,风化硝咸寒化痰结而泻热,二药

为引旨在理肺清热化痰浊。

十月二十一日，赵文魁请得端康皇贵太妃脉息：左关尚数，右寸关缓滑。肺经风热未净，痰饮欠清。今拟用清上理肺化痰之法调理。

荆芥穗三钱 防风三钱 薄荷二钱 杏仁四钱，炒 苏叶子各二钱
栝蒌六钱 桑皮四钱，炙 酒芩四钱 生石膏八钱，研 生栀四钱
胆草三钱 竺黄四钱

引用橘红四钱、防化硝八分，煎。

十月二十日，赵文魁请得端康皇贵太妃脉息：左关尚数，右寸关缓滑。肝气较舒，惟肺经痰热未清。今拟照原方加减调理。

荆芥穗二钱 防风二钱 薄荷二钱 杏仁四钱，炒 苏叶子各二钱
栝蒌六钱 酒芩四钱 生栀四钱，仁研 生石膏八钱，研 青皮三钱，研
枳壳三钱 熟军一钱五分

引用橘红三钱、鲜青果七个，打。

十月十九日，赵文魁请得端康皇贵太妃脉息：左关稍数，右寸关缓滑。风热较减，惟肝肺余热未清。今拟用清上调肝理肺之法调理。

荆芥穗三钱 防风三钱 薄荷二钱 甘菊三钱 苏子叶各二钱
杏仁三钱，炒 栝蒌六钱 酒芩四钱 生石膏八钱，研 青皮三钱，研
枳壳四钱 酒军一钱五分

引用橘红二钱、胆草三钱。

八月二十八日，赵文魁请得端康皇贵妃脉息：左关弦而近数，右寸关滑数。肺气渐和，咳嗽较轻，惟肝阳鼓荡，气道欠调，以致有时烦急，气串作疼。今拟用和肺调气化热之法调理。

苏叶子三钱 前胡三钱 防风三钱 钩藤三钱 炒杏仁三钱
栝蒌五钱 浙贝三钱，研 秦艽二钱 生石膏六钱，研 黄芩三钱
知母三钱 橘红络各三钱

引用羚羊角面六分，先煎、青皮子三钱，研。

按：风邪伤肺，肝阳鼓荡，内外交病，肝肺气滞，气道不利，以致有咳嗽、烦急、气串作疼之症，虽连服清肝调肺之剂，郁热渐开，咳嗽渐轻，病势有减，但肝肺之气仍未调和，故仍当以和肺调气化热之法。方中苏叶子、前胡、防风、杏仁疏风和肺；栝蒌、浙贝、生石膏、黄芩、知母清肺化痰；钩藤清热平肝；秦艽、橘红络化痰和络；引用羚羊角清热平肝，青皮子疏肝理气，二药入肝经，旨在镇肝阳以和肺气。

八月二十三日，赵文魁请得端康皇贵妃脉息：左关弦而近数，右关滑而稍数。肺气未和，肝阳未静，以致有时咳嗽，食后身倦。今拟用和肺清肝之法调理。

苏叶子三钱 前胡三钱 防风二钱 浙贝三钱，研 炒杏仁三钱
栝蒌五钱 黄芩三钱 橘红三钱 炒枳壳三钱 胆草三钱
焦三仙各三钱 酒军一钱五分

引用羚羊角面三分，先煎。

八月二十五日，赵文魁请得端康皇贵妃脉息：左寸关弦而近数，右寸关浮滑。肝肺有热，外感风凉，以致头闷肢倦，胸满作嗽。今拟清解和肝理肺之法调理。

苏叶子各二钱 薄荷一钱五分 防风一钱五分 杏仁三钱，炒
地骨皮三钱 玉竹三钱 淡豉三钱 橘红三钱 大栝蒌六钱
枳壳三钱 酒军一钱五分 枯芩三钱

引用羚羊角面六分，先煎。

八月十九日，赵文魁请得端康皇贵妃脉息：左关微弦，右部缓滑。风邪渐解，蕴热较轻，惟头闷肢倦，口渴作嗽。今拟照原方加减调理。

荆芥穗三钱 薄荷二钱 防风二钱 苏叶子各二钱 溱栝蒌六钱
杏仁四钱，炒 橘红三钱 生石膏六钱 枯黄芩三钱 花粉四钱
酒军一钱五分 生梔仁四钱，研

引用羚羊角面六分，先煎。

按：连服疏风理肺清热之剂，外风渐解，蕴热也得轻减，惟头闷肢倦，口渴作嗽之症仍在，故续前方，继以疏风理肺清胃之剂调理。方中荆芥穗、薄荷、防风、苏叶疏风邪而调肺胃之气；苏子、塘栝蒌、杏仁、橘红理肺化痰；生石膏、枯黄芩、花粉、酒军、生梔仁清理肺胃之热；引用羚羊角面，清肝平肝，以解肝经蕴热，以求新旧之痰并祛。

八月十八日，赵文魁请得端康皇贵妃脉息：左关弦数，右部缓滑。风邪欠解，肺胃蕴热尚盛，以致头闷肢倦，口渴作嗽。今拟用疏风清胃之法调理。

荆芥穗三钱 薄荷二钱 防风三钱 苏叶子各二钱 塘栝蒌六钱
杏仁四钱，炒 橘红三钱 枯黄芩四钱 酒胆草三钱 石膏六钱，生研
酒军二钱 淮牛膝三钱

引用羚羊角面六分，先煎。

《赵文魁医案选》

张山雷

毛左。延病三月。现上午有寒，下午有热，寅卯咳痰浓厚，胃纳甚少，抑且味苦，脉数，舌苔后半白腻，无汗。治法尚须开泄痰湿，参以疏解。

川桂枝 1.5 克 炒大白芍 4.5 克 炒柴胡 1.5 克 炒豆豉 4.5 克
生远志 9 克 姜半夏 4.5 克 广藿梗 4.5 克 炒常山 6 克
广皮 4.5 克 建曲 4.5 克 干佩兰 4.5 克 姜竹茹 4.5 克
九节菖蒲 1.8 克

二诊：前进疏解开泄，凛寒已蠲，咳痰较松。惟午后腹笥觉热，频泛涎沫，脉数且搏，舌苔根腻。仍是湿阻未化，再踵前方出入。

制半夏 6 克 新会皮 4.5 克 炒枳壳 3 克 苏梗 4.5 克
藿香 4.5 克 制川朴 1.5 克 白蔻仁打，3 粒 九菖蒲 0.9 克
绿萼梅 4.5 克 大腹皮酒洗，4.5 克 小青皮 3 克 炒茅术 1.2 克

孙右。肺失展布，咳嗽痰稠，脉小弦，舌苔薄黄，先以泄化。

瓜蒌皮 6克 广郁金 4.5克 象贝母 6克 杜兜铃 4.5克
生紫菀 9克 胖大海 2个 路路通 去刺，6克 生打代赭石 9克
苏半夏 4.5克 薄荷 1.2克 霜桑叶 6克

二诊：痰热未楚，咳嗽减而未净，姙事逾期，腹筒稍有腹胀。此气火上行致令经尚未行，舌根黄腻，脉则右弦。是宜柔肝泄降，化滞通经。

生玄胡 6克 四花青皮 4.5克 苏半夏 6克，打 当归尾 4.5克
生光桃仁 打，9克 泽兰叶 6克 植肉炭 6克 生紫菀 9克
杜兜铃 4.5克 炒黑荆芥 4.5克 茺蔚子 9克 瓜蒌皮 6克

三诊：经事未净，腹胀已蠲，胃纳已醒，鼻流浊涕，脉右弦搏，古心薄黄，是肺有郁热。再以毓阴培本、清肺治标。

炒萸肉 4.5克 甘杞子 6克 厚杜仲 6克 象贝母 3克
杜兜铃 3克 生桑白皮 6克 霜桑叶 6克 鲜竹茹 4.5克
荆芥炭 4.5克 生紫菀 6克 熟女贞子 12克 天台乌药 7.5克
泽兰叶 6克

陈右。肺气上逆，呕吐涎沫，胃纳呆钝，入暮倦怠，体肥积湿，脉濡胸闷，咳嗽不松，舌根苔腻，小溲短少，法宜宣展降逆。

制半夏 4.5克 九菖蒲 1.5克 姜炒竹茹 4.5克 广陈皮 4.5克
橘络 3克 炒枳壳 4.5克 白蔻仁 打，2粒后入 淡吴萸 7粒
川黄连 0.9克，同炒 干佩兰 4.5克 云茯苓 6克 生紫菀 6克

胡右。咳久不爽，鼻塞带多，脉小极，舌薄黄。法宜肃降。

杜兜铃 4.5克 路路通 4.5克，去刺 大象贝 6克 萸肉 4.5克
薤梗 6克 佩兰 3克 沉香曲 4.5克 代赭石 9克 紫菀 9克
杜仲 9克 核桃肉 6克 半夏 6克

二诊：前授清金纳肾，咳则稍舒，带脉稍固，胃纳亦进，月经逾期是其常态。脉有起色，颇见弦象，舌则黄糙，自知引饮。治法仍踵前意，参以行滞填阴。

莢肉 6 克 杜仲 6 克 杞子 6 克 藿梗 6 克 佩兰 4.5 克
泽兰 4.5 克 补骨脂 6 克 沙参 6 克 杜兜铃 4.5 克 茺蔚子 4.5 克
紫菀 4.5 克 鸡内金 4.5 克 楂肉 4.5 克 胡桃肉 3 个 青皮 4.5 克
桑叶 4.5 克

祝翁。高年阴弱阳浮，肝火挟痰热内扰。咳嗽胸痞，胃呆无味，左腹隐隐作痛，大便燥结不畅，小溲短涩，脉弦劲有力，舌根腻而前半无苔。宜疏肝化痰为先，俟胃气来复，然后滋养之。

旋复花 9 克，包 薤白 6 克 萎皮 6 克 香附 6 克 乌药 4.5 克
杏仁 9 克 大贝母 9 克 郁李仁 3 克 枳实导滞丸 9 克，包煎

二诊：前方二服，大府畅解，腹角隐痛已除，脉之弦劲得和。自觉火热上腾熏灼顶巅，高年阴弱阳浮，宜潜阳不宜凉降。胃纳未苏，夜少熟寐，舌质光滑黯白无苔，胃阴伤矣。是宜养液潜阳。

原金石斛 9 克 北沙参 9 克 大麦冬 9 克 鳖甲 9 克 龟板 9 克
首乌藤 9 克 枣仁 9 克 杞子 9 克 白芍 9 克 归身 4.5 克
川楝子 9 克 橘红 3 克 蔻壳 1.2 克 远志 4.5 克

三诊：胃纳佳，大府调，舌光渐复，足软无力都是湿热内阻，脉重按有力。前方减滋腻厚味，加入清利之品。

北沙参 9 克 大麦冬 9 克 金石斛 9 克 白芍 9 克 杞子 9 克
枣仁 9 克 蔻壳 1.2 克 远志 4.5 克 苍术 4.5 克 川柏 3 克
米仁 9 克 萎皮 4.5 克

锺右。阴虚於下，气火不戢，上升为咳，胁内隐痛，经络不舒，脉颇滑数，舌不腻。所喜胃纳如恒，法当填阴纳气，当可渐就范围。

大生地 9 克 砂仁米 1.2 克，同打 生紫菀 9 克 制香附 4.5 克
甘杞子 6 克 杜兜铃 4.5 克 炒莢肉 4.5 克 旋复花 9 克，布包
大白芍 9 克 白前薇各 6 克 旱莲草 9 克 熟女贞子 12 克
广橘络 4.5 克

别生淡鳖甲 15 克 生龟板 12 克 生打代赭石 12 克，三物先煎

祝右。肝肾真阴久亏，气不摄纳，上冲咳嗽无痰，甚则呕吐。脉

小已级，头痛眩晕，舌滑根有薄苔，纳谷碍化。宜泄肝纳气，和胃健脾。

生打石决明 24 克 生研代赭石 12 克，包煎 炒山萸肉 4.5 克
生紫菀 12 克 紫石英 9 克 杜兜铃 4.5 克 广郁金 4.5 克
生鸡内金 4.5 克 制女贞子 12 克 潼蒺藜 9 克 制半夏 4.5 克
旋复花包，9 克 款冬花 9 克 枇杷叶 2 片，刷净毛包煎

二诊：肝脾肾三阴久亏。纳食不思，眩晕气促，心中懊恼，咳嗽甚则干呕，脉细已极，舌根薄黄。姑再养胃阴，以潜气火。

东洋参 3 克 北沙参 6 克 原枝金石斛 9 克，三物先煎
广郁金 4.5 克 制半夏 4.5 克 大白芍 4.5 克 生鸡内金 4.5 克
广藿梗 4.5 克 生山萸肉 4.5 克 丝瓜络 4.5 克 生紫菀 6 克
熟女贞子 9 克 枣仁泥 9 克

叶左。气火未戢，早则咳，晚仍不免，咳痰颇浓，咳声尚爽。脉弦大搏指，右手为甚，纳谷消化尤迟，舌根尚有腻苔。总之阴虚有素，还须涵阳毓阴，纳气化痰。

大白芍 6 克 山萸肉 6 克 生紫菀 9 克 款冬花 9 克
生鸡内金 4.5 克 瓜蒌皮 9 克 天台乌药 4.5 克 旋复花包，9 克
甘杞子 6 克 砂仁壳 1.5 克 杜兜铃 4.5 克

二诊：气不摄纳，上凌肺金则为咳，授摄纳宣展，尚属相安。脉涩而弦，阴虚有火，舌滑少苔，素有梦泄。法宜踵步，滋潜摄纳火气，参以封固真元，可多服也。

生紫菀 9 克 桑白皮 9 克 杜兜铃 4.5 克 旋复花包，9 克
款冬花 9 克 川柏皮 4.5 克 山萸肉 12 克 大白芍 6 克
熟女贞子 12 克 枸杞子 6 克 金樱子膏 15 克 另生打牡蛎 24 克
生打苍龙齿 6 克 生打鳖甲 15 克，三物先煎

《张山雷专辑》

范文甫

李 女。风热犯肺，咳呛痰稠，气喘，舌红，脉滑而数。

桑白皮 9 克 葶苈子 4.5 克 苏子 9 克 黄芩 9 克 海石 9 克
天冬 9 克 橘红 4.5 克 杏仁 9 克 竹茹 9 克

应师母。燥咳无痰，为日已久，口干咽燥，午后潮热，脉细而弱，舌中脱苔。阴虚生热，治颇不易。

生石膏 30 克 麦冬 24 克 小生地 24 克 炒麻仁 24 克
炙鳖甲 9 克 杏仁 9 克 枇杷叶 9 克 清甘草 3 克 肺露 500 克，代水

二诊：小生地 24 克 驴胶珠 6 克 生白芍 9 克 麦冬 24 克
生龙骨 9 克 炙甘草 3 克 炒麻仁 12 克 生牡蛎 24 克 杏仁 9 克
肺露 750 克

施根生。寒咳不止。见咳治咳，无人不能。症见咳嗽气喘，痰如蟹沫，腰酸无力，神疲少气，此为肾阳素亏，寒邪直中少阴。如仍与麻杏及止嗽散之属，则犯虚虚之戒。宜温肾阳，散寒湿。

茯苓 9 克 白术 9 克 白芍 9 克 附子 9 克 生姜 6 克
五味子 6 克 细辛 0.9 克

松老家人。久咳四、五月，咳声闷而不畅，久治不能愈。邀余治之。余曰，宜服小青龙汤。松云：已试过三帖，无效。余曰：请以冰煎之。松恍然悟曰：善哉此法！依照上法服之，果即见瘥。盖余曾见此入于烈日中大饮冰合水，此咳嗽自天热而起，故投之即见效也。

《范文甫专辑》

魏长春

王松茂君，年三十岁。十二月二十六日诊。

病名：虚咳嗽。

原因：喉症痊愈后，肺胃疾涎未清，虚火内炎咳嗽。

证候：咳嗽痰白厚粘，夜不安寐，潮热目赤。

诊断：脉弦细数，舌光绛破裂。肺胃液耗，虚火上炎证也。

疗法：清肺胃燥火为先。

处方：桑叶二钱 白菊花二钱 叭杏仁三钱 生米仁四钱
生甘草一钱 竹茹三钱 冬瓜仁三钱 瓜蒌仁四钱 白茅根四钱
川贝二钱 丹皮一钱 枇杷叶五片去毛

次诊：十二月二十八日。咯痰略爽，咳嗽稍差，目赤已退，夜寐亦安，脉软缓，舌红润。拟甘露饮法。

次方：钗石斛二钱 原麦冬三钱 天冬三钱 大生地四钱
黄芩一钱 生甘草一钱 枳壳一钱 生米仁四钱 茯苓三钱
枇杷叶五片去毛 桑叶二钱 天花粉三钱

三诊：十二月三十日。咳嗽差，咯痰爽，胃气已苏，口润有液，舌色淡红，裂痕已合。古人病后调理，皆以脾胃药收功。今拟六君汤加味治之。

三方：西党参三钱 生冬术三钱 茯神四钱 炙甘草一钱
橘红一钱 制半夏二钱 生白芍三钱 夜交藤四钱 生枣仁三钱
淮山四钱 杜百合四钱 生米仁四钱

效果：服后咳愈，胃醒停药。

炳按：肺虚咳嗽，先从脾虚而起，故治法亦兼健脾益胃，而兼补肺也。

冯士标君，年二十岁。十月二十四日诊。

病名：寒咳嗽。

原因：脾肾阳气衰弱，感寒咳嗽。前医过施凉腻，如沙参、麦冬、川贝之类，阴凝不化，变成寒饮。

证候：畏寒咳嗽，痰粘带血，面部浮肿。耳窍失聪，鼻塞不闻香臭。

诊断：脉象迟细，舌红。阳虚误药成饮也。

疗法：用温药开肺化饮。

处 方：炙麻黄一钱 桂枝一钱 苦杏仁三钱 炙甘草一钱
茯苓三钱 制半夏三钱 五味子一钱 干姜一钱 炒白芍三钱
橘红一钱 紫苑三钱 旋复花三钱包煎

次诊：十月二十六日。咳痰黄白，头痛，面部浮肿，腰间发冷，左脉弦，右脉缓，舌淡红。元阳不足，寒饮为患，再宗前法，更进一步。

次 方：桂枝一钱 茯苓三钱 炒白术三钱 炙甘草一钱
苦杏仁四钱 制半夏三钱 厚附子三钱 干姜一钱 五味子一钱
炒白芍三钱 吴茱萸一钱

三诊：十月廿八日。两耳失聪，头部眩痛，腰间冷气上升，痰从鼻孔而来。脉象软缓，舌红。拟温补肺脾肾。

三 方：炙黄芪四钱 桂枝一钱 炒白芍三钱 炙甘草一钱
茯苓三钱 厚附子二钱 款冬花三钱 干姜一钱 炒白术三钱
制半夏三钱 陈皮一钱 五味子一钱

四诊：十一月五日。咳痰多，鼻嗅已知香臭，耳窍聪明，面肿已退，腰暖不冷，微觉酸楚。脉象缓和，舌苔白腻。寒饮已化，宗外台茯苓饮加减。

四 方：西党参三钱 炒白术四钱 茯苓四钱 枳实二钱
干姜一钱 炙甘草一钱 制半夏三钱 陈皮一钱 生米仁四钱
桂枝一钱 苦杏仁三钱

效果：服茯苓饮，痰化病愈。

炳按：肺寒咳嗽，当温肺气以达窍，温则气行，而液不为痰矣。

孙永康君，年七十五岁。三月二十日诊。

病名：痰火热咳。

原因：肺素蕴热，风寒外来，酿痰咳嗽。病起一月，曾服化痰降气药无效。

证候：咳嗽痰粘，气促，内热便艰。

诊断：脉弦滑大，舌红。邪郁化热，热蒸于肺，肺炎叶举，清肃之令不得下行，故咳逆加剧。

疗法：拟麻杏石甘汤加味，开肺达邪，清化痰热。

处方：炙麻黄五分 苦杏仁三钱 生石膏五钱 炙甘草一钱
全瓜蒌五钱 射干二钱 马兜铃三钱 紫菀三钱 川贝二钱
款冬花三钱 牛蒡子三钱 苏子三钱

次诊：三月廿三日。咳嗽未已，咯痰稍利，内热未尽，口干，脉大，舌红。仍拟开肺化痰清热。

次方：炙麻黄八分 苦杏仁三钱 生石膏八钱 炙甘草一钱
制半夏三钱 全瓜蒌五钱 黄芩三钱 白前三钱 白薇三钱
川贝一钱五分 竹茹二钱 玄参四钱

三诊：三月二十六日。脉滑舌红，咳嗽痰少，内热未尽，肺痹已开，专用化痰清肺法治之。

三方：旋复花三钱包煎 苦杏仁三钱 紫菀三钱 黄芩二钱
款冬花三钱 炙甘草一钱 海石四钱 川贝一钱五分 浙贝三钱
带皮苓四钱 制半夏三钱 橘皮一钱

效果：服药后咳愈，热退身健。

炳按：肺炎热咳，咳嗽痰粘，多兼肝火烁肺。清金保肺，泄肺中之蕴热，镇肝火之上灼，则气平火清，咳自愈矣。

《慈溪魏氏验案类编初集》

沈绍九

肺阴不足，虚则生热，干咳，失眠，潮热盗汗，应予养阴清肺。

沙参五钱 苦杏仁二钱 川贝母一钱五分，冲服 桑白皮三钱
地骨皮三钱 生甘草一钱 鲜石斛五钱 生地三钱 芍药三钱

吴某，患风热挟湿，误进滋腻药，身热，咳嗽，手颤，口舌生疮，口角流涎，语言蹇涩，时有神昏谵语，舌苔白，舌尖红，小便黄，两脉沉细弦数。予疏风清热祛湿之剂：薄荷、杏仁、藿香、贝母、郁金、芦根、栝蒌壳、广陈皮、竹茹、厚朴花、连翘、六一散、枇杷叶、天竺黄。服后热减神清，遂就原方加石斛以养胃阴，丹皮以清血热，又服数

剂全愈。

此病乃内郁湿热，因新感外闭，为滋腻药物所误，致湿热胶结难解，有似邪传心胞，入营入血之象；但舌质不绛，苔不黄腻，所以仍从气分透解。如果过早使用清营凉血之药，反而引邪深入，难于宣透。

《沈绍九医话》

曹颖甫

叶瑞初君，初诊：咳延四月，时吐涎沫，脉右三部弦，当降其冲气。

茯苓三钱 生甘草一钱 五味子一钱 干姜钱半 细辛一钱
制半夏四钱 光杏仁四钱

二诊：两进苓甘五味姜辛半夏杏仁汤，咳已略平，惟涎沫尚多，咳时痰不易出，宜与原方加桔梗。

茯苓三钱 生草一钱 五味子五分 干姜一钱 细辛六分
制半夏三钱 光杏仁四钱 桔梗四钱

按：叶君昔与史惠甫君为同事，患咳凡四阅月，问治于史。史固辞之，以习医未久也。旋叶君咳见痰中带血，乃惧而就师诊。服初诊方凡二剂，病即减轻。服次诊方后，竟告霍然。

《经方实验录》

刘云湖

病者：李英品，年二十七，汉阳人，充鄂军电信队排长。

病因：患干咳喉痒。

症候：胸闷微喘，稀唾零星，睡觉麻木，难以转侧。

诊断：愚诊六脉濡涩，知湿横胸膈，影响肺络，致气不流利也。

疗法：与利湿之剂。

处方：藿梗四钱，苍术、云苓、枇杷叶（去毛）各三钱，木防己、泽

泻、猪苓各二钱，厚朴一钱五分。

效果：一剂而愈。

理论：咳嗽一名呷嗽，病源曰呷嗽者，咳嗽也。呷，玉篇吸呷也，即引息也，西医名气管炎，东医译作气管枝加答儿病。刘河间病机气宜保命集曰，咳谓无痰而有声，肺气伤而不清也。嗽谓无声而有痰，脾湿动而为痰也。咳嗽谓有痰而有声，盖因伤于肺气动于脾湿也。内经曰，秋伤于湿，冬心咳嗽，盖咳嗽脾湿居其大半。脾为生痰之源，肺为贮痰之器也。湿咳之症有四：有干咳者，干咳多喉痒，睡不止，胸不开，喘不息，湿横肺络也，宜藿香、枇杷叶、苍术、石菖蒲、厚朴、杏仁、苡仁、蔻仁之类。有痰多唾重者，其人嗽不已，身面黄，痰饮如注，良久化为稀水，脾湿也。宜苍、白术、生米仁、藿香梗、佩兰叶、大腹皮、白芥子、云苓、泽泻之类。有兼热者，其人面赤气粗，声如曳锯，唾地涎液，狼藉膏粘，亦湿留于肺络也。宜蒿芩、飞滑石、白芥子、淡黄芩、芦根、荷叶、云苓、泽泻、苡仁、杏仁之类。有挟风寒者，其人或喘或不喘，或闷或不闷，痰应声而出，唾地起泡，或涎引，或鼻塞，或头痛，或骨节痛，或恶寒发热，亦肺病也。宜苏叶、藿香、薄荷、半夏、厚朴、芥子之类。大抵咳症多端，而湿咳所该者只此耳。夫咳嗽除脾肺二经而外，另无湿症可推，治疗家总以肺脾两经湿邪混浊靠定，下药虽用辛散，而必兼以渗利者，使邪有出路，即内经所谓开鬼门洁净府之治法也。

方论 此方即用四苓散中枇杷叶、藿香、防己、厚朴也，苍术得厚朴有平胃之作用，藿香配厚朴有宽中之企图。湿之在胸膈者，得此可以消化。而再以枇杷叶抑其逆气，防己散其湿邪，使湿浊之在螺旋体枝气管间者，一齐山下而降也，湿去则喉不痒，喉不痒则咳嗽平矣。

《临床实验录》

汪逢春

杨先生，三十二岁，四月二十一日。

咳嗽咽痒，痰不易咯，鼻塞声重，舌绛苔白，两脉细弦滑数。肺有内热，感受风邪。治以辛凉清解，肃降化痰。

薄荷叶五分，后下 鲜枇杷叶三钱 金佛草钱五，同包 连翘三钱
苦杏仁三钱，去皮尖 嫩前胡钱五 忍冬藤三钱 苏子霜钱五
冬桑叶钱五 象贝母四钱，去心 鲜梨皮一个 桔萎皮三钱
枳壳片一钱 冬瓜子一两 鲜芦根一两，去节

《泊庐医案》

周镇

龙泉庵僧微明。丁巳二月下旬诊：身热，见风则畏，已经二月。脉紧数，舌浊而腻，痰多咳嗽，气逆口秽。是冬令膏滋，既者感邪，仍不停服，客邪为补堵塞，故热久不退。连翘、荆芥、冬瓜子、兜铃、郁金、杏仁、瓜蒌、竹茹、枇杷叶、前胡、芦根。另以鲜萝卜、生西瓜子洗净，煎汤代水。服三剂，续诊：痰吐漉漉，咳嗽转轻，形寒足厥，口渴，溲黄，无汗，邪仍不撤。疏豆豉、山梔、前胡、荆芥、杏仁、薏仁、青蒿、枳实、竹茹、新会红、瓜瓣。另顺气消食化痰丸。三诊：下午形寒减，痰亦少，惟里热未止。苏梗子、瓜瓣、杏仁、薏仁、苍耳子、路路通、秦艽、丝瓜络、前胡、象贝母、瓜蒌、桑枝。四诊：热减，背尚作寒，痰咳已平。春寒为补束缚，不能底撤，再为搜剔蕴邪。豆卷、桔梗、秦艽、山梔、枳壳、苍耳子、枫果、竹茹、杏仁、柴胡、桑枝、保和丸。热渐全止。此等症最多，易为病欺。要知果为虚损，服膏方应精神矍铄；而不然者，有邪外客也。

戴右，沪北。戊申春仲咳嗽气逆。寿医初投清肃，咳稍解。因其带多腰痠，用杜仲、牛膝、杞、芍之类，旋加参、术。是妇多气腹胀，故服之胃口钝。加以新感寒热，热解胃钝脘胀，就诊于予。自述不

时鼻衄干燥，痰韧如生虾，有木火刑金之象。气滞多暖，而胃土亦病，宜治其肝。疏方香附、金铃、八月札、糯稻根、黑山栀、旱莲、花粉、石斛、莱菔缨、青蛤散、白芍、甜杏仁、芦根、枇杷叶等。服后，气通暖爽，复用木蝴蝶、苏噜、橘白叶、青蛤散、绿豆衣、地骨、丹皮、茅花、扁石斛、芦根、枇杷叶等。诸恙均减，纳食胜前，续定滋水清肝之法而安。肝咳与外感嗽治法迥异，张伯龙《雪雅堂医案》颇备，此宗其意，以见一斑。

陈顺与，年二十余岁，住惠山。甲子五月初三日，身热，咳逆不爽，胸灼，痰白而秽，热以夜甚，谵语。医投栀、豉、牛蒡、荷、杏、薄荷等，不应。初十日延诊，案云“身热一候，咳嗽气逆，痰韧白，口渴引饮，胸前灼热，不能盖被，热以夜甚，谵语，连宵不寐，痰中见血，足厥不暖，溲赤如血。脉濡不扬，右见涩数，苔白而干。素喜饮酒，伏火挟酒湿熏蒸肺胃，瘀热留著，恐其昏喘。冬甜瓜子五钱，光杏仁三钱，生薏仁三钱，粉沙参五钱，玉泉散九钱，鲜薄荷五钱，射干钱半，郁金三钱，通草一钱，新绛五分，紫菀二钱，知母二钱，兜铃三钱，茅芦根一两，鲜竹叶三十片，枇杷叶五片，竹沥三两温冲。另西月石三分，猴枣八厘，雄精五厘，研细末，竹沥温调服。一剂而定。后以效方加减，即渐愈。

朱锦冒，甲戌年廿八岁。因连丧二子，郁忿，日气上十余次，单咳连绵，口苦溲黄。乙亥七月来诊，病已年余，木火刑金最重，且脉左关弦数与嗌苦，实是肝咳重症。拟醋炒柴胡、黑山栀、丹皮、白芍、金铃子、旋复、代赭、娑罗子、莪术、泽泻、夏枯草、乌梅。左金丸九分，先服。另上沉香五分，刀豆子一钱，青黛二分，研末，冲。服四剂，咳大减，气逆退半，脉弦数稍和，溲黄。再理气清肝，化湿摄纳。龙胆草八分，黑山栀三钱，醋炒柴胡五分，丹皮三钱，白芍六钱，川楝子四钱，代赭石七钱，旋复四钱，娑罗子五钱，莪术三钱，泽泻三钱，乌梅一钱，夏枯草三钱。左金丸九分，先服。另净青黛一分，刀豆子一钱，上沉香五分，研末，卧前服。丸方附后：木火刑金，咳中重恙。

单咳气逆经年，咳盛目花，气上则胸脘不达。审知肝脉弦数，口苦溲黄，爱好运动。以清肝下气，解郁润养为法，如鼓应桴。兹宗前意，以冀救平，还须节劳远热，勿迟眠熬夜伤神为嘱。粉炒参、生山药、首乌、白石英、獭肝、天冬、牛膝、稻豆、百合、二至、海藻、黛蛤、挂金灯、功劳子、射干、乌药、黑山栀、二苓、泽泻、白芍、黄柏、丹皮、远志、乌梅、夏枯草、香附、川黄连、胡黄连、木蝴蝶、莪术、金铃子、香橼、刀豆子、甘菊、檀香泥、研末、用桑枝膏八两，龟板胶二两，鳖甲胶二两，化烊为丸。每服四钱。

荣某氏，辛亥春初亥刻咳剧，痰味则咸。询知此症发于立春之日，口渴，气短，欲呕，颧赤，少腹震痛。脉弦，舌红。因思立春木气上僭，消瘦易怒，木火之质，卫气上升，化火灼津，宜与镇摄。决明、青铅、紫石英、甜杏仁、旋复、龟板，牛膝炭之类。知医者过来视方，颇讶此非治咳药而以为询。余详解此旨，径投之去。竟以潜摄之品三剂而定。

江左，丙子九月廿四日诊：感暑冒风，咳嗽痰黄，鼻灼，晨见红，身热汗多，咳引肾痛。伏邪挟风伤肺，防其入损。桑叶、荆芥、僵蚕、蝉衣、牛蒡、黑山栀、薏仁、地骨、黄芩、茜草炭、竹茹、黑豆衣、茅苳茎、瓜瓣、浮小麦。宁嗽丸，秋露温服。

廿六日诊：鼻灼咽痒、痰黄、身热、寐汗均减，血未见。惟脉数滑，左弦，舌净。肺蕴风热犹盛，防其反复。炒桑叶、地骨、金铃子、牛蒡、瓜瓣、薏仁、僵蚕、象贝母、黄芩、知母、茜草炭、黑豆衣、茅苳茎、浮小麦、竹叶、鲜梨。另净青黛、月石、珍珠母、辰砂，研服，秋露温饮。

廿九日诊：鼻灼咽痒均减，痰黄转白，里热寐汗亦少，血止。脉数左较盛，舌滑。内伏壮火，外袭风热，防其留恋。炒桑叶、制僵蚕、牛蒡、白薇、黄柏、黄芩、女贞、旱莲、瓜瓣、黑豆衣、地骨皮、元参、金铃子、茅苳茎、浮麦、竹叶。另净青黛二分，珍珠母二钱，柿霜五分，研末，冲服。

十月二日诊：鼻灼、咽痒、痰黄、寐汗均减，梦已觉少。再清金降火，因脉尚弦大不敛也。瓜瓣、白薇、冬青子、旱莲、地骨、桃干、黑豆衣、牡蛎、黄芩、牛蒡、元参、挂金灯、金铃子、茅苇茎、小麦。另净青黛二分，珍珠母二钱，研末，冲服。

十月六日诊：鼻灼、咽痒、痰黄、寐汗、咳减十之四，再循原方增减。以左脉弦，参入滋养。蜜炙款冬，功劳叶，南烛子、二至、瓜瓣、牡蛎、金铃子、紫菀、桃干、黑豆衣、元参、黄芩、地骨、小麦。另青黛二分，珍珠母钱半，研末，冲服。知柏八味丸四钱，下午服。循愈。

王瑞生，丝厂工作。因肺病，冬令来委膏方。询知痰多而浓，喻其此非膏类所宜，为制丸方。服经数年，咳竟全愈。案云：咳经数年，始因淋雨，形寒饮冷则伤肺也。热天寒令均重，甚则呕恶，咳以晨盛，退时痰黄。邪伏肺膈，牵及中州，食人阻饱。以前曾经见红，鼻塞亦肺气窒也。宜奠土以引饮邪下行，而搜涤久伏之邪，拟匱药丸法。於朮四两，远志四两，山药四两，青蛤散四两，功劳子叶各三两，怀牛膝四两，川断二两，白石英四两，薏仁二两，苏子三两，猪茯苓各二两，广皮二两，竹沥半夏二两，霞天胶二两蛤粉炒，泽泻二两，研末，雪梨膏八两，加开水，泛如秫米，晒。百部八两，白前八两，款冬三两，桑枝三两，紫菀八两，桔梗四两，佛耳草六两，石韦二两，荆芥二两，挂金灯二两，山梔仁三两，象贝母二两，研末，用枇杷叶膏十两，加开水泛于前小丸上，至绿豆大，晒。早晚卧前各服四钱。

沈姥，年六十余。癸丑正月，寒热咳嗽，脘闷便秘。某君照风邪外感治之，不减。脉滑数，苔白罩黄，腹中按之满痛，决为痰气食交阻。拟苏梗、厚朴、半夏、茯苓、瓜蒌、枳实、竹茹、陈皮、浙贝、杏仁、豆豉、楂炭、莱菔煎汤代水。服后，痰食下行，遂得畅便，咳嗽脘闷渐退，寒热自止。

陆左，阳明乡，在沪花厂作工。己未秋患感，热退咽痒，干咳一月，肢软溲黄，脉数舌红。肺有蕴邪，兼挟劳勩。进桑皮、知母、黄芩、地骨皮、黑山梔、冬瓜子、薏仁、瓜蒌、通、秦艽、茵陈、萆薢、茅苇茎、

灯心。服数剂，咳略爽，有痰气腥，热留肺中见证。瓜瓣、薏仁、杏仁、象贝母、萎皮、桑皮、黑山栀、功劳叶、知母、青蛤散、鱼腥草、芦根、茵陈。服后痰腥减，溲黄亦减。惟咳恋咽痒，足酸力乏。清肺涤痰化络湿为法。桑皮、紫菀、知母、地骨、瓜瓣、象贝母、萎皮、薏仁、青蛤散、白前、茯苓、茵陈、革薢。另西月石、僵蚕、川贝母、薄荷，研末，卧前另服。三剂，得便痰浊，咽痒大减，咳退十八，足酸已减，惟多行无力，脉见虚数。肺邪将清，络隧尚虚。用南沙参、瓜蒌、冬瓜子、西茵陈、革薢、秦艽、丝瓜络、薏仁、杏仁、紫菀、玉竹、川断。另川贝母、甜杏仁、木蝴蝶、鸡苏、研服。咳减十之九，力气略振，拟丸以善后。南北沙参、叭杏、瓜蒌、薏仁、革薢、丝瓜络、玉竹、续断、狗脊、茵陈、黄柏、紫菀、山栀。病由花絮呛入气管引起，嘱预防勿忽。

戴定礼，金坛。癸丑十一月诊：风寒内袭肺膈，脾湿蕴酿成痰，咳嗽六年，时愈时作。脉弦数，苔微黄。太阴之气不足，蕴邪将欲化热。宜脾肺同治，以冀减轻。膏方用百部、白前、茯苓、玉竹、橘络、枇杷叶、经霜丝瓜藤、杏仁、苏子、蛤壳、干术、泽泻、竹沥、半夏、瓜瓣、薏苡、黑小豆、牛膝、桑枝、功劳子叶、煎浓去渣，加燕窝汤、梨膏、阿胶、冰糖、白蜜收膏。

袁揆仁表戚之室，乙卯四月患桑毒咳嗽。桑毒者，系无锡乡间一种特别症，因春蚕汛中桑地浇肥，日晒雨淋，其土淫热，系桑者赤足践踏，初则足肿生疮，不数日足肿减，即咳嗽喉颈粗，痰吐腥韧，是桑地热毒湿火迫于肺。即疏桑皮、地骨、枯黄芩、黑山栀、茯苓、冬瓜子、薏苡、杏仁、枳实、瓜蒌、兜铃、防己、芦根。另用川贝母、银花、月石、雄精、净青黛，研细，化服。咽膩、咳嗽、颈胀大减。

复诊原方加减，渐即告痊。

此症失治后即延疳黄，浮肿无力，或转泄泻，淹笃不治。

朱左，西乡，业蚕。乙卯五月桑毒咳嗽，引咽喉痛，气腥痰多而韧。脉滑数，苔白。先由足肿有疮，骤愈而延于华盖。即疏白僵蚕、蝉衣、瓜瓣、薏苡、光杏仁、浙贝母、鼠粘子、射干、芦根、郁金、桑皮、

黑山梔、知母。另用制雄精、月石、银花、川贝母，研末，临卧冲服。三剂，咳嗽咽痛轻减。复诊原方出入，幸即渐痊。另有面黄力乏，锡谚名桑黄者，更难图痊。

陈永安，盐城。辛酉正月咳嗽，渐增胃呆力乏。延至五月，服药百余剂。就江北某医，视为损症，因见过痰红，药多黄芪、生地、沙参、阿胶、乌梅、白芍，以致咳恋夜甚，面晦，肤生黑晕，宛如癰证矣。五月下旬来诊时，知其牛肉摊设于棚下，风寒有征，损则未必。惟脉却细濡，苔白，咽有痰膩。此宜舍脉从证，由开展肺气涤痰着想，所谓退一步由表面设法也。苍耳子、枫果、款冬花、前胡、苏子、杏仁、薏仁、冬瓜子、宋半夏、竹茹、萎皮、郁金、射干。另月石、生白矾末，雄精，研细，萝卜汤卧前服。

复诊：咳减痰爽，原方增损，并予止咳散（内系桔梗、荆芥、紫菀、百部、白前、陈皮、甘草）数服，其咳愈稀，面与手上之黑晕自蜕，惟手指之黑晕退稍迟。不过十余剂而嗽竟止。

四诊中间在三面切在四。今世病者，每不肯先述病因，以为脉之自得，此风宁波、江北尤甚。医如误会其脉，不耐烦审因，鲜不误者。

《周小农医案》

方公溥

卓男。6月30日诊，咳嗽缠绵日久，痰带白沫，声音不扬，面色晦黯，动见气急，症势已深，急与理肺培元，候政。

款冬花9克 大淮药9克 仙半夏9克 云茯苓9克
炙甘草3克 新会皮4.5克 光杏仁9克 全福花4.5克
炙兜铃9克 北沙参9克 冬虫夏草9克 香谷芽9克

7月1日复诊：进理肺培元，夜卧较酣，咳嗽较减，声音较扬，胃纳渐增，药既应手，再宗原意化裁之。

处方同前。

7月2日三诊:咳嗽减而未痊,食欲较香,精神困倦,病情稍有转机,再进一步调理。

处方同前,除马兜铃。

7月3日四诊:夜来咳嗽较差,痰沫渐减,声音渐复,再与理肺和中,处方同前,除淮山药,加五味子9枚。

7月4日五诊:病势较前大有转机,再进一步调理。

处方同前,除陈皮、全福花、香谷芽、五味子,加麦门冬9克、生苡仁9克、肥玉竹9克、淮山药9克、改光杏仁为甜杏仁9克。

按:患者咳嗽既久,声音不扬,痰带泡沫,面色晦黯,动则气急等一系列证候,符合虚劳中肺气虚,津液伤之候,经方师采用健脾培元,理肺,润肺,化痰之剂,病情日见好转而痊。

《方公溥医案》

翟竹亭

东郭外边继勋,初感寒甚重,未曾服药。月余后,咳嗽发喘短气,饮食减少。迎余诊治,肺脉沉迟,脾胃脉细弱,此因禀赋不足,中气不能送出寒邪,寒邪仍在肺经,久则变成肺劳,实难治疗。今虽不能速愈,倘肯服药,或渴望好。治宜十全大补汤加减,服十帖痊愈。

加减十全大补汤

熟地 15克 当归 10克 川芎 10克 黄芪 10克 白芍 10克
党参 10克 白术 10克 茯苓 10克 炮姜 6克 川羌活 6克
防风 10克 附子 6克 肉桂 6克 荆芥 6克 白芷 10克 炙麻黄 3克
炙甘草 6克 水煎服。

邑西北三十五里王庄村,王金山,年三十余,家贫劳甚。季秋出门作小贩,饮食不足,斯年十一月间,天气分外寒冽,日积月累,形寒伤肺,从此咳嗽吐痰,亦无甚痛苦。至腊月病势大作,冷热无时,吐痰如涌,饮食日减,头目眩晕,四肢懒动,自知不能支持,雇人送回。迎余诊治,脾胃二脉细细,肺脉劲硬,此壮年当忌之脉,余辞不

治。伊母含泪告余曰：“吾寡居三十年，所盼者此儿，若有不测，合家零散，老命转沟壑矣，望先生重怜老妇孤苦，救我子命，不惜倾资以报。”余闻惨然，勉开一方，先固先后两天，加以宁肺之药，嘱以服八帖后再诊。伊果如数服完，诸症均去大半。原方未改，又服十帖，饮食日增，诸症尽去，脉象精神俱复原状。始终共服药二十帖，不大加减。

补脾宁肺汤

百合 15 克 茯苓 10 克 山萸肉 6 克 丹皮 6 克 泽泻 6 克
白术 12 克 芡实 10 克 熟地 15 克 山药 12 克 附子 6 克
破故纸 6 克 肉桂 10 克 半夏 10 克 橘红 6 克 炙麻黄 6 克
巴戟天 10 克 砂仁 6 克 牛膝 6 克 炙甘草 6 克 水煎服。

赵瑞亭，年十八岁，从余学医。家贫甚，终日苦读，余戒之不听，三年即能应世。又二年，在邢口村行医，患咳嗽，吐痰，短气，饮食日减。就诊于余，心脉微散，脾脉虚弱，少神。余谓少年见此脉，决非佳兆。此为习医、行医操劳过度，致伤心血。心火虚则不能生脾土，脾土虚则不能生肺金。三经具虚，则心火上炎，肺金最怕火灼，是以咳嗽成焉。治宜子母俱补，使肺金有源，肾子不盗母资，有不愈者乎？方用子母两济汤，服十帖，略有转机。奈彼性急，欲求速效，又投别医，指为心火，用黄连泻心汤，遂渐加重，形体日削，精神日减，危困于床，不久告绝。

子母两济汤

白术 15 克 薏苡仁 12 克 山药 15 克 扁豆 10 克 莲子 10 克
炒枣仁 10 克 茯苓 10 克 菖蒲 6 克 天竺黄 15 克 麦冬 10 克
柏子仁 10 克 远志 6 克 辰砂 2.4 克 炙甘草 10 克

邑北十八里陈寨村，余友夏殿三君。腊月赴汴返里，偶逢天变，北风大雪寒甚，彼恃健强，冒雪至家。从此每日咳嗽，少有寒热，不以为意。又月余，嗽略带血，寒热如疟，饮食减少。邀余诊治。肺脉紧数，脾胃微细。土不能生金，乃元气大虚之兆。非服药数十剂，温

补脾胃，培养后天，使肺金有源，断难痊愈。伊以余言太过，乃更某医，某医不明经旨“虚者补之，寒者温之”之义，但见吐血，便指为血热妄行，遂投麦冬、丹皮、黄芩、桑皮、枇杷叶之类，服十余帖，吐血虽止而音哑矣。又见寒热如故，复用柴胡、黄芩、地骨皮、鳖甲、龟板之类，专务清热，由是大便洞泻，虚汗似雨，面如枯骨，青色绕口，危困于床。重邀余诊，肺脉散乱，脾脉已见雀啄，形色脉象，死证俱见，万无生理，越二日而歿。书此以为延医贻误者戒。

《湖岳村史医案》

孔伯华

李女，七月十八日，肝肺气郁，热居上焦，头部晕楚，咳嗽胸中闷损，身倦腰疼，脉弦滑，左关大，亟宜平肝降逆，兼肃肺络。

杏仁泥三钱 川郁金四钱 白蒺藜五钱 龙胆草二钱
苏子霜钱五分 青竹茹四钱 酒黄芩二钱 石决明八钱，生研生煎
全栝楼五钱 清半夏三钱 海浮石五钱 荷叶一张 滑石块五钱
杭菊花三钱 二剂

二诊：七月二十日。服前方药后，肺热较平，咳嗽渐止，第肝阳仍盛，头部尚不能清楚，湿邪为肝气所迫，腰部仍觉痛楚，脉属弦数，左关仍盛，再从前方加减。

生石膏四钱，先煎 石决明八钱，生研生煎 知母三钱 川黄柏三钱
地骨皮三钱 青竹茹四钱 龙胆草钱五分 白蒺藜五钱
桑寄生四钱 杏仁泥三钱 霜桑叶三钱 荷叶一个 生滑石块三钱
羚羊角一分，镑片，另煎兑入 二剂

吕男，十月十四日。湿痰久注于肺，呛咳经年而未得治，痰属稀涎，脉弦滑而数，治当涤痰降逆，以肃肺络。

黛蛤粉六钱，布包先煎 生桑白皮三钱 旋覆花钱半，布包煎
代赭石钱五分 青竹茹五钱 甜葶苈子二钱 川郁金二钱
苦杏仁泥三钱 苏子霜钱五分 盐橘核四钱 知母三钱

生滑石块四钱 法半夏三钱 鲜雅梨一两 二剂

二诊：十月十七日。晋服前方药后，证象业经渐减，第痰咳经年，不能即愈，舌脉如前，仍当攻痰降逆，以祛实邪而安肺络。

黛蛤粉两，布包先煎 生桑白皮三钱 旋覆花钱五分，布包煎
代赭石钱五分 青竹茹六钱 甜葶苈子三钱 川郁金二钱半
苦杏仁泥三钱 法半夏二钱 生橘核四钱 知母三钱 生滑石块四钱
栝楼皮四钱 苦桔梗一钱 鲜梨皮一两 三剂

《孔伯华医集》

章成之

王男。颈长肩耸，面容清癯，十之八九易樱损证。今以咳为主诉，前年曾咯血，不亟加休养，行将进展无已。

北沙参9.0克 大麦冬9.0克 京元参9.0克 阿胶珠15.0
血燕根9.0克 肥知母9.0克 大熟地15.0 玄武板30克
蒸百部9.0克 水獭肝9.0克，焙研吞

别：琼玉膏180.0克 川贝末18.0(和入膏中)，每天早晚各服一食匙。

施男。以左肋痛为苦，不能向右侧卧，短气，咳嗽，西医诊为浆液性肋膜炎。其效固非旦夕可期。

银柴胡9.0克 前胡9.0克 桑白皮9.0克 旋复花9.0克
象贝母12.0克 杏仁泥18克 粉丹皮9.0克 葶苈9.0克
新绛2.4克 炙乳没各9.0克

二诊：两药后左肋之痛大定，其效之速，非始料所及。

桑白皮12.0克 粉丹皮9.0克 知母9.0克 白芍12.0克
象贝母12.0克 葶苈9.0克 玉竹9.0克 紫花地丁9.0克
粉甘草2.4克

李女。咳而呕，占称痰饮，不可予刺激性祛痰剂。平素缺乏营

养,面色不华,与咳有连锁性。

茯苓 9.0 克 桂枝 2.4 克 白术 9.0 克 清炙草 2.4 克
旋复花 9.0 克,包 姜半夏 9.0 克 橘皮 6 克 白芍 9.0 克
五味子 2.4 克

胡男。此症古称痰饮,现称慢性支气管炎。多发于冬令,每日清晨其咳益甚。不易根治,用药无非祛痰、镇咳。

蒸白部 9.0 克 远志肉 1.5 克 杭芍 9.0 克 嫩白前 9.0 克
紫苑 9.0 克 款冬 9.0 克 葶苈子 9 克 白果十二枚,去壳 粉甘草 3 克
鹅管石 24 克 柏子仁 12 克

李女。慢性气管炎,前人有痰饮之称。必刺激之而后痰爽,予三子养亲合苓桂五味姜辛半夏汤。

炙苏子 9 克 莱卜子 9 克 白芥子 4.5 克 云苓 12 克
川桂枝 2.4 克 五味子 3 克 北细辛 2.4 克 生姜一片 姜半夏 9 克
光杏仁 12 克

另:白果九粒,橘皮 6 克,煎汤代茶。

施女。慢性气管炎,古称痰饮,当以温药和之。温药皆能祛痰,苓桂术甘殆其代表剂。其痰活,其咳因之减少。若云根治,难矣。

川桂枝 2.4 克 生白术 9 克 旋复花 9 克,包 云苓 9 克
炙甘草 3 克 款冬 9 克 紫苑 9 克 细辛 2.4 克 五味子 9 克

崔女。慢性之咳,际此冬令,难奏捷效。除服钟乳补肺汤(丸)剂外,以此方振作疲乏之精神。

当归 9 克 潞党参 9 克 功劳叶 9 克 生黄芪 9 克 脱力草 12 克
升麻 4.5 克 苈麻根 12 克 杭白芍 9 克 川桂枝 24 克

赵男。药一帖热退,但临风仍洒洒然有寒意。医用去痰药,其咳增多,不足虑也;痰不得出,反是隐患。

黄芪 9 克 焦白术 9 克 防风 6 克 白芥子 3 克 炒苏子 12 克
莱菔子 9 克 橘皮 4.5 克 远志 4.5 克 银杏十枚,去壳

王女。主诉为咳与腰痛,此二者皆为风寒之侵袭,以其苔白也。

生麻黄 2.4 克 川桂枝 3 克,后下 杏仁 12 克 细辛 2.4 克
炙紫菀 9 克 生苍术 6 克 苡仁 12 克 甘草 3 克 西河柳 9 克

郑男。病咳未满一候,已剧烈不能平卧。前贤论不能平卧之原理,属之水寒射肺;假使不能平卧而见上气,则属之肾不纳气。病者盖因痰涎壅塞气道,祛其痰,卧斯平矣。

葶苈子 9 克 莱菔子 9 克 苏子 9 克包 射干 4.5 克
生麻黄 2.4 克 远志 1.5 克 炙紫菀 9 克 干姜 3 克 鹅管石 18,先煎
杭芍 9 克 细辛 2.1 克 白果十二枚,去壳

另:皂角末 2.4 克,肉桂末 2.4 克,分六包,睡后两小时服一包。

卢女。近二月清晨食入则呕,便亦燥结,自觉痰粘喉间不爽利。此肺病而见胃肠功能障碍者。

淮山药 9 克 桑棋子 15 杏仁泥 12 克 首乌 9 克 麦门冬 9 克
苏子 9 克 蜜炙枳壳 9 克 谷麦芽各 9 克 象贝母 9 克
天花粉 9 克

二诊:肺与大肠相表里。咳呛痰少,此肺燥也,故大便难。

桑白皮 9 克 马兜铃 9 克 麦门冬 9 克 玉竹 9 克 甜杏仁 18 克
浙贝母 9 克 北沙参 9 克 杭白芍 12 克 桑棋子 15 粉甘草 3 克

三诊:叠用清润法,咳呛有痰且活,大便亦见调整。再事原法加减。

桑白皮 9 克 马兜铃 9 克 浙贝母 9 克 麦冬 9 克 北沙参 9 克
甜杏仁 12 克 粉甘草 3 克 白芍 9 克

叶女。久咳而见舌光滑者,虽在老年,亦有肺癆嫌凝,所幸两脉不数;又舌光,有厚痰,不宜用温燥化痰药。

淮山药 12 克 北沙参 9 克 仙鹤草 12 克 知母 6 克
麦门冬 9 克 生侧柏叶 30 克 杭白芍 9 克 玉竹 9 克 粉甘草 4.5 克

黄男。干咳而见鼻衄、膺痛,即非细故。盖肺病初起,亦有此等症状故也。

桑白皮 9 克 白部 9 克 麦门冬 9 克 地骨皮 9 克 杭白芍 9 克

马兜铃 9 克 川百合 6 克 白前 6 克 粉甘草 3 克 黑木耳 12 克

《章次公医案》

张汝伟

高右，年四十二，常熟。冬温袭肺，咳呛，未经疏散，延绵至春暮，已五阅月矣。诊见面赤颧红，骨削神消，饮食不进，气喘音微，痰吐粉红，或黄块，苔薄质绛，脉细无力，此久咳肺伤，兼及于胃，经事不止，浮游之火上泛，亟宜纳胃潜阳，和胃生津，勿沾沾上治肺。

制熟地 山萸肉 生淮药 云茯苓 甘枸杞 川贝母
菟丝子各三钱 五味子一钱 炙甘草八分 化橘红 款冬花各钱半
生牡蛎 生蛤壳各一两

本证始末：此证病已五月，问治于伟，为列此方，家中人亦略知医，曰此方无治咳药。余曰：款冬、川贝、桔红不是治咳药么？其他六味地黄法加减，是肾咳专剂，乃取服之，不料服二剂后，即咳止气平，渐能食粥矣。嗣转一方，乃加沙参、天冬，旬日之间，即告痊愈，其夫为登感谢广告数天云。方义说明，见前不赘。

朱左，年三十五，黟县。久咳不已，每咳一声，尾闾及腰相引而痛，右胁及肩背亦痛。痰吐青黄，脉来弦滑，状如劳风，良由肝火上逆，将肺胃之热，蕴遏煎熬其痰所致，仍宜清肺胃之痰热，而兼镇肝理气为要。

炒午劳 桑白皮 天花粉 冬瓜子 炒苡米各三钱 旋复花
炙紫苑 炒防风 丝瓜络各钱半 代赭石先煎 生浮石先煎各四钱
生蛤壳五钱

本证始末：朱君是安徽银行职员，他患病时在南京，医家云系肾咳，用巴戟天、补骨脂、麻黄、附子、细辛、肉苁、诃子等酸辛温补之品。服后鼻衄如流，气逆作痛益甚，不能纳食，勉强回沪，始来诊治，为出上方，服药二剂，其痛若失，血止痰爽，而咳亦停矣。

方义说明：照吐青黄之痰，似属劳风，咳则引痛腰胁尾闾，似属

肾亏，则前医之方，何以反不愈而加剧，伟从脉之弦滑而诊，是可断火肝火蕴遏，蒸迫脾胃之痰所致，是木克土症。方药则用清肺肃肺之品，是清金以制木，肺气有权，肝火自熄，是隔二隔三之治法。所以看似病重而药轻，肝病而治肺，亦是煞费苦心矣，然亦想不到效力有如此之速者耳。

《临症一得》

陆观虎

宋某某：女，62岁。

辨证：咳嗽。

病因：外感风邪，兼有内热。

症候：头痛，咳嗽，喉痛，心悸、纳少、四肢酸痛。脉细数。舌质红，苔微黄而粘。

治法：清化风热。

处 方：连翘9克 山楂炭6克 生枇杷叶6克，拭毛包
净银花9克 大贝母6克，去心 黛蛤散9克 陈皮6克 焦稻芽9克
杭甘菊9克 炒赤芍9克 冬瓜子9克 炒竹茹6克
苏薄荷3克后下

方解：银花、连翘、薄荷轻宣散结清热解表而止喉痛。杭甘菊疏风热而止头痛。赤芍泻肝散郁。焦稻芽、陈皮开胃。冬瓜子，枇杷叶止咳嗽。竹茹、贝母、黛蛤散化痰热泻肝散郁火。三剂而愈。

李某某，男，21岁。

辨证：咳嗽。

病因：内热伤风，汗出当风。

症候：鼻塞咳嗽，气短，胸痞作堵，腰痛三天。脉细数。舌质红，苔黄。

治法：清热疏风化痰。

处 方：冬桑叶11克，水炙 大贝母9克，去心 生枇杷叶6克，拭毛

白蒺藜 6 克,去刺炒 炒赤芍 6 克 黛蛤散 9 克,包煎 冬瓜子 9 克,杵
丝瓜络 6 克 川通草 3 克 炒竹茹 6 克 苏薄荷 3 克

方解:以桑叶、薄荷清热疏风。贝母、竹茹清痰热而散结。冬瓜子、枇杷叶清肺止咳。丝瓜络除风化痰通络止腰痛。黛蛤散、白蒺藜化痰清肝热。赤芍泻肝散郁。川通草入肺胃二经利溲兼清湿热。连服三剂,风热解痰亦化,肺气顺,诸恙悉除矣。

万某某,女,46 岁。

辨证:咳嗽。

病因:内热伤风,肺胃不和。

症候:头胀,咳嗽,鼻塞,乏力,心悸,纳食不香。脉细数。舌质红,苔黄。

治法:清热疏风,两和肺胃。

处方:冬桑叶 9 克,水炙 大贝母 9 克,去心 鲜枇杷叶 6 克,拭毛
白蒺藜 9 克 陈皮丝 6 克 丝瓜络 6 克 冬瓜子 9 克,杵 炒黄芩 6 克
川通草 3 克 炒竹茹 6 克 苏薄荷 3 克

方解:以桑叶、薄荷疏风去鼻塞。黄芩清上焦热。冬瓜子、贝母、枇杷叶、竹茹清肺化痰以止咳嗽,疏肝泻肺散肝风而治头胀。丝瓜络除风化痰兼通经络而去乏力。以通草利水。陈皮和胃化痰,俾得风热解肺胃和。先服二剂,后再复诊。

二诊:

症候:头胀鼻塞,咳嗽已减,纳少。脉细弦。舌质红,苔薄黄。

治法:再与两和肺胃,清热疏风。

外方:冬桑叶 6 克,水炙 大贝母 6 克,去心 鲜枇杷 6 克,拭毛
白蒺藜 6 克,去刺炒 炒赤芍 6 克 丝瓜络 6 克 冬瓜子 9 克,杵
炒栀子 6 克 草决明 9 克 鲜茅芦根各 3 克 焦稻芽 9 克

方解:药后症候均减,即于前方内去薄荷、竹茹、黄芩、通草、陈皮加入鲜芦茅根清肺胃之热。栀子清三焦热。草决明平肝而止头胀。赤芍泻肝散瘀。焦稻芽开胃。再服二剂病即痊愈。

王某某,男,40岁。

辨证:咳嗽。

病因:风热郁于肺胃。

症候:咳嗽痰少,头微晕,流涕已三星期。脉细数。舌质红,苔黄。

治法:清热疏风。

处方:冬桑叶9克,水炙 大贝母6克,去心 生枇杷叶6克,拭毛
冬瓜子9克 炒赤芍6克 黛蛤散9克,包煎 炒竹茹6克
炒栀子6克 陈皮丝6克 杭甘菊6克 苏薄荷3克,后下

方解:桑叶、薄荷、杭甘菊疏风兼清头目。

冬瓜子、枇杷叶清肺止咳。大贝母、黛蛤散清痰热而散结凉肝。陈皮和胃化痰。竹茹清痰热而通络。栀子清三焦之热。赤芍泻肝散郁。连服二剂即稍愈,后再复诊。

于某某,男,54岁。

辨证:咳嗽。

病因:内热上蒸,风邪外束。

症候:咳嗽,存水不下,微热,喉痛。脉细弦而数。舌质红,苔薄黄。

治法:疏风清热。

处方:冬桑叶6克,水炙 大贝母6克,去心 生枇杷叶6克,拭毛包
白蒺藜9克,去刺炒 炒赤芍6克 川通草3克 冬瓜子6克,杵
栀子皮6克 金灯笼6克 粉丹皮6克 苏薄荷3克,后下

方解:以桑叶、白蒺藜、薄荷疏风。金灯笼苦寒治其喉痛。丹皮、栀子清热。枇杷叶、冬瓜子止咳。大贝母清痰热而散结。赤芍泻肝散郁。川通草利水兼入肺胃二经。连服三剂,风热解喉痛止,病即痊愈。

叶某某,女,29岁。

辨证:咳嗽。

病因：风火上炎，兼有痰滞。

症候：身热、咳嗽、作吐、痰声频作，喉痛，头痛、肢痛。脉细数。舌质红，苔黄。

治法：清解风火，兼以化痰。

处方：连翘9克 大贝母9克，去心 生枇杷叶6克，拭毛包
净银花9克 炒赤芍6克 杭甘菊6克 金灯笼6克 梔子皮6克
粉丹皮6克 苏薄荷3克，后下 黛蛤散9克，包煎

方解：银花、连翘轻宣散风火清热解毒。金灯笼止其喉痛。薄荷、杭甘菊清上焦、疏风止头痛。梔子、丹皮清内热。大贝母化热痰而散结。赤芍凉血散瘀。黛蛤散清肝化痰。枇杷叶止咳。

李某某，女，61岁。

辨证：咳嗽。

病因：痰湿互滞。

症候：咳嗽，气短，心悸，失眠，脘堵腹胀纳呆，白带颇多，皮肤起湿疹，手肿。脉细数。舌质红，苔黄腻。

治法：疏化痰湿，兼清内热。

处方：前胡6克，水炒 水腹皮9克 生枇杷叶6克，拭毛包
白前6克，水炒 炒枣仁9克 海浮石9克，杵 冬瓜子皮各9克
青陈皮各6克 山楂炭9克 焦稻芽24克 茯苓皮9克
苏子6克，炙，杵包 猪赤苓各6克

方解：前胡，白前泻肺清热止咳。苏子、海浮石一升一降取其调气。茯苓皮、冬瓜子、猪赤苓渗湿治其白带兼化皮肤湿疹手肿等症。青陈皮开胃而消脘堵。枣仁止心悸能安眠。焦稻芽、山楂炭健胃。大腹皮消腹胀。

王某某，男，42岁。

辨证：咳嗽。

病因：湿痰互滞。

症候：咳嗽痰多，音嘶胁痛，关节不利。脉细弦滑。舌质红，苔

薄黄。

治法：疏化湿痰，兼以舒筋活络。

处 方：冬瓜子 9 克，杵 大贝母 9 克 宣木瓜 9 克，酒洗
胖大海 2 个 炒赤芍 6 克 嫩桑枝 30 克 云茯苓 6 克
丝瓜络 6 克，炙 猪赤苓各 6 克 焦苡米 9 克 生枇杷叶 6 克，拔毛包

方解：冬瓜子、焦苡米、猪赤苓渗湿。加枇杷叶止咳。胖大海治音嘶。木瓜、桑枝、丝瓜络舒筋活络以利关节。大贝母清痰热。赤芍泻肝散郁。

二诊：

症候：药后湿痰化，又感风邪，咳嗽痰多不易咯出，胁紧腕痛。脉细弦，舌红苔薄黄。

治法：再以疏化湿痰通经络为主，佐以疏风之品。

处 方：冬瓜子 9 克，杵 陈皮丝 6 克 嫩桑枝 30 克，酒炒
炒竹茹 6 克 丝瓜络 6 克，炙 苏薄荷 3 克后下 制半夏 6 克
甜杏仁 6 克，去尖皮 猪赤苓各 6 克 白蒺藜 6 克，去刺炒 焦苡仁 12 克
冬桑叶 9 克，水炙 生枇杷叶 6 克，拔毛包

方解：如竹茹、杏仁降肺气。桑叶、薄荷疏风。白蒺藜祛风止痛。陈皮、半夏化湿痰而和胃。

三诊：

症候：再诊后湿痰已化，内热外达，咳嗽见轻，喉痛脸部起疖，余恙均退。脉细，舌红微黄。

治法：止咳化痰，清热解毒。

处 方：冬瓜子 11 克 大贝母 9 克 川通草 3 克 炒竹茹 6 克
炒赤芍 9 克 黛蛤散 9 克，包煎 紫花地丁 6 克 蒲公英 9 克
鲜枇杷叶 6 克 金灯笼 6 克 梔子皮 6 克

方解：将原方内加紫花地丁、金灯笼、蒲公英清热解毒散结。赤芍泻肝散瘀。大贝母清热痰而散结。梔子清三焦之热。黛蛤散化痰热。川通草利水入肺胃二经。又服三剂病已霍然而愈。

庄某某,女,49。

辨证:咳嗽。

病因:积食受风

症候:咳嗽痰声频作,鼻塞。脉细数。舌质红,苔黄腻而垢。

治法:疏风化食。

处 方:冬桑叶6克 大贝母6克 生枇杷叶6克,拭毛包
冬瓜子6克,杵 山楂炭9克 朱通草6克 甜杏仁6克,去皮尖
陈皮丝6克 竹沥半夏6克 苏薄荷6克,后下 黛蛤散9克,包煎

方解:以桑叶、薄荷疏解风邪。冬瓜子、甜杏仁、枇杷叶止咳嗽而化痰。贝母、黛蛤散化痰散结清肝。陈皮、竹沥半夏和胃化痰。山楂炭消食。通草入肺胃二经兼清湿热。连服三剂病已告愈。

曾某某,男,32岁

辨证:咳嗽。

病因:积食受风,兼有郁火。

症候:咳嗽、音哑、唇干喉干,似有痰堵。

脉细濡。舌质红,苔浮黄。

治法:化食疏风。

处 方:冬桑叶9克 大贝母9克 生枇杷叶6克 粉丹皮6克
冬瓜子9克 炒赤芍6克 天花粉9克 苏薄荷6克,后下
炒竹茹6克 山楂炭9克 黛蛤散9克,包 胖大海6克
净蝉衣3克,去翅足炙

方解:以薄荷、桑叶疏解风邪。山楂炭化食。大贝母、竹茹化痰清热散结。天花粉化痰热而止喉干。蝉衣、胖大海治其音哑。冬瓜子、枇杷叶清肺止咳。黛蛤散化痰清肝热散郁火。丹皮、赤芍泻火化瘀凉血。

丁某某,男,50岁。

辨证:暑风(咳嗽)。

病因:湿痰蕴结。暑风外束。

症候：咳嗽痰粘，胸闷纳呆。脉细。舌质红，苔薄白。

治法：清暑利湿，化痰止咳。

处 方：冬瓜子 11 克，拌 大贝母 6 克，去心 土泽泻 6 克
炒竹茹 6 克 陈皮丝 6 克 猪赤苓各 6 克 焦苡米 9 克
杭白芍 9 克，炒 生枇杷叶 6 克，拭毛包 制半夏 6 克
益元散 9 克，鲜荷叶包刺孔

方解：以冬瓜子、枇杷叶止咳。陈皮、半夏化湿痰而和胃兼理嗽。炒竹茹、大贝母清热痰。泽泻、猪苓、赤苓、焦苡米健脾。杭白芍补脾阴而平肝。益元散，鲜荷叶清暑渗湿升阳。

曹某某，男，30 岁。

辨证：暑风（咳嗽）。

病因：平素血热，暑风袭肺。

症候：咳嗽、脸红，素体血热。脉细弦。舌质红，苔浮黄。

治法：祛暑风，清血热。

处方：冬桑叶 9 克 大贝母 9 克 生枇杷叶 6 克，拭毛包
冬瓜子 6 克，拌 炒赤芍 6 克 黛蛤散 9 克，包煎 杭甘菊 6 克
炒梔子 9 克 天浆壳 6 克 炒竹茹 6 克 鲜佩兰 6 克，后下
粉丹皮 6 克 六一散 9 克，包

方解：以鲜佩兰祛暑风，加桑叶、杭甘菊以清风散热。赤芍、丹皮清血热。大贝母、竹茹、黛蛤散、天浆壳化痰清热。冬瓜子、枇杷叶止咳。炒梔子清三焦之热。六一散清暑热并能利水。

刘高氏，女，40 岁。

辨证：暑风（咳嗽）

病因：暑风袭肺。

症候：咳嗽、发热、痰多，月水已见五天。右腰骶、腿酸痛。脉细数。舌质红，苔微黄。

治法：疏风清暑，利湿化痰。

处方：鲜佩兰 9 克 大贝母 6 克，去心 丝瓜络 6 克，炙

白蒺藜 9 克,去刺炒 炒赤芍 6 克 益元散 9 克,鲜荷叶包刺孔
杭甘菊 6 克 陈皮 6 克 生枇杷叶 6 克,拔毛包 冬瓜子 6 克,拌
鲜藿香 6 克,后下

方解:以鲜佩兰、鲜藿香芳香和胃化浊。白蒺藜、杭甘菊疏肝
风,清风热。赤芍泻瘀散瘀。陈皮化痰和胃。冬瓜子、枇杷叶止咳
嗽。大贝母清痰热。丝瓜络通络止腰腿痛。益元散、鲜荷叶清暑
利湿。

《陆观虎医案》

赵海仙

有声无痰为咳。火灼金伤,卧则气急,牙龈浮肿,食入作呕,已
延数月。夜来盗汗。肺胃中伤,肾水亦亏。理当金水六君,因秋燥
伤肺,未便腻补,谨防喉痛音哑。

老苏梗一钱五分,蜜炙 白桔梗一钱五分 粉甘草五分 太子参二钱
炙冬花一钱五分 川百合一钱五分 苦杏仁三钱 云茯苓三钱
糯稻根须四钱

复诊:

加南沙参三钱

复诊:咳呕盗汗已止,尾间疼痛。肾亏,督脉亦虚。

加胡桃肉三钱

火干肝络,咳嗽痰红。心中火燥,暴怒伤阴。肝火,心火皆旺,
气不调达所致。当静心戒怒,庶与药饵兼功。

桔梗一钱二分 女贞子三钱 牛蒡子二钱 杏仁三钱
旱莲草三钱 茅根 马兜铃一钱 麦冬三钱 童便一杯

清金养肝,痰红已止,咳嗽已平,心中不燥。既已获效,步原方
加川贝母。红止咳安,心亦不燥,宜养水滋肝,清心保金,以丸代煎。
回府徐徐调养可也。

大生地三两 炒牛子三两,糯米五钱同用 马兜铃八钱,蜜炙

苦桔梗一两 淮山药三两 粉甘草五钱 连心麦冬一两五钱
藕粉炒阿胶二两 女贞子三两 苦杏仁三两 旱莲草三两
川贝母二两 云茯苓四两五钱

上药共为细末，以蜜为丸。每日服二钱，开水送下。

《寿石轩医案》

叶熙春

殷，女，三十二岁，杭州。阴虚之体，感受风邪，初起失治，风从热化，热壅肺胃，发热干咳无痰，喉痛声哑，口干咽燥，喜饮，脉象弦滑，舌淡苔黄。拟用甘凉润剂。

生石膏 15 克，杵，先煎 知母 9 克 桔梗 5 克 生甘草 5 克
连翘 9 克 山豆根 9 克 牛蒡子 6 克，杵 金锁匙 9 克 乌元参 9 克
石菖蒲 5 克 老蝉 3 克，去头足

二诊：前方服后，热退，喉痛已止，声音渐扬，口干咽燥减轻。宗原法，续服三剂，声音清朗，诸症俱瘥。

宣，男，三十九岁。四月。杭州。风寒外袭，内有郁热，恶寒身热，咳嗽气急痰黄，胸胁震痛，口渴喜饮，脉紧数，舌苔黄糙。麻杏石甘汤加味。

生麻黄 1 克 白杏仁 9 克，杵 生石膏 15 克，杵，先煎 甘草 3 克
竹沥半夏 8 克 炙前胡 6 克 冬瓜子皮各 9 克 竹茹 6 克 茯苓 9 克
炙橘红 4 克 白茅根 12 克

二诊：外寒束表，得汗身热渐解，里热内遏，咳嗽痰黄依然，胸痛气急如故，舌苔黄糙已转薄润。仍用前方加减。

麻黄 2.1 克 生石膏 18 克，杵，先煎 甘草 3 克 炙前胡 6 克
浙贝母 9 克 白杏仁 9 克，杵 炙橘红 1 克 竹茹 12 克
炙枇杷叶 12 克 白茅根 4 克 冬瓜子皮各 9 克 竹沥半夏 8 克

三诊：表邪已解，寒热尽退，肺气犹未清肃，咳嗽欠爽。症势虽平，务慎饮食。

赤白苓各9克 浙贝母9克 仙露夏5克 生蛤壳18克,杵
蜜炙前胡5克 白杏仁9克,杵 白茅根12克 冬瓜子皮各9克
炙枇杷叶12克 炙橘红1克 金沸草8克,包

寿,男。五十五岁。四月。酒后触风引起湿痰,而致身热头疼咳嗽,痰稠胸闷,食减肢酸,舌苔白腻,脉弦。拟辛温解表法。

桂枝尖2.4克 杏仁9克 炙前胡8克 炒香豉5克 荆芥5克
藿香6克 橘红6克 刺蒺藜8克 杜苏叶5克 宋半夏8克
象贝9克

二诊:形寒身热已解,头疼咳嗽亦差,胸闷得宽,目尚昏眩,舌白脉缓,再以宣肺化痰。

杏仁9克 宋半夏8克 象贝9克 炒苏子8克 白前6克
旋复花8克,包煎 炙冬花9克 制南星4克 省头草6克 天麻5克
决明子9克

金,男,四十岁。三月。杭州。风热外袭,肺卫失肃,身热咳嗽,痰滞不爽,便秘溲赤,舌绛苔黄,脉象浮数。拟清热涤痰。

桑叶9克 白杏仁9克,杵 炒牛蒡子6克 青连翘9克
甘菊花6克 炙前胡6克 枇杷叶12克,拭包 天花粉9克
浙贝母9克 全瓜蒌12克,杵 竹茹12克

二诊:痰为热留,热因痰困,痰热交煎,日耗气液,前以清热涤痰,热势已退,咳嗽如故,肺失清肃之令,痰浊尚恋,舌绛起有芒刺,津液未复故也。治拟肃肺涤痰,兼清余热。

鲜石斛9克,劈,先煎 橘红橘络各5克 茯神15克 川贝母9克
竹茹9克 黛蛤散12克,包 天花粉9克 黑山栀6克
粉丹皮5克 白杏仁9克,杵 白薇9克

三诊:热退,咳嗽减少,大便秘结,食入胀闷,头晕乏力,乃邪去正虚之征也。

扁石斛9克,劈,先煎 米炒麦冬9克 细生地12克
抱木茯神12克 生白芍5克 制木瓜2.4克 山楂肉9克

范志曲6克,包 生谷芽9克 火麻仁12克,杵 蜜炙枳壳5克

赵,女,三十三岁。八月。余杭。脾湿生痰,痰阻于肺,清肃不行,咳痰稠白,湿滞于中,胸脘窒闷,饮食亦减,脉滑苔白。治且理脾化湿,肃肺涤痰。

白杏仁9克,杵 泡射干4克 炒甜葶苈子6克,杵,包
炒香枇杷叶12克,包 化橘红5克 姜汁炒竹茹9克 宋半夏8克
茯苓12克 盐水炒前胡6克 金沸草9克,包 炒苏子9克,包

二诊:进前方后,稠白之痰,日渐减少,咳嗽亦止,湿注于下,腰酸带多,舌苔白腻,脉濡而滑。再拟肺脾同治。

赤白二苓各9克 制茅白术各5克 宋半夏6克 炙橘红5克
金沸草9克,包 炒白薇6克 炙白前6克 煅赭石18克
炒杜仲15克 漳痰紫9克 炙白鸡冠花12克

杨,男,二十九岁。五月。杭州。阴虚火升,火刑金烁,咳而咽燥,两胁震痛,午后有虚潮之热,脉象弦数,舌红而干,延有失血之虞。

清炙桑白皮6克 地骨皮9克 黛蛤散12克,包 煅赭石12克
天花粉6克 川郁金5克 橘红络各5克 粉丹皮5克
蜜炙白薇9克 川贝9克 冬瓜仁12克

二诊:潮热已减,咳嗽胸痛见差,脉不数,失血之累或可幸免矣。

白杏仁9克,杵 地骨皮9克 蜜炙枇杷叶12克 炙白薇9克
清炙桑白皮6克 代赭石15克 蛤壳12克,杵 川贝6克
炒橘红5克 川郁金5克 泡射干2.4克 炙紫菀6克

三诊:火不烁金,金润始复,热退咳减,胁痛已止,脉弦,舌红。再拟清润养肺。

南沙参9克 麦冬9克 甜杏仁9克,杵 代赭石12克
蛤壳15克,杵 炙紫菀6克 川郁金5克 炒橘红5克 冬瓜仁12克
蜜炙冬花9克 川贝6克 杜仲12克

洪，男，二十九岁。三月。杭州。相火内炽，肾水不济，上则咽喉作痛，咳嗽痰中夹血，下则梦遗失精，腰髂酸楚，脉来左寸右尺数劲。证属金水两亏，久延防成虚损。

根生地 15 克 元参 9 克 生首乌 15 克 甘草 3 克 原麦冬 9 克
粉丹皮 6 克 潼蒺藜 9 克 盐水炒川柏 1 克 马勃 5 克 芡实 9 克
生牡蛎 18 克，拌 茯神 12 克

二诊：咳轻血止，咽喉之痛已差，近日亦未梦遗，仍守原法增损。

大生地 15 克 制女贞 9 克 潼蒺藜 9 克 麦冬 9 克 陈萸肉 6 克
茯神 12 克 生牡蛎 18 克，拌 芡实 12 克 粉丹皮 6 克 淮山药 9 克
元参 9 克

王，男，六十九岁。十月。绍兴。高年气虚，肺肾两亏，肃纳无权，久咳不已，腰背引痛，动生气逆，痰多稀白，脉沉细，苔薄白。治拟温肾健脾，肃肺化痰。

炒菟丝子 9 克，包 炒杜仲 18 克 盐水炒桑椹子 9 克
盐水炒甘杞 9 克 米炒上潞参 9 克 茯苓 12 克 宋半夏 8 克
天冬 9 克 炙冬花 9 克 炮姜 3 克 拌捣五味子 2.4 克
参贝制陈皮 5 克

二诊：咳逆俱差，痰亦减少，但体虚一时难复，仍宗前法加减再进。

米炒潞党参 12 克 炒冬术 6 克 云茯 12 克 盐水炒甘杞子 9 克
炮姜 3 克 拌捣五味子 2.4 克 炙款冬花 9 克 炒橘红 5 克
宋半夏 9 克 盐水炒杜仲 15 克 盐水炒菟丝子 9 克 潼蒺藜 9 克

《叶熙春专辑》

施今墨

张某某，男，53 岁。1950 年以来，体力逐渐不支，消瘦无力，易于疲倦，常患感冒，咽痛，偶有咳嗽，重则感觉胸痛，下午烦躁，胃纳

日减,1959年底即无力工作,乃于1960年来京就医于阜外医院,诊断为右上结核瘤、右侧结核性胸膜炎、喉炎(早期结核所致)给链霉素、异菸肼及去氢考的松治疗。三个月后复查,胸水基本吸收,其它无改变,以体力关系未考虑手术,仍断续注射链霉素口服异菸肼,旋即回内蒙古自治区海拉尔市人民医院就诊,随后转回工作地扎兰屯结核病院治疗,先后休息一年多,透视照像复查五次,诊断为右上结核瘤、右下胸膜变化兼两下肺气肿,服异菸肼迄未间断,患者于1961年9月来京就诊,现症消瘦,面色无华,形神萎顿,咳嗽气短,食欲不振,夜间偶有盗汗现象,二便如常。舌苔微黄,脉象沉细。

辨证立法:脉症参合,虚象具备,然而虚不宜峻补,以其病灶尚在,补身亦补病,必无功效,故驱邪重于扶正,先拟汤剂,以观究竟。

处方:西洋参6克,另炖浓汁兑服 冬瓜子15克,打 北沙参10克
甜瓜子15克 旋复花5克,海浮石10克同布包 干薤白6克
苦桔梗5克 赤白芍各6克,柴胡5克同炒 青橘叶10克 炙百部6克
云苓块10克 紫丹参12克 苡仁米15克 清半夏6克
焦远志5克 鸡内金10克 炙甘草5克 三七粉3克 分二次随药送服。

二诊:汤药共服五剂,症状无大改变,病属慢性,图治勿急,拟用丸药,并继续服用异菸肼,双管齐下。

处方:田三七30克 炙百部30克 左牡蛎30克 白芨面60克
杭白芍30克 青橘叶30克 北柴胡15克 苦桔梗15克
南红花30克 干薤白30克 炒香附30克 云苓块30克
炙黄芪60克 制乳香30克 紫河车30克 紫丹参30克
制没药30克 北沙参30克 炒白术30克 炙甘草30克

共研细面,蜜丸重6克,早晚各服1丸,白开水送服。

三诊:服完丸药后已三月余,自觉症状有好转,食欲转佳,体力较强,不似以前萎顿不堪,胸痛及下午烦躁均见减轻,脉由沉细转

为升起且甚悠扬,再拟丸方继进。

处方:西洋参 30 克 磁朱丸 30 克 瓦楞子 30 克 野党参 30 克
云茯苓 30 克 海浮石 30 克 三七面 30 克 炒白术 30 克
炙紫苑 30 克 白芨面 60 克 清半夏 30 克 炙白部 30 克
炒远志 30 克 化橘红 30 克 左牡蛎 30 克 柏子仁 60 克
炒枳壳 30 克 杭白芍 30 克 苦桔梗 30 克 干薤白 30 克
紫河车 30 克 炙甘草 30 克

共为细面,蜜丸,每丸重 10 克,每日早晚各服一丸,白开水送下。

韩某某,男,29 岁。三日前感冒并发高热,自购西药服后,下午体温仍在 38℃ 左右。咳嗽痰不易出,胸肋震痛,口渴思饮,小便黄,食欲不振,夜寐不安。舌苔微黄,脉浮数。

辨证立法:风邪乘肺,内热被束,遂发高热,肺失清肃而为咳。治宜疏表清热宣肺,以五解五清之法治之。

处方:鲜芩根 18 克 炙白前 5 克 炒香豉 10 克 鲜茅根 18 克
炙前胡 5 克 炒山栀 5 克 桑白皮 5 克 白杏仁 6 克 炒芥穗 5 克
冬桑叶 6 克 苦桔梗 5 克 酒条芩 10 克 冬瓜子打,18 克
炒枳壳 5 克 炙甘草 3 克 炙化红 5 克

邓某某,女,41 岁。感冒两日,鼻塞声重,流涕,咽痛咳嗽,痰吐不爽,发热不高,身痛不适。舌苔正常,脉浮数。

辨证立法:风热外受,自表及肺,上呼吸道感染之症状均现,即用辛凉解表清肺法治之。

处方:炙前胡 5 克 白芩根 15 克 金银花 6 克 炙白前 5 克
白茅根 15 克 金银藤 6 克 炙苏子 5 克 苦桔梗 5 克 牛蒡子 6 克
轻马勃 5 克,黛蛤散 6 克同布包 炒杏仁 6 克 冬桑叶 18 克 薄荷梗 5 克
青连翘 10 克 嫩桑枝 18 克 凤凰衣 10 克 粉甘草 3 克

张某某,男,45 岁。十数年来咳嗽痰多早晚较重,每届秋冬为甚。近时眠食欠佳,大便不实。屡经治疗,效果不大,经西医检查、

透视化验均未发现结核病变,诊断为慢性支气管炎,今就出差之便,来京就诊。舌苔薄白,脉缓弱。

辨证立法:脾为生痰之源,肺为储痰之器,脾肺两虚,不能摄养,故咳嗽多痰,大便不实,多年不愈。治宜补肺健脾为主。

处方:炙百部 6克 炙紫苑 6克 云茯苓 10克 炙白前 5克
炙化红 6克 云茯神 10克 野党参 10克 小於术 10克 川贝母 6克
北沙参 6克 枇杷叶 6克 炒杏仁 6克 炙甘草 3克 半夏曲 10克
炒远志 10克 南沙参 6克

二诊:服药六剂,咳嗽大减,食眠亦均转佳,二便正常,前方加玉竹 10克,冬虫草 10克。

三诊:服五剂后,咳嗽基本停止,返里在即。嘱将前方剂量加五倍研细面,炼蜜为丸,每丸重 10克,每日早晚各服 1丸,白开水送服。并嘱其加强锻炼,防止外感。

白某某,女,35岁。昨日天气酷寒,晨起外出,旋即发冷发热,继而咽痒欲咳,晚间则咳重,但无痰,头痛如裂。全身骨节酸楚。舌苔薄白,脉浮紧。

辨证方法:脉浮为风,紧则为寒,时届冬日,原蓄内热,风寒暴感,腠理紧闭,阳气不越,寒热互争。肺为娇脏,最畏寒冷,遂致咳嗽不停。《诸病源候论》云:“肺主气,合于皮毛,邪之初伤先客皮毛,故肺先受之”。急拟辛温解表并清里热用七解三清法治之。

处方:炙前胡 5克 炙麻绒 1.5克 炙白前 5克 酒黄芩 10克
杭白芍 10克 川桂枝 3克同炒 广陈皮 5克 桑白皮 5克 海浮石 10克
蔓荆子炒,6克 冬桑叶 6克 旋复花布包,5克 瓜蒌根 6克
苦桔梗 5克 炙甘草 3克 瓜蒌皮 6克 炒杏仁 6克

按:患者服药三剂诸证全解。冬日酷寒若有内热,常致暴感,病势甚急,治宜既解风寒又须兼清内热。本案以麻黄汤解风寒,用黄芩清里热,七解三清为法。

杨某某,女,36岁。夙有慢性气管炎症,日前外出感寒,干咳不

止，畏冷喉干。舌苔薄白，六脉紧数。

辨证立法：素患咳嗽，肺气已伤，肺主皮毛，腠理不固，易受外感，风寒袭肺，遂致干咳不止。治宜疏散风寒，宣肺止咳。

处方：炙麻黄 1.5 克 炒杏仁 6 克 软射干 5 克 炙白前 5 克
炙桑皮 5 克 炙前胡 5 克 炙陈皮 5 克
五味子 2.4 克，北细辛 0.6 克同打 炙紫苑 5 克 川桂枝 3 克
酒黄芩 3 克 炙苏子 5 克 杭白芍 10 克 云茯苓 10 克 苦桔梗 5 克
炙甘草 3 克

《施今墨临床经验集》

哮喘

江少微

小儿盐哮，声如曳锯。以江西淡豆豉一两，白矾一钱，研细，拌入精猪肉四两，以泥固济，炭火煨出青烟为度，研细，和淡豉捣匀，为丸如黍米大，每服二三十丸，滚白水送下（此方甚佳，即紫金丹），忌大荤盐酱，一月而愈。

一贵公子患盐哮，年方九龄，每以风寒即发。投以噤丸药饼，夜卧醒放舌上，任其自化下，随效。方用苦葶苈五钱（隔纸炒），茯苓五钱，花粉、麻黄、杏仁、款花蕊、桑白皮（蜜炙）、贝母（去心）各三钱，五味子二钱，罂粟壳（蜜炙）一钱五分，右为细末，乌梅肉三钱，枣肉三钱，煮烂如泥，捣和前末为饼，每重一分半，服未半料，永不复发，须忌大荤一两月。

一小儿盐哮喘嗽，用海螵蛸刮屑研细末，以白糖蘸吃愈。

一富儿厚味发哮喘，以萝卜子淘净蒸熟洒干为末，姜汁蒸饼为丸（即清金丹），每服三十丸，津咽下。

《名医类案》

罗谦甫

· 贵妇，年逾五十，身体肥盛，当八月中，霖雨时行（外伤湿），因过饮酒及潼乳（内伤湿），腹胀喘满，声闻舍外（其症重极），不得安卧，大小便涩滞（气壅于上），气口脉大两倍于人迎，关脉沉缓而有力（湿甚）。罗思霖雨之湿，饮食之热，湿热太盛，上攻于肺，神气躁乱，故为喘满。邪气盛则实，实者宜下之，为制平气散，加白牵牛二两，半生半熟，青皮三钱，槟榔三钱，陈皮五钱，大黄七钱（利大便而小便亦通），《内经》曰：肺苦气上逆，急食苦以泄之，故以白牵牛苦寒泻气分，湿热上攻喘满，故以为君；陈皮苦温，体轻浮，理肺气，青皮苦辛平，散肺中滞气，为臣；槟榔辛温，性沉重，下痰降气，大黄苦寒，荡涤满实，故以为使（使亦有重于臣耶？再商之）。为细末，每服三钱，煎生姜汤调下，无时，一服减半，再服喘愈。仍有胸膈不利，烦热口干，时时咳嗽，再与加减泻白散，以桑白皮一两，地骨皮、知母、陈皮、青皮、桔梗各五钱，黄芩、炙甘草各三钱，剉如麻豆大，每服五钱，水煎服，数剂良愈。华佗有云：盛则为喘，减则为枯。《活人书》云：发喘者，气有余也。盛而为喘者，非肺气盛也；喘为气有余者，亦非肺气有余也。气盛当认作气虚，有余当认作不足。肺气果盛，又为有余，当清肃下行而不喘，以其火入于肺，衰与不足而为喘焉。故言盛者，非肺气盛也，言肺中之火盛也；言有余者，非言肺气有余地，言肺中之火有余也。故泻肺以苦寒之剂，非泻肺也，泻肺中之火，实补肺也。用者不可不知。

一人六旬余，素有喘症，或唾血痰，平居时则不喘，稍行动则气喘促（今人此症颇多）。急以黄柏知母滋肾丸，空心服七、八十丸，其症大减。此坎离丸能泄冲脉之火者，故如此效也。

洪辑居溧阳西寺，事观音甚谨。幼子佛护三岁，病痰喘，医不能治，凡五昼夜不乳食（五昼夜不乳，虚可知），症危。辑忧惶，祷于观音。至中夜，妻梦一如人自后门入，告曰：何不服人参胡桃汤？觉而语辑，

辑洒然悟曰：是儿必活，此盖大士垂救尔。急取新罗人参寸许，胡桃一枚，不暇剥治，煎成汤，灌儿一蜺壳许，喘即定，再进，遂得醒。明日以汤，剥去胡桃皮，取净肉入药与服，喘复作。乃只如昨夕法治之，信宿而瘳。此药不载方书，盖人参定喘而带皮胡桃则敛肺也。

《名医类案》

丹溪

一人，贫劳秋深浑身热，手足疼如燬，昼轻夜重，服风药愈痛，气药不效，脉涩而数，（涩为少血为痹，数则为热）右甚于左，饮食如常，形瘦，盖大痛而瘦非病也。用苍术、酒黄柏各一钱半，生附一片，生甘草三分，麻黄五分，研桃仁九个煎，入姜汁令辣，热服（一起仍用温散，湿热非温散不行故耳）。四贴去附子，加牛膝一钱，八贴后，气喘痛略减。意其血虚，因多服麻黄，阳虚被发动而上奔，当补血镇坠，以酸收之。以四物倍川芎、芍药，加人参二钱，五味十二粒，与二贴，喘定，三日后脉减大半，涩如旧，仍痛，以四物加牛膝、参术、桃仁、陈皮、甘草、槟榔、生姜，五十贴而安。后因负重，腹痛食少，前药加黄芪三分，二贴而愈。

一人五七月间喘不得卧，主于肺，麻黄、石膏各二钱，柴胡、桑白皮各一钱，甘草五分，黄芩一钱半，服之一汗而愈。后以五味、甘草、桑白皮、人参、黄芩遂安。

一人痰多喘嗽，用白术、半夏、香附、苍术各一两，黄芩、杏仁各半两，姜汁糊丸服。

一妇人六十八岁，恶寒发热，自四月来（久病），得痰嗽，眠卧不得，食少，心膈痛，口干，其嗽五更烦甚。以白术三钱，芍药二钱半，炒枳壳、麻黄各二钱，片苓一钱半，桔梗、苏梗叶各一钱，木通五分，炙甘草些少，五味二十粒，入竹沥。

一人日病喘不得卧，肺脉沉而涩，此外有风凉湿气，遏内热不得舒。以黄芩、陈皮、木通各钱半，麻黄、苏叶、桂枝各一钱，黄连、干

生姜各五分(姜连并用 妙),甘草些少。

一人体虚感寒,发喘难卧,以苍术、白术、麻黄、防风、炒片苓各五分,半夏、枳壳各一钱,桂枝、木通、炙甘草各三分,姜二片,同煎,研杏仁五枚。此方半夏为君,兼解表,三方,前一为热多而设,后一方为寒多而设也。

浦江吴辉妻,孕时足肿,七月初旬,产后二日,洗浴即气喘,但坐不得卧者五个月(产后元虚气喘,岂能至五月耶)。恶寒得暖稍宽,两关脉动,尺寸皆虚无,百药不效。朱以牡丹皮、桃仁、桂枝、茯苓、干姜、枳实、厚朴、桑皮、紫苏、五味、瓜蒌实煎汤服之。一服即宽,二三服得卧,其病如失。盖作污血感寒治之也。

《名医类案》

滑伯仁

一人肺气焦满,病得之多欲善饮,且殫营虑,中积痰涎,外受风邪,发则喘喝痰咳不自安。为制清肺泄满降火润燥苦辛之剂,遂安。

《名医类案》

沈宗常

庐陵人胀而喘,三日食不下咽矣。视脉无他,问何食饮,对以近食羊脂。沈曰:得之矣。脂冷则凝,温熨之所及也。温之,得利而愈。

天台李翰林,有莫生患喘疾求医。李曰:莫生病日久,我当治之。乃取青橘皮一片,展开,入江子(江子即巴豆也)一个,以麻线系定,火上烧烟尽,存性,为末,生姜汁酒一钟呷服之,到口便定。实神方也。

《名医类案》

程明祐

张内患中满气喘,众医投分心气饮舟车丸,喘益甚。一医曰:过

在气虚。以参、芪补之，喘急濒死。程诊之，曰：病得痰滞经络藏腑，否寒生膨胀。投滚痰丸，初服腹雷鸣，再服下如鸡卵者五、六枚，三服喘定气平。继以参苓平胃散，出入三十日复故。所以知丙得之痰滞经络者，切其脉沉而滑，痰候也。

《名医类案》

虞恒德

一羽士，年五十余，素有喘病，九月间得发热恶寒证，喘甚，脉洪盛而似实（此洪盛脉，恐为凉药所激而然）。一医作伤寒治，而用小柴胡汤加枳壳、陈皮等药，六日后欲行人承气。一医曰：此伤食也，宜用枳实导滞丸。争论不决，虞视之。二医皆曰：脉实气盛，当泻。虞曰：此火盛之脉，非真实也。观其短气不足以息，当作虚治。（《金匱》云：病人无寒热而短气不足以息者，实也。此以虚治，当以意逆不可徒执古人之法也，何以故？正亦因有寒热也）而用补中益气汤加麦冬、五味，入附子三分，煎服。二贴脉收敛，四贴而病减轻，六贴全安。

《名医类案》

汪古朴

一妇，形肥而长，面色紫淡，产后病喘不能卧，消谷善饥，汗出如洗（姜全善云：产后喘极危，多死也。而况汗出如洗乎！其得生处，全在消谷善饥）汪诊视，曰：此阴虚阳亢，当合东垣、丹溪两法治之。遂以升阳滋阴之剂，旬余而愈。

《名医类案》

汪石山

一人，体肥色白，年近六十，痰喘声如曳锯，夜不能卧。汪诊之，脉洪浮六、七至，中或有一结。曰：喘病，脉洪可治也。脉结者，痰碍经隧耳，宜用生脉汤加竹沥服之。至十余贴，稍定。患者嫌迟，更医，

服三拗汤，犹以为迟，益以五拗汤，危矣。于是复以前方，服至三、四十贴，病果如失。

一个年逾六十，病气喘。汪诊之，脉皆紫紫如蛛丝。曰：病不出是夜矣。果如期而逝。

一中年男子久喘，每发时，不食数日，声撼四邻，百治不效。脉寸沉伏，关滑。遂于未发时，用人参、白术、当归、地黄、姜汁制之，瓜蒌实、陈皮、茯苓、黄芩、黄连、干姜些少，煎汤下青礞石丸。将发时，先用神效沉香丸下之，次于前药中加杏仁、枳实、苏叶，倍瓜蒌实，煎服一月后，症减十分之八，后遂守此方渐安。后凡治数人，以此法加减之，皆效。

一妇人年五十余，素有嗽病，忽一日大喘，痰出如泉，身汗如油，脉浮而洪，全似命绝之状。令速用麦冬四钱，人参二钱，五味钱半，煎服。一贴喘定汗止，三贴后痰亦渐少。再于前方，加瓜蒌实钱半，白术、当归、芍药、黄芩各一钱半，服二十余贴而安，此生脉散之功也。

平江沈怕宁，家丰，好内厚味，每年到四九月内，必发气喘，抬肩吐痰，脉沉涩而细数。诸医用平肺之药，数年不愈，如此者六七年。用人参、生地、黄耆和当归、牛膝、肉苁蓉、枸杞子、五味、知母、黄柏、天麦二冬、元参，末丸如梧子大，每空心服百丸，以救肾虚；又用阿魏、黄连、山楂、沉香、牛黄、辰砂、胆星、陈皮、神曲糊丸梧子大，临卧，姜汤送三、四十丸，以治厚味，服讫，复用琼玉膏二剂而安。

《名医类案》

江汝洁

一老妇，病虚弱气喘，左身半自头面以下至足发热，自汗，单衣被不能耐，右身半自头面以下至足厚衣被不能温，如此三年矣，医药不效。江诊其六脉，举之俱微而略弦，按之略洪而无力，二关脉略

胜于二寸。《经》曰：微则为虚。又曰：诸弦为饮。又曰：洪为阳，为热。又曰：无力为虚，据此，则知风邪入脾，表里阴阳气血俱虚之候作也。《经》曰：治病必求其本。今受风邪，乃木来侵土，又风自太阳而入脾，先当于太阳疏泄以固表，次当养脾而祛木，俾脾无贼邪之患，则血气渐盛而左热右寒之疾可除也。以石膏、款花蕊各三钱，官桂、甘草半之，研为细末，以管吹入喉中，浓茶送下三、四分，嗽喘即止，次日，用滋补之剂白术二钱半，白芍、香附各一钱半，黄芪、陈皮各一钱，甘草三分，水煎服，后除芍药，加入参三钱，数服而愈。

《名医类案》

江应宿

朱万里子，年十七岁，因服砒毒，杂进解毒药，并多服泥水，大吐后发喘，抬肩竦体，手足爪甲黑色，气不相续，频死复苏，饮食难进，六昼夜不得眠。时六月中旬，邀宿诊视，脉促而面赤。曰：胃火冲逆。用葱煮麻黄五圣汤，一匕而愈。所谓火郁发之也。

《名医类案》

壶仙翁

乡进士许崇志病呃逆，医以雄黄烟熏其鼻，倏然目暗，（火症）热剧甚。召翁诊之，曰：此得怒气伤肝，肝气上逆而呃（木挟相火直冲清道）。《经》云：木郁达之。即投以涌剂，更为之疏肝平气，数服而愈。所以知崇志病者，切其脉左关沉而弦，右寸微而数。沉弦为郁，微数为热，郁不行，故病呃逆，此怒气所生也。（丹溪曰：诸逆冲上皆属于火，然亦有数者不同，或痰、或食、或汗吐下后、或中气大虚、或阳明失下、或痢后胃虚阴火上冲清道，宜细阅准绳治法）

有病霍乱吐痢垂困，忽发咳逆，半月间遂至危殆。一医云：凡伤寒及久病得咳逆，皆恶候，投药不效者灸之愈。遂令灸之。火至肌，咳逆随定。元丰中壶为鄜延经略使，有幕官张平序病伤寒，已困，咳逆甚，气已不属。忽记灸法，试令灸之，未食顷遂瘳。其法乳下一

指许(足阳明乳根穴),正与乳相直骨间陷中,妇人即屈乳头度之,乳头齐处是穴,艾炷如小豆大,灸三壮。男左女右,只一处,火到肌即瘥。若不瘥,则多不救矣。(灸法)

《名医类案》

丹溪

一老人,素厚味,有久喘病,作止不常,新秋患痢,食大减,数日咳逆作,脉豁大(病见呃逆从补,况脉大耶!仲景云:大则为虚)。以其形瘦可治,用参朮汤下大补丸以补血,至七日而安。

一妇人年逾笄,性躁味厚,暑月因大怒而咳逆(怒见呃逆治痰从吐),每作一声则举身跳动,神昏,凡三五息一作,脉不可诊视,其形气实。以人参芦二两煎饮,大吐顽痰数碗,大汗,昏睡一日而安。

《名医类案》

虞恒德

一人,病伤寒阳明内实,医以补药治之而成发咳逆,十日后召虞。诊其脉长而实大,与大承气汤大下之,热退而咳亦止。(伤寒阳明内实失下)

一人得伤寒症,七日热退而咳连声不绝。举家彷徨,召虞诊其脉,皆沉细无力,人倦甚。以补中益气汤作大剂,加炮姜附子一钱,一日三贴,兼与灸气海(任穴)乳根(胃穴)、三处,当日咳止,脉亦充而平安。(胃虚)

《名医类案》

吕元膺

一人病嘔十余日,诸医以附子、丁香等剂疗之,益甚。切其脉,阳明大而长,右口之阳数而躁,因告之曰:君之嘔即古之咳逆,由胃热而致,或者失察,反助其热,误矣。饮以竹茹汤,未终剂嘔止。(胃火)

《宝鉴》治一人，中气本弱，病伤寒八九日。医见其热甚，以凉药下之，又食梨三枚，痛伤脾胃，四肢冷，时发昏愦，脉动而中止，有时自还，乃结脉也。心亦悸动，咳逆不绝（丹溪云：此症唯伤寒病残胃气虚衰为至重），色变青黄，精神减少，日不欲开，蹠足，恶人语。以炙甘草、生姜、桂枝、人参、生地、阿胶、麦门冬、麻仁、大枣，水煎，再服而愈。（伤寒下后）

《名医类案》

丹溪

一人哮喘，十日一发，此病在上焦，不得汗泄，正当十月，遂以麻黄、黄芩各二钱，入姜汁煎服，临卧进小胃丹二十粒而安。

《续名医类案》

圣济

一人饮醋呛喉，喘哮不止，用粉甘草二两，去皮破开，以猪胆六七枚，取汁浸三日，炙干为末，蜜丸，清茶下三四十丸，渐愈。

《续名医类案》

王宇泰

一人盐哮，用白面二钱，沙糖搜和，以糖饼灰汁捏作饼子，放在炉内烘干划出，切作四块，以轻粉四钱另炒，掺在饼内食之，吐痰而愈。（以上俱大还）

《续名医类案》

龚子才

一人哮喘十数年，发则上气喘促，咳嗽吐痰、自汗，四肢厥冷，六脉沉细，此气虚脾弱，与六君子加黄芪、五味、二冬、杏仁、姜、枣，煎服而愈。

一人自幼患哮喘之症，每遇寒即发，发则喘急咳喘，痰涎上涌，

久不瘥，已成痼疾，与甘、桔、芩、连、瓜蒌、贝母、二冬清肺，合六味补肾为方，名清上补下丸，服一料全愈。

《续名医类案》

孙文垣

查少川夙有哮喘疾，每发则遍身如燎，上气短促，喉中痰声，响若汤沸，每经七昼夜，汗出渐愈。（七日来复之义）居恒嗜饮纵欲，不避风寒，有教以石膏、麻黄、杏仁、枳壳、细茶各一两，作大剂饮之，名曰五虎汤，喘至即以此御之，随饮而止，屡发屡进，应若桴鼓，凡三年饮五虎无算，因而腹大加覆箕，两腿光肿如柱，内外疰疮，清水不竭，腥气逼人，不能伏枕者五阅月，诊时长至后一日也。气高而喘，身热而烦，覆以棉被，足纳火箱，环列火盆，绒帽貂套，束之以帕，鼻亦绒套笼之，坐重幔中，犹凛凛畏寒，今已十日，其脉浮大无力，其色白中隐青。盖旧病由于气虚中满，新病由寒在表而然，合先散之。以紫苏、马蹄、辛、甘草、防风、白豆仁、苍术、陈皮、人参、羌活、生姜，一贴得微汗，畏寒之状已去，独鼻尚寒，用防风，黄芪二两，煎汤，令熏其鼻，饭顷而止，日凡三熏，次日亦愈。呕恶不止，用人参温脾汤加丁香，进之一贴旋已。因欲利水，自食鲤鱼数斤，夜胀极以平胃散入橄榄肉一两，（能解鱼毒）两剂而定，独腹胀，小水不利，不能伏枕为苦，以附子理中汤加砂仁、补骨脂、赤小豆、桂心，连进四剂，小水略长，继以尊重丸，日三服之，每服五丸，五日后小水通利，可以卧矣，守此调理，胀消而平。

《续名医类案》

李士材

顾文学十年哮喘，百药无功。诊其两寸数而涩，曰：涩者，痰火风寒久久盘据，根深蒂固矣，须补养月余，行吐下之法，半年之间，凡吐下十次，服补剂百余，遂愈。更以补益气为丸加鸡子、秋石服年

许、永不再发。

《续名医类案》

施沛然

阮二华室患哮喘，过用凉剂，痰上壅，面目浮黄而肿，每昏晕则形静若死，苏则鼾鼾之声闻于外庭，医者望而却走。诊其六脉沉滑而弱兼紧，病得之冬伤于寒。《经》云：形寒饮冷则伤肺。古人治此病必用麻黄，轻清辛散之剂，若投以寒凉，则邪气蔽固而不得泄，痰日胶结，上焦之气壅而不宣，乃用通关散涌其痰涎，凡三涌而痰气始清，喘息始定，后以三拗汤兼导痰汤出入，调理月余而安。

钱国宾治金陵青衿赵滢，年六旬得痰症，昼夜吼锯，呕痰数碗，初尚能行，后渐不起，幸胃不病，饮食如常，多医罔效。脉之六部浮滑，右寸关更甚，浮主肺气虚弱，滑主脾经积痰，乃痰吼症也。用导痰加杏仁、麻黄，二十剂病势不减，辞去又更二医，反重复求治，曰：吾技尽矣，容思之。忽悟吼痰属太阴肺经之症，肺乃清虚之藏，六叶两耳，四垂如盖，今胶痰固于肺缝中呼吸而作吼锯之声，且胃主纳受，脾主运化，今胃纳而脾不运，停饮作痰涌出，非劫剂不可也。以三白丸方示彼，用白砒三分煅黄，贝母、桔梗各三分，捣饭为丸黍米大，以冷茶睡下七丸，七服痰止吼定，服理脾清肺药痊。大抵病危至此，不用客劫之味，弗知此七方十剂之意者也。古人学力深，今人学力浅，再思能用狼虎劫夺之剂，学力方到，若迎夺劫伏神兵，奇正当并用也。奚王道可以尽岐黄之伎哉，如果见真劫剂，亦不妨暂用也。

《续名医类案》

金陵一铺

哮喘，白果定喘汤，服之无不效者，其人以此起家，方用白果二十一个炒黄，麻黄三钱，苏子二钱，款冬花，法制半夏，桑白皮蜜炙

各二钱，杏仁去皮尖，黄芩微炒各一钱半，甘草一钱，水三钟，煎二钟，随时分作二服，不用姜。

琇按：此方惟风寒外感者宜用，若上盛下虚，气不归元者，服之立毙。如不问虚实，尽行与之，虽起家而杀人多矣。然今之时师，执方遇病，谬为知脉，其人亦未必不起家，而其罪则加等矣。

《续名医类案》

泸东

一人九月间病发热，恶寒喘急，脉洪大而似实，众作伤寒治，勿效。此火甚之脉，非真实也。止视其短气不足以息，即当作虚治，以补中益气汤加麦冬、五味子、熟附子三分，六剂愈。亦有痰食阻滞，而声微脉促者，与虚症相似，不可不审也。

《续名医类案》

陈三农

一人，每劳或怒即喘急，吐痰不卧，众以降火化痰，理气清肺之剂，不效。脉浮数而虚涩，此阴虚火动其痰也。用补阴平肺饮，下咽喘即定而愈。（同上）

《续名医类案》

薛立斋

妇人，伤风寒作喘，或用表散，愈而复患，仍用前药，其症益甚，饮食少思，胸腹不利，此因脾肺气虚也。先用六君子汤加桔梗，渐愈。又用补中益气汤全愈。

侍御谭希鲁喘咳吐痰，或手足时冷，此中气虚寒，用补中益气炮姜而愈。

一妇人患前症，属命门火虚，不能生脾土，用补中益气汤，八味丸而痊。后复患，其喘益甚，用前药不应，遂用黑锡丹，二服喘止，仍

用前二药而诸症痊。凡属邪气有余者，其症易识，治效亦速。其属元气不足者，变症不一，效非可以旦夕期也。

定西侯蒋公患上气喘急，其脉寸口洪滑，此痰滞胸膈也。令先服稀涎散二钱，更以热水频频饮之（用代探法，殊妙），则溢而吐其痰如胶，内有一长条，裹韭叶一根，遂愈。

一路姓者年近五十，身体肥大，饮食倍常，病月余，每行动即喘，诊之六脉微涩，曰：此死症也。众谓妄，后逾月果卒。

《续名医类案》

孙文垣

程菊泉暑月患喘嗽，咳咳连声浓痰滚滚，行动则喘促不宁，夜分口渴胸膈胀闷，脉两寸滑而数，两关弦，此肺有宿痰，胆有郁火。《经》云：火郁发之，又风寒外束者，可发，用苏子、半夏曲、杏各一钱，石膏二钱，款冬花、桑皮各八分，桔梗，枳壳各五分，麻黄三分，病不减，改以杏仁、陈皮、人参、贝母、款冬花、麦冬各七分，苡仁一钱五分，桔梗、知母各五分，五味子十粒，桑皮一钱，陈皮六分，痰减半，胸膈未舒，口干脚热，前方减去款冬、五味，加枳壳、葶苈，两帖全愈。

《续名医类案》

陆祖愚

唐鸣和平时有火症，因试事成痰火咳嗽，日夜吐黄痰二三碗，气逆喘急，饮食不进，服枳梗二陈尤甚，改服参术儿危，脉之两寸俱洪滑而数，乃用茯苓、桑皮、贝母、芩、连、花粉、元参、枳壳，加牛黄、竹沥，二三剂胸宽气缓，七八剂痰乃白色，去牛黄，三十余剂而安。

黄履素曰予家有庖丁王姓，生平多欲，年四十患脚痛，往针，予谓此足三阴虚，针无益也。数年后患痰喘，胸中痛，昼夜不眠。予谓此肾虚气不归元，峻补其下则气自降，适名医陈月坡来诊，其持论

与予略同，余病者服陈药嫌其作闷，别寻粗工治之，大服降气宽中之剂，服后宽宽，后复发病者，尚以暂宽为效，信服之，以至于死，良可叹也。大凡此等病，服药初觉闷，久当渐宽、渐愈。愚者嫌闷而别求宽药，死者比比而是（医者病家两宜，熟悉）。如脾虚者，亦然。初服术必作闷久则自宽。破气、消导之药服之觉宽，久乃愈闷，以至不救，病者不可不知。

《续名医类案》

李士材

一人，发热干咳，呼吸喘急，始用苏子降气，不应，乃服八味丸，喘益急，诊之见其两颧俱赤六脉数大，此肺肝蕴热也。以逍遥散用牡丹皮一两，苡仁五钱，兰叶三钱，连进两剂，喘吸顿止。以地黄丸料用麦冬、五味煎膏及龟胶为丸，至十日而康。

朱太学喘急多痰，可以坐不可以卧，可以府不可以仰，惶急求治。李曰：两尺独大而软，为上盛下虚，遂以地黄丸一两，用桔梗三钱、枳壳二钱、甘草一钱、半夏一钱，煎汤送下，不数剂而安。

黄给谏中气大虚，发热，自汗，喘急，诊之脉大而数，按之如无，此内有真寒，外见假热，当以理中汤冷饮，举家无主，不能信徒，惟用清热化痰之剂，遂致不起。

叶方伯夫人喘急痞闷，肌肤如灼，汗出如洗，目不得瞑，诊之六脉皆空，所谓汗出如油，喘而不休，绝症见矣，辞不治，三日而歿。

宋氏女中气素虚，食少神倦，春初忽然喘急，闷绝不知人，手足俱冷，咸谓毙矣。李曰：气虚极，而不清肃不能下行，非大剂温补，决无生理。遂以人参一两、干姜三钱、熟附子三钱、白术五钱，药服而苏，后服人参七斤余，姜，附各二斤，遂全愈。

孙氏女久嗽而喘，凡顺气化痰，清金降火之剂，几于遍尝，绝不见效。一日喘甚烦躁，李视其目则胀出，鼻则鼓扇，脉则浮而且大，肺胀无疑矣。遂以越婢加半夏汤，投之一剂而减，再剂而愈。曰：今

虽愈，未可恃也，尝以参术补之，助养金气，使清肃下行。竟因循月许终不补，再发遂不救药矣。

《续名医类案》

冯楚瞻

司文选素患痰喘，发则饮食不进，旦夕不寐，调数月不效。脉之两寸少洪，余皆沉弱，其右关尺微细更甚，乃命门之火，衰极无根，虚阳上浮，且服克削，脾元亏损，致痰涎益甚、虚气愈逆，以炒黄白术八钱，固中气为君，炒燥麦冬三钱，清肺引气降下为臣，炮姜二钱温中导火，牛膝二钱下趋接引，五味子一钱敛纳收藏，并以为佐，制附子一钱五分，承上药力直达丹田为使。如是数剂，痰退喘止，食进神强，久服八味丸，不再发。

《续名医类案》

吴孚先

赵太学患水气，咳嗽而喘，误作伤风，概投风药，面目尽肿，喘逆愈甚。曰：风起则水涌，药之误也。以真武汤温中镇水，诸症悉平。

李成槐之室蓦地气喘，呼吸促急，提不能升，咽不能降，气道噎塞，势甚危，或作痰逆气滞，欲用牛黄、苏合二丸，不敢遽服，脉之两尺微细无神，此肝肾亏虚、子午不交，气脱症也。用人参一两、熟地二两、当归五钱、甘草二钱，一帖稍定，二帖喘平。凡气短似喘，人谓其病在上，不知元海无根，病实在下也，误治立危。（予遇此等症重投熟地无力之家不能备参者，以枣仁一两枸杞子一两代之，亦应如桴鼓）

《续名医类案》

张飞畴

韩顺溪内子患喘症月余，服破气宽胸，豁痰清火等药不效，发表利水亦不应，其痰转急，稍动则喘，难以休息。诊之六脉细数，而

面赤戴阳，用大剂六味地黄丸作汤，加青铅两许，一服而缓，三服而安。

《续名医类案》

柴屿青

程别驾尊人高年忽患痰喘，不进饮食，诊其脉有根，决无意外事，用四磨汤内加人参一两，一服而愈。

王观察在太史时方酷暑，令媳面红唇燥，发喘不止，足令至胯，危甚，两脉鼓指，按之微细，必过服苦寒所致，询之果然。曰：此戴阳症也。内真寒而外假实，急以人参三钱、熟附子一钱五分，投之喘定。又加肉桂一钱五分，半夜尚发躁烦，足冷未愈，遂以六味汤内加桂附各一钱五分，六剂并煎，冰冷频频饮之而愈。

少宗伯邹小山春月患喘咳，吐痰甚剧，延诊视，按其诸脉和平，惟肺部沉洪，明有伏邪，此小疾也。缘医谓风寒凝结，用桂温散，彻夜不寐，惫甚不支，遂用清理药剂而愈。

张三锡云：《纲目》载一男子五十余病伤寒，咳嗽喉中声如鼾，与独柴汤一服，而鼾声除，至二三帖，咳嗽亦渐退，服二三斤病始痊。不佞亦屡用有验，但可与知者道耳。今人因右寸脉大，不知分别有力无力，遽认为实，枳、桔、桑、杏、苓、栀、妄投，死亦不悔者多矣。

《续名医类案》

薛立斋

一儒者体肥，仲夏患痰喘，用二陈、苓、连、桔梗，痰喘益甚，加桑皮、杏仁、瓜蒌，盗汗气促，加贝母、枳壳，不时发热，饮食渐减，脉大面无力，以为脾肺虚寒，用八味地黄丸，以补土母，用补中益气汤，以接中气而愈。

一妇人早间吐痰甚多，夜间喘急不寐。夫早间多痰，乃脾虚饮

食所化，夜间喘急，乃肺虚阴火上冲。用补中益气加麦冬、五味而愈。

《续名医类案》

王叔权

一贵人久患喘，夜卧不得而起行，夏月亦衣夹背心，知是膏肓病也。令灸膏肓而愈。亦有暴喘者，知是痰为梗，令细锉厚朴七八钱，重以姜七片，水二碗，煎七分服，滓再煎服，不过数服愈。若有因痰而喘者，尝灸肺俞。凡有喘与哮者，为按肺俞，无不痠疼，皆为缪刺肺俞，又令灸而愈。亦有只缪刺不灸而愈者。此病有浅深也。

舍弟登山为雨所搏，一夕气闷，几不救，见昆季必泣，有欲别之意。疑其心悲，为刺百会不效。按其肺俞，云疼如锥刺，以火针微刺之，即愈。因此与人治哮喘，只缪刺肺俞，不刺他穴，按肺俞痠疼者，然后点其他穴非是。

滁阳高司法名申之，每苦寒喘，痰发甚时，非此药不能治，方名五味子汤，用橘皮（三两去白）、甘草（一两半炙）、麻黄（四两去根节）、五味子（二两）、杏仁（二两麸炒，去皮尖）、右为粗末，水一盞半，药末二大钱，煎至七分，去渣，通口服，不拘时候，如喘甚加药末，人马兜铃、桑白皮同煎，夏月减麻黄一两。

《续名医类案》

陈三农

一人极言痰气作楚，喘急而不能食，遍体作痛，服清气化痰药，无异服水何也。曰：岂止无益，反受害矣。肥人气居于表，中气必虚，脾弱不能胜湿，气虚不能健运，是以多痰而喘，以四君子加南星、半夏，佐以姜汁，数剂而愈。

《续名医类案》

刘点生

汪去尘脾虚水逆，伤肺喘嗽，不食，小水不通，脉虚不胜补泻，用茯苓五钱，泽泻、橘红各一钱五分，防风、肉桂、熟附各五分，二服水去后加入参，调理而安。

《续名医类案》

薛立斋

职方王用之喘嗽作渴，面赤鼻干，为脾胃有痰，用二陈加芩、连、山栀、桔梗、麦冬，而愈。

一武职体魁梧，素不围炉，不喜热食，行则喘促，自谓气实老痰，服碑记丸攻伐之（人名黑丸子），诊其脉洪数，重按全无，谓命门火衰，脾肺虚寒，与八味丸，一服痰喘稍止，数服全止，遂能亲火，喜热饮食。盖碑记丸出自西域，况方外人所制者。《经》云：西域水土刚强，其民不衣而褐荐，而民华色而脂肥，故邪不能伤其形体，其病生于内，其治宜毒药。由此观恐不可概用也。

太守钱东圩先患肩疽，属足三阴虚火不归元，用壮水之主以制阳光而愈。口：疮疾虽愈，当屏去侍女，恐相火一动，其精暗流，金水复竭，必致变症。后果咳嗽，痰出如涌，面目赤色，小便淋涩。又误认为外感风寒，用麻黄汤表散，汗出不止，迎视其脉，已脱，惟太冲未绝。曰：此脾虚不能摄涎，肾虚不能生水，肺虚不能摄气，水泛为痰，虚极之症也，辞为难治，勉以益火之源以消阴翳而愈。继又劳伤神思，外邪乘之，仍汗出亡阳，以致不起。

《续名医类案》

朱丹溪

七三婢喘，遇冬则发，此寒包热也。解表则热自除，枳壳三钱、炒麻黄、防风、黄芩、桔梗各二钱，木通一钱半（通利九窍治肺壅甚当），

紫苏五叶，分四帖，煎取小半盏饮之。

《续名医类案》

薛立斋

一男咳嗽，脉紧数，以小青龙一剂，表症已解，更以亭荔大枣汤，喘止，乃以桔梗汤，愈。

马元仪治朱千秋患喘嗽，自夏及秋，群治不愈，自谓已成阴虚。曰：阴虚者，宜补阴以制火；阳虚者，宜补气散邪。今两脉浮濡，浮为虚风，濡为气弱，病在阳而补阴，故邪留而不愈也。不信，又一月食减喘增，寒热自汗，身重不能转侧，复求治，其脉空大急疾，此中气大亏，虚阳不外固。治法先固卫外之阳，次补内守之阴，则真气内振，而虚风可熄矣。遂与大剂玉屏风散加贝母、杏仁、苏子、桔梗，一剂而脉症渐和，再加入人参三钱，二剂诸症渐平，惟咳嗽未已，以六味汤加入参调理，一月全安。

顾芝岩夫人喘嗽半载，卧不著枕，舌燥无津，屡治不应。诊之右关尺虚涩无神，此标在肺，而本在肾也。肺为出气之路，肾为纳气之府，今肾气亏乏，吸不归根，三焦之气出多人少，所以气聚于上，而为喘嗽口干，不得安卧。《中藏经》云：阴病不能吸者，此也，法当清气于上，纳气于下，使肺得其清肃，肾复其蛰藏，则气自纳，而喘嗽平矣。用苏子降气汤，加入参五钱，肉桂一钱，连进三剂，症渐平。改用金匱肾气汤，加入参五钱，二十余剂，可以安枕。后因补护失宜，前症复作，乃委之庸手，纯用破气镇逆之剂，极诋人参为不可用。病者自觉不支，求少参，不与，遂气败而死，伤哉。

邱友痰喘发热，口渴胸满，身如被杖，时恶寒，或与呕风化痰，不效。诊之弦数且涩，此情志郁结，而肺燥也。今之医者但知散风清热治痰，风剂则辛，寒剂则苦，痰剂则燥，辛能耗液，苦能伤气，燥能动火，是适助长而已。今欲治痰，必先清风，清气必先滋燥，使气得清肃下行，又何痰喘之有哉。用萎仁、半曲、枳壳、秦艽、杏仁、苏

子，少加柴胡、桂枝，二剂症减半，再加生首乌，以滋阴燥，大便通而全愈。

《续名医类案》

缪仲淳

藏仪部静涵患气喘自汗，昼夜不眠食，诸医以外感治之缪。诊之曰：此肾虚气不归元，故火上浮，喘汗交作；脾虚故不思食。亟以麦冬、五味、枸杞滋阴敛肺，以苏子、橘红降气消痰，以白芍、枣仁、茯苓补脾敛汗，不数剂而愈。

叶都督患痰喘，诸医作胃虚，治之不愈。后以导水丸利五六次而安。

蒋仲芳曰：周忠介夫人年六十余，患痰喘五六年，医药无效。士材先生诊之曰：右寸浮洪，肺有实邪，须用麻黄、石膏、半夏、防风、细茶、生姜等件，药虽峻而病当之无畏也。投之果愈。但麻黄只可用二三分，服后兼须避风耳。

《续名医类案》

吴桥

程参军汶年近耆故病痰喘，秋冬遽作，春夏浸平，顷归自留都，痰喘如昔。一医以为热也，剂以石膏，再服而痰喘不除，加以泄。一医以为攻损而虚也，则以人参峻补，一服而痰喘大作，喉壅塞不能言，瞑而愍愍。桥至诊之，寸口浮大，弦数搏指，然不任按，病得之郁怒，而伤肝气，法当缓治。而二医以燥急乘之，故甚。脉虽九死，犹可觐一生，乃以导痰汤为剂，加芩、连、麦冬，一服而唾结痰，有间稍寤，未尽二服，结痰越出喉吻间，不能唾，则簪入口而衡引之。累累连绵，去如败絮者盈二缶，喘乃少定，瞑而愍愍如前，偃卧如尸，七日乃寤，寤则呻吟出息，目微开，始进勺饮，间日一剂，逾月而安。或以参军方赵简子云。

刘清江曰：先君尝施喘药，盖用麻黄三两不去根节，汤浴过诃子二两去核，用肉二味为尘末，每服三大匙，水二盏，煎减一半，入腊茶一钱，再煎作八分，热服，无不验者。后于彭子寿侍郎传一方，用新罗参一两作细末，以生鸡子清和为丸，如梧子大，阴干，每服百粒，温腊茶清下，一服立止。尝见知临江叶守端向言其祖石林病此，专服人黄而愈。其尊人亦苦此疾，乃纯用附子。至某，则非麻黄不可。然则又观其所禀如何，且自谓其女幼年已喘，传至四世，而用药皆不同。

朱武章年三十八，客姚江，仲冬左额患疔，七八日微喘，疔溃后大喘，疔愈喘甚，坐不能卧，医与降气清金不效，已二旬。归而渡江，比到岸，两脚赤肿如灯笼，不能极履矣，舁负至家，一月间更七医。其宽胸者，重投厚朴，泻肺者，峻用葶苈。有谓表邪未清者，有谓脚气上攻者，有谓水肿入腹者，有谓疔毒入肺者。杂治肿渐及囊，一医谓虚也，与八味反增谵语。诊之两关模糊，左尺不应，余部微数而洪，面有红光，倚息不寐，小便浓浊，掌心热炙，臂起映疮，以久坐也，其舌左连赤紫，四沿凸凹，而左为甚，鼻孔干燥，能俛不能仰。曰：此肝肾大伤之候，初时之疔，亦肝火炽甚而作，治得其宜数剂可愈。朴苈既非桂附，亦误，今兼治，药必三十剂乃可。与生熟地、天麦冬、炒参、枸杞子、萆仁、米仁，四剂肿渐消，谵亦止，十剂便清肿退，可卧矣。唯仰卧及侧向右，则喘嗽。丁宁又十剂，已能应酬宾客，但卧仍宜向左，乃加熟地至一两，入五味三分，蛤蚧一具，一剂而安，四剂全愈。

吴性全幼即病喘，凡因与枳、桔、橘、半、桑、杏、前、苏之属，伤其肺气，遂成痼疾，每发必沉绵床第，淹旬浹月，年十七余诊之，令服重剂肝肾药，加沙参、萆仁、麦冬之类，自是发渐轻，或数月一次，仍以前方加减，不过数剂，即霍然，近则终年亦罕作。余治喘多矣，多以此法取效。盖虚喘者，十之九，实喘者，十之一也。

金太孺人四旬之外病喘，以攻伐之过，坐致痼疾，已近七旬，忽

一医与三子汤加葶苈服下，胁痛厥逆欲脱，余以大剂杞子地黄，入川楝一枚，得瘳。兰亭其四君也，亦病喘，面色㿗白，发必数日卧床，与以滋水生肝养金之剂，后发渐少而轻，自言得狗宝，服之而愈。此症凡遇面夭白皮，急痰腥秽，而小便点滴者，不可治。盖症非肺痈，而肺叶坏也。肺为水源，既败则小便必少耳。

张司閤年六十余，嗜饮病喘，吐痰无算，动则胸膈，抬肩倚息，或与杏仁、枳壳、苏子、前胡之类，十余剂喘益甚，枯瘠如鬼，辞不治矣。余与二地、二冬、米仁、薏仁、沙参、杞子、枳椇子、女贞子等，八剂全愈。戒其勿饮。初稍节，久仍纵恣，年余复作，左脉如按琴瑟弦，此真脏见也。不与药，月余而歿。

《续名医类案》

呃逆

朱丹溪

绍、越陈氏二十余岁，因饱后奔走数里，遂患哕病，但食物连哕百余声，半日不止，饮酒与汤则不作，至晚发热，如此者二月，脉涩数，以血入气中，治之用桃仁承气汤，加红花煎服，下污血数次，即减，再用木香和中丸加丁香服之，十日而愈。

一人病后呃逆不止，声闻邻家，或令取刀豆子烧存性，白汤调服二钱，即瘳。盖取其下气归元，而逆自止也。

《续名医类案》

遂严

一人伤寒阳明内实，地道不通，发呃，其脉长而实，以大承气汤下之，而愈。

一人伤寒七日，热退面呃声不绝，六脉沉细无力，倦甚，以补中益气汤加附子，日进三服而安。

一人酒色过伤，医作外感治，发汗过多，绝食日久，致气血两虚，相火冲上，呃逆五六日不止，治以半夏、黄连以泻逆气，归、芍、生地、知母以养阴，炒柏以泻冲火，二三剂而愈。

《续名医类案》

陈三农

一人患温热病十余日，身热面红，舌燥黑，咳逆日夜不止者三日，众医以脉迟无力，欲用丁附回阳热剂，陈以手按其胸腹，痛不可近，曰：脉微迟，非元气虚，由邪热内实壅滞其脉而然也，用解毒承气汤入甘遂末三分，下咽而躁热片时，去黑粪三四升，热退呃止，而安。

一人患温热病，大便不通，用下药，粪去而呃大作，众尤下药之过，曰：此燥粪在肠胃，遏气于下，粪去而郁气暴升，故奔迫而作呃耳，以枳壳饮之而安。

一人呃逆连声，脉来有力，因相争，肝木受邪，自思金能克木，用铁二斤，烧红水淬，饮之即愈。

一妇患时疫，饮水过多，心下坚痞，咳逆倚息，短气不卧，汤药不下，诸药无效，作停饮治之，进以五苓散，一剂而安。

《续名医类案》

卢不远

陈孟抒室人，因怒发呃三日夜，召诊以来迟，意其不悻，脉之曰：固来迟，然效极速。果一剂而愈。此盖肝郁盛怒弗畅，气将入胃而不能，故发呃，今不治呃，用柴胡等条达木郁，郁解即止。暴病气全，故易愈也。

《续名医类案》

吴孚先

袁氏女陡发呃症，有用丁香柿蒂者，有补之泻之者，有灸之者，俱不效。乃与柴胡、桔梗等味，开提之，不三剂而愈。良由郁怒肝木不舒，上乘于胃，故作呃。《经》曰：木郁则达之。此之谓也。

《续名医类案》

喻嘉言

王岵翁素有脾约症，得润剂即解。冬尽偶饱食当风而吐，胃气大伤，微发热，左关脉甚大，自云中脘不舒，气觉攻左，初饮梨汁不投，今服蔗汁稍定。喻曰：此虚风之候也。以胃中空虚，若谷风自内生，左投肝木，而从其类，是以气攻左，而左脉即为之大且劲。《经》云：风淫于内，治以甘寒。梨蔗皆甘寒，而一效，一不效者，乃胃中气虚极，不奈梨性之达下，而喜蔗性之和中也。遂以甘寒定方，人参竹沥、麦冬、生地之属，众议除参不用，服后腹内呱呱有声，呕出黄痰少许，胸中遂快，次早大便亦通，症以平安。然本胃经受病，而胃脉反和，惟心肾肝肺之脉不安，其故口中味淡，汤饮不肯下行，此中央气弱，不能四达转达也，宜急用四君子汤，理胃气，不信。别召二医，一谓中风，一谓伤寒，微用表剂，即汗出沾濡，气高神荡，呃逆不休矣。再投黄连一剂，则脉乱如沸羹，频转频歇，神昏身强，年寿黑，滞气出顺，而人必嘔，昼夜万三千五百息，即嘔亦如之，二医卸祸，谓喻前议四君子汤，今始可用。喻曰：气已出而不入，再加参术之腻阻，立断矣。惟仲景旋覆代赭一方，可收神功于百一，进一剂而嘔势稍减，二剂加代赭至五钱，嘔遂大减，连连进粥，神清色亮，脉复体轻，再用参、苓、麦冬、木瓜、甘草，平调二日，康复如初。

《续名医类案》

张三锡

一老人内伤饮食，消导未减，或误与润肠丸，二服下清水，胀痛转甚，或复投巴豆丸，二服致呃逆不止，用大剂六君子汤，二帖至五帖，全止。补养而愈。

一老人深秋患痢，发呃逆呕吐，黄柏炒燥研末，陈米饭为丸，小菟豆大，每服三十丸，人参、白术、茯苓，三味浓煎汤下，连服三剂即愈。切不可下丁香等热药。

《续名医类案》

陈良甫

一人痢疾，呃逆不止，六脉沉弱，诸医药灼艾皆无效，乃投退阴散两服愈。又尝治许主簿痢疾，咳逆不止，诸药无效，灸期门穴，不三壮而愈。

《续名医类案》

王叔权

一男子忽气出不绝声，病数日矣，以手按其臆中而应微，以冷针频频刺之而愈。初不灸，何其神也。

《续名医类案》

陈霞山

一人咳逆上气，体重气短，胀满，坐不得卧，常作水鸣声，用白前汤，白前二两，紫菀、半夏各三两，大戟一两，水一斗，煮三升分三服。（水肿大实之治）

《续名医类案》

薛立斋

一妇人痢后呕哕，(即呃逆也)服降火化痰等剂，愈甚。脉洪大，按之虚细，作渴饮汤，诸药到口即呕，此脾胃虚寒，不能司纳，以参、术、炮姜末各一钱，以饭作丸。米饮不时送三五粒，至三两许，闻药不呕，乃以六君加炮姜，三十余剂而安。

一妇人患症同前，饮食少思，胸腹膨胀，大便不实，所见之症，悉属虚寒假实，遂朝用补中益气汤加炮姜、木香，夕用六君子汤送四神丸，渐愈。又用八味丸料煎送四神丸，而痊。

一妇人因怒呕哕，时或昏愤口噤，或时举体内动，其面色或青或赤，此肝火炽甚，脾土受侮，用小柴胡汤加山栀、钩藤，治之渐愈。又用加味归脾、逍遥二药，调理而痊。

《续名医类案》

缪仲淳

高存之邻人卖腐者，伤寒微哕，两日夜不省人事，其子乞方，问之曰：汝父当时曾头身热乎？曰：然。曰：曾服汗药乎？曰：未也。曾吐下乎？曰：未也。因索伤寒书检之其方类，用干姜、柿蒂、丁香及附子等温热之药。(检方云云者盖示人以病系阳明热哕，以上诸药均不可用，非临阵者兵书也)。末条仅载白虎汤一方，缪思之曰：伤寒头痛，口渴身热，本属阳明热邪传里，故身凉发哕。(传里身凉，亦是金针)，未经汗吐下，邪何从而出？但其人年老多作劳，故于白虎汤中加入人参三钱，二剂立起。

《续名医类案》

马元仪

葛怀年六旬外，下痢呃逆，两足彻冷，或以痢治之，转剧。诊之两脉虚微，此中气挟寒下痢，当大剂温补，以恢复元气，时有言下痢多由湿热在胃，不行清理，而反温补，恐未合。曰：湿热伤者，其脉必

实，其腹结痛，且无呃逆足冷之症，此由年高气弱，火衰於下，气虚于中，因之升降失常，而输泄无度，温补非治痢也，阳回则痢自止耳。若必俟痢止而后补之，晚矣。遂与人参四两，合附桂理中汤，连投四大剂而瘥。

陆圣修年逾六旬，呃逆泄泻，面赤如赭，足冷如水，两脉沉微，曰：人身之中赖元气以充养，今因泄泻而气衰于下，复因呃逆而气伤於上，上下交征，年高气弱，何以当此？所幸者，犹未喘与汗，尚可挽也。与附子理中汤大培火土，加丁香以暖胃止呃。盖一法而升降之道备焉。降者，以肾中阳旺，则气不上僭，而下收崇土之功；升者，以脾中阳旺，则气不下陷，而中守其运行之职。则饮食自然变化精液，而泄泻安有不愈者乎？

朱氏子未第时，患腹胀食少，倦怠自汗，呃逆口干，脉之左得弦急，右见虚微。此中虚肝盛，得之烦劳且怒也。烦劳则阳气分驰，而脾胃损，郁怒则肝木横肆，而脾胃伤，由是汗出不止，脾虚而腠理不固也。口中干燥者，脾虚而精液不升也。腹胀者，气虚而传化失常也。食少者，胃阳不化，健运失职也。呃逆者，五阳不布，阴气用事也。当用附桂理中汤大培中土，土旺则不受制于木，且能生肺以制木也。服四剂脉渐起，胀渐平，因停药数日，胀如故。与大剂桂附理中汤，少加沉香以和胃气，而行肝气，调理一月而安。（病本多项，因呃逆为病之最，故入）

老仆王忠妇呕逆呃气，几无宁刻，脉之右寸独大，余脉虚微，此中州土败，水气不行，五阳不布，浊阴上逆也。与五苓散一剂，服后一时许，吐逆顿止。再与附桂理中汤连服之，明日两脉向和，呃逆亦止，微觉倦怠，与加桂理中汤，四五剂而安。

《续名医类案》

张意田

董友之母，年将七旬，病已八日，脉之软缓而迟滞，发热日晡益

甚，舌胎黄厚，大便不行（便知非丁香柿蒂症），畏寒呃逆，阅诸方，咸以老年正气用丁香柿蒂与补阴之剂。夫脉来迟滞，畏寒，阳邪入里也，舌胎黄厚，日晡热盛，阳明实也。此乃表症未解而陷里之势，急致气机逆窒而发呃，法当下之，毋以年高为虑也。与小承气，服后大便转矢气，兼有心烦大不宁之状，再与一剂，临晚下黑屎数枚，二更战栗壮热，四更大汗，天明又便黑矢，然后呃止，神清而睡。此实症之呃也，宜审之。

《续名医类案》

朱丹溪

一中年妇人病嘔，以四物汤，加和白陈皮、留尖桃仁、生甘草、酒红花，浓煎，入驴尿饮，以防其或生虫也。与数十帖，而呃逆除矣。

《续名医类案》

娄全善

其兄九月得滞下，每夜五十余行，呕逆食不下，五六日后加呃逆，与丁香一粒，噙之立止。但少时又至，遂用黄连泻心汤，加竹沥引之，呃虽少止，滞下未安，若此者十余日（病久故可用涩），遂空心用御米壳些少，涩其滑，日间用参、术、陈皮之类，补其虚。自服御米壳之后，呃声渐轻，滞下亦收，而安。

《续名医类案》

沈明生

唐玉如，夏间患血淋数日，淋止发呃，举体振动，声大且长，或与开胃消痰，益剧，勺粒不入，已两日。夕又欲进丁香柿蒂，且加姜、桂、参、芪，诊之乃阴衰火炎症也。盖劳役而兼房帏时际炎歊，水不制火，血少而气上冲，是以胀满不食，呃逆不已，今六部脉洪数，颜如煤炷，大便六七日不行，小水滴沥不快。《经》云：诸逆冲上，皆属

于火。先哲云：呃满须看前后部，肾虚不能纳气归元，故呃声长大，从凡田出。丁香柿蒂可妄投耶？乃先用胆导，得垢数枚，觉两足微暖，此逆气下达也。即以六味汤料稍减山药、萸肉，入黄连、梔子、车前、牛膝，薄暮煎服，不夜分呃全愈矣。明晨进粥，滞色渐清，夫呃症有寒热之分，呃声有上下之别，今以劳剧之体，血淋后见之，是不由胃而由于肾也。六脉洪数，大小便不利，是不由于寒，而由于热也，真水耗于平日，火症萃于一时，虚则肝肾不能纳气，自下焦上逆为声，非中焦热邪之比，其腰疼颜黑俱属可虞，幸得而足温，得补而啰止，乃壮水制阳明之明验，亦坎离既济之佳征也。依方调理半月全瘳。

娄东吴夫令梅顿先生弟也。丁未夏归自燕台，炎风烈日不无感受，萑苻出没不无惊恐，舟中兼有当夕者，至中途疲惫殊甚，疾棹抵吴门。或谓憔悴之体，竟应投补，沈见脉数未平，气口独盛，以为虚中有实热，初有薤苓等剂，溯其源也，继用疏利等剂，导其流也。宿垢既除，旋培元气，元气渐复，行且勿药矣。因设酬劳之宴劳备甚。其夕神昏肢倦，俄而发呃，沈曰：劳复发呃，当施温补，无疑第虚气上逆，其势方张，恐汤药未能即降，须艾炷佐之为妙。一友于期门穴，一壮即缓，三壮全除。调补而瘳。

祖姓人年近七旬，素有胃痛病，于二月间忽发呃，昼夜不绝声者十余日，胃亦痛，食入即呕，或与二陈汤加丁香、藿香等，病转剧。脉之两手皆洪数，两寸溢而鼓，时见歇至，乃厥阴之火上冲而然，与杞子、米仁各一两，沙参五钱，麦冬三钱，酒连四分，二剂而愈。后半年病复作，以贫乏无力，再药而死。此贫亦为不治之一也，哀哉。

《续名医类案》

秦昌遇

一贵人因恼怒，饮食不思已三月矣。春初患左胁痛不能向左眠，三日后又感暴寒邪风，遂咳嗽，喘急，短气，恶风喜重衣覆身，汗

流不止，不时呕吐清水及痰。每偏左卧久则痛而且烦，或饮冷水才觉稍舒，胸膈中脘痞塞，上下气不相通，日夜烦躁，止饮米汤碗许，耳鸣如风刮树，手指肉眊振摇不已。予始至诊得两手寸脉微浮而涩，关尺微虚不固。此日大使溏泻三次。其子问曰：“何如？”予曰：“虚劳咳嗽之症。靠左不得眠者，肝胀；靠右不得眠者，肺胀，及咳嗽自汗喘急，俱在难治例。况涩脉见于春时，金来克木亦是可畏，但神气尚未乏极，虽少春夏之脉，而两带浮尚有微阳，小便黄稠而微长，面色焦黑而微有黄气，数件或可皆耳。仲景云：脉虚微弱，下无阳。又云：微虚相搏，乃为短气。又云：微浮伤客热。东垣云：阴虚先亡阳，欲得去，乃见热壅口鼻，为之假热之症。各条所云颇合此症，总得之七情伤阴，烦劳伤阳，风寒人得以乘虚而入。胸膈痞塞，因邪在半表里，又为冷水停凝症。似支结胁侧不能卧，寐觉痛。虽云饮留肝实，亦是元气不充不调兼之。咳嗽喘急，短气自汗，耳鸣肉眊、振摇不已，呕吐泄泻，俱属正气已疲，合从止治，虽有表邪，亦惟调其气，使邪自释。养其血，使气自平。用顺气营汤加桂枝，甘草二剂，诸症顿减。但关尺之脉沉涩可虚，易以补中益气汤顺春升之令，补不足之阳，少佐小青龙汤一、二分以和荣卫而散其未尽之邪。又二剂，自汗喘咳呕吐已除，但痞塞胁痛不甚减，更以六君子汤倍半夏、陈皮、少佐木香、白豆蔻，向左右侧卧俱不痛，脸上焦黑之色日渐减耳。而脾胃不实，再制四陈丸以固之。左尺且弱，知肾为胃之关，肾虚则胃之化机未运，又合六味丸投之。六味服之空腹，六君服之日中，四神服之临卧。自此月余而病体霍然矣。

《秦景明先生医案》

程从周

汪让之婢者，年约十五、六岁、病数日方延予过诊。乃至房门外，即闻喘声如雷，举家惶惧，且发热，浑身叫疼，耳且聾，问之多不解应，六脉细数而浮，大便五日未通。余先用加味麻黄汤一剂。次

日再诊时，在榻边方微闻喘急之声，乃再以清金之剂加酒大黄，大便随通一、两次，而病退矣。后以清热化滞调理而安。然此症内外俱实，予故先取其标，而后取其本，亦乃急则治标之意也。

黄州牧美汲先生孝廉时年近五旬，或多酒色。都门春试回，得痰喘咳嗽之症，口唇干燥。其时侨寓广陵，自去年十月医至次年二月，绝无寸功，日渐羸尪，面色痿黄，肌肤瘦削，夜皆拥衣而睡，不能就枕，其喘时作时辍，安静之时犹可步履，但喘急一来既不能卧，又不能立，惟隐几而坐，以双手按棹边。听其哮喘二、三时许方定，两足无时顿跳，大汗如雨，自云：“喘发时似乎上下气皆不相连续，而两足不得不频频顿跳也。”二月初旬，社友徐田仲郡丞素精于医，见其服药不应，乃荐余诊视。脉皆弦细而滑，两尺更弱，经云：喘而多汗，法当难愈。所喜手温，而脉近滑，犹有可治之机。初医皆作外邪，表散太过，而肺气益虚。且肺主皮毛，腠理不密，故喘动即汗，汗愈多而喘愈盛，此皆肺虚之极也。又云：初病而喘，责之肺实；久病而喘，责之肺虚。据症宜以参芪为务。但喘时上下气不通者，痰客中焦而然，痰气未清，恐不能遽行补剂。因都门用煤为焚，又受煤火之毒，火来刑金。占云：肺受火邪者忌有人参。乃今只以清金保肺顺气化痰。用天麦二冬、白芍、橘红、桔梗、酒芩、青黛、知母、贝母、五味、茯苓、甘草之类，出入加减服之，稍应。喘发时，再以牛黄丸噙口中，而喘略定。但一端即要坐起，因表虚易于感冒，故不敢脱衣而卧者数月矣。一日，美汲先生谓余曰：“贱恙久无进退，渐觉羸弱，先生其谓之何？”余曰：“尊恙来既远，其去亦迟，曷能以旦夕计功？况尊体贵重，而不佞黔驴之技止此，盍再延一、二医商之何如？”先生曰：“杨城贵道，延之过半，非惟无效，而反欠安。惟先生药服之甚妥，虽未即愈，仍冀加功。”余思药病相对，所未奏效者，邪重剂轻，一簣之功未成耳。清晨，再以补阴丸药滋其化源。口干作渴，戒勿啜茶，制玄霜膏一料。无时以茶挑咽下，竟入肺经，大能止嗽化痰。临睡时，又进清气化痰细丸药一服。如斯四月，终方得解衣伸足而卧，喘嗽

俱愈。噫嘻！如斯之症，若以寻常汤剂安能奏功。此亦先生知予之深，而专任之笃，故能尽一得之愚也。迄今廿载，论交有自来矣。

《程茂先医案》

李用粹

歙商吴维宗，年将耳顺。忽然染吐血嗽痰，昼夜不发。医见年近多劳，误投参、芪、遂觉一线秽气直冲清道，如烟似雾。胸间隐隐而疼，喘气不卧，阖门悲泣。特遣伊侄远顾蓬门，具陈病概，并言，伊子幼龄，倘成沉疴，何人抚育，深为惨恻。予悯其恳切，细为审度，知水下龙奋焦灼娇脏，将见腐肺成痈，所以咳咯不止。盖金水一气，水火同原。乾金既可生水，坎水又能养金。惟源流相济，则离焰无辉，如真水涸流则相火飞越。俾清虚廓然之质，成扰攘溷浊之气，况乎甘温助阳愈伤肺液，宜壮水之主以镇阳光，使子来救母而邪火顿息也。方以生、熟地黄各二钱，天冬、麦冬各一钱五分，茯苓、紫苑、川贝、桔芩、瓜蒌霜、甘草节各一钱，二剂而烟消雾散，喘息卧安。以后加减，不旬日而咳嗽俱止。

秦商张玉环。感寒咳嗽，变成哮喘，口张不闭，语言不续，呀呬有声，外闻邻里。投以二陈、枳、桔毫不见减。延予救之，诊六脉右手寸关俱见浮紧，重取带滑，断为新寒外束，旧痰内搏，闭结清道，鼓动肺金。当以三拗汤宣发外邪，涌吐痰涎为要，若畏首畏尾，漫投浮浅之剂，则风寒闭固，顽痰何由解释？况经曰：辛甘发散为阳。麻黄者，辛甘之物也，禀天地轻清之气，轻可去实，清可利肺，肺道通而痰行，痰气行而哮喘愈矣。乃以前药服之，果一剂而汗出津津，一昼夜约吐痰斗许，哮喘遂平。越二年，因不忌口。复起前症而歿。

《旧德堂医案》

周南

林重兵，年方四旬，体亦不肥。从幼痰多、气喘，迨来积病三

年，面色天白，胸膈气滞，懒于言语，小腹少力，多言气升，有似疝气上升之状；痔疮下血，以致颈疼、耳鸣、行动晕眩；宗气动且应衣，饮食不下，食则饱胀，或吐水苦酸，夜不能寐，痔痛气升精自流出。脉左寸细涩，右关滑大。此火不生土，金不生水之症也。左寸细涩，君火虚也；右关滑大，痰气盛也。火虚而水反凌之，所以心君不宁。金不生水则真水亏，土不制水则邪水溢。所以为痰为饮上逆于肺则喘息，溢于胃则吐水，聚于中则为胀，阻于经隧为气上升，为头疼，为眩暈，为耳鸣。至于精滑不寐皆心肾不交之虚症错杂其间。治当审其标本缓急，而调治之火土之虚本也。痰饮为患，标也。本不亏而治标，当以急剂，病去而正不伤本。已虚而治标，当以缓剂，扶正面邪自退。拟以苓桂术甘汤加半夏、陈皮，十剂面病去其半，又五剂而愈十之七八，再服人参养荣汤不及十剂而全愈。总之，饮为阴类，挟下焦之阴气而上逆为患，非助上焦之阳不足以胜之。故以桂枝赤色通心者为君，以扶其阳；茯苓白色入肺者为臣，以行治节，以伐肾邪；苍术之苦温以燥湿健脾；甘草之甘而先入脾；加二陈以消痰理气。药味皆阳刚雄烈，而阴类自消矣。若以心肾之虚，而用滋阴，反助痰饮为患，所以经几年而不愈也。

《其慎集》

王三尊

圻者孙伯魁，岁二十余。体素健，伤风咳嗽将一月。忽痰喘，卧床不食，脉微数而弱。予舍脉从证，治以消风驱痰之品二帖。呕痰甚多，然余证不减，脉亦如前。予思风邪宿痰俱去，脉当出而证当减。今仍如前者，真虚证也，遂以六君子汤加归、芍、龙眼肉与之。喘嗽渐止而思食，四帖全愈。问其平日，过饥则汗出而颤，其中虚可知，勿谓少年藜藿之人，无外感虚证也。

《医权初编》

郑重光

邵子易兄令眷，年四十外，形盛多痰，素有头风呕吐之病，每发一、二日即愈，畏药不医，习以为常。二月间感寒，头痛呕吐，视为旧疾，因循一月，并不服药。渐致周身浮肿，咳喘不能卧，呕吐不能食，已五日矣。方请医治，切脉至骨，微细如丝，似有若无，外证则头疼身痛，项强肤肿，足冷过膝，咳喘不能卧，滴水不能下咽，沉寒痼冷，证皆危笃，必须小青龙汤，方能解表里之寒水。但苦药不能下咽，先经半硫丸一钱，通其膈上之寒痰，继以麻黄、桂枝、细辛、附子、干姜、半夏、茯苓、吴萸，煎剂与服。初剂尚吐出不存，又进半硫丸一钱，次剂方纳。如斯三日，虽小有汗，足微温，而脉不起，全不能卧，寒水之势不退。余辞之，令其另请高明。有一浙医视为湿热，用木通、灯草、腹皮为君，幸病家粗知药性，不令与尝。专任于余，改用生附子，十剂至四，五日，通身得汗，喘咳始宁，方得平卧，频频小便而下体水消，非此大剂，何能化此坚冰。后用理中桂苓加入参，匝月方健。询彼家仆人，乃平素贪凉食冷所致。若此证属脾肾虚寒，则不可治矣。

《素圃医案》

任贤斗

蒋宜山，麻疹收后微喘，由渐而甚，动则汗出，脉濡食少，身体倦怠。余曰：此必麻疹时过服寒凉，致伤脾胃，土亏金无以生，肺气无主，致生喘促，补土生金必愈。与温胃饮加黄芪，十数剂而愈。

温胃饮

人参 白术 扁豆 陈皮 干姜 当归 甘草

《瞻山医案》

永富凤

有一医生，每冬初微喘，按其腹部，诸脏逼上。余曰：“是喘息之候也，可急吐。唯脐上一寸有动气，吐后胃中空虚，则上逆冲心，不可大吐。”乃与瓜蒂末五分，自旦至晡时吐数十回，晡后吐黑血三、四合，困眩不可堪，额上冷汗如洗。急与冷粥一盏止吐，服三黄汤二大盏。其翌增进三黄汤，经三日灸育门及七俞各百壮，数日后不闻喘声。

《漫游杂记》

陈念祖

哮喘气急，脉细数，系寒入肺俞，痰凝胃络而起，发之日久，则肺虚必及于肾，胃虚必及于脾，脾肾两虚。寒痰凝滞不化，气机被阻，一触风寒，病即复发。治法在上宜责之肺胃，在下宜责之脾肾，然此症治病非难，除根实难，宜分临时平时两种治法。临时以肺胃为主，平时以脾肾为主，一标一本先后并治，庶可冀收全效，兹列二方于后：

紫菀二钱 款冬花二钱 苏子一钱 橘红一钱 白茯苓三钱
桑白皮二钱 杏仁二钱，去皮尖 制半夏二钱 淡条苓一钱
沉香五分，研细末冲

临发时用此方煎服。

熟地黄五钱 五味子一钱 陈皮一钱 薏苡仁三钱 白茯苓三钱
紫石英二钱，煨 牡蛎三钱 胡桃肉二钱 川杜仲二钱，炒
制半夏二钱 平时用此方常服。

情怀抑郁，津液日受蒸熬，痰结成块，如絮如核。喉间常苦壅寒，胸痞闷尤甚，上气喘急，系内伤外感之兼证。此时若专治内伤，恐外邪不能出；若仅治外感，又恐内伤不能愈，治法最难。拟先和解表里为兼筹并顾之计，列方于下：

炒白芍四钱 当归身三钱 炒白术三钱 柴胡一钱 白茯苓三钱
制半夏一钱 苏叶八分 厚朴八分 陈皮八分 甘草一钱
水同煎服

《南雅堂医案》

许璉

宁人郑姓子，甫七岁，患哮喘证。脉形俱实，结喉两旁青筋突起如笔管，喉中作牛马声。此系果饵杂进，痰浊壅塞。始用苏子降气汤加减，服六七剂不效。余思病重药轻，遂以苏梗八钱，易本方之苏子，余药分量加重，分服二剂，青筋隐而不露，脉亦和软，鸣声不作矣。凡治病虽用药不误，而分量不足，药不及病，往往不效。

郭姓，年四十许。素有痰饮，每值严寒，病必举发，喘咳不卧，十余年来大为所苦。甲申冬因感寒而病复作，背上觉冷者如掌大，喉间作水鸡声，寸口脉浮而紧，与小青龙汤二剂即安。至春乃灸肺俞、大椎、中脘等穴，以后不复发矣。凡饮邪深伏脏腑之俞，逢寒病发，非用灸法不能除根。惜人多不信，致延终身之疾，可慨也！

祖庙巷高太太，年三十余。平素肝阳极旺而质瘦弱，患痰火气逆，每日吐痰一、两碗，喉间咯咯有声，面赤烦躁，舌苔中心赤陷无苔，脉弦细虚数，乃感受风邪，少阳木火偏旺，风得火而愈横，风火相煽，肺金受制，阳明所生之津液，被火灼而成痰，旋去旋生，是以吐之不尽。痰吐多而肾液亦伤，故内热。《素问》云：大颧发赤者，其热内连肾也。痰随气以升降，气升痰亦升。治当用釜底抽薪法，先以清火降气为主，火降、气降而痰自搓矣。方书“治心肝之火以苦寒，治肺肾之火以咸寒”。古有成法，方用咸苦寒降法。丹皮、山梔、青黛、竹茹、竹沥、杏仁、黄连、黄芩、羚羊角、石决明、川贝母、旋复花、海浮石，加指迷茯苓丸三钱。连服三剂，气平热退，痰喘俱瘥，安卧如常。后用清肺降火化痰之药，如沙参、麦冬、石斛、竹茹、青黛、山梔、牡蛎、鳖甲、阿胶、川贝母、海石、茯苓、仙半夏、橘红、首乌、雪

羹等，出人为方。调理数剂而愈。

宁波蓬莱宫羽士陈信良，患虚喘。咳逆而无痰，动喘乏力，脉虚自汗，证属肺脾两虚。与西洋参、冬虫夏草、川贝、青盐、陈皮、阿胶、当归、杞子、枇杷叶、蒺藜、牡蛎等。土金相生，二十余剂而愈。

广东盐大使汪公，回杭途次偶感微邪，又加忿怒，遂致喘逆倚息不卧。余因治桑观察之症，乘便召诊。其息甚促，音不接续，面色黧黑，中有油光，脉浮部豁大，中部空扎，沉部细弱，不相联贯。余曰：“此证邪少虚多，勿误用表散。”进二加龙牡汤，二剂而安。

《清代名医医话精华》

中神琴溪

棋山先生之室，喘家也，一夜发甚急，遽招先生往诊之。脉促心下石硬，喘急塞迫，咽中作引锯声，唯坐不能卧。他医二三辈，先在坐焉，治方已穷，待先生。先生至曰：“予有一奇方，往往用之颇奏奇功，请尝试之。”即作生萝卜汁，注之咽中，未尽一盂，喘顿止大息，曰：“精神始爽。”

《生生堂治验》

程文囿

哮喘多年，原属铜疾，往岁举发尚轻。此番发剧，胸满喘促，呼吸欠利，夜卧不堪着枕。药投温通苦降，闭开喘定，吐出稠痰而后即安。思病之频发，膈间必有窠囊，痰饮日聚其中，盈科后进。肺为华盖，位处上焦，司清肃之职。痰气上逆，阻肺之降，是以喘闭不通。务将所聚之痰，倾囊吐出，膈间空旷，始得安堵。无如窠囊之痰如蜂子之穴于房中，莲子之嵌于蓬内，生长则易，剥落则难，不刈其根，患何由杜。考《金匱》分外饮治脾，内饮治肾。且曰：饮邪当以温药和之。议以早服肾气丸，温通肾阳，使饮邪不致上泛。晚用六君，变汤为散，默健坤元，冀其土能生金，兼可制水。夫痰即津液所化，使脾

肾得强，则日入之饮食，但生津液而不生痰，痰既不生，疾自不作。上工治病，须求其本，平常守服丸散，疾发间用煎剂搜逐，譬诸宵小，潜伏里闾，乘其行动犯窃，易于拘执，剿抚并行，渐可杜患。

《杏轩医案》

黄凯钧

徐，二八，肺气失于清肃，则欠下行，致生腹胀痰喘，小便赤短，治法宜行秋令。

石膏 茯苓 通草 桑皮 苏梗 杏仁 厚朴 连翘

四服腹不胀，痰喘缓，小便清长，改用：

北沙参 麦冬 茯苓 桑皮 杏仁 连翘 甘草 茅根

《肘后偶抄》

李文荣

包式斋患尿血，二年未痊，后觅予调治而愈。盖肾亏人也。偶然伤风，某医发散太过，转致喘，不能卧者屡日，急乃延予。予曰：“咳出于肺，喘出于肾，肺肾为子母之脏。过散伤肺，母不能荫子，则子来就母，而咳变为喘，肾虚人往往如此。今已肾气上冲，脉来上部大，下部小，而犹以为风邪未尽，更加发散，无怪乎喘不能卧也！”与以都气全方加紫衣胡桃肉三钱纳气归肾，一药而愈。越二年，又因伤风，某医肆意发散，致喘不能卧者三日，又请予治。曰：“此与前症无异，彼昏不知，子何毫无记性耶？”曰：“因伊在舍诊病，偶贪顺便，不意在此。”予曰：“无他，仍服前方可也。”其内因夫病着急，忽得笑症，终日哑哑不止，亦求予诊。其左关寸皆数甚，予曰：“膻中为臣使之官，喜乐出焉。此肝火犯心包络也。”与犀角地黄汤加羚羊角。次日复请予至，则笑病一药而痊。而式斋则夜仍喘不能卧，唯下半夜稍平耳。余曰：“异哉！何药之灵于当年，而不灵于此日哉？”细诊脉象，上部大，下部小，实属肾气不纳，毫无他疑。静思良久，因问：“昨

何时服药？”曰：“晚饭后。”予曰：“是矣！今可于晚饭前服药，当必有效。”次日问之，则喘定气下，一夜安眠矣。伊问：“何故？”曰：“药本纳气归肾，饭后服药，为饭阻不能直达于肾，故上半夜全然无效，下半夜药性渐到，故稍平也。今于饭前服药，腹中空空，药力直达肾经，然后以饭压之，肾气岂有不纳者哉！”嘱其多服数帖。后加十倍为丸，常服。并嘱偶有外感，不可任医发散，其症乃不复发。

张伟堂二兄，吾乡南张榜眼公嫡派，先居城南塞上，太夫人患疟，服凉药太多，病剧。其戚严嘉植素信予，荐诊。知其本体虚寒，始以温解，继以温补而愈。嗣迁居扬州，十余载不相往来。道光五年十二月十七日，忽接严嘉兄信，据云：伟堂病已垂危，诸医朝至以为暮必死；暮至以为朝必死，即如此，何敢复以相累。但病者忽忆当日母病系兄挽救，思得一诊，虽死瞑目，务恳屈降，死生均感等语。因其言直，谅不欺，二十日渡江，下昼到张府，即上楼诊视。见其痰涌气急，坐伏茶几，一人两手扶其头，不能俯仰，十余日不得一卧矣！人事昏沉，不能言语，诊其脉滑数两大，虽已空象，而尺部尚觉有根。遍阅诸方，自八月服起，皆作外感治，尽用发散消导；月余后想觉人虚，易而为补，总以人参为主；后想因痰多气阻，又改用化痰；又或疑外感，加用疏解。现在诸医皆云不治，无药可用，唯一朱医与伟堂至好，一日数至，以二陈汤作丸与服，见症愈坏，束手流泪而已。予乃曰：“此肾气上冲症也！诸气以下行为顺，今肺不清降，肾反上冲，气降则痰降，气升则痰升，故痰涌气急，不能俯仰；且其脉象甚数，似杂湿热，阴虚湿热不化，亦随肾气而上冲。若能纳气归肾，气降痰降，湿热亦降，可以安卧，可以调理，症虽重，无妨也。”于是用六味为君，以都气法原本六味，而六味地黄古称为治痰之圣药，又称为下焦湿热之圣药，有三善焉，而皆合乎此症，故特用之。大熟地八钱，山萸肉四钱，怀山药四钱，粉丹皮三钱，福泽泻三钱，云茯苓三钱，外加北沙参四钱，杏仁泥三钱以润肺降气；故桃肉三钱以助纳气；福橘皮一钱，取其顺气而不燥。开方后，予往候九峰先

生，因即止宿。次日复请，予至门，严嘉翁迎出，问服药如何？曰：“差不多。”若有不豫色，予心窃疑之。至厅坐定，予问曰：“药吃坏耶？何吾兄之怏怏也！”曰：“并未服，正以远劳吾兄，又不服兄药，故不快耳。”予闻未服药，心转定，因问：“何不服药？”曰：“朱先生坚称熟地不可服，故耳。”伊家闻予至，又请上楼诊脉。太夫人曰：“昨方因有熟地，不敢服，今恳另定良方。”予曰：“熟地乃此症要药，吾方君药，舍此更有何法？且闻所请先生不少，朝称夕死，夕称朝死，无药可治。今服熟地不合，亦不过死，况予尚许君家不死耶？此症服熟地则生，不服则死，服与不服，悉听君家，予无他方。”下楼，予即欲行，严嘉兄曰：“今已将午，不及到镇。饭后兄仍往九峰先生处，明早动身可也。”予唯唯。嘉兄又曰：“此地有好浴堂，陪兄去一浴何如？”予曰：“甚好。”正欲偕行，忽一人告曰：“老爷过矣！请严大太爷勿他往。”嘉兄徬徨欲止，予笑曰：“予诊脉未久，岂有死在顷刻而不知者耶？此不过痰厥，片时即醒，其尺脉根本尚在，保无虑也。”转拉嘉翁出浴。浴罢而归，曰：“醒久矣！”时有伊戚邹翁亲闻予言，进告太夫人曰：“伊言如此有准，其药尚不可服耶？”半晌，其侄出问：“今日如服先生方，可肯在此住宿否？”予曰：“服吾方，吾敢在此；不服吾方，吾不敢在此。”又半晌，其侄出问曰：“如服熟地不合，可有解药否？”予笑曰：“今日如此谨慎，何不慎之于当初耶？药中佐使已解在内，不必过虑。”盖诳之也。然后其家始肯依方制药，而尚止服一半，服后气痰渐平，已觉能俯。乃又进一半，觉痰与气随药而降，并能仰矣。迁延太甚，已二鼓。后复请予看脉，脉亦渐平。伟堂并能说话，谓予曰：“药真如神，但尚不能平卧，君能令我一卧，则快甚矣！”予曰：“惜君家不肯早服予药耳！昨肯服药，今日安眠矣！虽然，明日保君酣睡无虑也！”次日依方再进，傍晚服药，旋即能卧，卧则熟寐，三更始寤。以后予用药，无复敢赞一词，而总本初方，略为加减，地黄则始终未减分毫，八剂后，其症大痊，余乃辞归。次年复请调理，煎方、膏方悉本原方。盖伟堂素嗜虾油，每食不撤。其湿热甚

重，因热生痰，因痰致咳。所用辛散，即诛伐无过；所用人参亦助热锢痰。因咳致喘，肾气上冲，犹以二陈丸治痰，岂不去题千里乎？唯六味地黄三补可保肾气，三泻兼治湿热，于伟堂最宜。况痰之本在肾，肾安痰亦自减也。

《仿寓意草》

吴簪

亚相英煦斋每早入朝，偶感风寒及遭凉气，即咳嗽痰喘，气急声粗，呕恶食少，秋冬严寒喘嗽尤甚。余曰：脉虚浮滑，此肺气虚乏则腠理不密，易感风邪，以致痰涎壅盛而为哮喘之恙。且知喘有夙根，故遇感冒即发，遇劳亦发也。先以华盖散及金水六君煎加减参用甚效。继以保肺清金，益气固表之剂乃安。按：此证未发时，以扶正气为主，既发时以祛邪气为先。惟哮喘痼疾猝难根除耳。

南路司马汪柳湖太翁，年逾七旬，患气短喘促，神昏懒言，饮食不入，能坐不能卧，势已垂危。延余往祝，六脉微细，系阳衰气怯，营卫败剧之候，法在不治。幸两尺重按有根，若能惟余是听，可救十中之一。每帖用人参、当归各三钱，熟地八钱，桂、附各钱半，日投两帖，小效。以原方加五味子、蛤蚧，服数剂，脉旺、气缓、喘减，食粥后，以峻补元气，俱重用参、附，调摄三月而安。

协揆英煦斋太夫人，年近八旬，忽痰喘不语，视其神疲气逆，语言謇涩，肢体俱冷，汤饮不进，六脉细微，独右关浮大而滑。时协揆随扈五台，众医见病沉困，不敢议方。余曰：系高年阳气衰弱，脾虚不能运化水谷，故致中痰壅滞，上下不得宣通。所幸禀质素厚。且神门重按有根，脾脉虽滑大而不躁。亟进四味回阳饮以救元阳，虚脱尚可望痊。服药后即吐脓痰成碗，手温能言。脉亦有神，惟喘不能止。自云胸中痰多即欲吐出为快，奈无气为送出。仍以原方重用参、附，加制胆星、当归。越日，吐痰涎甚多，而喘总不止。乃真阴命火俱衰。用六味回阳饮加肉桂，服数帖，脉旺证减。以六君子汤加

当归、蛤蚧，服数帖，喘定痰少。改投贞元饮加人参，并五福饮加姜、附，服药月余而安。

尚书那绎堂太夫人，年逾八旬，患气促痰喘，饮食不进，足膝俱肿，脉旺躁痰，有表无里，此高年气血将竭，孤阳离剧之候。急进四味回阳饮加当归速救元阳，防其虚脱。乃定方后，主家固畏温补，又有坐知医者云：现在饮食不进，痰火上逆，岂可温补？另延他医，服化痰降气之药，不一月而逝。

相国庆树斋夫人，年逾七旬。因食饱遭凉，即痰喘气急，饮食不纳，医治月余罔效。余曰：脉见浮大滑数，皆由肺虚感寒，既失疏散，复误温补，以致寒束于表，阳气并于膈中。久则郁而成热，火烁肺金，不得泄越，故隔热喘急弗止也。即进定喘汤，去麻黄，加枇杷叶、茯苓以清热降气，涤痰疏壅，服后痰喘减半，更用加减泻白散，甚效。后以百合固经汤，调理而安。

《临证医案笔记》

何书田

去冬吐血后，阴亏气不归根，喘急日甚，肢浮腹满；六脉虚弦无根，不易治之证。姑与金匱肾气法，未知稍效否？

制附子 炒熟地 五味 菟怀膝 泽泻 车前子 赤肉桂
山萸肉 山药 茯苓皮 腹皮

肺虚，气不下降，腠理不密，易感发喘；脉象虚弦无力。此根难断。

西党参 川贝母 花粉 白茯苓 炒怀膝 麦冬肉 甜杏仁
橘白 炒苏子

阳虚恶寒，肺气不降，咳喘少纳；六脉沉微不振。劳怯之候也。盛暑防汗脱。

生黄芪 橘白 款冬花 生蛤粉 炒苏子 白茯苓 玉竹
川石斛 煅牡蛎 炒怀膝

积劳咳嗽，气喘脉微。劳怯之根也，不易全愈。

西党参 炒怀膝 五味 枸杞子 川石斛 麦冬肉 炒苏子
橘白 款冬花 白茯苓

肺气不降，络伤肺热，咳血气喘；脉弦细无力。宜降气化痰之法。

西党参 代赭石 麦冬肉 川贝 款冬花 旋复花 炒怀膝
甜杏仁 橘白 枇杷叶

膏方

西党参 熟地 茯苓 炒枣仁 甜杏仁 款冬花 炙绵芪
黄肉 枸杞 煅牡蛎 麦冬肉 橘白

咳嗽失血，其根已深。近因肝郁不舒，渐至举动气喘；右胁作胀，胃不贪纳；脉形细数无力。此属肝肺肾三阴俱亏，虚怯已成，难期全愈也。拟润肺化痰法，接以纳气摄下之剂。未审少有效否。

紫菀茸 甜杏仁 五味子 川斛 炒怀膝 款冬花 川贝母
麦冬肉 橘白 枇杷叶

接方

炒熟地 沉香拌 麦冬 款冬 山药 紫石英 坎气 山黄肉
五味 橘白 怀膝盐水拌 胡桃肉

咳嗽多年，近兼喘急，得痰出而咳稍止，间有红色；脉沉软无力。此肺劳已成之象，不易全愈。扶过暑天，方得少安也。

生黄芪 炙桑皮 甜杏仁 川贝母 橘白 西洋参 地骨皮
款冬花 川石斛 枇杷叶

肺气不肃，咳痰不已，举动喘急；脉形未见弦数。不宜用偏阴之药，当从手太阴调治。然一时未能速效也。

党参 炒阿胶 甜杏仁 款冬花 霍斛 枇杷叶 洋参 生
黄芪 冬虫草 川贝母 橘白

丸方

大熟地 炙黄芪 山药 五味 川贝母 炙甘草 山黄肉

西党参 茯苓 麦冬 甜杏仁 枇杷叶 炼蜜为丸

劳嗽根深，近兼腹胀气喘。此肾水内亏，火不归根。高年患此，难治也。

炒熟地 五味子 山药 车前子 新会皮 怀膝 炒萸肉
甜杏仁 茯苓 建泽泻 胡桃肉

病经八载，血证根深。现在喘急咳痰，气不下降；脉虚微而数。此本元虚竭之象，炎夏如何得过耶？姑与一方而已。

炒熟地_{沉香拌} 麦冬 款冬花 橘白 牡蛎煅 枇杷叶 潞党参 甜杏 金石斛 怀膝炒 胡桃肉

复诊：外来之热已解，内发之热亦减，喘急不卧，其本病也。气有降无升，则胃益不和，而足欲浮肿矣。盛暑伤气，惟有益气降喘主治。

潞党参 代赭石 炙紫菀 款冬 茯苓 胡桃肉 旋复花
炒怀膝 金石斛 川贝 橘白

久咳见血，气喘神倦；六脉细微，四肢略肿，便溏胃闭。此系火不生土、土不生金之象，虚怯已成，难治。

炒熟地_{沉香拌} 制于术 橘白 款冬 牡蛎煅 枇杷叶 制附子 白茯苓 天冬 五味炙 胡桃肉

自夏及冬，血证虽属不发，而真阴亏竭，喘急不已；脉细软而神痿顿，水火两不济矣。天气渐寒，恐日形憔悴，姑与温纳根元一法。

干河车 炙龟板 枸杞子 天冬 紫石英 山药 大熟地
山萸肉 五味子 麦冬 胡桃肉 橘白

阴亏，肾气不摄，晚间必发喘急；脉形细数。舍纳补无策。

大熟地 五味 麦冬肉 淮山药 白茯苓 山萸肉 丹皮
煅牡蛎 紫石英 胡桃肉

每朝服八仙长寿丸四钱。

先患肛漏，后即吐血。现在咳喘神倦，右脉芤弦不摄。此金水两亏，气不归根也。怯疾已成，只图扶持岁月而已。

炒熟地 萸肉 麦冬 牡丹皮 茯苓 坎气 炙龟板 五味
川贝 淮山药 橘白

复诊：送投温补重剂，气喘神倦，略有气色，而水泛为痰，咳吐不已，总属肾水不摄也。夏令火炎，诸宜加意调护。

制附子 枸杞 五味 炙黄芪 法半夏 陈皮 炒熟地 萸肉 赭石煨 甜杏仁 白茯苓 胡桃肉

平昔多劳少逸，内伤外感，气阴两为所耗，以致骨热多汗，五心燔灼；舌紫绛而心滑脱液，脉形虚数，右关尺尤甚。可见真水大亏，虚阳不时游溢，则汗出无度，而咳喘并作矣。大势非轻，拟方备用。

龟板 人参 麦冬肉 炒知母 川贝母 枇杷露 生地 洋参 炙五味 天花粉 金石斛

肺气不降，下焦奔豚之气上升，喘急不已；脉弦而无力。非浅恙也，防汗脱。

熟地 枸杞 麦冬肉 川贝母 炒怀膝 橘白 党参 五味
甜杏仁 代赭石 胡桃肉 沉香

复诊：照前方去赭石、贝母，加牡蛎、萸肉。

又复：喘急稍平，下元之气大亏。且丸子调理，扶过夏令，庶可无虞。

西党参 熟地 萸肉 麦冬肉 淮山药 炒怀膝 炙黄芪
枸杞 五味 甜杏仁 白茯苓 胡桃肉

痼疾后失调，喘咳气逆，六脉扎软细数。气阴交亏之象。且曾患痰血，已近怯门，非浅恙也。急须静养珍摄，否则恐血证复作。

西党参 麦冬 甜杏仁去皮尖 煨牡蛎 川斛 橘白 炒阿胶 款冬 川贝母去心 制女贞 枇杷叶

肺俞受寒，哮喘痰升。急切不能平复。

炙麻黄 生黄芪 炙桑皮 法半夏 款冬花 光杏仁 炒苏子 淡黄芩 橘白 白果肉

天炎多汗，腠理不固，肺气不肃，哮喘旧患又作。宜护表，以泻

肺主治。

生黄芪 地骨皮 葶苈炒 光杏仁 川贝大枣 炙桑皮 炒
苏子 白前 海浮石 橘白

哮喘根深，兼之咳痰带红。此金水两脏受伤矣，焉能冀其全愈耶！

炙紫菀 光杏仁 白前 川贝 白茯苓 款冬花 炒苏子
桑皮 橘白 海浮石

《解山草堂医案》

王孟英

孙渭川令侄，亦患哮喘，气逆欲死。孟英视之：口渴头汗，二便不行。径予生石膏、橘（皮）、贝（母）、桂（枝）、（茯）苓、知母、花粉、杏（仁）、（紫）菀、海蜃等药，服之而愈。

耳姓妇，回族，患哮喘。自以为寒，频饮烧酒，不但病加，更兼呕吐泄泻。两脚筋掣，既不能卧，又不能坐。孟英诊曰：口苦而渴乎？泄（污）出如火乎？小溲不行乎？痰粘且韧乎？病者曰：诚如君言，想为寒邪太重使然。孟英曰：汝何愚耶？见证如是，犹谓受寒，设遇他医，必然承教，况当此小寒之候，而哮喘与霍乱，世俗无不硬指为寒者。误投姜、附，汝命休矣。予北沙参、生苡仁、冬瓜子、丝瓜络、竹茹、石斛、枇（杷）叶、贝母、知母、梔子、芦根、青果、海蜃、莱（菔）汁为方，一剂知，二剂已。

鲍继仲，患哮喘，每发于冬，医作虚寒治，更剧。孟英诊之：脉滑，苔厚，溺赤，痰浓。予知母、花粉、冬瓜子、杏（仁）、贝（母）、茯苓、滑石、梔子、石斛，服之而安。

张氏妇，患气机不舒，似喘非喘，似逆非逆，似太息非太息，似虚促非虚促，似短非短，似闷非闷，面赤眩暈，不饥不卧。补虚清火，行气消痰，服之不应。孟英诊之，曰：小恙耳，旬日可安。但必须惩忿，是嘱。予黄连、黄芩、梔子、棟实、鳖甲、羚羊角、旋覆、赭石、海

蜚、地栗为大剂，送服当归龙荟丸，未及十日，汛至，其色如墨，其病已若失，后予养血和肝调理而康。

邻人王氏妇之父王叟，仲秋患痰嗽不食，气喘不卧，囊缩便秘，心摇摇不能把握，势极可危。伊女浼家慈招孟英救之。曰：根蒂欲脱耳，非病也。以八味地黄汤 去丹皮、泽泻，合生脉散 加青铅、龙骨、牡蛎、紫石英、胡桃、楝实、苁蓉，（为剂投之）。大解行而诸恙减，乃减去苁蓉、麦冬，服旬日而瘳。

邵奕堂室，以花甲之年，仲冬患喘嗽，药之罔效。坐而不能卧者，旬日矣。乞诊于孟英。邵述病源云：每进参汤，则喘稍定。虽服补剂，仍易汗出，虑其欲脱。及察脉，弦滑石甚。孟英曰：甚矣！望、闻、问、切之难。不可胸无权衡也。此证当凭脉设治，参汤切勿沾唇。以瓜蒌、薤白、旋覆、苏子、花粉、杏仁、蛤壳、茯苓、青黛、海蜇为方，而以竹沥、（莱）菔汁和服。投匕即减，十余帖痊愈。

同时，有石媪者，患此，（病）极相似，脉见虚弦细滑。孟英予沙参、蛤壳、旋覆、杏仁、苏子、贝母、桂枝、茯苓（等药之）中，重加熟地而瘳。所谓病同体异，难执成方也。

张孟皋少府令堂，年逾古稀，患气逆殿屎，烦躁不寐。孟英切脉滑实，且便秘面赤，舌绛痰多。以承气汤下之，霍然。逾年以他疾终。

王致青鏊尹令正，患痰喘，胡某进补肾纳气，及二陈（汤）、三子（养亲汤）诸方，证濒于危。顾升庵参军令延孟英诊之：脉沉而涩，体冷自汗，宛似虚脱之证，惟二便不通，脘闷苔腻，是痰热为补药所遏，一身之气机窒痹而不行也。予（栝）蒌、薤（白）、旋（覆）、赭（石）、杏（仁）、贝（母）、梔（子）、（紫）菀、兜玲、海蛇、竹沥等以开降，复杯即减，再服而安。

王小谷，体厚善饮，偶患气逆，多医咸从虚治，渐至一身尽肿，酷肖《回春录》所载康副转运之证，因恳治于孟英。脉甚细数，舌绛无津，闻（间）有谵语。乃真阴欲匿。外证虽较轻于康，然不能收绩矣。再四求疏方。与西洋参、元参、二地、二冬、知母、花粉、（竹）茹、

贝(母)、竹沥、葱须等药,三剂而囊肿全消,举家忻幸。孟英以脉象依然,坚辞不肯承手,寻果不起。

吴蕴香大令宰金溪,自仲春感冒而起,迨夏徂秋,痰多气逆,肌肉消瘦,延至初冬,诸证蜂起,耳鸣腰痛,卧即火升,梦必干戈,凛寒善怒。多医咸主补虚,迄无小效,卧理南阳,已将半载,群公子计无所施,飞函至家,嘱大公子汾伯副车,叩求孟英来署,已仲冬之杪日矣。诊脉弦细,而左寸与右尺甚数,右寸关急搏不调,且病者颈垂不仰,气促难言,舌黯无苔,面黧不渴。孟英曰:病虽起于劳伤挟感,而延已经年,然溯其所自,平昔善饮,三十年来,期在必醉,非仅外来之客邪,失于清解,殆山内伏之积热,久锢深沉,温补杂投,互相煽动,营津受灼,内削痰多,升降愆常,火浮足冷,病相错杂,求愈殊难,既承千里相招,姑且按经设法。以石膏、知母、黄芩等清肺涤痰;青蒿、鳖甲、栀子、金铃等柔肝泄热;元参、女贞、天冬、黄柏等壮水制火;竹茹、旋覆、枇杷叶、橘红等宣中降气,出入为方,间佐龙荟丸,直泄胆经之酒毒,紫雪丹搜逐隧络之留邪,服三剂而舌布黄苔,蕴热渐泄。服六剂而嗽减知饥,渴喜热饮,伏痰渐化。季冬八日,即能出堂讯案。十剂后,凛寒始罢,足亦渐温,肺气果得下降。望日出暑行香。继而兵火之梦渐清,夜亦能眠,迎春东郊,审决积案,亦不觉其劳矣。方中参以西洋参、生地、麦冬充其液;银花、绿豆、雪羹化其积。至庚戌岁朝,各处贺年,午后护日,极其裕如,且肌肉渐丰,面黑亦退,药之对病,如是之神,调养至开篆时,起居如旧,各恙皆瘥,而孟英将赴宜黄杨时府之招,酝香为录其逐日方案,跋而记之,兹特采其大略如此。

鲍继仲,于季春望日,忽然发冷,而喘汗欲厥。速孟英视之,脉沉弦而软滑带数,是素患痰饮。必误服温补所致也。家人始述去冬服胡某肾气汤颇若相安,至今久不吐痰矣。孟英曰:病在肺。肺气展布,痰始能行。虽属久病,与少阴水泛迥殊,辨证不明,何可妄治?初服颇若相安者,方中附、桂刚猛,直往无前,痰亦不得不为之辟

易，又得地黄等厚浊下趋之品，回护其跋扈跳梁之性。然暴戾之气，久而必露，柔膩之质，反阻枢机，治节不伸，二便涩少，痰无出路，愈伏愈多。一朝卒发，遂壅塞于清阳升降之路，是以危险如斯。须知与少阴虚喘，判分霄壤。切勿畏虚妄补。投以薤（白）、（栝）蒌、枳（实）、杏（仁）、旋（覆）、赭（石）、半（夏）、紫（菀）、（竹）茹、芦根、蛤粉、雪羹之剂而平。继与肃清肺气，而涤留痰，匝月始愈。

潘肯堂室，仲冬陡患气喘，医治日剧。何新之诊其脉，谓常候，嘱请孟英质焉。孟英诊曰：两气口之脉，皆肺经所主，肺为华盖，气不流行。虚促虽形，未必（即）为虚谛。况年甫三旬，平昔善饭，病起于暴，苔膩痰浓，纵有足冷面红，不饥、不寐、自汗等症，无非痰阻枢机，有升无降耳。遂与石膏、黄芩、知母、花粉、旋覆、赭石、蒌仁、通草、海蜃、竹沥、（芦）根汁、梨汁等药，一剂知，二剂平。乃去“二石”（石膏、赭石），加元参、杏仁，服旬日而安。俟其痰嗽全蠲，始用沙参、地黄、麦冬等，以滋阴善后。

余朗斋令堂，秋间患伏暑，孟英已为治愈，失于调理，复患气冲（喘）自汗，肢冷少餐，攻补不投，仍邀孟英治之。与填补冲任，清涤伏痰法，合甘（草）、（小）麦、大枣以补血而愈。

《王氏医案》

林佩琴

王。丹溪治哮专主痰，每用吐法，不用凉剂，谓寒包热也。今弱冠已抱宿根，长夏必发，呼吸短促，咳则汗泄，不能平卧，脉虚，左尺搏大，不任探吐，乃劳力所伤。暂与平气疏痰，俟哮咳定，当收摄真元。先服桑白皮汤去芩、连、梔、夏，用桑白皮蜜炙、甜杏仁炒研、茯神、竹茹、贝母、苏子炒研、薄橘红。数剂后，服生脉散、潞参、五味、麦冬，加海浮石、海螵蛸、远志肉、山药、炙草、茯苓。

巫妇。梅夏宿哮屡发，痰多喘咳，显系湿痰郁热为寒邪所遏。暂用加减麻黄汤温散。麻黄三分、桂枝五分、杏仁二钱、苏叶、半夏制各钱

半、橘红一钱、桔梗八分、姜汁三匙，二服后随用降气疏痰：栝蒌皮、桑皮俱炒，一钱、贝母、杏仁俱炒研。各二钱、海浮石三钱、前胡、枳壳各八分、苏子炒研，六分、茯苓二钱、姜汁三匙。

数服哮喘除。

赵。衰年哮喘痰红，舌焦咽燥，背寒，耳鸣颊赤，脉左弦疾，右浮洪而尺搏指。按脉症系冬阳不潜，金为火烁，背觉寒者，非真寒也。以父子悬壶，忽而桂、附，忽而知、柏，忽而葶苈逐水，忽而款冬泄肺，致嗽血益加，身动即喘，坐则张口抬肩，卧则体侧喘剧，因侧卧则肺系缓而痰益壅也。思桂、附既辛热助火，知、柏亦苦寒化燥，非水焉用葶苈，泄热何借款冬，细察吸气颇促，治宜摄纳。但热蒸臑痰，气冲咽痛，急则治标，理先清降。用川百合、贝母、杏仁、麦冬、沙参、牡蛎、阿胶水化，燕窝汤煎。一嗽嗽定而痰红止。去杏仁、牡蛎、阿胶，加生地、竹茹、丹皮、元参、羚羊角午服，以清上中浮游之火，用熟地、五味、茯神、秋石、龟板、牛膝、青铅晚服，以镇纳下焦散越之气，脉症渐平。

族某。七旬以来，冒寒奔驰，咳呕喘急，脉弦滑，时暖冷气。夫寒痰停腕必呕，宿痰阴气必咳。老人元海根微，不任劳动，劳则嗽，嗽则气升而喘，必静摄为宜，仿温肺汤，用辛温止嗽以定喘。淡干姜、五味、干姜、五味摄太阳而定喘，古人治嗽喘，必二味同用。桑皮炙、茯苓、潞参、甜杏仁、橘红、制半夏、款冬花、紫衣胡桃，数服喘呕俱定，十服全瘳。

贡。积年痰嗽，脉细形衰，动则疝气偏坠，病因肝肾久损，客冬心事操劳，身动即喘，痰嗽益剧，肉消骨立，是五液悉化为痰，偏卧不舒，是阴阳亦乖于用，所谓因虚致病，积损成劳候也。右脉沉数无力，左脉浮数无根，良由下元真气失纳，以致下引上急，吸入颇促而为短气，若不纳使归源，将下元根蒂都浮，喘嗽何由镇静，况症本肾虚水泛为痰，必非理嗽涤饮可效。奈何胆星、竺黄、芥子、芩、柏等无理乱投，不知顾忌。昨议服固摄之品，痰气较平，而脉象未改，是损

极难复，维系不固，有暴脱之忧。今酌定晨服都气丸加参、术、远志、故纸，晚服肾气汤去萸、泻、丹皮、桂、附，加茯神、五味、杞子、沙苑子、莲子、枣仁。冀其气平而痰嗽自定。

李。喘由外感者治肺，由内伤者治肾，以肺主出气，肾主纳气也。出气阻而喘，为肺病，吸气促而喘，为肾病。今上气喘急，遇烦劳则发，不得卧息，必起坐伏案乃定，近则行步亦喘，是元海不司收纳之权，致胶痰易阻升降之隧，急急摄固真元。熟地炭、牛膝炭、茯神、五味、萸肉、补骨脂、莲子俱炒。数服颇安。

岳。少年体质阴亏，兼伤烦劳，脉虚促，热渴颊红，痰血喘急，速进糜粥以扶胃，食顷喘定，症宜清调肺卫，润补心营。甜杏仁、阿胶水化、沙参、川贝、茯神、枣仁、麦冬、石斛、萸仁、黄芪蜜炒。三服脉匀症退。继进燕窝汤，嗽喘悉止。治以培土生金，潞参、山药、炙草、玉竹、五味、茯神、杏仁、莲子、红枣，食进。丸用加减都气而安。

服侄。初春脉左弦长，直上直下，喘嗽吐红，梦泄。冬阳不潜，足少阴经与冲脉同络，阴虚火炎，气冲为喘，络伤为血，乃元海根蒂失固。医者不知纳气归原，泛用归、芪、术、草，症势加剧，寒热咳逆，血升气促，冲脉动诸脉皆动，总由肺肾失交，急急收纳，务令阳潜阴摄。阿胶水化、牡蛎醋煨、龟板酥炙、龙骨煨、五味、山药、高丽参、茯神、枣仁、坎气焙研。数服嗽平血止，去坎气，加青铅，冲气亦定。

倪。年近七提，木火体质，秋嗽上气喘急，痰深而黄，甚则不得卧息，须防晕厥。治先平气定喘。蜜桑皮、苏子、杏仁、川贝母、茯神、栝蒌、百合。二服后，加白芍、麦冬。述旧服两仪膏痰多食减，今订胶方，减用熟地砂仁末拌熬晒干，四两、高丽参一两、茯苓三两、甜杏仁炒研，五两、莲子八两、枣仁一两，枇杷膏四两、燕窝两半、橘红八钱、贝母一两、山药三两、阿胶一两，各味熬汁，阿胶收，开水化服。

某。肾不纳气则喘息上奔，脾不输精则痰气凝滞。今痰哮不利，呼吸颇促，病本在脾肾，而肺胃其标也。由冬延春，脉候若断若续，忽神烦不寐，语澹舌灰，虚中夹湿，治先清降。杏仁、栝蒌、象贝、茯

神、潞参，菖蒲汁冲服。一剂嗽定得寐，舌苔稍退，进粳米粥，喘息乃寤，脉见虚促，急用纳气归原，冀根蒂渐固。高丽参、五味、牛膝炭、远志、茯神、杞子、莲子、牡蛎粉，六服。间用七味地黄丸而安。

堂弟。肺主出气，肾主纳气。今肾少摄纳，时交惊蛰，阳气大升，两关尺通滑兼弦，气由冲脉逆冲而上，子夜阳动，喘嗽汗泄，必起坐不能安卧，皆真元不纳之咎。屡用参芪保固，肺脾既属不济，即用知柏，名为滋肾，岂能骤安。仿叶氏镇摄法，青铅三钱、牡蛎煅研，钱半、茯神三钱、五味八分，炮姜四分。远志炒炭钱半、故纸盐水炒，一钱。三服气平喘止，饮食大进，弦脉顿减，后用峻补膏方得痊。

堂弟。呛嗽气急，脉弦数，适逢秋令，予谓此火刑金象也，当滋化源。以自知医，杂用梨膏止嗽，予谓非法。入冬寒热间作，厥气冲逆，灰痰带红，良由阳亢阴亏，龙雷并扰，冬藏不密。今近立春，地气上升，内气应之，喘嗽势必加重，拟方阿胶烊化、山药炒，各二钱。洋参、熟地炒、茯神、藕节各三钱、川贝母炒研，一钱、甜杏仁炒研，钱半、枣仁炒研，八分、五味五分。数服颇效。又五更服燕窝汤，晚服秋石汤，降虚火而喘定。

《类证治裁》

方南薰

蔡耀南，临邑武夫也。善修养，能使口中津液送至丹田，气血流走周身，上贯泥丸，满而不溢，故生平无病。居乡偶感风寒，医者不察，投以麻黄、桂枝一剂，遂扰动元气，喘息抬肩，逆呃不止，迁延七日，来省求治。予诊其脉。幸而未散，因用高丽参二钱以益气，熟地八钱以滋阴，炒枣仁以收心气之散，山茱萸以收肝气之散，炒白芍以收脾气之散，北五味以收肺气之散，益智仁以收肾气之散，龙骨、牡蛎、龟板以潜入阴分，连服三剂，呃声渐减。再加白术、茯苓以镇中州，由是周身之气翕然归根，呼吸如旧。

同乡魏姓少妇，偶沾感冒，请医服表药二剂，因用细辛太重，开

发肺窍，扰动少阴，以致气出如喷，饮食不下。迎余视之，见其面色拂郁，手足掣跳，难以定诊。少顷，病势少懈，诊之脉上涌无根，未几复喘，此时纵用药得当，滴水不能吸受，可若何？别思良法。令将秤锤烧红淬醋，使酸气入鼻，稍宁片刻，庶几煎药可入。如法行之，气促略平，随用洋参二钱，五味二钱，麦冬一钱，炒白芍一钱五分，极力收敛，二剂而安。

《尚友堂医案》

抱灵居士

一中年，舟上受风，面肿。曾服解表利水顺气之品，屡服牵牛、甘遂之类，泻黄水面消。

数月气虚作喘，五更泻二、三次，以补中益气、济生肾气不效，气上喘咳，足胀，溺多，脉虚大，关数小，此脾肾两虚、气不归元也。以熟地、淮山、牛膝、故纸、炙草、沉香、青铅、归、麦、味、桂、附三剂，喘定，五更泻四次，口干；以前方加寸冬则烦，溺多便频；以四神丸不效；以八味去泽、苓、丹加益智、五味、故纸，牛膝、青铅三剂好，夜发热，视灯光有碗大，咳甚，此助阳阳不回，而阴又亏也，法在不救。后或虽用十全归脾养荣之类不应，终至发笑而危，则心火之炎可知。

《李氏医案》

顾德华

张。前进养血平肝法。哮喘减轻过半，脉息左数右弦，心中似乎烦扰，寐不安帖，癸水将至。营虚血热，再防反复，当加意养金水为妙。

乌犀尖一钱五分 细生地四钱 杜苏子五分 秦艽一钱五分
羚羊角一钱五分 瓜蒌皮三钱 莱菔子一钱五分 白薇一钱五分
川贝母三钱 银杏肉三钱 左金丸五分

又诊：喘哮每发于经至之前，营虚显然矣。今值癸水将至，其病必发，无外感可驱。急先存阴平木，兼以治风先治血法，冀能由渐转轻为幸。

羚羊角二钱 广郁金五分 焦杏仁三钱 归身一钱五分
细生地四钱 瓜蒌皮三钱 怀牛膝二钱 赤芍五分 秦艽一钱五分
川贝母三钱 银杏肉三钱 左金丸五分

《花韵楼医案》

蒋宝素

《内经》无哮喘之名，有肺痹、肺壅、息奔之旨。《难经》有肺积、息贲之论。《金匱》有胸痹、短气之条。后世又有呷嗽、黠嗽、齁齁诸症，皆其类也。由于先天不足，酸咸甜味太过，为风寒所袭，幻生痰饮，如胶如漆，为窠为臼，粘于肺系之中，与呼吸出入之气搏击有声。起自幼年，延今二十余载，终身之累。现在举发，疏解豁痰为主。平复后，脾肾双补为宜。

淡豆豉 紫苏子 桑白皮 款冬花 苦杏仁 制半夏 陈橘皮 海螵蛸 白螺壳 银杏

四进疏解豁痰之剂，哮喘已平，浊痰亦豁。自当培补脾肾，以求其本。褚侍中、李东垣补脾肾各有争先之说，莫若双补并行不悖为妙。即以《医话》脾肾双补丸主之。

人参 黄芪 冬白术 当归身 炙甘草
制半夏 陈橘皮 云茯苓 广木香 酸枣仁 远志肉 大熟地 粉丹皮 建泽泻 怀山药 山萸肉
水叠丸。早晚各服三钱，滚水下。

脉来滑数，数为热，滑为痰，痰热郁于肺中，清肃之令不降，哮喘痰鸣，巅痛，唇干舌燥，溲浑，食减。宜先清肃肺金。

南沙参 桑白皮 地骨皮 苦杏仁 甜桔梗 生甘草 白知母 黄芩 羚羊片 活水芦根

清肃肺金，已服三剂。哮喘稍平，痰声渐息，数脉渐缓。饮食未畅，溲色未清，巅顶犹疼，唇舌仍干。原方加减。

北沙参 大麦冬 甜桔梗 羚羊片 黄芩 白知母 生甘草
甜杏仁 活水芦根

原方加减，又服四剂。饮食较进，哮喘大减，巅疼、唇燥、舌干俱已。惟溲色犹浑，值暑湿司权，金令不肃，移热州都，仍宜清上。

北沙参 甜杏仁 天门冬 大麦冬 甜桔梗 生甘草 川贝母
瓜蒌皮 白知母 黄芩 活水芦根

清上之法，又服六剂。溲色已清，诸症悉退，眠食俱安，形神复振。哮喘既平，自宜清补，近交秋令，最得时宜。仍以清上为主，实下辅之。

南沙参 北沙参 天门冬 大麦冬 白知母 川贝母 大熟地
大生地

水叠丸。早晚各服三钱。

哮喘虽有伏风，总是湿痰盘踞脾肺曲折之处，回搏经络交互之间，岂铢两之丸散所能窥其繁臈，故前哲在立秋前后，用攻剂捣其巢穴，

今值其时，拟三化汤下之。

生大黄 朴硝 枳实 川厚朴 姜活 皂角炭

连进三化汤，大下痰涎、结粪盈盆，哮喘立止。宜戒酸、咸、甜味。再以《医话》阳和饮加减为丸，以善其后。

大熟地 麻黄 怀山药 山萸肉 鹿角霜 人参 白芥子
油多肉桂 制附子 赤茯苓 猪牙皂角 白枯矾

水叠丸。早晚各服三钱。

喘在子、丑、寅之时，阳气孤浮于上可据。法当纳气归源，导龙归海。金匱肾气加味主之。第肾不纳气，本是危疴，多酌明哲。

大熟地 粉丹皮 建泽泻 怀山药 山萸肉 赤茯苓 制附子
上肉桂 人参 车前子 怀牛膝 鹿茸

连进金匱肾气加减，喘促渐平，脉神形色俱起，肾气摄纳有机。肾乃立命之根，阳无剥尽之理。纳气归源，导龙归海，前哲良规，依方进步。

大熟地 怀山药 山萸肉 赤茯苓 怀牛膝 制附子 油多
肉桂 当归身 枸杞子 人参 鹿茸

金匱肾气加减，又服六剂，喘促虽定，反觉痰多。痰即肾水津液，脂膏所化，犹乱世盗贼，即治世良民，法当安抚。且金匱肾气能治痰之本，依方加减为丸，以善其后。

大熟地 怀山药 山萸肉 赤茯苓 菟丝子 制附子 油肉
桂 怀牛膝 鹿茸 当归身 枸杞子 人参
水叠丸。早晚各服三钱，淡盐汤下。

《问斋医案》

曹存心

年逾古稀，肾气下虚，生痰犯肺，咳喘脉微，当与峻补。

金水六君煎麦、地、橘、夏、苓、草。合生脉散 加桃肉

另八仙长寿丸 肾气丸

原注：补命门之火以生土，清其生痰之原，则肺之咳喘自宁。煎方金水六君煎以治脾肾，生脉以养肺，桃肉以补命门。其奠安下焦之剂，另用丸药常服，斟酌可谓尽善矣。

气喘痰升，胸痞足冷，是中下阳虚，气不纳而水泛也。已进肾气汤，可以通镇之法继之。

旋覆代赭汤去姜 枣 合苏子降气汤去桂前草姜 加薤白
车前 茯苓 枳壳

治按：于肾气后续进此方，更加旋、赭以镇逆，薤白以通阳，用意极为周到。

交冬咳嗽，素惯者也。今春未罢，延及夏间。当春已见跗肿，入夏更增腹满，口燥舌剥，火升气逆，右脉濡数，左脉浮弦。风邪湿热

由上而及下，由下而及中，即经所云：久咳不已，三焦受之，三焦咳状，咳而腹满是也。际此天之热气下行，小便更短，足部尚冷，其中宫本有病象，亦从而和之为患，用药大为棘手。姑拟质重开下法，佐以和胃泄肝之品。

猪苓 鸡金 白术 石膏 寒水石 雪羹 肉桂 枇杷叶

原注：风邪归并于肺，肺气素虚者，由肺而陷入于脾，尚是一钱；加以口燥舌剥，阴虚有火之体，更属难治。用河间甘露之意，质重开下，方则极妙，未识效否？

治按：病情纷错，实难著手，以桂苓法增减出之，已属苦心经营。特于痞满一层，尚恐与两石有碍，方中茯苓、滑石，似不可少。

寒热后咳嗽痰浓，头疼口渴，舌红脉数，大便溏泄。冬温之邪郁于肺分，而从燥化，当泄之清之。

葳蕤汤 葳蕤、石膏、青木香、薇、麻、芎、葛、羌、草、杏。

原注：此冬温咳嗽也。麻杏开泄外罩之凉风，羌活、葛根佐之；石膏清内伏之温热，白薇、玉竹佐之。冬温必头痛便泄，青木香治便泄之药也。病比伤寒多一温字，方比麻黄去桂枝一味，加入石膏以治热，有因方成珪遇圆为璧之妙。

治按：此病即见痰浓口渴，则已有邪郁化热之征。方中羌、防、葛根，似宜酌用。

寒必伤营，亦必化热，咳嗽不止，呕吐紫血，咽中干痛，苔白边青，脉紧而数，近更咳甚则呕，气息短促。肺胃两经皆失其清降也。郁咳成劳，最为可怕。

荆芥 杏仁 紫苑 桑皮 地骨皮 苏子 麦冬 金沸草
玉竹

再诊：白苔已薄，舌边仍青，痰出虽稀，咳逆未止。观其喘急呕逆，多见于咳甚之时。正所谓肺咳之状，咳而喘；胃咳之状，咳而呕也。

桑皮 骨皮 知母 川贝 淡芩 浮石 桔梗 甘草 紫苑

麦冬 芦根 莱菔汁

原注：风寒之邪，郁于肺胃，久而化火，遂至见血，先用金沸草散、泻白散，以搜剔其邪。第二案即加入芦根、知母，清营中之热。用法转换，层次碧清。

治按：此证先曾吐瘀，加以舌边色青，似有瘀血郁阻。方案中何以并不理会及此！

伤风不醒，咳嗽呕恶，所见之痰，或薄或浓，或带血色。左关脉独见浮弦且数，小有寒热，此损证之根也。千金法治之。

苏叶 党参 川连 乌梅 橘红 川贝 柴胡 杏仁 桑皮 地骨皮

原注：此用柴前连梅煎意，千金法也。咳嗽由来十八般，只因邪气入于肝，即是此方之歌诀。此方效，转方加竹茹一味。

治按：弦数独见于左关，故知其病专在肝。

咳嗽吐出青黄之痰，项强恶风音烁，寒热分争，是名劳风。服秦艽鳖甲而更甚者，当进一层治之。

柴前连梅煎 柴胡、前胡、黄连、乌梅、薤白、猪胆汁、童便、猪脊髓。

附 秦艽鳖甲煎 秦艽、鳖甲、地骨皮、柴胡、青蒿、归身、知母、乌梅。

再诊：进前方咳嗽大减，所出之痰，仍见青黄之色，身热虽轻，咽中苦痛，脉形弦细数。风邪未尽，中下两虚，制小前方之外，参入猪肤法，一治身热，一治咽痛。

柴前连梅煎合猪肤汤 加党参 花粉

原注：此方治伤风不醒成劳，比秦艽鳖甲又进一层。其见证每以咳吐黄绿青痰为据。

咳嗽，时盛时衰，粉红痰后变为青黄，劳风之根也。

柴胡 前胡 乌梅 川连 薤白 童便 猪胆汁 猪脊筋

治按：童便易秋石甚妙。

再诊：进劳风法，咳嗽大减，红痰亦无。但痰色尚带青黄，左关脉息弦硬不和，肝胆留邪容易犯肺胃俞也。毋忽。

麦冬 沙参 淡芩 炙草 白芍 川贝 青黛 广皮

原注：此方极玲珑，先生用之每灵。大约风喜伤肝，风郁于肝，久而不出，必有青黄之痰，所谓劳风是也。

治按：先生案中治劳风一证。必用柴前连梅煎，自云法本千金，用之神效。查《千金方》所载劳风治法，及所叙病原，与此不同，即所用之柴前连梅煎，仅见于吴鹤皋《医方考》，《千金方》中并无此方，先生偶误记耳。

右脉弦滑而数，滑为痰。弦为风，风郁为热，热郁为痰，阻之于肺，清肃不行，咳嗽自作。

金沸草 前胡 半夏 荆芥 甘草 赤苓 川芎 枳壳 紫菀 杏仁 桑白皮 萎皮 竹沥

原注：方中芎、枳二味，是升降法也。必有一团寒风化热，郁闭于肺，用芎之升，枳之降，以挑松其火；若火重者不可用，有阴火者更不可用，恐火升则血易动耳。

治按：此金沸草散去麻、芍，加芎、枳，以挑动之，菀、杏以宣泄之，桑、萎以清降之。细玩其加减，可识其心思之细密，用意之周到矣。案语亦简炼老洁。

晨起咳嗽，劳倦伤脾，积湿生痰所致。久而不已，气喘畏风，金水因此而虚，补中寓化，一定章程。现在身热口干苔白，脉息细弦而紧；紧则为寒，寒风新感。必须先治新邪，权以疏化法。

香苏饮合二陈 加枳壳 桔梗 杏仁 通草

又接服方：

麦门冬汤合二陈 加旋覆 冬术 牛膝

治按：此即六君加麦冬、旋覆、牛膝也，恰合脾虚有湿痰，而伤及金水者之治。

《内经》云：秋伤于湿，冬生咳嗽。喻氏改作秋伤于燥，冬生咳嗽。岂知初秋之湿，本从夏令而来，原为正气，若论其燥，则在中秋以后，其气亦为正令，二者相因，理所固然，势所必至。仲景早已立

方，独被飞畴看破，今人之用功不如古人远矣。

麦冬 半夏 甘草 玉竹 紫菀 泻白散

原注：此麦门冬汤也。先生以肺燥胃湿四字提之，故此案以燥湿二字为言。

去冬咳嗽，今春寒热，至秋令而咳嗽或轻或重。惟喉痒则一。所谓火逆上气，咽喉不利，此等证是也。最易成劳，未可以脉未促，气未喘为足恃。

麦门冬汤合泻白散 加橘红 茯苓 甘草 玉竹

再诊：内热已除，咳嗽亦减。气火之逆上者，渐有下降之意。静养为佳。

前方加枇杷叶

原注：此病必有舌苔，而不夜咳，所以与四阴煎证有异。

肺经咳嗽，咳则喘息有音，甚则吐血；血已止，咳未除，右寸脉息浮弦，弦者痰饮也。良以饮食入胃，游溢精气，上输于脾，脾气散精，上归于肺；而肺气虚者，不能通调水道，下输膀胱，聚液为痰，积湿为饮，一俟诵读烦劳，咳而且嗽，自然作矣。补肺健脾，以绝生痰之源，以清贮痰之器。

麦门冬汤合异功散 加薏仁 百合

原注：此曲曲写出痰饮之所由来。用二陈以化痰，佐以薏米；用麦冬以养肺，佐以百合；用白术以健脾，佐以党参。味味切当熨帖，看似寻常，实是功夫纯熟之候。

论按：以上数案，均是麦门冬汤证，乃燥湿互用之法。

《柳选四家医案》

何平子

气亏表弱，不时寒热，营络空虚，气喘火升，六脉不甚有力，须气阴兼顾。

真西党 北沙参 蛤粉炒阿胶 茯神 淮山药 制透于术

枸杞子 焙麦冬 橘白 临服入化青盐少许

又方：连进补剂，并不膈胀作痛，不但营液有亏，表阳亦不固密。宜用重剂频补，庶乎奏效。

西党参 熟地 茯神 炒枣仁 煅牡蛎 北沙参 怀膝 麦冬 川百合 加藜肉三钱

肺气不足，痰喘频发。以密腠理降气，徐徐安痊。

炙黄芪 沙参 熟地 款冬 杞子 苏子 橘白 麦冬 半夏 桑叶

复诊：元气久虚，咳喘频发，此非外感，可用丸子调理。

炙芪 麦冬 淮膝 牡蛎 真白前 沙参 甘菊 橘白 云苓

丸方：炙芪 麦冬 法夏 淮膝 杞子 熟地 五味 橘白 牡蛎 胡桃霜

中虚挟湿，湿化为热，以致气喘肉削，右脉滑数。先用健脾分理，再进温补。

生于术 云苓 款冬 生米仁 石决明 法半夏 苏子 橘红 小郁金

接方：西党参 法半夏 茯神 新会皮 枸杞子 生于术 益智仁 菟丝子 牡蛎 胡桃肉

复：气虚火微，多痰喘逆，纳食无味，亦属下焦真火不充也，仍拟培土助元阳法。

制于术 菟丝子 甘杞子 橘白 茯神 西党参 法半夏曲 款冬花 川贝

丸方：西党参 菟丝子 甘杞子 半夏曲 橘白 制于术 茯苓 五味肉 麦冬 淮膝 沉香末 干河车 淡蜜水法丸

元阳气亏，兼之喘逆，右脉洪数，金水交亏也，甚为棘手。

自注：并有疝气。

真西党三钱 北沙参二钱 枸杞子二钱 橘白一钱 牡蛎煨五钱

大熟地四钱 麦冬肉二钱 炒淮膝二钱 川百合三钱 枇杷叶钱半
胡桃肉二个

喘咳稠痰转剧，咽痛脉弱，此非有余之火克金，乃气虚肝液亏也。若再投凉剂，必至脾胃困败矣。须重剂滋补，图其奏效。

大熟地 川贝 橘白 焙麦冬 茯苓 制于术 枸杞 天竺黄 淮山药 建莲

膏方：党参 于术 枸杞 燕屑 北沙参 熟地 茯苓 枇杷叶 胖海参 建莲肉

煎汁去渣，另研川贝粉一两 百合粉一两 沉香末三钱
人中白三钱 同入收膏

《壶春丹房医案》

曹存心

憩岩杨。中虚湿热，生痰生饮，为咳为嗽，甚至为喘。喘出于肺，关于肾，肺病及肾，水失金之母也。如此日虚一日，而所患之湿热苑蒸于内，化热伤阴。溺黄、口干、口苦、苔白，脘痞，头昏耳闭，小有寒热等症继之于后，更觉无力以消。所以右脉虽空，其形弦大且数，左部虽沉，仅见弦急不舒。从肺肾立方，本属堂堂正正，无如湿热反蒸乎？

甘露饮去草，水泛资生丸，取炒香花生果肉煎汤代水。

复诊：寒热一除，精神有半日之爽，未见复蹈前辙。是湿邪尚盛为热，热又蒸湿，蒙其清窍。将前之减其补者，重乎清降。

大生地 麦冬 半夏 茵陈 西洋参 川斛 枳壳 苏子
枇杷叶 桑皮 通草 竹沥

《延陵弟子纪要》

费伯雄

某。痰火内郁，风寒外束，哮喘发呃，脉滑舌腻。化痰肃降。

蜜炙麻黄三分 苏子霜一钱 杏仁三钱 橘红一钱 法夏二钱
象贝三钱 萎仁三钱 赭石三钱 旋覆花包,二钱 海浮石三钱
桑皮三钱 款冬二钱 杷叶炙,三钱 沉香三分

某。素有哮喘之疾,近因外邪触发,痰稀脉细。寒湿之邪,非湿不解,桂枝合六安煎加減。

西桂枝三钱 中朴姜炒,一钱 制半夏一钱半 白芍酒炒,一钱半
当归二钱 茯苓三钱 炙草四分 炙紫菀一钱半 上沉香三分
杜苏子炒,二钱 旋覆花包,一钱半 浮水石三钱 生姜一片 大枣一枚
枇杷叶去毛、蜜炙,四钱

某。风痰堵寒肺之小管,而为哮喘。痰鸣气不能降,夜不能睡,脉象浮滑。治当三子养亲汤加味调之。

苏子霜一钱 白芥子一钱 莱菔子三钱 法夏二钱 赭石三钱
旋复花包,一钱半 枳实一钱 陈皮一钱 桂枝四分 马兜铃三钱
茯苓三钱 炙草四分 沉香三分 竹茹一钱半

某。痰气哮喘,肺气不降,肾气不纳,脾多湿痰,呛咳而喘。宜扶土化痰,降纳气机。

家苏子 制半夏 橘红 瓜蒌仁 象贝 桑皮 郁金 怀牛膝
云苓 杜仲 生熟苡仁 甜杏仁 补骨脂核桃拌炒,各三钱
沉香三分

某。气喘汗流。宜酸甘化阴。

旋覆花包,一钱半 怀牛膝二钱 人参五分 麦冬二钱 五味四分
杜仲三钱 象贝三钱 杏仁三钱 牡蛎煅,三钱 补骨脂一钱
橘红一钱

某。肺胀而喘,欲卧不得,面红流汗,系肾气不纳故也。

川贝三钱 潼白蒺藜各三钱 五味子十粒 天竺黄二钱
牡蛎煅,四钱 伽南香四分

《费伯雄医案》

李铎

吴氏妇，年四十余，气喘而急，咳嗽痰鸣，稠痰带红，胸胀而痛，不能欹卧，面色黯瘁，唇淡白，昏冒闭厥，脉细欲绝。以脉象形色而论，似属产后虚损之证，据所见病候，又是热积痰凝之状，询其家人辈，述因郁气及嗽久服糖食过多，以为顺气化痰，詎知水桶糖食助热生痰，且甘能令人满，是以食下即满闷，比际本元固虚，而标证更急，当舍脉从证治，加味四七汤。

杏仁 半夏 川朴 茯苓 苏子 香附 神曲 北沙参
竹沥一羹匙，姜汁一茶匙刺，入服。

又 昨方颇效，大吐稠痰，诸候渐平，爰议固本，兼治其痰。

高丽参 茯苓 沉香 苏子 橘红 半夏 神曲 厚朴 竹
沥

此方服二帖，气顺痰下，食进病除。

东坑傅姓妇，年五旬余，论哮喘证之发，原因冷痰阻塞肺窍所致，故遇寒即发者居多。盖寒与寒感，痰因感而潮上也，此番加以食冷物糍果，犹滞其痰，肺窍愈闭愈塞，呼吸乱矣，脉亦乱，而哮喘自加甚。是以旬日来不能安枕，困顿不堪，时际严寒，虽拥衾靠火，难御其寒，非重用麻、杏、细辛猛烈之性不能开其窍而祛其寒，佐以半夏、厚朴、苏子而降气行痰，再加麦芽、神曲消食导滞，引以姜汁利窍除痰，连服四剂，必有效也。

此方服二剂，即能就诊而卧，可谓奏效之速，其子持方来寓云：乃母言药虽见功，而不敢再进，求易方。余晓之曰：麻辛虽猛烈，能发汗，一到此症，虽盛夏之月，孱弱之躯，不发汗，不伤气，何况此严寒冻栗之际，冷痰塞窍之病，非麻辛不能通痰塞之路，非诸苦降辛通佐使之味不能除冷滞之气，且既获效，又何虑焉。令其照方再服二帖，必痊愈。但不能即刈其根而不复发也，宜常服药，歼其痰伏之魁，拔其痰踞之窠，庶或能除其根耳。

肺膈之寒气与肺膜之浊痰，窒塞关隘，非猛烈药，何以奏效。

寿山

余某，年六旬，气喘逾月，医用疏肺降气法不效。此病在肾，非肺胀实证，乃肾虚而喘也，议都气丸加附子，沉香、淮牛膝十余帖而愈。

杨秉南，年五十余，面色鲜明为饮，脉息细沉为虚，气喘入暮加甚，明是浊饮上干。按饮为阴邪，阳虚不能旋降，冲逆不得安卧，当宗仲景真武法加减。

附子 川姜 茯苓 沉香 白芍 泽泻 山参

汪某，五旬有六，阳气渐衰，过服阴药，渐至气喘不续。昨用摄纳定喘之法，原以下元已虚，肾不纳气，痰饮随地气上升而作喘，依理应奏效，服之气更喘。细思浊饮自夜上干，填塞隧道，故阳不旋降，冲逆不得眠卧，于夜分更甚。法当通阳，议仲景真武加桂主之。

喘证之因，在肺为实，在肾为虚，此为喘证提纲。然实证宜分寒热，虚证宜分精伤气脱。

喘促者，气上冲而不得倚息也，当与痰饮咳嗽、哮证参看。寿山

余某，年五十余，形躯丰盛，病气喘。视其面色青如蓝，身汗如油，四肢逆冷，诊脉皆紫紫如蛛丝。与其子曰：病不及是夜矣，果如斯而逝。又朱家巷一车夫，东乡人，五鼓敲门请诊，脉沉于筋间，劈劈急硬如弹石，声如拽锯，鼻气有出无入，能呼而不能吸，此肾气绝也。余亦断以不出是夜死，次早果殁。

喘证之因，在肺为实，在肾为虚。此二证皆肾真已绝，气脱则根浮，吸伤元海，危亡可立而待。且《素问·五色生死篇》曰：色见青如草滋者死，黑如炁者死。又《审治篇》曰：病不许治者，病心不治，治之无功矣。

分局罗巡丁，年四旬，形肥而长，素有喘病。三月间因差务驱驰，劳力冒风寒，喘甚气上冲而不得倚息者月余，服药不效，形容黧瘁，不能食，余诊得右脉虚滑，左沉细，所喜手足温暖若四肢逆冷不治，

初以附子、麻黄、杏、朴、苓、半、甘草、桂枝、生姜煎服，气略平以此先治外邪。因其痰饮甚多，投椒、附、桂、苓、半夏、甘草、生姜通阳祛饮，不应，而声如拽锯，形状甚危，复依得石脉，虚滑无力，与七气汤高丽参、当归、肉桂、炙甘草合青娥方故纸、胡桃一帖，喘急大减，再剂喘定气平，即能着枕正偃，并可纳食，令其层进数剂寻愈。

陈修园曰：喘者气上冲而不得倚息也，有内外虚实四证，外则不离乎风寒，内则不离乎水饮，实则肺胀，虚则肾虚，宜分别治之。余按此症，虚兼内外，治分次第，归根于虚。以七气合青娥方，内有参能定喘，而带皮胡桃则敛肺气，故如此效也。

李，六五，脉来大旺，冬令非宜，且老人脉宜缓弱，亦忌燥亢，惟喜尚有根，不同阳脱之候。外症喘促头晕，小便频多，虽老年人常态，而总宜温理下焦，以固真阳。

附子 焦术 益沉 白蔻 胡巴 固脂 益智 小茴
晚进黑锡丸三钱

又，前剂有效，足微温，理下焦不谬，盖下焦乃阴阳之道路，元气之所藏。一病虚冷，则肾气不能归元，必泛逆而见诸症。兹则脉象渐平，然总近亢燥，须得温以培固，重以敛镇，使肾气有归，而真阳不越，乃为正治。

附子 白术 吴萸 川椒 胡巴 固脂上桂少许 益智
黑锡一在块，煎 牡蛎

《医案偶存》

浅田惟常

余治一男子喘症，遇夏季必作，冬时反愈，与他人患喘症者相别，青龙法投之不效，香薷合六一散投之即愈。以治暑症之药治喘，盖其喘实因暑而起也。所以治病必求其本谓可信。征韩一役，患喘者甚多，青龙法皆不效，惜乎未谛审及此。

一老人痰喘气急有癥瘕，细柳安以为劳役，与补中益气汤，痰

喘益剧。余诊曰，此人性豪强，壮年起家，故肝郁生癥，加之水饮聚结以为喘急也。乃与宽中汤加吴茱萸。病安后感寒为下利，因与真武汤利止。以四逆散加薯蓣、生芩愈。

《先哲医话》

徐守愚

剡西太平镇刑匡超日晚脉沉弦有力，按久不衰，乃阳气郁伏，不能浮应卫气于外，一得水气上逆，而喘咳呕啰所由作焉。早晨脉沉弦而紧，按之稍缓，乃阳气式微，不能统运营气于表，则阴盛生内寒，而腹痛、泄痢所由生焉。昼夜而分两脉，病机乃致。叠变并进补药，虽有小效，而根株终不拔，法宜大开大阖，使上下一气，庶沉痾可去。暂用仲圣小青龙，放胆服之，俾阴阳交而水饮涤，便是效验，毋须云虚损忌此方也，独惜用之不早耳。

据述此病自三月初起咳嗽痰多，医者咸谓火盛刑金，不知其为饮邪滔天也。日以沙参、麦冬、紫菀、款冬花之类用事。不及一月，渐加微寒微热，饮食减少，乃阴盛阳衰所致，正与阴虚火旺之病相反。医者见其发热也，以为阴虚，用景岳熟地，佐当归以滋阴；一法见其恶寒也，以为阳虚，用人参配甘草以补阳；一法其方以大补元煎为主，自行加减，服至数十剂而呕、啰、泄痢因之丛生，后迭更数医，俱以六味丸为主。有加知母、黄柏以清金降火者；有加东参、麦冬以润肺止嗽者；有加龟版、驴胶、柴胡、白芍，肝肾同治以祛寒除热者。自夏至冬，纷纷杂投，意欲求安，而不知速使之危也。迨余诊时，而喘咳、呕啰、泄痢腹痛，病根已固而命根已斫，谓之痼瘵，夫复奚辞？宜先用小青龙汤数剂，俾饮涤、胃开，然后进以温补。才投一剂而诸证果得稍减，本可续进，以尽其能。无如其兄某，粗知医理，谓证属虚损，不可再投。不知余小青龙汤取其涤饮之中，兼交阴阳。以虚损有交阴阳之法，姑置不与论，默计此法乃一傅众咻，其证必

九死一生。医者当此正跋前疐后，实有无可如何之势。凝思良久，谓其兄曰：“参芪建中汤加五味子，接服二十剂，至立春后，叩谒复诊何如？”时岁聿云暮，归心如箭，只图脱身，非真望其有济也。谁知其兄此方亦不合意，谓桂枝辛散，力专横行，干姜辛热太过，恐致涸阴。满口俗论，不明经旨，而仲景立方之旨茫然不知。余卸去后，闻医仍以麦冬、川贝、龙骨、牡蛎、玉竹、东参等味，谓不寒不热，大有殊功，其兄从之。自是而参芪建中视为鸩毒，不复入口矣。越二旬立春节交，病者身冷汗出五日而气乃绝。若是证始终以纯阴之药，枉其归阴，或亦劫运使然。匡超有知，其果瞑目于地下否耶？嗟嗟！昔喻嘉言有云：时医世界，一曝十寒，难与图成。大抵以此。

嵯城盐业店主汪某，年臻六旬之日，四肢浮肿，气喘下痢，是脾、肺、肾三经为病，固非轻渺。然揣目下病情，总由饮邪盘踞，水气上逆，而喘息、便痢诸证因之叠起。按脉迟弦，迟则为寒，弦则为饮，显有明征。昔仲圣谓饮邪当以温药和之，愚见以熟附配生姜一法专务于此，极处逢生，理固有诸，倘得饮邪一涤，而诸证从此渐平。亦即子贡存鲁霸越灭吴之意。痰附子三钱，生姜捣冲，潞党参三钱，姜半夏二钱，桂枝二钱，木瓜一钱，广皮一钱。

此证前医用金匱肾气丸，接服十余帖，非第无效，渐且加喘加痢。后更医改用金水六君，数剂又不效，技穷卸去，金曰不治。余方服四剂而渐渐向安，至十余剂乃得坐卧自如，周旋户庭。而元气终不能复。以人生年五十一脏衰，况花甲已周者乎？带病延年，夫复何望？

剡城潘蕙亭在嵯业盐，余亦熟识。体质虚弱，平日常需药饵。近因辛苦而喘大作，时某不究其原。猥云，肺感风寒，肺气不得升降故喘，用杏仁、薄荷、苏子等味以治之。不知肺与大肠相表里，其人患痔多年，一开肺则气虚而痔遂坠痛不堪，喘亦渐加，伊谓气虚下陷，非升提不堪，用补中益气不效；又谓肾不纳气所致，改用崔氏八味丸加沉香与之。只知喘由肾阴之虚，而不知其为肾阳之寒也，服后

喘益甚。几至于死。余诊其脉沉弱，按久愈微，舌苔厚白而两边带灰，显然阴象可睹。先以苓桂术甘汤加干姜与服数剂，而喘减半，得进稀粥，再以真武汤加杞子、桂枝，接服五剂而喘乃除，胃亦渐开，惜勉强行走，数武力不能胜，头汗即出，怯证已成，为之奈何？时岁将暮矣，归期在即。伊求调治方药，余乃书一参芪建中汤，嘱服二十剂，不见变动，可卜无虞。不意越二旬节交立春，其喘旋发，不数日而逝。是知病愈而元不复者，势必至此。

王泽韩林松，六脉细微，肿胀所忌。平素喘息多痰，至今更加大腹胀闷，腿肿如斗，喘大如升。壮者患此已属可虑，况年臻花甲有余者乎？由脉证而察，病情总因天道不下济，地轴不上旋，上下浑如两截，有似否卦之义。所以肺气逆而喘作焉，脾气窒而胀成焉，肾气寒而水聚焉，脾肺肾三脏俱病，明系棘手重证。治宜开天户，转地轴，使上气下济，下气上旋，复天地运行之常。庶几喘由此平，胀由此宽，水由此行。医理如是，但不知效之所奏何如耳？方用消水圣愈汤加生薏仁。

附子一钱五分 桂枝二钱 麻黄一钱 知母三钱 生姜三钱
大枣三个 甘草一钱 薏苡仁四钱

剡西崇仁镇史美林，年臻五旬。夜间赤身立阶下撒小尿，偶尔感冒，次日即身热咳嗽，日夜危坐，不得就枕。所谓外感之喘多出于肺，尔时用麻黄、桂枝峻散可愈。乃医者因其平素体质虚弱，而用苏杏轻剂不效，改投参附温补而病遂增。后延裘小山、周渔帆二先生，一用赭石旋覆花汤，一用半夏泻心汤。喘得稍平而满日白苔，板实如故。其间邀余数次，适往烟山，越十余日余归。复邀诊脉，右关息止，左寸见结，而舌苔又板白如雪，是火不制金，心气绝而肺色乘于上也。法在不治，然病者望余救药已久，余怜其一息尚存，勉用小青龙汤折为小剂与服，倘肺气一开，得复外降之常，便有生机，此亦医家婆心则然耳。服药后，至半夜渐可着枕，定属向安。不意次朝顽痰上壅，顷刻而逝。可知病危至此，医者慎勿幸愈为心，贪功而招杀

人之谤也。谚云：送终难过，信然。

《医案梦记》

吴达

甲申春季，诚济堂王耀庭兄请诊。诊得脉象浮大无伦，两尺沉伏，舌有薄白之苔，平铺满布，咳痰盈碗，喘息肩耸，喉声煦煦然，气短语言不续，小便点滴不通，起卧均不适，举家惶然。余以为湿痰中郁，外感风邪也。大凡人有外邪感冒，初起必有白苔满布舌边，至于舌边无苔，湿苔在中而毛，此乃外邪渐解，或系久病变象。至于杂症，舌苔变现无定，又不能拘泥，不得与外感初起之舌并论也。此症因时交春令，外感风邪，皮毛闭郁。缘风为阳邪，鼓动营卫，触其当令之木火，风火相击，湿痰在中，又因风火冲击而升，不得下降，以致风、火、湿三邪，共犯肺胃，是以异常喘急，证情危险矣。治法用薄荷、前胡、半夏、杏仁、橘皮、淡芩、泽泻、苡仁、石斛、滑石、生草等。

一剂平，二剂愈。

《医学求是》

徐镛

郡城西门外奚藕庄客幕于外，上年道途受热，曾患喘嗽，服自便而愈。今复患喘嗽，投自便而加剧。医亦概用清肺补肺，终不见效。自疑为阴虚重证，徬徨无措，遂延余诊。余为脉象见紧，似数非数。前患暑热，故自便可愈，今患寒邪，故反增剧。用小青龙汤而愈。

《医学举要》

温载之

葛味荃署忠州刺史时，于夏日半夜，忽患汗喘吐泻之症。余时任汛事署，在城外。俟天时，延余诊视。其脉浮无力，大汗大喘，吐泻兼作，腰疼欲折，其势甚危。署中有知医者，已拟用藿香正气散，

窃幸煎而未服。余谓：“此症系由肾水上浮，真阳外浮。若服散剂，必至暴脱。况夏日阳浮于外，阴浮于内，乃真阳外浮之症。并非感冒实邪，正气散断不可服。”即用真武汤招阳镇水，汗喘自止。一剂喘汗俱平，二剂吐泻皆止。随用温肾固脾之药调理而愈。

联军门星阶镇重庆时，余隶麾下，有疾皆令余治。优礼有加，赏识逾分。委权巴汛，四历星霜，感恩知己，兼而有之。嗣奉督宪飭回忠州本任。乙亥冬，忽患痰喘之症。医家误认肾虚作喘，概用滋阴补肾之剂，其喘愈甚。渝城不少名医遍延，无效。气息奄奄，众皆束手。不得已，飞函赶余回重医治。来使舟行下流如飞，一昼一夜即到。但忠距重陆路八站之遥，兼程而进，恰只四朝。到时晋谒，见其人事恍忽，痰声如锯，气喘吁吁。诊其六脉沉迟，四肢冰冷。此乃水泛为痰，阴霾用事，何堪滋阴之膩？如再稍迟，必气高不反矣。余即用真武汤回阳镇水。连服二剂，随得厥回气平。继用苓桂术甘及六君子汤调理而愈。

章云亭年届古稀，冬日患吼喘咳嗽。医谓肺虚水亏。概用补肺滋水之剂，愈服愈剧。甚至喘息胸高，不能睡卧，每夜坐以待旦，自分必无生理。其子求余诊治。审其脉现沉紧。乃寒入少阴，水气凌肺。宜用小青龙汤以温散寒邪。其子见有麻黄、细辛，恐其年老不胜药力。余曰：“此方乃和解之剂，有开有合，非大散之品。常云有病则病当，非此方不能平其喘咳。”其疑始解，煎而服之。次日，喘平咳止，身始安枕。随用温平之剂，调理而愈。今人一见麻黄，畏其大表。至于羌活气味雄壮，全不畏忌。殊不知麻细二味，仲景伤寒各方屡屡用之，皆由医家误用与病相反，是以病家畏惧。由其未读《神农本草》，不谙其性耳。犹如正人身负恶名，岂不冤哉？

《温病浅说温氏医案》

汪廷元

方赞武兄暑月病哮，从淮来扬就医，喉中痰喘，汗出不辍，夜不

能上床而卧，医莫能疗。切其脉，右寸浮滑，尺中带洪。因思哮之为病，发时固宜散邪。今气从下逆上，行动则喘甚。盖病久则子母俱虚，肾气不能收摄，亦上冲于肺，是虚为本，而痰为标耳。用人参、熟地黄、北五味、橘红、阿胶、半夏、茯苓，治之不半月而平。

《广陵医案摘录》

许恩普

吴燮臣司业父刑部毓春公咳喘呃逆，延余诊视，脉七八至，将绝之候。服殿撰陈冠生方石膏、黄连多日，以至此剧。余拟肾气汤加减，以救垂绝之阴阳，服之见效。次早来请，以为得手，至则见喘已轻，呃逆已止，精神大好，原可挽回复依原方加以滋阴扶阳之品。适陈冠生至，持方连曰：“火上添油也！”余请示姓名，知为殿撰。曰：“何知为热？”陈曰：“脉数。”曰：“浮数为风热，沉数为寒热，洪数为大热；数而有力为实热，数而无力为虚热。今数而无力，不及之象，犹灯油将尽，拍拍欲绝之候。添油犹恐不燃，若加滴水即灭矣。”陈曰：“脉之理微。”曰：“诚然！然犹人胡琴、三弦，三指挑拨，五音合调，君能之乎？”陈曰：“未习也。”曰：“以此即知脉理，未习故不知也。”遂辞。燮臣司业送出，询以病势，余曰：“若听陈君主政，预备后事不出三日也。”旋陈病，自用苦寒之药，亦亡。

福建陆路提督程魁斋军门年六旬，伤寒。时医以年老气衰，重用参、芪补药，固邪于内，痰喘不眠，病剧。延余诊视，脉紧数，知系闭塞寒邪，化热痰喘。拟以小青龙汤加减解寒邪、疏通肺气、化痰之品。金曰：“年老气衰，不可服。”余曰：“有症无损，开门逐盗之法，姑试少服。”其堂弟从周军门天姿过人，以为然。嘱先服半，咳喘顿减，终服大好。依方加减，十日而愈。

己丑，候选通判缪仲勉少君伤寒。他医误为瘟疫，重用凉药，以致病剧。卧床两月，痰喘欲绝。延余诊视，脉沉濡而滑相等，尚可挽回。拟以生脉散加半夏、杭芍，服之见效，数服即能饮食。治理数月，

两腿不能伸屈站立。其母只此一子，不胜情急，询余曰：“废否？”余曰：“以脉缓和无力，不至残疾。”即用十全大补汤加杜仲、牛膝下注三阴；并令捶打以舒筋血。又两月痊愈矣。

《许氏医案》

陈幻生

喘之内病，有风寒，有暑湿，有痰壅，有气郁，有水气上泛，有火邪上冲，致喘者不一，端要不越表里寒热虚实之分。先哲有言，治病以辨证为急，而辨喘证为尤急。盖见庸工治喘，拘守偏见，不能随证施治也。兹姑举其一。壬辰秋，余至天津，适张汉卿观察病气喘甚剧，终夜不得卧，绵延已月余，邀余往诊，脉虚细数，审是夏季伏暑未清，阴虚火升为患，用润气汤加石膏，一剂喘嗽平，能安睡矣。后承是意加减，两旬余而愈。当初治时，有闻方中用石膏，传为大谬者，愚思症起六月，暑邪内伏，非石膏不解，何谬之有？彼以石膏为谬者，殆患喘而不敢用石膏者也。否则辨证不明，误用石膏治寒喘，未得其法者也。夫仲景续命汤、越婢汤等方，俱加石膏以为因势利道之捷诀。李士材治烦暑致喘，用白虎汤，古人治火邪上冲，喘不得息者，罔不藉石膏以为功，盖暑喘用石膏，犹之寒喘用干姜，虚喘用人参、实喘用苏子，不遇其症则已，既遇其症，必用无疑。俗流信口雌黄，原不足辨，所不能不辨者，此等喘症最顽，愈未几时，倏焉又发，投剂稍差，贻误非小。丙申冬，刘讳齐大令之令郎，病喘甚剧，数日一发，发则头痛身热，转侧呻吟，苦不可堪。余切其脉，右部虚数，左更微不可辨，按久，又似有数疾情状，知是阴虚阳盛，与以冬地三黄汤，喘势渐平，继减三黄进以参芪，调养而痊。丁酉夏，因劳复发，他医以头痛身热为外感，而用温疏，以形瘦脉微为中虚，而与补益，病势又剧，余仍前清养法治之，旬余而愈，可见喘系宿疾，多由气质之偏，不得以寻常脉证相例，总恃临证者，随时论病，随病论治，阴

阳虚实，辨得清耳。

《诊余举隅录》

张乃修

贾左。气喘不止，厥气尽从土逆，无形之火亦随之而上，火冲之时，懊恼欲去衣被。金无治木之权。姑清金平木。

瓜蒌霜四钱 杏仁泥三钱 川贝母二钱 郁金一钱五分
海浮石三钱 风化硝七分 黑山栀二钱 蛤粉四钱 粉丹皮一钱四分
竹茹 盐水炒，一钱 枇杷叶六片

二诊：大便未行，灼热依然不退，寅卯之交，体作振痉，而脉并不数。无非肝胆之火内炽，不得不暂排其势。

杏仁泥三钱 羚羊片一钱五分 郁金一钱五分 丹皮二钱
竹茹一钱 瓜蒌仁五钱 法半夏一钱五分 川贝母二钱 青黛五分包

三诊：火热之势稍平，略近衣被，不至如昨之发躁，咽喉气结稍舒。的属痰阻滞气，气郁生化。再展气而清熄肝胆。

瓜蒌霜 夏枯草 羚羊片 郁金 川贝 橘红 鲜菊叶 松罗茶 黑山栀 杏仁 枳实

四诊：火热渐平，然两肋胀满气逆，甚至发厥。良由气郁化火内炽，火既得熄，仍还于气。再平肺肝之逆，而开郁化痰。

郁金 杏仁 竹茹 山栀 丹皮 蒺藜 橘红 枳壳 枇杷叶 皂荚子一钱五分，重蜜涂炙研末，每服分许，蜜水调

五诊：中脘不舒，两肋下胀满，妨碍饮食不能馨进，气逆不平。脉象沉弦。此肝藏之气，挟痰阻胃，胃气不降，则肺气不能独向下行，所以气逆而如喘也。

整砂仁 广皮 杏仁 旋复花 制半夏 炒枳壳 香附 苏子 诃桂二分研末，饭丸

六诊：中脘渐松，两肋胀满亦减，气逆火升略定。的是寒痰蔽阻，胃气欲降不得，肺气欲降无由，一遇辛温，阴霾渐扫，所以诸恙

起色也，再从前法进步。

桂枝 制半夏 瓦楞子 茯苓 薤白头 枳实 广玉金 瓜蒌仁 橘红 干姜

江左，痰饮咳逆多年，气血逆乱，痰每带红。日来兼感风邪，风与湿合，溢入肌肤，面浮肤肿，喘咳不平，腹胀脘痞，小便不利。脉数浮滑，舌苔白腻。有喘胀之虞。

前胡一钱五分 荆芥一钱 光杏仁三钱 橘红一钱 茯苓皮四钱
葶苈五分 防风一钱 制半夏一钱五分 白前一钱五分 大腹皮二钱
生姜衣四分 川朴一钱

二诊：痰喘稍平，浮肿亦减，然中脘仍然作胀。肺胃之气，升多降少，致风与湿横溢肌肤。效方再望应手。

大腹皮二钱 川朴一钱 杏仁三钱 生薏仁四钱 煨石膏三钱
制半夏一钱五分 炙麻黄四分 陈皮一钱 枳壳一钱 茯苓皮三钱炒
生姜二片 冬瓜皮三钱，炒

三诊：开上疏中，适交节令，痰气郁阻不开，痰出不爽，腹胀面浮足肿，小溲不利。脉形细沉。夫痰饮而致随风四溢，都缘脾肾阳虚，不能旋运，所以泛滥横行，有喘胀之虞。拟千缙汤出入以开痰，真武以温肾而行水。

制半夏一钱五分 橘红一钱 大腹皮二钱 生姜衣四分
真武丸三钱 皂荚子蜜炙，二粒 枳实一钱 连皮苓三钱
炒於术一钱五分

改方去皂荚子，加葶苈。

四诊：开肺之气，温肾之阳，肺合皮毛，遍身自汗，水气因而外越，面浮肤肿大退，胸闷较舒，胀满大退，痰亦爽利。然大便不行，足肿未消。还是水气内阻，不得不暂为攻逐之。

大腹皮二钱 姜衣四分 白茯苓三钱 冬瓜皮四钱炒
泽泻一钱五分 上广皮一钱 於术二钱 生薏仁二钱 熟薏仁二钱
制半夏一钱五分 禹功散先调服一钱

五诊：痰化为水，泛溢肌肤，先得畅汗，水湿之气，从汗外溢，继以缓攻，水湿之气，从而下达，故得腹胀面浮俱减。拟运土分化。再望转机。

葶苈五分 橘红一钱 冬术二钱 大腹皮二钱 炒范志曲二钱
光杏仁三钱 茯苓皮三钱 猪苓二钱 泽泻一钱五分 生薏仁二钱
熟薏仁二钱 枳壳七分 生姜衣四分

左，肾本空虚，闭藏不固，冬令气不收摄，燥气外袭，干咳无痰。去冬阳气升动，由咳而喘，不过行动气逆片时即定，初未尝太甚也。乃春分节令，阳气发泄已甚，肾气不能藏纳，气喘大剧。耳聋作胀，咽中如阻，二便不利，口渴咽干，形神消夺，偶有微痰咯吐，色带灰黑。脉细少情，舌红苔白干毛。冲阳挟龙相上逆，遂令肺气不能下通于肾，肾气不能仰吸肺缺气下行，所谓在肾为虚也。恐阳气泄越，再加汗出。勉拟交通肺肾，参以丸药入下，以免膩药壅滞胃口。即请商裁。

磁石五钱，煨 淡秋石二钱 天麦冬各二钱 紫蛤壳七钱
茯苓三钱 怀牛膝三钱 车前子三钱 粉丹皮三钱 肥知母一钱五分
都气丸五钱，分二次服

二诊：交通肺肾，丸药入下，耳聋转聪，小渡通利，气喘稍有休止之时。然仍口渴咽干，身体不能行动，动则依然喘甚。脉象细数少情，右尺尤觉细涩。其为根本空虚，不能摄纳，略见一斑。昨药进后，不觉滞闷，勉从前意扩充。但草木之功，未识能与造化争权否。

熟地炭四钱 生白芍一钱五分 粉丹皮二钱 煨磁石三钱
茯苓三钱 天花粉三钱 萸肉炭一钱 肥知母二钱，炒 紫蛤壳六钱
片膝三钱 天麦冬各二钱 炙桑皮三钱
囫囵五味子三分，开水分二次另吞服

严某，辛温寒合方，气喘大减。的是寒热，互阻于肺。不入虎穴，焉得虎子，效方进退。

炙麻黄五分，后入 生甘草三分 橘红一钱 枳壳一钱五分，炒



生地四钱 山药三钱 牛膝三钱，盐水炒 生白芍二钱
 云茯苓二钱 黄肉二钱，炒 车前子二钱，盐水炒 生牡蛎五钱
 夜交藤五钱 龙骨三钱，煨 都气丸五钱，分二次服

邱左，痰湿素盛，而年过花甲，肝肾日亏，木少滋涵，于--阳来复之后，骤然气喘，痰随气上，漉漉有声。其病在上，而其根在下，所以喘定之后，依然眩晕心悸，肢体倦乏，肝木之余威若此。下焦空乏，不足以涵养肝木，略见一斑。脉象左大少情，右濡细软。诚恐摄纳失职，复至暴厥。

炙熟地四钱 海蛤粉五钱 朱茯神三钱 煨龙骨三钱
 炒杞子三钱 牛膝炭三钱 煨磁石三钱 白归身二钱，酒炒
 炒白芍一钱五分 沙苑子三钱，盐水炒

二诊：补纳肝肾，症尚和平，然左脉仍觉弦搏。下焦空乏，根本之区，不易图复，理所宜然。

龟甲心五钱 牛膝炭三钱 沙苑子三钱 炙河车三钱
 茯苓神各二钱 炙生地四钱 海蛤壳六钱 煨龙齿三钱 炒白芍二钱
 建泽泻一钱五分

三诊：左脉稍敛，心悸眩晕俱减。再摄纳下焦。

龟甲心五钱 牛膝炭三钱 紫河车三钱 海蛤壳四钱
 川断肉三钱 生熟地各三钱，炙 煨龙骨二钱 粉丹皮二钱
 炒白芍一钱五分 沙苑子三钱，盐水炒 泽泻一钱五分

四诊：脉象较前柔静，饮食亦复如常。虚能受补，当扬鞭再进。

龟甲心七钱 辰茯苓三钱 泽泻一钱五分，秋石拌炒
 生熟地四钱，炙 紫河车三钱 海蛤壳一两 沙苑子三钱，盐水炒
 杭白芍一钱五分 粉丹皮二钱 龙齿三钱，煨 牛膝三钱，炒
 厚杜仲三钱

五诊：滋填甚合，再参补气，以气为统血之帅，无形能生有形也。

人参须七分 黑豆衣三钱 女贞子三钱 厚杜仲三钱

白归身二钱 生熟地各四钱，炙 元武板八钱 杭白芍一钱五分，酒炒
粉丹皮二 西潞党三钱，九米炒 煨龙骨三钱 泽泻一钱五分
用紫河车一具，微炙研末为丸，每日服三钱。

陈某，向有痰饮，咳嗽痰多，习为常事。兹以感冒新风，肺气失肃，发为咳甚，兼以肝木郁结，风气通肝，肝木从而勃动，腹痛泄泻。此初起之情形也，乃热减痛止泻定，转见神志模糊，喉有痰声，而不得吐，气喘不能着枕，四肢搐动，面色红亮，汗出溱溱。舌苔灰滞，而脉象濡滑。良由痰饮之邪，随外感所余之热，肝经郁勃之气、蒸腾而上，迷蒙清窍，阻塞肺气。清窍被蒙，则神机不运，而神识模糊。肺气阻塞，则出纳失常而气喘不能着枕。肺气不能下通于肾，则肾气立见空虚，肾为封藏之本，肾虚则封固不密，而为汗出。本虚标实，恐成必败之局。勉拟扶正化痰，降胃纳肾。即请商裁。

吉林参七分，切小块开水吞 旋复花三钱，包 怀牛膝三钱，盐水炒
陈胆星一钱 焦远志肉五分 炒苏子三钱 车前子二钱，盐水炒
天竺黄二钱 煅磁石四钱 广蛤蚧尾一对 竹沥姜汁五滴冲
白金丸一钱，包煎

二诊：朴泻兼施，上下兼顾，如油如珠之汗已止，神志稍清，痰出较多，而稠腻如胶，牵丝不断，汗虽止而不时懊烦。脉见歇止，舌苔浊腻灰滞。无形之气火，有形之浊痰，蕴聚胸中，肺出肾纳之道路，为之阻塞，肾气虽欲仰吸肺气下行，而无路可通。此时欲降肺气，莫如治痰。标实本虚，元气能否胜任，实非人事所能为也。勉再议方。

白前三钱 白茯苓四钱 炒苏子三钱 旋复花三钱，包
蜜炙橘红一钱 陈胆星一钱五分 炒萎皮三钱 竹沥半夏三钱
紫口蛤壳一两 白果肉四粒，打烂 礞石滚痰丸一钱，开水先服 雪羹汤代水。

《张聿青医案》

王旭高

高。寒入肺底，久而化热，同一痰喘，先后不同矣。初病在肺，久必及肾，虚实不同矣。补肾纳气，清金化痰，是目下治法。

大熟地 海浮石 麦冬 川贝 蛤壳 五味子 牛膝 杏仁
沙参 地骨皮 枇杷叶 雪梨皮

卢。肾司纳气，开窍于二阴。病发每因劳碌之余，先频转矢气，而后气升上逆，短促如喘，饮食二便如常。其病在少阴之枢。宜补而纳之。

六味地黄合生脉散，加青铅。

陆。喘哮十二年，三症一载。症止复来，喘发愈勤。中虚痰饮不化，虽痰中带血，而不可以作热治也。拟六君子加杏仁、旋复、姜桂方法。

六君子汤加杏仁、旋复花、桂枝细辛同炒、干姜五味子同打炒。

渊按：痰中见血，仍用姜，桂，非老手不辨。

冯。年逾七旬，伏暑挟湿，湿能生热。病起微寒微热，咳嗽痰稠，曾经吐血。今血虽止而咳仍然，脉涩而数，舌苔灰白而渴，乃湿热痰浊恋于肺胃。病将匝月，元气大伤。脾胃不醒，谷食少进。初起大便坚，今则软而带溏矣。病在肺脾胃三经，治在化痰、降气、和中。

甜杏仁 茯苓 款冬花 蛤壳 沙参 紫苑 川贝母 苡仁
陈皮 雪羹

另：用人参、珠子、血珀、沉香、礞石，研细末，匀和一处，再研极细。分四服，日一服。

又：夫咳嗽痰喘之病，浅则在肺胃，深则属肝肾。凡用方之法，由浅而深。按脉察色，知其虚中挟实。实者，痰浊也，故先以化痰、降气、和中为法。两剂，咳嗽稍平，惟气之喘而短者有出多纳少之意，则其本虚矣。左脉细微，肝肾之虚大著。虽舌苔黄浊不化，亦当以摄纳为要。且额上汗冷，胃泛不纳，将有虚脱之虑。

人参一钱五分 五味子八分 麦冬钱半，元米炒 山萸肉二钱
泽泻一钱 大熟地六钱，附子三分煎汁，浸片时，炒成炭 怀山药五钱，炒
茯苓二钱 紫石英三钱 怀牛膝三钱 紫衣胡桃肉不去皮，二个

另：用好肉桂三分，上沉香三分，坎气二条。

上三味，各研末，和一处，再研细，分作二服。今晚一服，燕窝汤调下。明日再进一服。若得额汗收敛，左脉稍起，犹有生机可理。若不应手，难为力矣。

杜。咳嗽有年，每遇劳碌感寒即发。并无痰涎，此属气喘。据述病起受寒，早用麦冬清滋之药，遂至邪恋于肺，曾服麻黄开达见效。然病根日久，肺气日虚。虚而不治，累及子母。今三焦并治，乃肺脾肾三脏兼顾也。

杜苏子 淡干姜 五味子合捣 甜杏仁 橘红 半夏 款冬花
炙甘草

早服附桂八味丸一钱，金水六君丸三钱，开水送。

又：久咳，肺脾肾交虚，前用温纳相安。今交夏令，肾气丸中桂、附嫌刚，改用都气丸可也。

都气丸三钱，朝服。金水六君丸三钱，晚服。俱盐汤下。

又：肺为贮痰之器，肾为纳气之根。肾虚不纳，则气逆而生喘；肺虚失降，则痰贮而作喘。前方辛通肺气。补摄肾气，服下稍安，而病莫能除。良以多年宿恙，根深蒂固。然按方书内饮治肾，外饮治肺，不越开上填下之意。

法半夏 茯苓 橘红 杏仁霜 款冬花 干姜 白芍 五味子 炙甘草

上药为末，用麻黄三钱，白果肉三十粒，枇杷叶二十片，煎浓汁，泛丸。每服一钱，朝晚并进，与都气丸同。

王。高年烘火，误烧被絮，遭惊受寒，烟熏入肺，陡然喘逆，痰嘶，神糊，面浮。防其厥脱。

旋复花 前胡 杏仁 川贝 代赭石 茯神 苏子 沉香

桑白皮 款冬花 竹油冲 姜汁冲

渊按：此火邪伤肺而喘也。与寻常痰喘不同，故不用温纳。

徐。喘哮气急，原由寒入肺俞，痰凝胃络而起。久发不已，肺虚必及于肾，胃虚必累于脾。脾为生痰之源，肺为贮痰之器。痰恋不化，气机阻滞，一触风寒，喘即举发。治之之法，在上治肺胃，在下治脾肾，发时治上，平时治下，此一定章程。若欲除根，必须频年累月，服药不断，倘一暴十寒，终无济于事也。此非虚语，慎勿草草。

发时服方：

款冬花 桑皮 紫苑 苏子 沉香 茯苓 杏仁 橘红 半夏 淡芩

平时服方：

熟地 五味子 陈皮 苡仁 胡桃肉 紫石英煨 半夏 蛤壳 杜仲 茯苓

又：喘哮频发，脉形细数，身常恶寒。下焦阴虚，中焦痰盛，上焦肺弱。肺弱故畏寒，阴虚故脉数。喘之频发，痰之盛也。有所感触，则病发焉。病有三层，治有三法。层层护卫，法法兼到。终年常服，庶几见效，否恐无益也。

发时服方：

桂枝生晒干 款冬花蜜炙 橘红盐水炒 杏仁霜 莱菔子 桑皮蜜炙

共研末，用枇杷叶十片，去毛，煎汤，再用竹油半茶杯，姜汗一酒杯，相和一处，将上药末泛丸。发喘时，每至卧时服此丸二钱，苡仁、橘红汤送下。

平时服方：

大熟地砂仁拌 丹皮盐水炒 茯苓 牛膝盐水炒 泽泻盐水炒 肉桂 山萸肉酒炒 怀山药炒 五味子盐水炒 磁石

上药为末，用炼白蜜捣和，捻作小丸，丸须光亮。俟半干，再用制半夏三两，陈皮二两，炙甘草一两，研极细末，泛为衣。每朝服二钱。

发时亦可服。

叶。喘之标在肺，喘之本在肾，脉迟者，寒也。舌白者，痰也。以金水六君煎加味。

大熟地_{蛤粉炒} 半夏 陈皮 茯苓 杜仲 款冬花 桂枝
紫苑 杏仁 五味子 胡桃肉

又：喘发已平，咳嗽不止，吐出浓痰，今宜降气化痰。

苏子 旋复花 当归 款冬花 桑白皮 橘红 半夏 茯苓
杏仁

金。痰气声嘶，面仰项折，久而不已，防有鸡胸、龟背之变。盖肺气上而不下，痰涎升而不降，上盛则下虚，故病象若此。宜清肺以降逆，化痰而理气。

生石膏 紫石英 半夏 茯苓 橘红 石决明 川贝母 蛤
壳 紫苑 杏仁 竹油 姜汁

另：不蛀皂荚三枚，去皮弦子，煎浓汤一饭碗，用大枣三十枚，将汤煮烂，晒干，将汁再浸，再晒干。每日食枣五六枚。

某。汗出不休，气短而喘，是气血阴阳并弱也。足常冷为阳虚，手心热为阴虚。营不安则汗出，气不纳则喘乏。法当兼顾。

大熟地_{附子三分，拌炒} 黄芪_{防风一钱，拌炒} 归身 白芍 五味子
紫石英 茯苓 党参 冬术 浮麦 红枣

渊按：此劳损虚喘也。金受火刑，经所谓耐冬不耐夏。夏令见之，都属不治。黄芪为汗多而设，若喘而无汗，即不相宜。

又：汗出减半，气尚短喘。今当大剂滋阴，再参重以镇怯。

人参固本丸 龟胶 磁石 紫石英 白芍 五味子 胡桃肉

又：周身之汗已收，头汗之多未敛。气喘较前觉重，交午愈甚。掌心觉热，脉形细数，饮食减少。阴津大亏，肺气伤戕。兹当炎暑，水衰火旺，金受其灼。咳嗽痰黄，渐延损症。拟清金丽水，冀其应手为妙。

沙参 麦冬 大生地 龟板 川贝母 五味子 知母 西洋

柳宝诒

孙。先患咯血，营阴亏损。因时感邪热，肺胃津液亦伤，咳迫气喘，晚热盗汗，营阴之损象日深，脉象虚细而数，舌苔光绛润。下滋肝肾，上养肺胃，是属一定之理。惟食少便溏，上损及中矣，又当参入培土之意，方为稳当。

北沙参 麦冬肉 生地炭 白芍 百合 苡仁 牡蛎 怀山药 白扁豆 霍石斛 白薇 丹皮 炙甘草 燕窝

另：琼玉膏地黄、茯苓、人参、白蜜临卧枇杷汤下

二诊：养阴清肺，兼培中土，阴热似乎稍减；惟内热盗汗，咳喘便溏，频作不已，则肺胃之液，肝肾之阴，均难遽复。且中气虚陷，大便不实，凡凉肾之剂，尤宜斟酌用之。拟以培土生金为主，兼用滋摄之法。

党参 北沙参 怀山药 白扁豆 麦冬 苡仁 生地 五味子 丹皮 白薇 霍石斛 蛤壳 燕窝 胡桃肉

尤。咳嗽痰黄，经年不止，内热盗汗，经停脉数，是属营损金伤之病。神色枯瘁，气促胸板，肺金受伤已甚。而向晚腹痛，便溏下血，脾土先虚。舌白少纳，又未可专投滋腻。病势固深，用药尤多碍手。姑拟培上生金，清阴和络，用上中同治之意。但顾虑既多，用药即难于奏效耳。

北沙参 生於术 川贝 砂仁 麦冬 川百合 紫菀 生地炭 丹皮炭 旋复花 新绛同包 橘络 木香 炙甘草 枇杷叶

下。咳吐秽痰，自夏及秋，金伤已甚，喘逆不能平卧。姑与清肺降逆，疏化痰浊。

南沙参 苡仁 冬瓜仁 桃仁 川贝 紫菀 合欢皮 旋复花 蛤粉 橘红 枇杷叶 青芦管

方。气逆痰壅，甚至喘不能卧，脉象细弱而涩。老年正气已弱，此非轻证。

旋复花 代赭石 盐半夏 橘络 枳壳 紫菀 太子参 於术 茯苓 瓦楞子 胡桃肉 竹茹

顾。痰喘宿病，因产后而发，咳逆痰粘，息促偏卧。肺胃有痰浊阴窒，复感风温，蒸蕴而发，肝络上逆，肺不下降。当疏肺胃，和络降逆。

旋复花 代赭石 归须 橘红 半夏 冬瓜仁 杏仁 紫菀 苡米 牛膝炭 牡蛎 银杏肉 胡桃肉

郑。春间外感咳嗽，经夏不愈，痰色黄稀。病由外感与痰涎蒸结于肺，久而不化，熬炼熏灼，肺液被伤。刻当秋金司令，宜清泄郁伏之邪。望其肺气得清，可以乘时调复，乃为至美。

南沙参 冬瓜子 苡仁 旋复花 蛤壳 桑叶皮各 茯苓 瓜蒌皮蜜炙 海浮石打 丝瓜络姜汁炒 嫩芦根去节 枇杷叶刷毛，烘

戎。内热咽燥，痰热先蕴于肺。今春劳倦感邪，肺络被其窒塞，嗑干失音，内热愈甚，右脉虚细，左脉按之弦数，舌苔浊腻。痰浊壅而肺气窒，内热甚而肺阴伤，本虚标实，法当两面兼顾。

马兜铃 紫菀 旋复花 洋参 鲜沙参 白薇 丹皮炭 冬瓜子 苡仁 海浮石 蛤黛散包 元参 小生地炒 芦根 竹叶茹各

马。肺为热灼，咳吐痰秽带红，历夏不愈，色浮肢肿，内热不纳，脉虚细而数。津枯肺痿，渐次损及脾土；而秽热未净，痰色黄红未干，未可遽与培上。兹拟清养肺阴，疏化浊热。

鲜沙参 北沙参 蛤壳 川贝 鲜石斛 丹皮炒 桑叶皮各 小生地炒 苡仁 冬瓜仁 桃仁 芦根 枇杷叶

二诊：前与清肺疏浊，痰秽略减，纳谷渐增；但浊热未净，肺脏久伤，脉象左手弦数无神，阴气先伤，有金损不复之虑。再与养阴束肺。

鲜沙参 玉竹 小生地 蛤黛散包 川贝 苡仁 冬瓜仁
百合 麦冬 丹皮炒 淡黄芩 生甘草 知母 芦根 枇杷叶

华。承示华君失音病原一纸，再四推度，此症因伤风而起。发言即觉气促吃力，其为肺气不利可知。看书即心嘈动气，心火升而肺气不降也。当伤风咳嗽之时，其因不忌油腻，致热痰胶结，肺窍不利而然乎！否则风邪化热，外为寒气所遏；或骤进冷物凉饮，与痰热搏激，亦能致此。若是大实大虚之症，则绵历年余，必有变动，不应若此之安然也。治疗之法，既非虚证，自不应补；病久肺阴渐伤，更不宜燥；即与清火化痰，似乎中病，而不能疏涤肺窍，则久结之痰，嵌于肺隧者，仍不能化，而音仍不能出也。鼻准微红，即有痰火之据。痰火壅而肺津渐烁，故喉间喜食清润，而不宜燥辣。延久失治，肺液日枯，亦将致重。刻下忌饮酒以助热，忌食油腻浊厚之物以助痰；再用清涤肺窍之物，制膏常服。俟一月以外，观其效否若何？录方候高明教政。

甜杏仁 苦杏仁 广橘络 南枣肉 通草 鲜竹茹 石菖蒲
西洋参 百部蜜炙 上药煎浓汁，滤净约一大碗许，加入鲜生地汁、鲜沙参汁、人乳各两碗，再熬至稠厚，入西血珀末、川贝末成膏。

每日两许，含入口中，细细咽之，用枇杷叶汤过口，早晨临卧服两次。嫩芦根去节泡汤代茶。燕窝汤常服。

冯。前承手示，读悉一切病原。细审贵恙情状，此病盖不在肺而在肾也，《内经》谓内夺而厥则暗，少阴不至者厥也。是失音一症，因有由于肾气之虚者矣。呼吸之气，呼出心与肺，吸入肾与肝。从前多言伤气，勉强提振，吸入之气，不能归藏于肾，肾气日耗，致少阴之气，不至于咽而暗。稍说话即觉吃力，不过因肾气虚，而无力以下吸耳。至咽痛乃吸动虚火循络而升，故转不觉其虚，其病盖更深一层矣。其看书亦觉吃力者，前人以不能近视责之水亏。看书则目光专力于近，亦能吸动肾阴故也。作文则劳心，行动则劳形，皆不专关于肾，故于病无增损耳。平日因看书说话受伤，所损者是无形

之气，与精血枯槁者不同，故能起居饮食，一切如常，病经久淹，不致摇动其根本也。以此推求，则治肺之药，确于病原不合，其数年服药而不效者，得无以此故乎。兹姑就当见所及者，拟方录呈，以便采择。

大熟地 党参 龟板 牡蛎 牛膝 潼蒺藜 远志 杞子
菟丝子 天冬 巴戟肉 肉苁蓉 车前子 川石斛

二诊：读前案及方，深合病机。惟伏热浊痰两层，虽投轻清，而未与疏泄。据述自粤至沪，在船大呕，登岸后服青宁丸，又复泄去浊垢如痰者甚多。此皆病之去路，故迨日病势颇减。刻诊脉象，软细带数，两关略浮。其伏热之在阴，浊热之在胃者，大段虽去，而余炎犹存。气升喘喝，劳动则甚，肾气不摄，肺气不降也。遗泄频发，肝藏有热下注疏泄也。口苦舌燥，热久而液干也。此症就虚一面论，不过病久阴伤，金水不承，自当用养阴调摄法，以善其后；就实邪论，则从前肺胃痰浊蕴热，固未能一律清泄，即肝肾之郁热，亦未能清澈如常。所以上而肺胃，下而肝肾，其见象总不能霍然也。灰中余火虽若无多，而日引月长，亦有烁液耗阴之虑。此病之最易慎防者，即在乎此。兹拟两法，一则疏彻其余热，以除其致病之原；一则清养其阴液，以补其被伤之地。相继进服，调理一月，可以复原。

鲜沙参 原石斛 苡仁 牡蛎 旋复花 白薇 丹皮炒
黄柏盐炒 洋参 黄芩酒炒 川贝 紫菀 百合 芦根去节

三诊：续服清养阴液方

大生地 天冬 洋参 黄柏盐炒 春砂仁 白芍
牡蛎盐炒 丹皮炒 麦冬 苡仁 川贝 生甘草 莲子须各

金。失音咳呛，咽不能咽。病因金体受伤，火气浮逆，不能肃降所致。神枯肉削，脉数少神，症情颇难着手。如与壮水制火，保肺降逆之法，佐以清咽化毒，以外治之。

洋参 元参 天冬 大生地炒炭 怀牛膝盐炒炭 磁石煨
蛤壳 川贝 川百合 生甘草 枇杷叶 竹茹

别：濂珠粉、犀黄、柿霜、人中白、生甘草、大梅片 以上各取净末和匀，用蜜调含咽，或干药吹之亦可。

《柳宝诒医案》

马文植

某。饮邪喘咳，已过月余，动则喘息抬肩，脉来虚弦而疾，兼带歇止，左三部推之少神。肾亏于下，肺虚于上，肾气浮则诸气皆浮，喘出下焦，最为恶候。拟肃肺纳肾。

西洋参 北沙参 青铅 法半夏 甜杏仁 乌贼骨 大麦冬
牡蛎 云茯苓 潼沙苑 黑料豆 毛燕

复诊：服药后喘定，脉亦有神。原方去青铅，加丹参、夜交藤。

某。肾气不纳，肺气不降，脾有湿痰。咳嗽气喘，甚则自汗，小便短数，下部乏力。拟纳气降气，以化湿痰。

北沙参 黑料豆 款冬花 杏仁 法半夏 栝蒌子 破故纸
牡蛎 炙草 银杏 沉香 茯苓

复诊：昨进纳气降气之剂，喘咳不平，而痰不爽，肺气壅塞。拟用三子养亲汤。

炒苏子 桑皮 茯苓 白芥子 莱菔子 嫩前胡 杏仁泥
橘红 枳壳 生姜 款冬花 贝母

某。喘咳有年，肺肾气虚，脾湿陷下，足肿而冷，已及少腹，小溲欠利，不能动劳，脉来濡细，湿胜阳虚，虚湿邪入肾，有不克平卧之势，症非轻浅。真武汤加减，喘平乃佳。

熟附子 陈皮 白术 牛膝 黑料豆 淡干姜 杏仁泥 苡米
法半夏 茯苓

复诊：喘势稍平，惟不能动劳，肾虚气不归窟，足冷稍和，而肿未减，气不化湿。仍议昨法，参以纳肾之品，俾气归于肾，渐可向安。

参须 破故纸 白芍 白术 法半夏 核桃肉 附子 新会皮
牛膝 黑料豆 茯苓 炒黑干姜

某。喘咳之症，发于三阴者最剧，肾虚气不摄纳，肺虚气不约束，脾虚气不化津，痰嗽气喘，不能平卧，二便有时不禁，眩晕肢凉，症势极重。宜摄脾化饮，兼纳肾气。

炙款冬 沉香人乳磨冲 黑料豆 参须 焦於术 淮山药
煅牡蛎 法半夏 甜杏仁 茯苓 毛燕 旋覆花

复诊：喘咳较平，而脉沉未起，气馁阴伤，肝肾又失约束，脾气下陷，小溲勤短，五更便溏，火升头痛，左目视物不清，亏损已极。当补三阴气血。

党参 於术 淮山药 潼白蒺藜 煅牡蛎 菟丝饼 白芍
款冬花头蜜炙 桃肉 毛燕

《马培之医案》

沈祖复

光复门外王文魁年四十余，面色皤白浮肿，少腹坚硬，气逆喘急，彻夜不寐，咳嗽痰多，两脉沉细，舌质淡白。始用旋复、代赭、坎气及冬瓜皮、鸡金散等，而喘急如故。先生曰：“此系肾阳不足，气不摄纳，脾不温运故也。”因用细辛四分，制附子五分，炒枣仁三钱，带皮苓五钱，炒苏子五钱，老桂木四分，青铅一两，制半夏三钱，甜杏仁连皮，三钱，枇杷叶去毛，三片，沉香三分，服后气喘大平，夜得安卧，面肿亦退，舌质转红，右脉似觉有力；唯咳嗽未止。前方去枣仁、枇杷叶、沉香，加巴戟肉三钱，姜皮七分，坎气一条，三剂喘平肿退。

西门外太平巷某媪年七十三，每值夜半子时气逆喘促起坐，至天明其气稍平，汗出不止，微咳稍有痰，不得吐。诊脉细软，舌上少苔。其孙问先生曰：“此何故耶？”曰：“子时者，阴静阳动之时，高年阴分已亏，阴不敛阳，故气促汗出。”仿高鼓峰用六味地黄丸一两五钱，坎气、青铅、小麦、白芍、牡蛎等同煎，服数剂而安。

南门外盐场许某，喘逆咳嗽痰多，筋惕肉瞤，昏昏欲睡，自语不休，中脘格拒，饮食少进，已经一载。医用旋复代赭及人参半夏茯苓

汤，而气喘更甚，大便不解。诊脉虚细，舌苔潮腻，先生以为脾胃之阳不足，肾虚摄纳无权。始用黑锡丹及温中之味，服后二脉有力，痞满消除，腑气宣通，大便得解。然气喘不平，再用北沙参、五味子、蛤蚧、坎气、巴戟肉、吴茱、白芍、银杏、紫衣胡桃等，气喘遂平，浊痰亦少，能进饮食。先生观其苔，黄而腻，舌质少有裂纹，又以为阴分亦伤，痰乃津液所化，非填下焦阴液不可。用龟板、制首乌、煅牡蛎、白芍、盐水炒巴戟肉、杞子等，连服数剂而饮食愈增，惟夜少安卧。原方加柏子仁、煅龙齿、抱木茯神、淮小麦，安眠如常。后服调补气血之药而痊。

邹律师之子病气逆痰鸣喘急，不能平卧。先生诊视曰：“此喉风也。”用猴枣一分，同贝母、制胆星研末调服。服后喘热大定，得以安睡，呼之不应，家人以为昏迷也，孰知竟愈矣！考猴枣古书所无，马培之征君首用此药，先生承师法继用之有效，今则人人皆知用此物矣。然唯风痰、热痰可用；若寒痰、湿痰用之，无怪凌永言君訾议之也！吾以为非药之咎，是医之不良于用药之过也！

北门外陈合茂行主，年五十余，有烟霞癖，素有痰喘之证。忽起寒热不扬，不进饮食者累月。咳嗽痰多，形神消瘦，脉沉细，苔浊腻。龚医用达邪化湿之品，不效，反致汗出如雨，呃逆不止，神迷谵语。先生以为气阴皆伤，中阳不足。同张君砚芬用老人参一钱，生姜一钱，西洋参、天生术、牡蛎、五味子、半夏、茯苓、伽楠香、再生稻叶等，一剂汗出，再剂苔化，能食煮烂焦锅巴。调理旬日而愈。

又羊毛行陈某亦有烟癖，神情迷糊，谵语，气逆喘急，循衣摸床。先生诊其脉沉细，舌苔浊腻。用人参、干姜、附子、半夏温补之法。适主医至，见方用人参，扬言不可服。诊脉后在楼下相遇，不置可否而去。病家信，服一剂而神情清爽，诸象均退。

《医验随笔》

张锡纯

天津宁某某，年近四旬，素病虚劳，偶因劳碌过甚益增剧。

病因：处境不顺，家务劳心，饮食减少，浸成虚劳，已病倒卧懒起床矣。又因讼事，强令公堂对质，劳苦半日，归家病大加剧。

证候：卧床闭目，昏昏似睡，呼之眼微开不发言语，有若能言而其懒于言者。其面色似有浮热，体温 38.8°C ，问其心中发热乎？觉怔忡乎？皆颌之。其左脉浮而弦硬，右脉浮而芤，皆不任重按，一息六至。两日之间，惟少饮米汤，大便数日未行，小便亦甚短少。

诊断：即其脉之左弦右芤，且又浮数无根，知系气血亏极有阴阳不相维系之象。是以阳气上浮而面热，阳气外越而身热，此乃虚劳中极危险之证也。所幸气息似稍促而不至于喘，虽有咳嗽亦不甚剧，知尤可治。斯当培养其气血，更以收敛气血之药佐之，俾其阴阳互相维系，即可安然无虞矣。

处 方：野台参四钱 生怀山药八钱 净萸肉八钱
生龙骨八钱，捣碎 大甘枸杞六钱 甘草二钱 生怀地黄六钱
玄参五钱 沙参五钱 生赭石五钱 轧细 生杭芍四钱

共煎汤一大盅，分两次温饮之。

复诊：将药连服三剂，已能言语，可进饮食，浮越之热已敛，体温下降至 37.6°C ，心中已不发热，有时微觉怔忡，大便通下一次，小便亦利，遂即原方略为加减俾再服之。

处方：野台参四钱 生怀山药一两 大甘枸杞八钱 净萸肉六钱
生怀地黄五钱 甘草二钱 玄参五钱 沙参五钱 生赭石四钱，轧细
生杭芍三钱 生鸡内金钱半，黄色的捣

共煎汤一大盅，温服。

方解：方中加鸡内金者，因虚劳之证，脉络多瘀，《金匱》所谓血痹虚劳也。用鸡内金以化其血痹，虚劳可以除根，且与台参并用，又能运化参之补力不使作胀满也。

效果：将药连服四剂，新得之病全愈，其素日虚劳未能尽愈。俾停服汤药，日用生怀山药细末煮粥，少加白糖当点心服之。每服时送服生鸡内金细末少许以善其后。

沈阳高某某，三十二岁。因伏气化热伤肺，致成肺劳咳嗽证。

病因：腊底感受寒凉，未即成病，而从此身不见汗。继则心中渐觉发热，至仲春其热加甚，饮食懒进，发生咳嗽，浸成肺劳病。

证候：其咳嗽昼轻夜重，时或咳而兼喘，身体羸弱，筋骨酸疼，精神时昏愤，腹中觉饥而饮食恒不欲下咽。从前惟心中发热，今则日昃时身恒觉热。大便燥，小便短赤，脉左右皆弦长，右部重按有力，一息五至。

诊断：此病之原因，实由伏气化热久留不去。不但伤肺而兼伤及诸脏腑也。按此证自述，因腊底受寒，若当时即病，则为伤寒矣。乃因所受之寒甚轻，不能即病，惟伏于半表半里三焦脂膜之中，阻塞气化之升降流通，是以从此身不见汗，而心渐发热。迨时至仲春，阳气萌动，原当随春阳而化热以成温病《内经》谓“冬伤于寒，春必病温”，乃其所化之热又非如温病之大热暴发能自里达表，而惟缘三焦脂膜散漫于诸脏腑，是以胃受其热而懒于饮食，心受其热而精神昏愤，肾受其热而阴虚潮热，肝受其热而筋骨酸疼，至肺受其热而咳嗽吐痰，则又其显然者也。治此证者，当以清其伏气之热为主，而以滋养津液药辅之。

处方：生石膏一两，捣碎 党参三钱 天花粉八钱 玄参八钱
生杭芍五钱 甘草钱半 连翘三钱 滑石三钱 鲜茅根三钱
射干三钱 生远志二钱

共煎汤一大盅半，分两次温服。若无鲜茅根，可以鲜芦根代之。

方解：方中之义，用石膏以清伏气之热，而助之以连翘、茅根，其热可由毛孔透出；更辅之以滑石、杭芍，其热可由水道泻出；加花粉、玄参者，因石膏但能清实热，而花粉、玄参兼能清虚热也；用射干、远志者，因石膏能清肺宁嗽，而佐以射干、远志，更能利痰定喘。

也；用甘草者，所以缓诸凉药之下趋，不欲其寒凉侵下焦也；至加党参者，实仿白虎加人参汤之义，因身体虚弱者，必石膏与人参并用，始能逐久匿之热邪外出也。

复诊：将药连服四剂，热退三分之二，咳嗽吐痰亦愈强半，饮食加多，脉象亦见缓和。知其伏气之热已消，所余者惟阴虚之热也，当再投以育阴之方，俾多服数剂自能全愈。

处方：生怀山药一两 大甘枸杞八钱 玄参五钱 生怀地黄五钱
沙参五钱 生杭芍三钱 生远志二钱 川贝母二钱
生鸡内金钱半，黄色的捣 甘草钱半

共煎汤一大盅温服。方中加鸡内金者，不但欲其助胃消食，兼欲借之以化诸药之滞泥也。

效果：将药连服五剂，病遂全愈。而夜间犹偶有咳嗽之时，俾停服汤药，日用生怀山药细末煮作粥，调以白糖当点心服之以善其后。

天津张某某，年九十二岁，得上焦烦热病。

病因：平素身体康强，所禀元阳独旺，是以能享高年。至八旬后阴分浸衰，阳分偏盛，胸间恒觉烦热，延医服药多用滋阴之品始愈。迨至年过九旬，阴愈衰而阳愈亢，仲春阳气发生烦热，旧病反复甚剧。

证候：胸中烦热异常，剧时若屋中莫能容，恒至堂中，当户久坐以翕收庭中空气。有时，觉心为热迫怔忡不宁。大便干燥四五日一行，甚或服药始通。其脉左右皆弦硬，间现结脉，至数如常。

诊断：证脉细参，纯系阳分偏盛阴分不足之象。然所以享此大年，实赖元阳充足。此时阳虽偏盛，当大滋真阴以潜其阳，实不可以苦寒泻之。至脉有结象，高年者虽在所不忌，而究系气分有不足之处，宜以大滋真阴之药为主，而少加补气之品以调其脉。

处方：生怀山药一两 玄参一两 熟怀地黄一两 生怀地黄八钱
天冬八钱 甘草二钱 大甘枸杞八钱 生杭芍五钱 野台参三钱

赭石六钱，轧细 生鸡内金二钱，黄色的捣

共煎三大盅，为一日之量，徐徐分多次温饮下。

方解：方中之义，重用凉润之品以滋真阴，少用野台参三钱以调其脉。犹恐参性温升不宜于上焦之烦热，又倍用生赭石以引之下行，且此证原艰于大便，赭石又能降胃气以通大便也。用鸡内金者，欲其助胃气以运化药力也；用甘草者，以其能缓脉象之弦硬，且以调和诸凉药之性也。

效果：每日服药一剂至三剂，烦热大减，脉已不结，且较前柔和。遂将方中玄参、生地黄皆改用六钱，又加龙眼肉五钱，连服五剂，诸病皆愈。

《医学衷中参西录》

巢渭芳

巢良荣孙，目直视，痰声漉漉，身微热，舌晦苔腻，以葶苈子、川贝母、射干、杏仁、川郁金、枳实、生草、橘红、法半夏、淡芩、竹沥、鸡子清煎服而愈。

某，素体阴液不足，吸烟好色，至中年略为维护，光境裕如，知调摄之得宜也。三年来哮喘频发不已，今春更剧，喘不能卧，卧则言语支离，两目不张，痰亦难咯。用清上纳下之剂，初颇见效，甚则以蛤粉含于口中，喘势始平，汗亦止。不数日又作，痰且胶粘，以某夜甚险，渭以九转灵砂丹一分，兼投清降痰逆而效。后虽屡萌，均投灵砂丹开降痰气而愈。越一载，冒秋燥，引动旧恙而歿。

本城张林成，年甫四旬，哮喘十年，正值暑天亢热，感温一候，彼兄偕渭诊之。神烦气粗，脉大而芤，口渴，苔白满布少津，汗多不粘，不能着枕安卧，自问必死。当以西洋参、川贝母、蛤粉、麦冬、五味子、瓜蒌皮、生熟牡蛎、熟石膏、藕汁五大杯、鲜枇杷叶露四两，药汁并进。次晨彼兄来谓大势已平，可啖粥汤否？谓改以藕粉汤进之。

复诊：再减轻洋参，以霍石斛、扁豆等调肺胃而痊。

《巢渭芳医话》

邵兰荪

安昌娄。阴火上升，咳嗽气喘，着枕不耐，脉滑数，舌黄燥底赤。宜防变幻。候正。三月七号壬寅十九日

鲜生地六钱 瓜蒌子三钱 白石英三钱 赖橘红八分
陈萸肉钱半 川贝二钱 天冬三钱 海石三钱 粉丹皮二钱
杜兜铃钱半 光杏仁三钱 引青铅一两

三帖。

又。据述痰气稍平，胃钝，浮肿溺少，恐痰壅致险。仍遵前法加减。候正。四月十二号癸卯念五日

瓜蒌子三钱 苏子二钱 炒谷芽四钱 海金沙四钱 川贝三钱
橘红一钱 白石英三钱 杜赤豆四钱 光杏仁三钱 通草钱半
紫菀二钱

清煎二帖。

史介生评：喘病之因，在肺为实，在肾为虚。此则虚实兼夹，肺肾同病。虚则虚于肾之不固，实则实于湿痰壅逆。盖因下元已虚，肾气不为收摄，痰随气升，壅住肺气，肺气不降，以致气喘不能着枕。初方镇摄固纳，清宣肃降，得以痰气稍平。然湿浊尚未净退，而浮肿溺少，继进清肺渗湿以化痰。治法标本兼顾。

《邵兰荪医案》

何长治

左，复。胸烦咳呛，俱得减；惟不甚聪，脉数。是关劳心烦火上炎。夏令更宜静养。

生黄芪钱半 湖丹皮钱半 远志肉钱半 白蒺藜二钱
广陈皮八分 生甘草四分 中生地三钱 秦艽肉钱半 煅龙齿三钱

甘菊花钱半 炒黄芩钱半 加细桑枝五钱 干荷蒂三枚

左。热久肺气受伤，又复作泻，脉细弱。非补不可。

潞党参钱半 制首乌三钱 款冬花钱半 干百合三钱
生甘草四分 焦冬术钱半 煅牡蛎三钱 麦门冬三钱 酸枣仁三钱
广皮八分 冬虫夏草钱半 加佛手柑四分

左。中虚气弱，脾经生痰，致上焦肺气不肃，吐咯颇艰，甚则气逆似喘；小便不禁，寐则口角流涎，肢冷指麻，腿膝弱而艰步，言钝神呆；舌白中黄，脉左寸细弱，右寸关沉滑。正虚邪盛，恐其变端。拟方以冀神清为幸。

於术钱半 半夏钱半 远志钱半 茯苓三钱 橘红八分
牡蛎三钱 炙草四分 桂枝五分 川贝母二钱 加菖蒲钱半
郁金钱半

陈，四十八岁。壬申五月十五日。哮喘，脉弱。当用补摄。

潞党参二钱 麦门冬二钱 炒苏子三钱 炙甘草四分
款冬花钱半 煅瓦楞子三钱 原生地三钱 五味子四分 广陈皮一钱
茯苓二钱 加胡桃两枚，杵 水姜一片

陈，十五岁。癸酉九月十三日巳刻。杂食伤中，哮喘气逆，多痰，脉细数。关金水交困。先宜理肺。切忌生冷。

潞党参钱半 原生地四钱 麦门冬二钱 炒苏子三钱
款冬花钱半 五味子五分 煅瓦楞四钱 白茯苓二钱 枸杞子二钱
旋复花钱半，绢包 炙甘草四分 广陈皮一钱 加水姜二片

左。哮喘多痰常发，腰背酸楚，脉细数无力。当从肝肺滋化。营分久亏，调理非易也。炎令最宜节养。

生黄芪二钱 中生地三钱 生甘草四分 款冬花钱半
肥玉竹二钱 广陈皮八分 地骨皮钱半 瓦楞壳三钱 天花粉三钱
炒苏子钱半 桑白皮三钱 加盐水炒竹茹钱半 藉节四枚

复诊：哮喘，痰滞艰出，脉细软无力。由肺气不摄。此方接服。节劳为要。

潞党参二钱 北沙参三钱 中生地三钱 款冬花钱半
炒苏子钱半 煨瓦楞壳三钱 白前钱半 生甘草四分 广陈皮八分
佛手柑八分 肥玉竹二钱 冬虫夏草二钱 加枇杷叶二片去毛。

左。劳倦，哮喘久作，气逆，脉涩。肺肾已枯，衰年调理非易也。

潞党参二钱 白茯苓三钱 炒苏子钱半 五味子三分
炮黑姜四分 焦冬术二钱 炙甘草四分 枸杞子三钱 款冬花钱半
广陈皮八分 佛手柑八分 煨瓦楞子三钱 加旋复花钱半

左。哮喘，脉芤弱。法当补摄。

潞党参二钱 炒苏子钱半 原生地三钱 煨瓦楞子三钱
广皮八分 麦冬三钱 款冬花钱半 五味子三分 白茯苓三钱
炙草四分 加胡桃肉两枚，打 水姜二片

左。气虚，哮喘，脉芤，神困。当从肺肾滋养。

炒党参二钱 原生地三钱 款冬花钱半 桑白皮二钱
生鳖甲三钱 广皮八分 麦门冬三钱 炒苏子钱半 干百合三钱
煨牡蛎三钱 象贝母三钱 生草四分 加根杏三枚，打

左。气虚，哮喘时作，脉细无力。难以取效也。

炒党参二钱 款冬花钱半 象贝母三钱 五味子三分 广皮八分
旋覆花钱半 麦门冬三钱 炒苏子钱半 山萸肉钱半 炒干姜四分
炙草四分

左。向有哮喘，近因症后时发，虚热多汗，痰塞，脉细数。暂从疏化。

生黄芪钱半 炒枳壳钱半 炒黄芩钱半 山查炭三钱
佛手柑五分 广陈皮八分 制首乌三钱 真神曲三钱 生鳖甲三钱
炒青皮钱半 茯苓三钱 生甘草四分 炒柴胡五分
加姜汁炒竹茹钱半

《何鸿舫医案》

也是山人

沈妇廿八唇裂频呕，口干头痛，不寐足冷，左胁向有癥聚，便秘，胸腹热炽，面色黄，脉左关弦大，右寸搏大，此属温燥内郁。喉间呼吸有声，是症虽属痰喘之象，但麻黄一味大谬。议喻嘉言清燥救肺汤合肺肝之治。

霜桑叶一钱 生石膏三钱 白蒺藜二钱 鲜生地五钱 杏仁三钱
石决明三钱 拣麦冬三钱 生甘草二分 大麻仁一钱五分
加鲜枇杷叶二张去毛、蜜炙

又。呕频稍减，唇裂退。

霜桑叶 炒石膏 拣麦冬 真阿胶 杏仁 白蒺藜 制洋参
鲜生地 生甘草 加枇杷叶三钱

又。呕大减。润肺燥，益肝液。

鲜枇杷叶 北沙参 紫石英 白蒺藜 真川贝 真阿胶 甜
杏仁 拣麦冬 炙鳖甲 霍山石斛 黑芝麻

又。呕减，潮热，咳乃胀痛，肝脉仍弦，大便秘，肺胃衰，肝阴亏，肝火上越。

紫苑草一钱 拣麦冬三钱 白蒺藜二钱 甜杏仁三钱
紫石英五钱 郁李仁 真石斛二钱 真阿胶二钱 咸苁蓉五钱
鲜枇杷叶三钱、小川连三分

《也是山人医案》

王仲奇

陆，南市，七月初十日。年前由泻而痢，脾肾元阳不振，肌肉渐瘦，肢酸乏力，不耐烦劳，喜暖恶寒，感凉而腹笥作痛，大便非温润不畅，脉濡弦。当以温下。

淡苁蓉三钱 巴戟天二钱 益智仁一钱 淫羊藿二钱
全当归小茴八分同炒，三钱 补骨脂炒，二钱 九香虫炒，一钱五分

沉香曲炒，钱半 葫芦巴钱半

二诊：八月初四日。肺主气，呼吸出入，痰液之分泌皆属于肺，气候忽热忽凉，肺气卫外不力，痰得壅逆于上，咳嗽旧恙又作，痰多，喉间有声，脉弦滑。恐渐入哮喘痼疾，且以温药和之。

法半夏钱半 甘草淡干姜四分同拌，八分 杏仁去皮尖，三钱
佛耳草布包，钱半 玉苏子二钱 百部蒸，八分 射干一钱
桑白皮炙，钱半 款冬花炙，钱半 茯苓三钱 生苡仁三钱

宋右，闸北。咳嗽、哮喘、喘急，呼吸紧迫，喉间有水鸡声，卧难安枕，脉濡弦。痰沫壅逆，肺布叶举，姑以温药和之。

麻黄泡去上沫炙 杏仁去皮尖 茯苓 淡干姜 甘草前二味同炒
紫菀蒸 桑白皮炙 鼠粘子炒 制川朴 马兜铃炙 法半夏
莱菔子炒 射干

三诊：咳嗽、哮喘、喘息见瘥，呼吸较畅，卧得安枕，脉濡滑而弦。肺恶寒，仍以温药和之。

麻黄泡去沫炙 杏仁去皮尖 射干 制川朴 马兜铃炙
鼠粘子炙 紫菀 款冬花炙 百部蒸 玉苏子 白前 莱菔子炒

王右，马浪路。痰沫上壅，肺苦气逆，咳嗽气急作闭，甚则卧难安枕，喉痛、头痛均偏着左边，昼轻夜甚，脉弦滑。治以宣豁。

桑白皮炙 马兜铃炙 紫荆皮 百部蒸 款冬花炙 鼠粘子炒
白前 茯苓 杏仁去皮尖 射干 紫菀 金钗斛

二诊：气急作闭较愈，卧得安枕，咳嗽较减未辍，头痛向安，偏左喉痛未已，经水适来，腰俞作酸，脉濡弦。守原意出入之。

桑白皮炙 鼠粘子炒 紫荆皮 马兜铃炙 款冬花炙 紫菀
杏仁去皮尖 射干 续断炒 泽兰 绿萼梅 莱菔子炒 茯苓

三诊：头痛向安，气急作闭较愈，卧得安枕，微咳未罢，喉痛作干，左胁肋引痛，口舌粘腻不爽，脉濡滑而弦。保肺清金可也。

海蛤粉包 金钗斛 生苡仁 马兜铃炙 紫荆皮 白药子
紫菀 款冬花炙 射干 天花粉 甘草 鲜青果

四诊：喉痛较瘥，咳呛、气急作闭、左胁肋引痛均已见愈，卧得安枕，食欲较启，唯右腿肢仍然清厥，脉濡弦。守原意为之。

海蛤粉包 金钗斛 紫荆皮 山豆根 淮山药 生苡仁
杏仁去皮尖 紫菀 冬虫夏草 茯苓 罂粟壳 十大功劳

郑，石路·黟县，初诊（佚）。

二诊：八月十九日。咳嗽、哮喘见瘥，呼吸稍畅，卧得安枕，惟晨起尚觉痰壅欠适，左胁肋吸气引痛，顽痰濡滞未清，仍守原意为之。

鹅管石煨透，一钱 杏仁去皮尖，三钱 甜葶苈隔纸炒，一钱二分
玉苏子二钱 射干二钱五分 鼠粘子白芥子八分同拌，钱半
金沸草布包，三钱 桑白皮炙，钱半 佛耳草布包钱半 马兜铃炙，钱半
麻黄根四分 丝瓜络带子，三钱

三诊：八月廿十九日。咳嗽、哮喘时愈时发，日来咳痰又觉不爽，左胁肋引痛，卧难安枕，晨起腕中难过，纳食胸脘中亦不适。仍以宣气豁痰、泻肺降胃。

鹅管石煨透，一钱 杏仁去皮尖，三钱 甜葶苈隔纸炒，一钱二分
玉苏子二钱 金沸草包，二钱 桑白皮炙，钱半
鼠粘子白芥子八分同拌，钱半 化橘红一钱 佛耳草包，钱半
莱菔子炒，一钱 麻黄根四分 茯苓三钱 射干一钱二分

四诊：九月初七日。左胁肋引痛向愈，痰壅肺实未瘥，咳嗽，哮喘，卧难安枕，喉间痰粘不爽，自闻气味恶浊，神疲，鼻窍不爽。仍以泻肺豁痰可也。

鹅管石煨透，一钱 杏仁去皮尖，三钱 甜葶苈隔纸炒，一钱
桑白皮炙，钱半 款冬花炙，钱半 马兜铃炙，钱半 鼠粘子炒，钱半
莱菔子炒，一钱 佛耳草布包钱半 百部蒸，八分 玉苏子二钱
赖橘红一钱 射干一钱 白果肉炒去壳，六枚

五诊：九月十七日。痰壅肺实，咳嗽哮喘，鼻息不爽，卧难安枕，午后呼吸稍觉舒畅，脉弦滑。乃以宣肺豁痰。

鼠粘子 白芥子 六分 同杵，钱半 百部 蒸，八分 杏仁 去皮尖，三钱
桑白皮 炙，钱半 甜葶苈 隔纸炒，一钱 款冬花 炙，钱半 北细辛 二分
赖橘红 八分 玉苏子 二钱 莱菔子 炒，一钱 射干 一钱二分
佛耳草 包，钱半 麻黄根 四分

李君，五月初九日。肾间动气为生气之本，三焦之原，阴阳翕辟存乎此，呼吸出入系乎此。肾气怯弱，气不运痰，而饮食入胃以传于肺，又酿痰而不生血，肾失固纳，肺苦气逆，病机日深，元气日乏矣，咳嗽，喘息，痰胶腻难出，交睫即梦梦忽忽，肢指掣动如瘰癧之状，脉濡滑，浮取尚盛，重取则微，右部三、五不调，偶有代象，精神不振，元气欲离，何恃而无恐？兹拟纳肾气以运痰，肾气稍振，自能使痰活动，然而难矣。

冬虫夏草 一钱二分 鹅管石 煨透，一钱 远志 肉炙，一钱
海蛤粉 包，四钱 参贝 陈皮 一钱 银杏肉 炒去壳，六枚 茯苓 三钱
金钗斛 三钱 百部 蒸，八分 蛤蚧尾 刮鳞炙研末吞，六分 罂粟壳 钱半
款冬花 炙，钱半

二诊：五月二十日。纳肾气以运痰，肾气稍振，痰稀且少，气逆喘息较安，惟精神仍然虚弱疲敝，欲眠交睫仍梦梦忽忽，指瘰肢痲，脉濡滑而弦，左右相等，惟右尺重按稍觉空大。肾命精气仍怯，精、气、神为入身三奇，乃生生之本，衰怯不振非一朝一夕之故，其渐久矣。漫长而多，亦属下虚。证、药虽云相安，但真元已惫，非外因时邪可比，不能以稍减即谓险岭已过也，仍拟原意出入之。

远志 肉炙，一钱二分 罂粟壳 钱半 鹅管石 煨透，钱半
左牡蛎 煨先煎，三钱 海蛤粉 包，三钱 银杏肉 炒去壳，六枚
虫夏草 一钱二分 参贝 陈皮 一钱 淮牛膝 炒，二钱 淮薏 二钱
茯苓 三钱 金钗斛 三钱 蛤蚧尾 刮鳞炙研吞，六分

程，太平坊。七月廿九日。望七年岁，阳明脉衰，宗气怯弱，气不运痰，痰壅于上，为咳嗽、痰多、喘急，头脑如蒙，小溲夜频，脉弦滑。治以运气豁痰，宣肺纳肾。

远志肉炙，一钱 鹅管石煨透，一钱 海蛤粉包，三钱
银杏肉炒去壳，六枚 法半夏钱半 益智仁一钱 罌粟壳钱半
冬虫夏草一钱二分 参贝陈皮一钱 佛耳草包，钱半 款冬花炙，钱半
百部蒸，八分

二诊：八月廿八日。望七年岁，阳明脉衰，宗气怯弱，元海失固，咳嗽痰多喘急，小溲夜频，心有余，力不贍，行动维艰，指臂亦不肯受驱使，脉弦滑。仍以纳肾调元，益气运痰。

海蛤粉包，三钱 远志肉炙，一钱 鹅管石煨透，一钱
款冬花炙，钱半 金钗斛二钱 赖橘红一钱 巴戟天钱半
胡桃肉补骨脂钱半同炒，钱半 罌粟壳钱半 百部蒸，一钱
冬虫夏草一钱二分 蛤蚧尾刮鳞炙研分吞，三分

三诊：九月十四日。痰嗽喘急较安，精神稍振，纳食略强，惟足膝仍然酸软，乏力步趋，脉弦滑。仍以纳肾调元气，益气运痰。

海蛤粉包，三钱 远志肉炙，一钱 鹅管石煨透，三钱 鹿角煨，钱半
金钗斛二钱 菟丝饼三钱 潼沙苑三钱 冬虫夏草一钱二分
巴戟天钱半 金毛脊炙，一钱 罌粟壳钱半 胡桃肉补骨脂钱半同炒，钱半
蛤蚧尾刮鳞炙研细末吞，三分

《王仲奇医案》

孙采邻

孙姬舟人，素有咳喘症，交冬更甚，肺俞畏寒，喘咳频增，闻烟酒则愈咳。年五旬又四，交冬即发者，贫妇不免单衣食薄，舟中又不能避风寒，所以咳无停，而常有畏寒兼喘之势。欲求方愈疾，而又惜费。余怜其贫苦，而想一省便简易之方以应之，药虽平淡，实有至理存焉，因识之。

生白果肉二十一粒，去心衣 胡桃肉两枚，连皮用 冰糖五钱
鲜生姜一钱五分

四味共捣，极烂。用滚水冲服，连渣齐饮，每早晚各饮一服，无

间。

按：是方也唯外感风寒而致身热头疼，鼻塞喘咳者，则禁服，竹亭再识。

遵法服之五日，不第喘咳止，而畏寒之势顿平矣。后偶遇寒冷，劳力复发，如法行之，一服而止。予乃一时之灵机，竟成千古之秘方。

《竹亭医案》

王埶

里中武庠杨乐斋之二嫂，廿余而寡，抚一子，人颇精强，一切家政，皆经其手，诸妯娌不及也。然郁郁独居，肝气时作，发则喘咳交臻，呻吟不食，如此者经年矣，延医数辈皆以癆瘵论。壬戌春，病复发。卧床月余，阖家无可措手。杨邀余视之，诊其左关滑数，右寸关俱甚。乃告之曰，此气郁停痰，并非癆症。前必多服补药，因而增剧，万勿为虑，药不十剂，保无恐矣。乃以平胃、二陈、四七汤合进之，药入口才刻许、膈间漉漉作声，顿觉宽展，二帖后，喘咳息，而食少进。家人皆惊其神，以为全愈，遂停药。余亦忘之，未过三日病又作。又延余视，诊之，脉少衰，而滑数未改。因问服几帖？以二对。告曰：二帖路已开，病未愈，少亦须四服，但得大解胶粘秽物，则全去矣。不必易方，宜照前服之，三日后再见也。病者听之，越日晨起，暴下恶物数次，食大进，喘咳皆归乌有。更告以香砂六君子丸调摄之，尤当稳固，而其家皆淡漠，不知听之否也。倘调养不善，恐明春再作也。

《醉花窗医案》

顾恕堂

陈某，哮喘发三载，每于隆冬而发。上焦积饮泛滥，极难除根。

小青龙汤

复诊：哮喘三载，虽缓，积饮未除。

苏子 旋复 橘红 款冬 白果 杏仁 半夏 前胡 海石
竹茹

《横山北墅医案》

红杏村人

沈左，暑夜露眠，裸体贪凉，酣睡骤遭阵雨沾背，致令寒邪深入肺俞，咳嗽喘逆，捧腹抬肩，玄府紧闭，汗出不畅，脉浮数舌白，口渴，病情极难图效。勉拟开鬼门、肃肺金、冀免喘脱。

麻黄 杏仁 粉草 前胡 桑白皮 款冬 苏梗 芦根 丝瓜络

又覆：昨幸得汗颇畅，咳喘顿平，谷食增旺。因起居失慎，感受新凉，兼之风湿相搏，偏体肢节疼痛不能转侧，肩臂伸举艰难，脉弦苔白。姑议疏风理湿，佐以通络。

秦艽 防风 独活 白蒺藜 豆卷 山栀 桑枝 木瓜 苡米 丝瓜络

濮左，喘出乎肾关乎肺，肺为主气之标，肾为纳气之本，本虚标实，咳喘并作，脉弦滑数。舌白边红。上实下虚最易喘脱。

旋覆 代赭 沙参 苏子 莱菔子 白芥子 川贝 橘红
蛤壳 杏仁 芦根

又覆：咳喘必由肺肾、肾为本而肺为标。急则先治其标，缓则宜治其本。今诊脉左弦细，右浮滑数，舌色边尖红根转黄糙。中脘痹痛，倚息不得卧下。痰随气升，气因痰阴，深虑昏喘而脱，勉仿清燥救肺法。

羚羊 沙参 麦冬 枇杷叶 杏仁 川贝 桑皮 蒺藜 茯神 五味

又覆：温邪必先犯肺，肺气贲郁，咳而且喘，加以痰浊上干，扰动膻中，膻中为气之海，上通于肺，下达于肾，兹以痰气交阻，失其

清旷之常，其气有升无降，是以喘逆不能卧也。欲平其喘必先顺气，欲顺其气必先涤痰。痰清气降，息息归元则喘自平矣。

沙参 麦冬 五味 海浮石 川贝 竹沥 补骨脂 胡桃
蛤壳 萎霜 青铅

汤左，积年哮喘频发益剧，倚卧不能着枕，喉间呼吸有声。窃惟喘逆虽出于肺，其源实本乎肾，是肾为本而肺为标也。诊脉右部浮滑带弦，左尺独见细弱，足征肺气散越，肾乏摄纳而成上实下虚之象。治宜肃肺以宣其标，纳肾以固其本。

参 地 麦冬 补骨脂 胡桃肉 女贞子 川贝 甜葶苈
蛤壳

又覆：肺为月藏，不耐寒暄，一有感触则咳喘并作，必俟所入之邪宣泄无遗，痰消气顺，始能息息归元。是以古人治法专以清润通降为主也。

鲜沙参 麦冬 瓜蒌霜 川贝 茯苓 杏仁 知母 生蛤壳
枇杷叶

《医案》

费承祖

山西任静斋，患呛咳气喘，诊脉细弦。系肾阴久虚，肝阳上灼肺阴，清肃无权。法当育阴制阳。

北沙参四钱 生杜仲三钱 女贞子三钱 白芍一钱五分
甘草五分 大生地三钱 川贝母三钱 瓜蒌皮三钱 川石斛三钱
杏仁三钱 冬瓜子四钱

连服十剂，病乃霍然。

安徽余仲庚，先受风而后受寒，咳嗽气急，喉有痰声，脉来浮弦。治必泄邪肃肺。

苏梗一钱五分 牛蒡子一钱五分 苦杏仁三钱 瓜蒌仁三钱
橘红一钱 甘草四分 冬瓜子四分

连服二剂而愈。

南京蒋寿山，发热咳嗽，烦躁难以名状。余诊脉弦滑。邪热挟痰，销烁肺津。治必生津泄邪，清热豁痰。

香豆豉三钱 黑山栀一钱五分 冬桑叶一钱 天花粉三钱
象贝母三钱 瓜蒌皮三钱 冬瓜子四钱 鲜竹沥二两 薄荷叶一钱

进两服，热退躁止，惟咳嗽、口干引饮，苔黄溲赤。此邪热外泄，而痰热未清也。前方去豆豉、山栀、薄荷，加石斛三钱、竹茹一钱五分、梨五片。进两剂，口干引饮、苔黄溲赤皆退，惟咳嗽尚未止。痰热虽化，肺津暗耗，清肃无权。前方去桑叶、象贝、竹沥。加南沙参四钱、川贝母三钱、杭菊花一钱半。连进三剂，霍然而愈。

常州瞿梅阁，咳嗽哮喘，举发无常，甚则喉际痰声漉漉，寝食俱废。诊脉沉细而弦。风寒挟痰饮阻肺，清肃之令不能下行。

薄橘红一钱 云茯苓二钱 制半夏一钱五分 苏子三钱
紫菀一钱 杏仁三钱 苡仁三钱 当归二钱 煨姜二片 大枣两枚
服六十剂而霍然。

四川倪太令淑，素精医理。因公来沪，事多烦劳，咳嗽气喘，夜难平卧。请医投以补肾纳气，不应。更医用通阳涤饮，病转剧。口渴引饮，大便溏泄。倪氏年近古稀，自觉支持不住，延余诊之。脉来沉滑。此痰热销烁肺阴，肃降无权。补肾纳气，滋腻未免碍痰；通阳涤饮，辛温反助火劫阴。火盛灼津，津枯失润。乃以生梨切片频进。

北沙参三钱 川贝母三钱 瓜蒌皮三钱 川石斛三钱
生甘草四分 生白芍一钱五分 甜杏仁三钱 冬瓜子四钱
鲜竹沥二两

连服三剂，口渴便泄已止，咳喘渐平，卧能着枕。前方加海浮石三钱，荸荠五枚。再服二剂，咳嗽气喘皆平，夜寐甚安。前方去竹沥，加吉林人参须一钱、淡竹茹一钱，进服六剂，眠食俱佳，精神振作而愈。

溧阳洪瑞初之夫人，咳嗽哮喘，喉际痰声，漉漉，口渴引饮，夜

坐凭几而卧。诊脉弦滑洪大。此痰火销烁肺阴，肺气肃降无权。辛温祛寒涤饮，反为痰火树帜而劫肺阴。

梨汁 荸荠汁 芦根汁 冬萝卜汁 鲜竹沥

上药隔汤炖温连进二次，喘咳皆平，即能平卧。

南沙参四钱 川贝母三钱 瓜蒌皮三钱 甜杏仁三钱 苡仁三钱
冬瓜子四钱 海浮石三钱 鲜竹茹一钱

服五剂，口渴止而病若失。

孟河都司刘文轩之太夫人，发热，汗出不解，咳嗽气喘，苔黄带灰，胸腹胀痛，势濒于危，急延余诊。脉来沉滑。此痰滞交阻，肺胃失肃降之权，非攻下不可。

礞石滚痰丸五钱 淡姜汤送下。

服后大便即行，热退痛止，喘咳皆平。太夫人性不喜药，以饮食调养而安。

徽州曹君物恒，略受外邪，而不自觉。医用补药数剂，遂发热喉痛，口干胁痛。予诊脉浮弦，邪热自气灼营，法当清透。

牛蒡子一钱 薄荷一钱 马勃八分 蒺藜皮三钱 桑叶一钱五分
连翘一钱五分 丹皮二钱 象贝母三钱 甘草五分 竹叶三钱

连进两剂，汗出热退，喉痛胁疼皆止，邪从汗解。惟津液暗亏，口干便结，不思饮食，夜不成寐。用甘凉益胃而安。

南沙参四钱 麦冬三钱 白芍一钱五分 石斛三钱 天花粉三钱
茯神二钱 生谷芽四钱 生甘草五分

淮安任守谦，咳嗽痰多，脘懣作吐，举发无常。进辛温发散，病益剧。肺俞穴畏寒，必须棉裹。诊脉沉细而弦。前因发散太过，肺胃气液皆虚，湿痰阻气，肃降无权。治必培养气液，兼化湿痰，方能奏效。

吉林参须五分 北沙参四钱 燕窝根一钱五分 川贝母三钱
紫菀一钱 橘红一钱 枳壳一钱 海浮石三钱 杏仁三钱
冬瓜子四钱 红枣五枚

服两剂，颇效。连服十剂，遂愈。

东台石品山，患咳嗽哮喘，喉际痰声漉漉，举发无常。发时自觉胸脘热盛，心烦不安。苔黄口干，脉来滑大。此痰火销烁肺阴，清肃无权。辛温逐饮，反劫阴液而助痰火，所以遍治无功。

沙参四钱 麦冬三钱 豆豉二钱 象贝母三钱 萎皮三钱
杏仁三钱 石斛三钱 冬瓜子四钱 竹茹一钱 竹沥一两

进八剂，有卓效。前方加女贞子三钱、杜仲三钱。二十剂全愈。

浙江朱竹石之失人，病咳嗽气喘，难以平卧，心烦懊恼，脘闷口腻，饮食少进，面浮腿肿，夜不成寐，势极危险。延余往诊，脉来洪大弦数。气液皆虚，肝阳上亢，挟素蕴之痰湿，阻塞肺胃，肃降无权。法当培养气液，清肝化痰。

吉林人参须一钱 西洋参一钱半 杜仲三钱 茯神二钱
川贝母三钱 枳壳一钱 瓜蒌皮三钱 女贞子三钱 杏仁三钱
白芍一钱半 牡蛎四钱 龙齿二钱 冬瓜子四钱 竹茹一钱

进二剂，肝阳上亢之势渐平，心烦懊恼已止，夜能安寐。照前方加石斛三钱、梨五片、荸荠五枚。大便畅行，痰从下泄，肺胃肃降，喘咳皆平，夜能平卧，饮食渐进，面浮腿肿渐消。照前方加毛燕三钱，调理半月而康。

《费绳甫医话医案》

曹沧洲

某左。肾气不摄，肺气不降，夜热，腰腿酸软，咳逆痰吐如沫，近日外症稍好，即守前意增损。

北沙参一钱半 麦冬一钱半，去心 白芍一钱半 沙苑一钱半，盐水炒
大熟地七钱，海蛤粉炒 川贝三钱 甘草炭四分 川断三钱
紫石英五钱，煨 甜瓜子五钱 朱茯神四钱 料豆衣加玉蝴蝶七张

某左。病久阴阳并亏，无藏不虚，近日所最虑者，肾不纳，肺不降，浮阳上越，痰不化，自汗不已，气急不止，自觉胸闷不能饮食，约

已六昼夜不能合目，病情危急已极，而又大便不实，畏热作躁，脉虚数，藏失所司，理之非易。

大熟地一两，切小块急火煎四五十沸去渣 蛤蚧尾一对，盐水炙以汤煎药
左牡蛎二两 抱木茯神六钱 苍龙齿五钱 南沙参四钱
海浮石五钱 淮山药五钱 紫石英五钱 川贝三钱，去心
紫河车根五钱 甘草炭一钱半

某左。肺虚久喘动肾，胃家痰热上亢，气急痰嘶，神识迷蒙，舌糙燥无津，气不至口，燥中无阳故不渴，脉至数不匀，肢振，病深药浅，不易立方。

鲜霍斛 左牡蛎 玄参 海浮石 西洋参 紫石英 川贝
竺黄片 生地炭 河车根 盐半夏 茯苓

某右。温邪包裹肺气，咽间哮喘紧，音哑极，舌白口腻，畏寒。经曰形寒饮冷则伤肺，以肺恶寒也，拟宗六安煎法治之。

苏叶一钱 蝉衣七分，去足 陈皮一钱 生米仁三钱
白杏仁四钱，去尖 牛蒡三钱 宋半夏一钱半 冬瓜子五钱
象贝四钱，去心 赤芍三钱 生蛤壳一两 通草一钱 紫菀一钱，生

某幼。童哮喘积久，大便溏泄，质小病深，理之不易。

苏子一钱半 陈皮一钱 茯苓四钱 紫紫一钱半，蜜炙 干菖蒲四分
泽泻三钱 白杏仁三钱，去尖 象贝四钱，去尖 漂白术一钱半

《吴门曹氏三代医验案》

曹南笙

某左。远客路途，风寒外受，热气内蒸，痰饮日聚，藏于络脉之中，凡遇风冷或曝烈日或劳碌形体，心事不宁，扰动络中夙饮，饮泛气逆咳嗽，气塞喉底胸膈，不思食物，着枕呛吐稠痰，气降自愈，病名哮喘伏饮。

小青龙汤去细辛。

某右。宿哮喘肺病，久则气泄汗出，脾胃阳微，痰饮留着，有食入

泛吐之状。夏三月，热伤正气，宜常进四君子汤以益气，不必攻逐痰饮。

四君子汤

某左。饮邪泛滥喘咳，头身摇动，喘逆不平。食则脘中痞闷，卧则喘咳不得息，肺主出气，肾主纳气，二藏失司，出纳失职，议早进肾气丸三钱以纳少阴，晚用小青龙法涤饮，以通太阳经腑，此皆内饮治法，与乱投臑补有间。

小青龙去麻、辛、甘、芍，加茯苓、杏仁、大枣

某右。初诊：脉弦坚，动怒气冲，喘急不得卧息。此肝升太过，肺降失职，两足逆冷，入暮为剧。

仲景越婢法

二诊：左胁冲气使喘，背上一线寒冷直贯两足，明是肝逆夹支饮所致。

金匱旋复花汤法

某右。劳烦哮喘是为气虚，肺主气，为出气之藏，气出太过，但泄不收，则散越多喘，是喘症之属虚。故益肺气药皆甘，补土母以生子。若上气散越已久，耳目诸窍之阻，皆清阳不司转旋之机，不必缕治。

人参建中汤去姜。

某左。望八之年，因冬温内浸，遂致痰嗽暮甚，诊脉大而动搏，察色形枯汗泄，吸音颇促，似属痰阻，此乃元海根微，不司藏纳，神衰吃语，阳从汗出，最有昏脱之变。古人老年痰嗽喘症，都从脾肾主治，今温邪扰攘，上中二焦留热，虽无温之理，然摄固下真以治根本，所谓阳根于阴也。

熟地炭 胡桃肉 牛膝炭 车前子 云茯苓 青铅

某右。先寒后热，不饥不食，继浮肿喘呛，俯不能仰，仰卧不安。古人以先喘后胀治肺，先胀后喘治脾。今由气分愤郁致水道阻塞，大便溏泄不爽，其肺气二肠交阻，水谷蒸腐之湿横趋脉络，肿由渐

加。

肺位最高主气，为手太阴脏，其体恶寒恶热，宣辛则通，微苦则降，若药气味重浊，直入中下，非宣肺方法，故手经与足经大异。

麻黄 苡仁 茯苓 杏仁 甘草

某左。疮毒内攻，所进水谷不化，蒸变湿邪，渍于经隧之间，不能由肠而下，膀胱不利，浊上壅遏，肺气不降，喘满不堪着枕，三焦闭塞，渐不可治，议用中满分消之法，必得小便通利方可援救。

葶苈 杏仁 桑皮 厚朴 猪苓 通草 大腹皮 茯苓皮 泽泻

《吴门曹氏三代医验集》

陈良夫

许妻。生痰之源有二，脾与肾也。痰沫稀薄味咸，咳呛气逆，动则喘息，脉细滑，舌碎苔薄白，此肺气先虚，肾水亦乏使然，宜清上益下法。

生地炭 制女贞 杏仁 紫石英 款冬花 蛤壳 淮牛膝 川柏 黛灯芯 川贝 紫菀

张男。肾与膀胱为表里，同司下焦，肾者主蛰，封藏之本，精之处也；膀胱者，州都之官，津液藏焉，水泉不止者，乃膀胱不藏也。阴精所奉其人寿，阴阳离决，精气乃绝，此皆内经之要旨，为治病之准的也。平素遗溺，肾气之虚，不言可喻，近复气升欲喘，动则更甚，神思恍惚，形瘦神疲，手指时有抽搐，舌绛苔花，上罩灰色，脉来细数。拙见阴精大亏，下焦失纳，虚阳亢而化风浮越，水火失于交济，肺肾不相接续，阴与阳已有离决之虞。高年之体，脏气已衰，恐草木之功，未可挽回造化矣。

霍石斛 冬青子 玄参心 辰麦冬 煅龙齿 龟板胶 生石决 五味子 山萸肉 熟地 吉林参须

沈男。初诊：肺气以下行为顺，上升为逆。始起胸膈痞痛，渐至

气喘痰鸣，胁腹亦觉不舒，咳呛，咯痰稀白，脉弦滑，苔浮腻。乃湿聚化痰，阴滞气分，肺金之宣降失司，周身流行之气，亦乖常度，《内经》所谓诸气贖郁，皆属于肺是也。若久郁不宣，便成气喘之症，拙拟宣其肺以利其气，化其湿以涤其痰，务使肺得宣降为妙。

旋复梗 甜葶苈 仙半夏 炙紫菀 细白前 白芥子 光杏仁 象贝母 代赭石 苏子 车前子 白茯苓

二诊：人之气机，本周行而无滞，湿为阴邪，最能滞气，进理气宣肺，祛湿涤痰之剂，咯去积痰颇多，气逆渐减，胸膈之满闷，亦觉稍舒，惟便下未能通畅，兼有啰恶，脉仍弦滑，舌黄薄腻。拙见肺金失于清肃，升降之气，尚乖常度，祛其有形之痰，利其无形之气，务使周行无滞，斯呼吸平匀则诸病自退矣，能再加以静摄尤为妥善。

旋复梗 象贝母 仙半夏 莱菔子 白前 光杏仁 代赭石 陈皮 苏子梗 白芥子 滚痰丸

秋翁。肺气以下行为顺，上升为逆。平素饮酒，湿热必然内盛，久之能化火生痰。痰热内郁于肺，偶伤风寒，遂至咳呛频作，咯痰欠豁，气逆如喘，不得平卧，口时干而喜饮冷，脘闷胁痛，不思纳食，脉来细滑带数，舌苔糙黄，中剥。病已一句，因留痰不从外出，阻滞肺气，是以润降因之失职，且火郁不宣，尤易伤津，不可不知也，且拟清化肃降肺气之法。

北沙参 鲜石斛 炙紫菀 款冬花 枯芩 炒苏子 细白前 甜葶苈 海浮石 代赭石 炙桑皮 青铅

周男。声响者谓之哮，气逆者谓之喘，气时喘逆，喉声如锯，胸闷痰粘，吐咯不利，脉滑苔腻，是积痰内涌，肺气失降，治以顺气涤痰。

旋复梗 炒枳实 光杏仁 熟菴子 煅礞石 炒竹茹 炒苏子 云苓 代赭石 沉香 川朴 葶苈

《陈良夫专辑》

徐渡渔

哮喘久年，痰泛作咳，咳剧辄喘，卧不着枕，作于子、丑二时。哮喘乃肺病，久则虚，涉于肾。肺主出气，肾主纳气，虽然感风辄发，发则气根不立，须自保下真，现在平善保肺摄肾以固气根，庶可御外邪之侵。

大熟地 淮山药 化橘红 大麦冬 海参 云茯神 白杏仁
海蛤壳

《徐渡渔先生医案》

丁泽周

屈左。痰饮咳嗽已有多，加之遍体浮肿，大腹胀满，气喘不能平卧，腑行溇薄，谷食衰少，舌苔淡白，脉象沉细。此脾肾之阳式微，水饮泛滥横溢，上激于肺则喘，灌溉肌腠则肿，凝聚膜原则胀，阳气不到之处，即是水湿盘踞之所，阴霾弦漫，真阳埋没，恙势至此地步，已入危险一途。勉拟振动肾阳，以驱水湿，健运太阴，而化浊气，真武、肾气、五苓、五皮合黑锡丹，复方图治，冀望离照当空，浊阴消散，始有转机之幸。

熟附子块二钱 生於术三钱 连皮苓四钱 川桂枝八分
猪苓二钱 泽泻二钱 陈皮一钱 大腹皮二钱 水炙桑皮二钱
淡姜皮五分 炒补骨脂五钱 陈葫芦瓢四钱 黑锡丹吞服，一钱
济生肾气丸清晨另吞，三钱

二诊：前方已服五剂，气喘较平，小溲渐多，肿亦见消，而大腹胀满，纳谷不香，咳嗽夜盛，脉象沉弦，阳气有来复之渐，水湿有下行之势，既见效机，率由旧章。

原方去黑锡丹，加冬瓜皮二两 煎汤代水。

三诊：又服五剂，喘已平，遍体浮肿减其大半，腹胀满亦松，已有转机。惟纳谷不香，神疲肢倦，脉左弦右濡，舌虽干，不欲饮，肾少

生生之气，脾胃运输无权，津液不能上潮，犹釜底无薪，锅盖无汽水也，勿可因舌干而改弦易辙，致反弃前功。仍守温肾阳以驱水湿，暖脾土而化浊阴。

熟附块五钱 连皮苓四钱 生於术三钱 川桂枝六分 猪苓二钱
福泽泻五钱 陈皮一钱 大腹皮二钱 水炙桑皮五钱 淡姜皮五分
炒补骨脂五钱 冬瓜子皮各三钱 陈葫芦瓢四钱

济生肾气丸清晨吞服，三钱

四诊：喘平肿消，腹胀满亦去六七，而咳嗽时轻时剧，纳少形瘦，神疲倦息，口干欲饮，舌转淡红，脉象左虚弦，右濡滑。脾肾亏而难复，水湿化而未尽也。今拟平补脾肾，顺气化痰。

炒潞党参五钱 连皮苓四钱 生於术三钱 陈广皮一钱
仙半夏二钱 炙远志一钱 炙白苏子五钱 旋覆花包，五钱
水炙桑皮五钱 大腹皮二钱 炒补骨脂五钱 冬瓜子皮各三钱
陈葫芦瓢四钱 济生肾气丸清晨吞服，三钱

五诊：喘平肿退，腹满亦消，惟咳嗽清晨较甚，形瘦神疲，纳谷不香，脉濡滑无力，脾肾亏虚，难以骤复，痰饮根株，亦不易除也。今以丸药缓图，而善其后。

六君子丸每早服三钱，济生肾气丸午后服三钱。

朱左。咳喘十余年，遇感则剧，胸闷纳谷减少，舌苔灰黄，脉象寸浮关弦，素性嗜酒，酒湿生痰聚饮，渍之于肺则咳，肺病及肾，肾少摄纳则喘，上实下虚，显然可见。酒性本热，温药难投。姑宜开其上焦，以肃肺气，斡旋中枢，而纳肾元。是否有当，尚希明正。

蜜炙麻黄三分 光杏仁三钱 仙半夏二钱 薄橘红八分
炙白苏子五钱 象贝三钱 炙桑皮五钱 海浮石三钱 甘杞子三钱
厚杜仲三钱 炒补骨脂五钱 核桃肉拌炒，二枚

二诊：咳喘均减，肺金之风邪已去，而多年之痰饮根深蒂固，脾肾之亏虚，由渐而致。脾为生痰之源，肺为贮痰之器，今拟扶土化痰，顺气纳肾，更宜薄滋味，节饮食，以助药力之不逮。

炙白苏子二钱 光杏仁三钱 仙半夏三钱 薄橘红八分
云苓三钱 炙远志一钱 象贝母三钱 水炙桑皮二钱 海浮石三钱
旋覆花包,五钱 甘杞子三钱 厚杜仲三钱 补骨脂五钱 核桃肉二钱

三诊:咳嗽已减,纳谷渐香,肺得下降之令,胃有醒豁之机,然嗜酒之体,酒性本热,易于生湿生痰。痰积于内,饮附于外,新饮虽去,宿饮难杜,况年逾花甲,肾少摄纳,故气易升,再拟崇上化痰,肃肺纳肾,亦只能带病延年耳。

南沙参三钱 云苓三钱 淮山药三钱 炙远志一钱
炙白苏子二钱 甜光杏三钱 仙半夏二钱 薄橘红八分 海浮石三钱
旋覆花包,五钱 甘杞子三钱 厚杜仲三钱 补骨脂五钱
核桃肉二枚,拌炒

俞右。暴寒外束,痰饮内聚,支塞于肺,肃降失司,气喘咳嗽大发,故日夜不能平卧,形寒怯冷,纳少泛恶,苔白腻,脉浮弦而滑。拟小青龙汤加减,疏解外邪,温化痰饮。

蜜炙麻黄四分 川桂枝八分 云苓三钱 姜半夏二钱
五味子四分 淡干姜四分 炙苏子二钱 光杏仁三钱 熟附片一钱
鹅管石煨,一钱

哮喘紫金丹另吞,连服二天,两粒

二诊:服小青龙汤两剂,气喘咳嗽,日中大减,夜则依然,纳少泛恶,苔薄腻,脉弦滑。夜为阴盛之时,饮邪窃踞阳位,阴塞气机,肺胃下降之令失司,再以温化饮邪,肃降肺气。

川桂枝八分 云苓三钱 姜半夏二钱 橘红一钱 五味子四分
淡干姜四分 水炙远志五分 光杏仁三钱 炙苏子五钱
旋覆花包,五钱 熟附片一钱 鹅管石煨,一钱

三诊:气喘咳嗽,夜亦轻减,泛恶亦止,惟痰饮根株已久,一时难以骤化。脾为生痰之源,肺为贮痰之器。今拟理脾肃肺,温化痰饮。

原方去旋覆花、远志二味,加生白术五钱、炒补骨脂五钱。

胡左。暴感寒凉，内停食滞，引动痰饮，互阻中上二焦，肺胃之气不得下降，哮喘喉有痰声，胸闷呕吐，不能纳谷，身热恶风，有汗不解，苔腻，脉弦滑，此留饮也。拟五苓、平胃，解肌达邪，和胃涤饮。

川桂枝五分 云猪苓各三钱 福泽泻五钱 陈皮一钱 苍术一钱
厚朴二钱 半夏五钱 枳实炭一钱 白蔻仁五分 炒麦芽四钱
莱菔子炒研，三钱 藿香梗五钱 玉枢丹开水磨冲服，四分

复诊：寒热解，哮喘平，呕吐亦减，而胸闷暖气，不能纳谷，小溲短赤，腑气不行，苔薄腻，脉弦滑，宿食留饮，难以骤化，夜不能寐，胃不和则卧不安。胃以通为补，今拟通胃消滞，和中涤饮。

陈广皮一钱 仙半夏二钱 枳实炭一钱 厚朴一钱 赤茯苓三钱
泽泻五钱 姜竹茹五钱 莱菔子炒研，三钱 生苡仁四钱
炒谷麦芽各三钱

文右。旧有痰饮咳嗽，触受风温之邪，由皮毛而上干肺系，蕴郁阳明。饮邪得温气之熏蒸，变为胶浊之痰，互阻上焦，太阴清肃无权，以致气喘大发，喉有钩声，咳痰不出，发热畏风，舌苔腻黄，脉象浮弦而滑。阅前方降气化痰，似亦近理，然邪不外达，痰浊胶固益甚，颇虑壅闭之险。书云：喘之为病，在肺为实，在肾为虚，此肺实之喘也，急拟麻杏石甘汤加味，清开温邪，肃肺涤痰，冀望热退气平为幸。

蜜炙麻黄四分 光杏仁三钱 生石膏打，三钱 生甘草五分
炙白苏子二钱 旋覆花包，五钱 竹沥半夏三钱 水炙远志一钱
炙兜铃一钱 海浮石三钱 象贝母三钱 冬瓜子三钱
活芦根去节，一尺 淡竹沥冲服，一两

二诊：前投麻杏石甘汤加味，已服两剂，气喘已平，身热亦退，佳象也。惟咳嗽痰多，胸闷不思饮食，苔薄黄，脉滑数不靖，温邪已得外达，痰浊留恋上焦，肺胃肃降失司，适值经临，少腹隐痛，挟宿瘀也。今制小其剂，佐入和营祛瘀之品。

炙白苏子二钱 光杏仁三钱 象贝母三钱 水炙桑叶皮各二钱

竹沥半夏二钱 水炙远志一钱 旋覆花包五钱 海浮石三钱
炙兜铃一钱 紫丹参二钱 荒蔚子三钱 冬瓜子三钱
干芦根去节一两

《丁甘仁医案》

余右。哮喘咳嗽音暗，喉中痰声漉漉，脉象弦滑，新寒引动痰饮，堵塞肺俞，清肃之令不行，症势非轻。姑宜开肺化痰。

旋覆花包，钱半 净蝉衣八分 嫩前胡钱半 嫩射干八分
光杏仁三钱 炙白苏子钱半 云茯苓三钱 仙半夏二钱 炙远志一钱
象贝母三钱 莱菔子二钱 白芥子炒不开，钱半 炙款冬钱半
淡竹沥冲服，一两

陈左。脉象虚弦而数，舌光苔黄，不能平卧，卧则气逆而喘，心中懊恼恍惚，似中无所主之象。口干不多饮，此少阴阴分早亏，肝阳挟冲气逆肺，肺失清肃之令，咳嗽咯痰不爽，肺燥津液不布为痰也。书云：喘之病在肺为实，在肾为虚喘也。颇虑喘极而汗脱，急宜纳气归肾为主，清燥救肺佐之。

甘杞子三钱 生左牡蛎四钱 青龙齿三钱 南沙参三钱
朱茯神三钱 炙远志一钱 竹沥半夏钱半 川石斛三钱 川贝母二钱
瓜蒌皮三钱 甜光杏三钱 水炙桑叶皮各钱半 枇杷叶露六两，真
珠粉、真猴枣各一分，二味冲服。

二诊：气逆渐平，心悸恍惚，夜寐不安，舌质红绛，脉象虚弦。少阴阴阳两亏，津少上承，肝阳冲气易于上升，心肾不得交通，再宜填补肾阴，以柔肝木，俾得水火既济，阴平阳秘则诸恙渐愈。

大生地四钱 甘杞子三钱 生牡蛎六钱 青龙齿三钱
朱茯神三钱 炒枣仁三钱 五味子四分 怀山药三钱 西洋参钱半
川石斛三钱 大麦冬二钱 川贝母二钱 真珠粉冲服，二分
甜光杏三钱 琥珀多寐丸包，钱半

王左。肾虚不能纳气，湿痰逗留肺、胃，行动则气急，咳嗽痰多，舌苔白腻，脉象细滑。宜顺气化痰，纳气归肾。

甘杞子三钱 厚杜仲三钱 仙半夏三钱 陈广皮一钱
云茯苓三钱 炙远志一钱 象贝母三钱 炙款冬钱半 旋覆花钱半
沉香片三分 银杏去皮壳,七粒 核桃肉去紫衣,二枚

《丁甘仁医案续编》

江少董

倪宗璐先生,前清秀才,才学兼优。庚戌年南洋道南学校聘为校长,校务过劳,致患痰喘,喉间汨汨有声,呼吸不能相续。他医以纯热药投之,反增心下动悸,小水短赤而频。延余往诊,寸口脉滑,尺部细数。谓曰:痰本乎湿,湿久生热,挟下焦水饮上蒸为痰,侵肺作喘。上焦痰饮,下焦湿热,宜止下以治上也。故以附子、半夏降上焦以助阳,阳旺而痰自消;龙骨、牡蛎敛心神心补阴,阴充则动悸自止;又以滑石、茯苓、猪苓、泽泻开其支河,使湿热痰饮尽趋太阳水腑,源流俱清,诸病可愈也。连服二剂,诸病果皆全安。以后多食牛肉调理两月,康健如常矣。

《奇症实验》

周镇

史姓,忘其年名,住沪南。

病名:湿痹肿喘。

原因:先由湿郁化肿,继则由肿转咳喘,屡治不应,改延予诊。

症候:面浮足肿,腹满有形,更加喘咳痰多。

诊断:脉濡带涩,苔白,据脉症是湿痹不宜,其所以痹而不宣者,由于气窒络瘀也。

疗法:仿前哲五子五皮饮加减,参以通络宣气。

处方:莱菔子三钱 苏子二钱 葶苈子钱半 瓦楞子六钱,煨研
新绉二钱 旋复花二钱 大腹皮三钱 橘皮络各一钱 连皮苓四钱
竹沥半夏三钱 代赭石四钱,打

先用冬瓜皮子各一两 葱须一钱 煎汤代水。

效果：叠进两剂，陡吐狂血如紫黑块甚多，喘先定，继诊通络宣痹，绛复汤合吴氏宣痹汤（新绛二钱、旋复花二钱、拌滑石四钱，包煎、光杏仁、竹沥半夏、焦山栀、连翘、赤小豆皮各三钱、生苡仁、晚蚕沙各四钱、汉防己钱半、葱须八分）服二三剂后，肿亦退，腹宽面浮亦平，肿满因血阻窒有如此。故治肿满病，不但宜理气也。如此重症骤愈于数日之内，即病者亦意所不料。

廉按：此肿而且满，满而转喘之实症，治法方用顺气开痰，通络宣痹，面面顾到，煞费经营，其病之去路，全在陡吐狂血如紫黑块甚多，学者宜注意之。

《全国名医验案类编》

贺季衡

蔡男。去冬呛咳起见，或轻或重，甚则痰鸣气粗，喘息有音，不能平卧，痰难出，舌苔腐白，脉沉细不起。伏风与痰浊久结肺络，随气机而升降，状如哮喘。拟小青龙汤出入，开肺化痰。

麻黄八分 淡干姜八分 姜半夏一钱五分 五味子八分
旋覆花一钱五分，包 薄橘红一钱 金苏子三钱，炒 云苓三钱
贡沉香五分 大杏仁三钱 川桂枝八分 姜汁三滴 白果七粒，取汁冲

二诊：昨进小青龙汤，哮喘就平，痰出极多，惟仍未能平卧，痰鸣脘闷，右脉较起，舌苔仍腐白。伏风顽痰薄结未化，肺气不利。当守原意进步。

麻黄八分 川桂枝八分 淡干姜八分 大白芍二钱
五味子八分，炒 北细辛五分 姜半夏二钱 炙甘草五钱 大杏仁三钱
金苏子三钱，炒 薄橘红一钱五分 姜汁三滴 白果七粒，取汁冲

和尚。哮喘十余年，愈发愈勤，月必两发，发则寒热，无汗，咳嗽，痰出间或带血，不得平卧，脉浮数，舌红。寒邪包热，肺络日伤之候，铲根不易。

麻黄八分 生石膏八钱 法半夏一钱五分 川桂枝八分
射干二钱 大杏仁三钱 五味子五分 橘红一钱五分 炙甘草五分
金苏子二钱，包 姜一片 白果七粒，取汁冲

二诊：进大青龙汤，十余年之哮喘大减，寒热亦清，惟发后痰中仍带血，脉细数，舌红，寒邪包热可知。当润肺气，以安血络。

北沙参三钱 青蛤壳五钱 象贝三钱 橘红一钱五分
瓜蒌皮五钱 淡天冬三钱 大杏仁三钱 小蓟炭三钱 桑叶二钱
子芩二钱 白茅花四钱 枇杷叶三钱

膏方：南沙参四两 蜜桑叶二两 海蛤粉四两 白苏子一两五钱
藕节炭四两 肥玉竹四两 淡天冬三两 枇杷叶三两 大生地五两
海浮石四两 大杏仁三两 瓜蒌皮四两 法半夏一两五钱

云苓三两 旋覆花一两五钱，包 炒苡仁五两 煎浓汁，入清阿胶二两，再白蜜收膏。

《贺季衡医案》

赵文魁

十二月初一日，赵文魁请得老太太脉息：左关沉弦，右寸关滑而近数。肺经有热，留饮不宣，以致胸闷喘促，咳嗽有痰。今拟清肺定喘化痰之法调治。

杏仁泥二钱 川贝二钱，研 橘红三钱 桑皮三钱，炙 莱菔炭二钱
栝蒌四钱 葶苈一钱 酒芩二钱 炙杷叶三钱 前胡三钱
炒梔三钱

引用竹茹一钱五分。

按：喘息之证，有虚实之分，与肺肾两脏直接相关。肺主一身之气，以肃降为顺，为呼吸之本；肾主纳气，为呼吸之根。实喘多责于肺，由邪气阻滞于肺，肺失宣降，气道不利所致。虚喘多责于肺肾两脏，病由肺虚日久，殃及于肾，肾失摄纳，气奔于上而起。本案病人脉息，左关沉弦，说明内有停饮，右寸关滑而近数，说明胸膈之

处有饮热滞留。痰饮郁热，蕴蓄于肺，肺气不宣则胸闷，气逆于上则咳嗽喘促。病性属实，当以祛邪为治，用清肺定喘化痰蠲饮之法。

方中杏仁消痰润肺，下气止咳定喘。川贝清热化痰，润肺止咳，“能散心胸郁结之气”（《本草别说》）。栝蒌甘寒润降，清热化痰，利气降浊宽胸。竹茹、枇杷叶，清热化痰止咳，和胃降逆止呕。橘红理气化痰燥湿。前胡下气祛痰，清热散风。桑皮走肺性降，味甘淡，能行肺中痰而利小便，性寒凉能清肺中之火，以为泻肺平喘之用。葶苈辛散苦泄而性寒，功专泻肺中之实而下气定喘。莱菔炭下气化痰而消食除胀。黄芩清肺中之火及上焦实热，栀子清心、肺、三焦之火而导热下行。综观全方，乃针对肺中痰饮热邪而治。

十二月初二日，赵文魁诊得二老太太脉息：左关沉弦，右寸关滑而近缓。肺热轻减，痰饮未清，所以喘促轻微，咳嗽尚作。今以理肺止嗽化痰之法调治。

杏仁泥三钱 橘红三钱 法夏三钱 栝蒌四钱 莱菔炭二钱
葶苈一钱五分 酒芩三钱 前胡三钱 白芥子二钱，炭 胆草三钱
炒栀三钱

引用浙贝三钱、知母三钱。

按：经用清肺化痰定喘之法，肺热减，喘促轻，说明药物切中病机。惟痰饮未清，咳嗽仍作，当继用前法变化，加强化痰止嗽之力。

方中杏仁、半夏、前胡，下气化痰，降逆止咳。橘红、莱菔炭，理气化痰止咳。浙贝母、栝蒌，清热化痰，宽胸散结。葶苈子泻肺行水，下气定喘。白芥子豁痰利气，止嗽定喘。胆草清肝胆湿热。栀子降三焦郁火。知母清肺胃实热，且能“消痰止咳，润心肺。”（《日华诸家本草》）诸药协同，功专力宏，直捣病所，求其速愈也。

赵右，72岁。秋令渐深，肺金行令，肺主一身之气，性喜肃降，肺气不足则肃降力差，中阳虚必少气无力，下肢沉重作肿，喘满不能平卧。益其气兼化湿邪，湿邪化则肿胀自退。当忌盐类。

绵黄芪八钱 西洋参三钱，另煎兑 杭白芍三钱 炙杷叶三钱

桂枝二钱 白术二钱 防己四钱 茯苓三钱 生姜三片 大枣五枚

按：肺居上焦，其气以清肃下降为顺，职司一身之气，主通调水道；脾位中土，为气血生化之源，主运化水湿。脾化生精微以充肺，肺肃降气机以助脾。今肺脾两虚，水谷不化精微，则气血亏损，宗气生化乏源，呼吸失助，肌肉失养，故见少气不足以息，体倦无力。水液之代谢，有赖于肺气之通调，脾气之转输，还要靠肾阳蒸腾化气为之主持。患者年愈古稀，肾气必衰无疑，肾气不足，肺气不降，脾气不运，则水湿留聚，水湿流注于下，则下肢沉重肿胀，水气上凌于肺，肺气益不能降，则见喘满不能平卧。治疗当运脾降肺，益气化湿，通阳利水。盐类能伤肾助湿，故在所忌。

方中用大剂黄芪，甘温入脾肺，补气益阳，“内补治虚喘”（《药性论》），利水消肿胀。西洋参苦微甘而气寒，入肺肾而补气养阴清火。白术、茯苓、健脾益气，燥湿利水。炙杷叶降气平喘，化痰止咳。防己苦辛而寒，入肺、膀胱经，善能利水消肿，祛风止痛。用白芍苦酸入肝、脾，养血敛阴，利水缓急。《本经》称其“主邪气腹痛，……止痛，利小便，益气。”桂枝辛温发散，通阳化气，利水消肿。大枣甘温，补脾益气养血安神以助参芪。生姜辛温，通阳利水，和胃调中以助苓、桂。二者合用，能调补脾胃，协和诸药。脾气健旺，肺行治节，水道通调，则肿胀自退。

《赵文魁医案选》

魏长春

俞燧生君之母，年约六十岁，住华家巷。九月二十三日诊。

病名：中寒夹哮喘。

原因：素患哮喘，猝中寒邪。

证候：昏眩自汗，肢冷腹痛，泄泻，鼻冷气喘。

诊断：脉象沉细，舌淡红。真火衰微，寒中脾肾，经所谓阳气衰于下，则为寒厥是也。

疗法：用真武汤，合龙牡救逆法，加黑锡丹，温纳元阳。

处方：淡附子一钱 炒白芍三钱 炮姜一钱 炒白术三钱
茯苓四钱 化龙骨四钱 煅牡蛎四钱 炙甘草一钱 黑锡丹一钱吞

效果：服后阳回肢暖，痛泻皆止，病愈。

炳按：脾肾虚寒，外寒重袭肺胃，则成是病，故用真武合龙牡，加黑锡丹，以镇摄肾气，而见效。

《慈溪魏氏验案类编初集》

沈绍九

刘某，男性，六十余岁，有痰喘旧疾，夏日偶感时邪，高热汗出，喘咳痰多，倚息不得卧，气短不能接续，舌苔白滑，满口粘涎，口渴不欲饮，六脉虚大而数，重按似有似无。当断为下虚痰饮，热伤元气，用益气固肾，佐以清热祛痰。处方：

洋参须三钱 法半夏三钱 杏仁三钱 茯苓四钱 菟丝子五钱
淫羊藿五钱 枸杞四钱 连翘三钱 淡竹叶三钱 黄芩三钱
甘草一钱

服后热衰汗少，喘咳俱减，再剂则热退汗止，可以平卧矣。后以六君子汤加补肾之药调理遂安。

病者某，喘咳不能行动，尺脉虚大，系下虚水泛为痰所致。曾服理中、二陈无效，用杜仲五钱，补骨脂五钱，菟丝子五钱，枸杞五钱，淫羊藿五钱，茯苓三钱，制首乌三钱，丁香二钱，泽泻二钱，砂仁三钱，安桂二钱，附片二钱。连服十剂，病渐愈。

老年脾肾阳气不足，水湿上犯，咳嗽气喘，行动更甚，心悸，腰疼，便溏，肢冷，苔白，脉沉迟，证属虚寒，议温补脾肾之阳以化水湿。

制附片三钱，先煎 白术三钱 炒芍药三钱 生姜一钱 桂枝二钱
茯苓三钱 杜仲四钱 补骨脂四钱 核桃肉五钱，连皮

《沈绍九医话》

姚甫

姚某某，男，56岁，住陇县东南公社板桥沟。素患喘证，遇寒即发。81年夏收看麦场时，因贪凉露卧，喘咳复作，心悸而浮，脘闷食少，时欲呕逆，医以其喘系受凉而得，与小青龙汤二剂，喘虽稍减，因汗多腠理开泄，着衣则烦，去衣则冷，受风则喘又大作。姚甫诊之谓：“此病虽因受凉而得，但无寒伤表证，用姜、辛、五味温肺则可，用麻桂发汗则难免有虚表之弊。现胸胃间有饮邪未净而表已虚，当用苓甘五味姜辛半夏汤，加桂、芍以调和营卫，加黄芪以固表”。服五剂喘即平。

按：姚师认为，寒喘多因外寒内饮，内外合邪而发。但寒气偏表，当着重发散，饮邪偏内，宜注重降逆。如外寒引动内饮，必有头痛身疼，发热恶寒，无汗等表证，宜用小青龙汤发汗解表，温化水饮；但有眩冒喘悸，或呕恶，面目浮肿等证而无伤寒表证者，属饮邪内盛，宜苓甘五味姜辛半夏汤，逐水降逆。二方虽同以干姜、细辛、五味温肺为主，而偏寒偏饮是必须明辨清楚的。

《宝鸡市老中医经验选编》

曹颖甫

张志明。初诊：暑天多水浴，因而致咳，诸药乏效，遇寒则增剧，此为心下有水气，小青龙汤主之。

净麻黄钱半 川桂枝钱半 大白芍二钱 生甘草一钱
北细辛钱半 五味子钱半 干姜钱半 姜半夏三钱

二诊：咳已全愈，但觉微喘耳，此为余邪，宜三拗汤轻剂，夫药味以稀为贵。

净麻黄六分 光杏三钱 甘草八分

冯仕觉。自去年初冬始病咳逆，倚息，吐涎沫，自以为痰饮。今诊得两脉浮弦而大，舌苔腻，喘息时胸部间作水鸣之声。肺气不得

疏畅，当无可疑。昔人以麻黄为定喘要药，今拟用射干麻黄汤。

射干四钱 净麻黄三钱 款冬花三钱 紫苑三钱 北细辛二钱
制半夏三钱 五味子二钱 生姜三片 红枣七枚 生远志四钱
桔梗五钱

拙巢注：愈。

《经方实验录》

刘云湖

病者 吾乡王基兴，年三十余。

病因 中暍田野，又饮冷水。

症候 病哮喘气逆，痰饮狼籍，面赤声如曳锯。

诊断 六脉沉伏，此暑伤肺络也。

疗法 拟泻肺清暑。

处方 炒苍术六钱，云苓、滑石各三钱，葶苈、枇杷叶各二钱，泽泄、芥子各一钱五，甘草一钱。

效果 服二剂而安。

理论 暑伤肺络而成哮喘，因肺为气出入之门户也。而脉又赖气以行之，肺络既痹，气未有不壅闭于间。此脉之所以沉伏也，昔人云，人但知暑伤肺气为气虚，而不知暑伤肺络为肺实，若此固肺实也，故当泻肺。

方论 葶苈与滑石同用，谓之葶苈六一散，乃古人治暑邪入于肺络，咳嗽喘逆，面赤气粗，昼夜不宁等症，以甜葶苈能入肺泻气，可引滑石直泻肺邪，其病自除，然遇肺实乃可用之。若肺虚误用，反能损肺矣（友人王若泉云，余三叔患咳嗽多痰，医用喝苈之类，服之痰消，数日复积，如前方又服之，又消，如是者数月，渐至失音而卒，不知为葶苈之害也，本草十剂，论其泻肺与大黄同功，信然）。更有寒留肺络，而痰饮喘逆者，此益得之平日见风寒则愈甚，又皆麻杏

之症，非葶苈所司也，葶苈有甜苦两种，宜用甜者，炒研入药。

《临床实验录》

汪逢春

刘先生，四十岁，四月廿七日。

咳嗽四五月。近因重感，身热，胸胁相引掣痛，心跳气促，喘逆，舌苔白腻而厚，两脉弦滑而数。一派停饮在胃，上迫太阴之象。拟以轻宣肃降，化痰利水。

嫩前胡一钱，麻黄汤煮透，去麻黄 象贝母四钱，去心 新绛屑钱五
鲜枇杷叶三钱，布包 家苏子钱五，莱菔子二钱，同包 苦杏仁三钱，去皮尖
生海石五钱，先煎 鲜佛手三钱 制半夏三钱，粉草钱五同炒
细辛二分，川连七分同打 甜葶苈一钱，焙 大腹皮三钱，洗净
赤苓皮四钱 建泻片三钱

二诊：四月二十九日

身热退而未净，咳嗽有痰，气分渐顺，心跳已止，舌苔厚腻，大便通利甚畅，左脉细濡而数，右弦滑。前法既效，毋庸更张。

嫩前胡一钱 莱菔子二钱 鲜枇杷叶三钱，布包
制半夏三钱，粉草钱五同打 家苏子钱五 冬瓜子一两 鲜佛手三钱
保和丸四钱，布包 甜葶苈一钱，焙 大红枣三枚，同包 生紫菀一钱
苦杏仁三钱，去皮尖 细辛二分，川连七分同打 大腹皮三钱，洗净
生海石五钱，先煎 赤苓皮四钱 建泻片三钱

《泊庐医案》

周镇

王楚江之妻，沪南。禀质阴亏。丙午立春之汛，咳嗽忽作，先与清扬肃肺，转觉气逆脉弦。楚江言及气从脐上冲，而痰则带咸。予疏化痰浊药中，加石英、青铅、沉香、蛤壳。气逆一平，咳即大减。越

数旬，凛热，不饥，便阻，恶风，头痛。自后喘咳又作。脉左弦右滑。卫气既僭，兼有新感。桑叶、旋复、瓜瓣、杏仁、半夏、陈皮、茯苓、瓜蒌皮、竹茹、枇杷叶、芦根、雪羹。有荐戴济川者，戴谓：不识此症，如何应诊！此恙仅须一二剂即愈。疏方则小青龙汤也。且谓初诊姑减其制，若第二剂麻黄三分要加倍云。楚江以药分寒热，不自主裁。会有罗店沈君在沪，邀其一视，即是予议，云非伏寒，姜、桂、麻黄不可用也。仅加甜葶苈、戈制半夏而已。服后气平咳减，诸恙亦退。沈君回罗，嘱仍邀予调治。病者最不喜药，一退即不善后。嗣回宁波，闻其交节则喘汗，形肉大削。甬医用温散，更不相宜。盖此症宜于平日常服七味都气丸之类，以养肝肾而潜卫气，与治外感咳不同。

张彦卿之妻，素体肥，有喉痛。丙辰二月患咽痒，频咳痰多，凛寒不扬。脉滑数，舌措黄厚。看前医之方，泥定春寒，且寒水司天，径用麻黄、桂枝之剂。驯至高枕不眠，痰韧可扯长至尺许。不知春令风气已温，外寒束状，郁于肺部，辛温开泄，熬夜成痰，愈吐愈多。即用兜铃、射干、冬瓜子、杏仁、芦根、象贝母、瓜蒌、桑皮、枇杷叶、鼠粘子、莱菔汁、半贝丸。

复诊：喘咳大定，已能起坐，惟苔色罩灰。减半贝丸，用雪羹汤代水煎药。另用川贝母、月石为末，同甜杏仁霜冲服，以泄热痰，渐以向愈。

施耀庭，五十余岁时，患咳，痰白，自服膏滋。癸亥冬杪寒热后，膏滋未停，以致痰多如脓，色黄而韧。甲子正月延龚医，投旋复、代赭；另疏吉林参须，以竹沥和服。烦闷不舒，气逆不卧者半月。脉则洪滑不敛，有时虚濡。气喘则头汗淋漓，宛如脱症。舌白。余谓伏热留肺，得补不安，即为实证。疏冬甜瓜子、光甜杏仁、薏仁、紫菀、兜铃、葶苈、粉沙参、黄芩、蛤壳、天竹子、枇杷叶、茅苳茎、竹沥、莱菔汁。另猴枣、雄丹、生矾、月石，研服。二剂，咳喘大减，询悉尚有气忿。前方去葶苈、兜铃、黄芩，加金铃子、木蝴蝶、浮石，并嘱服雪羹。数剂，喘定痰稀，调养就痊，赴沪就业。越一年，又发喘咳，吴医

用温，迨招余，已不及矣。

《周小农医案》

方公溥

杨女。十月二十九日诊：痰喘剧发，胸闷不舒，痰多白沫，脉象浮弦，舌苔白腻，法当温降平喘祛痰。

蜜炙麻黄 9 克 制半夏 6 克 淡远志 6 克 杜苏子 9 克
五味子 3 克 炙甘草 4.5 克 淡干姜 3 克 北细辛 3 克
川桂枝 4.5 克 白芍药 9 克 光杏仁 9 克 嫩射干 6 克 炙冬花 9 克

十月三十一日复诊：

投以温降平喘祛痰，喘咳较有转机，咯痰较易，再从前法化裁。

处方同前，除苏子、细辛、干姜、桂枝。加白当归 9 克
新会皮 4.5 克 云茯苓 9 克 白石英打，12 克。

十一月二日三诊：

咳嗽哮喘减而未痊，痰多，牙痛，仍宗前意出入。

处方同前，除白当归、白石英、白芍、五味子。加杜苏子 9 克
嫩白前 9 克 全福花包，9 克。

吴女。十二月十五日诊：痰喘故恙，感寒复发，气急痰虚，背部酸楚，夜不能平卧，脉浮滑，舌苔薄白，亟拟温降理肺，平喘化痰。

净麻黄 4.5 克 淡桂枝 4.5 克 光杏仁 12 克 淡远志 6 克
粉甘草 3 克 嫩射干 4.5 克 新会皮 4.5 克 淡干姜 3 克
五味子 3 克 炙冬花 9 克 白芍药 9 克 制半夏 9 克 紫苏子 9 克
白茯苓 9 克

十二月十八日复诊：

投以温降理肺，平喘化痰，症势大有转机，药既应手，再从前法化裁调治。

处方同前，除陈皮加嫩白前 9 克。

十二月二十一日三诊：

咳嗽痰喘减而未净，近见头痛肢楚，仍从前法出入。

处方同前，除桂枝、白前、五味子、干姜。加新会皮 4.5 克、制川朴 4.5 克、香白芷 9 克。

《方公溥医案》

丁叔度

患者某某，男，23 岁。患时疫，懊恼不安，面赤而喘，胸间烦闷，呼吸紧促，坐卧不安，发热恶寒，指梢冰冷，脉数而急促。

处方：麻杏甘石汤。重加银花 120 克 连翘 60 克 芦根 30 克 蝉蜕 15 克 栀子 15 克 豆豉 9 克 水煎服。

外用刮搓法：用细碗边蘸鸡蛋清刮其前胸后背，由随汗而去。

《津门医粹》

赵寄凡

吴某某，女，56 岁，农民。咳喘十余年，每年冬春加重，1962 年春来津治病，途中劳累又感受风寒咳嗽。喘不能平卧，吐大量白泡沫样痰，恶寒，发热，无汗，周身疼痛，脘腹胀满，不能进食，口不渴，二便利，脉弦，舌淡紫苔白腻。辨证：痰饮内停，外感风寒，给以小青龙汤原方：麻黄 10 克 桂枝 10 克 芍药 10 克 甘草 10 克 五味子 10 克 干姜 10 克 细辛 3 克 半夏 10 克 服药二剂咳喘症状大减，可以平卧入睡，饮食增加，精神面色明显好转，查舌质已不紫舌苔见化，脉弦亦见缓，病人十分高兴，连声称赞赵大夫救他一病，又给原方三付加茯苓，咳喘基本已愈。

《津门医粹》

章成之

唐女。

慢性气管炎，多有痰。今虽咳于冬令，但为干咳，届时亦能自

止,仍是急性气管炎。

生麻黄 6 克 五味子 4.5 克 杏仁泥 12 克 白前 9 克
天竺子 9 克 车前子 12 包 旋复花 9 克,包 百部 9 克 桑白皮 9 克
粉草 4.5 克

二诊:服药数剂,咳嗽大减,再事原法加减。

生麻黄 4.5 克 杏仁泥 12 克 天竺子 9 克 白前 9 克
桑白皮 9 克 百部 9 克 粉甘草 4.5 克 冬瓜子 9 克

朱男。咳引胸中痛,咯痰不爽,当以祛痰为先,镇咳次之。

苦桔梗 9 克 白前 6 克 知贝母各 9 克 杭白芍 9 克 苏子 9 克
杏仁 12 克 桑白皮 9 克 柏子仁 9 克 炙马兜铃 9 克
枇杷叶 五片,包

张女。当咳之初起,音即为之哑。其咳迄今旬日,此风袭于肺。盗汗、自汗、心中悸,则关乎平日之虚。

蜜炙麻黄 3 克 射干 6 克 川贝母 2.4 克,研末分冲 杭白芍 9 克
粉甘草 4.5 克 五味子 3 克 浮小麦 12 克 桑白皮 12 克
麦门冬 9 克

朱男。以咳为主症,痰作白沫,量少而不易咳出,多是气管有炎症。兼见咽干作痛,音为之哑,则炎症之由来,系风燥之侵袭。

前胡 9 克 桔梗 1.5 克 牛蒡子 9 克 薄荷 3 克,后下 浙贝 9 克
桑叶皮各 9 克 冬瓜子 12 克 光杏仁 9 克 生甘草 3 克
枇杷叶 三片,包 胖大海 三只

陈男。一日之内,势热数度变迁,面与脉俱是外邪侵袭。咳呛痰黄,气管有炎症也。

薄荷 4.5 克,后下 连翘 12 克 桔梗 9 克 射干 9 克 冬桑叶 12 克
粉前胡 9 克 杏仁 12 克 杭白芍 9 克 旋复花 12 克包
粉甘草 3 克 枇杷叶 12 克,包

叶女。听其呛,乃急性气管炎。痰白而粘,白是寒,粘是湿。

生麻黄 1.2 克 苏茅子各 9 克 白前 6 克 炙紫菀 9 克

生苍术 3 克 橘皮 6 克 炙冬花 9 克 射干 3 克 粉甘草 2.4 克
桔梗 6 克 山慈姑片 9 克,研末分二次调入

赵女。咳六、七日,干呛少痰,因此气粗喘促。夫治咳有痰,总当祛之,无痰则镇之。

生麻黄 4.5 克 旋复花 9 克,包 白前 6 克 杏仁泥 12 克
款冬 9 克 苏子 9 克 百部 9 克 粉甘草 3 克 杭白芍 9 克
白果五只

张男。凡暴病平卧则气逆者,病在于呼吸系居多;不在肺便在肋膜。与久病之在循环系者有别。病者热虽不高,而痰中带血,病在肺。

银柴胡 4.5 克 麦门冬 9 克 杏仁泥 12 克 百部 9 克
海蛤壳 15 克 旋复花 12 克,包 冬青子 9 克 玉竹 9 克 杭白芍 9 克
桑白皮 9 克 生侧柏叶 30 克 粉甘草 3 克

任男。痰饮并发哮喘,痰饮已成宿疾;哮喘则有时发作,多作于春秋气候剧变之时。上海地滨大海,尤易发作。此二者,皆少根治之法。今予小青龙汤。

生麻黄 6 克 淡干姜 4.5 克 细辛 3 克 川桂枝 3 克
杭白芍 9 克 五味子 6 克 白果九枚,去壳 姜半夏 9 克 炙紫菀 9 克
粉甘草 3 克 远志 4.5 克 白芥子 9 克

二诊:加味小青龙汤两服后,气平,咯痰仍薄。治痰饮者,当以温药和之。

旋复花 9 克,包 干姜 4.5 克 白芥子 9 克 款冬 9 克
五味子 4.5 克 紫菀 6 克 粉甘草 3 克 远志 4.5 克 茴香 6 克
杏仁 12 克

另:葶苈子 9 克 鹅管石 12 克 肉桂 3 克,共研末,分吞。

石男。十指如鼓槌状,大致为支气管扩张,虽见咯血,却非肺癆,但其咳可以累及终身。

五味子 4.5 克 昆布 9 克 罂粟壳 9 克 杏仁泥 12 克 款冬 9 克

杭白芍 9 克 海藻 9 克 蒸百部 12 克 旋复花 12 克,包
生侧柏叶 30 克,煎汤代水

另:蛤粉炒阿胶 15 克,令碎为小粒,口中含化。

解男。支气管扩张症,如见痰黄、脉带数时,清热药宜重用。

净连翘 15 克 银花 12 克 桑叶皮各 9 克 黄芩 9 克
川象贝各 9 克 桔梗 9 克 前胡 9 克 白苏子 12 克 生甘草 4.5 克

二诊:药后痰量减少,脉见平定。再拟原意出入。

净连翘 12 克 银花 12 克 黄芩 9 克 川象贝各 9 克 桔梗 9 克
桑叶皮各 9 克 粉草 3 克

庄女。鼓槌指多见于呼吸系病及循环系病,盖末梢循环郁血故也。今咳呛气逆,不能平卧,祛痰镇咳,固属重要,强心药亦不可少。

炮附块 9 克 全当归 9 克 熟地黄 15 克 远志 3 克
北细辛 2.4 克 五味子 4.5 克 炙款冬 9 克 胡桃肉 9 克
炮姜炭 4.5 克 罂粟壳 9 克 补骨脂 9 克

吴老。气急不能平卧,已历二月之久,左卧则腹中水声漉漉,痰不多,必用力乃能咳出。今察其两足浮肿,胸次窒闷异常,尿少,脉微弱,当从肾治。

炮附块 9 克 熟地黄 15 克 远志 4.5 克 北细辛 3 克
五味子 4.5 克 苏子 12 克,包 茯苓 9 克 核桃肉 9 克 白果十粒,去壳
鹅管石 24 克,煨先煎

陈女。四日来,哮喘发作,服麻黄素后,喘稍减而盗汗多。

附块 6 克 银杏十五枚,去壳 五味子 4.5 克 陈皮 6 克
天竺子 9 克 甘草 9 克 麻黄 3 克 黄芪 12 克 远志 4.5 克
紫菀 9 克

三诊:哮喘大发,喉间有水鸡声。

麻黄 6 克 黄芪 12 克 党参 12 克 浙贝 15 克 远志 9 克
紫菀 9 克 冬花 9 克 厚朴 6 克 杏仁 12 克 甘草 6 克 肉桂 1.8 克

三诊:哮喘稍定,但周身汗出淅淅。

巴戟 9 克 仙灵脾 9 克 破故纸 12 克 炮附块 4.5 克
当归 12 克 白术 18 克 黄芪 18 克 党参 12 克 麻黄 6 克 甘草 6 克
肉桂 2.4 克

四诊：哮喘已成尾声。

原方加益智仁 9 克，细辛 4.5 克

五诊：今日上班工作，体力不支，腰背酸，失眠。

巴戟 9 克 仙灵脾 9 克 破故纸 12 克 当归 9 克 益智仁 9 克
党参 12 克 山药 12 克 炙甘草 6 克 白术 15 克 黄芪 12 克
肉桂 1.8 克

裘男。病者是急性气管炎。素无咳痰，一也；在此时令（12 月），二也；洒然有寒意，三也；痰作白沫，喉痛，四也。

牛蒡子 12 克 桔梗 4.5 克 白苏子 12 克 桑白皮 9 克
射干 4.5 克 山豆根 4.5 克 杏仁泥 12 克 知贝母各 9 克
杭白芍 6 克 冬瓜子 12 克 柏子仁 9 克 甘草 3 克

《章次公医案》

张汝伟

胡右，六十九，藕渠。高年脾肾两亏，宿有痰饮，近感冬温之邪，肺气被遏不宣，咳呛气急，喉中鸣响，自汗如雨，两颧绯赤，少腹牵引作痛，状如戴阳，诊脉右寸关滑数无伦，左尺略浮，拟旋复代赭，合越婢意。

川桂枝 沉香片各五分 旋复花包 姜竹茹各钱半 粉前胡一钱
生石膏五钱 竹沥半夏 光杏仁 云茯苓各三钱 生蛤壳 生牡蛎
煅代赭各一两，先煎。

二诊：昨进旋复代赭合越婢法，表热已退，痰气亦平，自汗已止，颧红大减，痰吐焦黄，夜卧已安，仍用前法增损。

玉泉散包，五钱。竹半夏 云茯苓 大白芍 南花粉各三钱
淡芩炭一钱 生蛤壳 生牡蛎各一两 炙甘草八分 枇杷叶二张

姜竹茹钱半

本证始末：胡某系伟常熟故邻居米行职员，伊家住离城五里之藕渠镇，病乾是伊之母。病起时，医者先用沙参桑叶蝉衣等，润肺疏表，继用三子养亲降气涤痰，而喘益甚。又经西医用平喘止咳之剂，针砭并用，都无效。伟去诊时，亲友邻居麇集一堂，达五六十人，包围问余，可有救乎。余曰：姑服此药或可挽救。服此方后，仅二天即能纳谷安眠，起居如常，不惟合家欢悦，即近邻亲友，亦互相惊奇云。

方义说明：此种痰喘症，人人知得，即中西医治法及立方，也不可认为不合。所以不效而反加剧者，治不得法也。大凡喘症，非虚即实，非寒即热，他们见自汗，见颧红，都认为虚，见咳呛，都认为痰，不知脉右寸关滑数，左尺略浮上，可以证明在阳明胃之热甚也。所以方中用药，以石膏一味为紧要，胃火一清，其气自平，尤必佐以桂枝，而石膏之功用乃显，余药人所易识，无须多赘矣。

刘老太，年六十九，福建，住富民路富民村四弄四号。宿有痰饮，近患咳嗽，气急多痰，形寒畏风。脉象濡细，苔布白腻，肺肾两亏，痰湿中阻。用苓桂术甘，合旋复代赭意。

川桂枝八分同 大白芍炒钱半 姜半夏 甜冬术炒各二钱
化橘红一钱 磁朱丸包 茯苓神象贝母各三钱 代赭石煅红先煎，四钱
旋复花包 姜竹茹各钱半

二诊，前方服后，咳喘较平，形寒亦减，头晕胸痛仍有，大便少畅。苔白起花，边尖露红，脉迟而大，此金气过甚，克木，肝阳上逆。拟改为平肝理气，润肠养阴治之。

潼沙苑 炒枣仁 象贝母 朱茯神各三钱 制香附
姜半夏各二钱 明天麻一钱 炒白芍 淡苡蓉各三钱 青陈皮
姜竹茹各钱半

三诊，进平肝理气之方后，头痛胸痞，咳逆吐痰已除。只因高年气血两虚，肾亏心火旺，耳鸣甚剧，自汗，夜不安寐。揆度苔脉，虚不

受补。姑先养心宁神，化痰理气调之。

南沙参 杜苏子 潼沙苑 生枣仁 柏子仁 川贝母 冬瓜子 朱茯神 夜交藤 生芪皮各三钱 仙半夏二钱 新会皮二钱

四诊，前方服后，诸恙均安，痰喘亦平。精神较好，已能阅报间谈。苔化薄，终因高年肾气不足，虚阳上窜，耳鸣不靖，头晕间有，再用熄风平肝育阴调之。

灵磁石先煎四钱 真珠母先煎一两 潼沙苑 夏枯草 制女贞 滁菊花 菟丝饼 夜交藤各三钱 净蝉衣八分 净钩藤后下，三钱 苦丁茶一钱

五诊，精神体力很好，所有耳鸣，未曾痊愈过，近头顶之上，似痒非痒，似痛非痛。脉来细软，今表邪已净，当从本治。从金匱治肝补脾，隔二之意立方。

潞党参 蜜炙黄芪 磁朱丸包 甘枸杞 刺蒺藜 制首乌 炒白芍各三钱 北细辛四分 炙甘草八分 姜竹茹钱半 红枣三枚

六诊，治肝补脾，兼隔二之治。进后，精神充沛，起居如常。所余者，耳鸣仍有，偶有心悸。仍从前意，进一步调之。

潞党参 蜜炙黄芪 野於术 炒枣仁 柏子仁 甘枸杞 厚杜仲 川续断 全毛狗脊 磁朱丸包

本证始末：此人系西医刘永钧眼科之母，其夫在福建原籍，亦一老中医师。本人对于中医，亦甚明了。此症前经一同乡不行医者，为之处方，服之无效。后经余治，一月有余，始得完全治愈。愈后，单独至哈尔滨次子处，游玩七个月回来，颇为欣喜，特招余报告情况云，本症方义说明，很难详解，阅者在案中可以研求，兹不赘。

王右。年五十八，宁波，住顺昌路承庆里二十四号。肺气郁结，胃湿内蕴，外袭风寒，以致肺气不宣，咳呛气急，痰吐腻浊，形寒。进三子养亲法后，形寒已除，而喘逆依然，痰吐黄腻，口渴不欲多饮。舌绛脉弦滑，此气滞痰凝，胃有伏热。拟用麻杏甘膏法。

带节麻黄五分 炙紫苑 玉桔梗 炙款冬 炒苏子各二钱

玉泉散包 象川贝 光杏仁 忍冬藤各三钱 代赭石五钱,先煎
沉香片三分,炒 香麦芽四钱 茅芦根去心节,各一两
枇杷叶去毛包,二片

二诊:进麻杏甘膏加味法后,气喘已平,咯痰亦爽。天气突转严寒,喘逆又作,比前较轻。苔绛,根黄腻,脉转濡弦,改投越婢法加味。

川桂枝四分,炒 大白芍三钱 姜半夏二钱 炙款冬钱半
生石膏四钱,打 薄荷叶八分,打 沉香片后入,四分 玉桔梗一钱
细生地四钱 川贝母三钱 代赭石四钱,先煎 茅根肉一两,去心

本证始末:按此症因戒除嗜好而起,每年逢冬必发,本年尤剧。此次共诊三方,上列两方服后,得能痊愈,但以后可保不发。在平日之调养得宜为要。

方义说明:寻常喘症,寒症为多。小青龙症,是立方要点。今因舌绛苔黄,脉弦之故,三方中均用石膏一味,为中心重点。三方用生地,是滋液清热以化痰之法,不可视为滋腻之用。生地同石膏用,即玉女煎之法。亦即釜底抽薪之意。非必用承气者为抽薪,此处方之灵活应用处。

《临症一得》

冉雪峰

肖某之女,长沙人,前在新疆乌鲁木齐工作,往来戈壁沙漠间,由于携带衣具少,适值大风,为风沙袭击,患胸痹短气,咳逆喘喘不得卧,音暗,目钝少光,珠微突也,病历有年,时轻时重,时发时止,来中医研究院诊察。X线透视见肺门纹理粗糙,两肺野显示透明度较强,两膈位置较低(下降)并运动不良,为加简明按语:咳逆喘急,不得卧,音暗、脉虚数,病历年久,肺伤较重,清肺利膈,豁痰散结,以开上痹,敛浮越,畅中气。拟方:柔紫菀、百部根各三钱,全栝蒌四钱,大浙贝三钱,川厚朴一钱五分,小杏仁、天竺黄各三钱,化橘红

一钱五分，左牡蛎四钱，鲜苇茎六钱，甘草一钱，鲜竹沥四钱，同煎去滓，冲入竹沥，分温二服。复诊三次，约三星期，有效，咳喘减缓，勉能安寐，声音渐出。审度此病，肺伤较重，决不如是痊可之易，但既有效，即按法治疗，不敢多事，若病发时，再作进一步治疗办法。喘病在上为实，在下为虚，未发治脾，已发治肺，此病与脾关系小，拟未发疏肺，已发泻肺，后在疾病过程中，微发则加重疏肺并微兼泻意亦有效。两月余相安无事。曾再至新疆及回长沙故里，长途奔驰，舟车劳顿无恙，诿住京偶因感冒突然触动大发，齁喘如曳锯，鱼口气急，目钝色苍，证象特殊（此为本院治疗中大发第一次）。即按前规划，急与泻肺，药用：全栝蒌五钱，半夏三钱，枳实、厚朴各二钱，苦葶苈炒研、瓜瓣各四钱，小杏仁、天竺黄各二钱，苡仁四钱，鲜竹沥八钱，三剂减缓，六剂平复。后于清肺养肺中，亦侧重疏肺，勿俾浊痰滞气瘀塞，容易再发，现经年少发，胸次开豁，食思转旺，体重加增，面间欣然有腴色，病已向愈，再经调摄休养，可望恢复正常。

武昌粮道街，伍亿丰伍秀章君，体质素弱，下元衰败，又肺气痹阻，患齁喘有年，秋冬起北风，天时陡变时易发，每发六七日，或十日以上不等。证状较剧，气逆奔迫，齁鼾如曳锯，不得卧，几不能支，以两手握床柱，张口息肩，目胀如欲脱状。但其喘为肺喘而非肾喘。为气痰胶结、肺气痹闭之实喘，非真元不固、真气欲脱之虚喘。喘病在上为实，在下为虚，占有此说，苟果肾喘，连经则生，连藏则死，气还则生，气不还则死，早生危变，遑能久安。频年屡经诊治，知其病历，此病实而夹虚，不是虚反成实。未发治脾，勿俾痰生；已发治肺，勿俾痰阻，古人亦均论及。病发若轻，疏上兼可固下，病发若重，不遑其他，惟专治上，可分用亦可合用，并可参错用，或日服疏肺剂，晚服固肾剂，后服疏肺剂，随病所至，适事为故。现拟先疏肺，所谓疏，非仅疏利之疏，乃包括滑利泄下等等。总之疏而勿令伐正，固而勿令滞邪，是为得之。拟方：紫菀、百部各三钱，苦葶苈四钱，竹沥、荆

沥各四钱，如无荆沥，竹沥用八钱，如姜汁少许，苡仁、百合各五钱，瓜瓣四钱，鲜苇茎八钱，七味煎，冲入二沥，分温二服。二剂，喘减三之一。复诊，原方葶苈减为二钱五分，又二剂，哮喘减三之二。三诊，日服原方，晚另服黑锡丹一钱，三剂，哮喘止。四诊，紫菀、百部、百合各一两五钱，栝蒌、川贝各二两，厚朴、橘红各一两，茯神一两五钱，杜仲、补骨脂、紫河车各一两，适量竹沥为丸，如梧子大，烘干，每服一钱至二钱，日二次。疏上固下，九剂缓调，一方两扼其要。后予因事去鄂，病发，守前方前法出入加减，亦颇有效。

《冉雪峰医案》

陆观虎

张某某，女，63岁。

辨证：咳喘。

病因：风寒束肺，痰热上攻。

症候：咳喘，发冷发热，脊背痛，纳少，脸手浮肿。脉浮数。舌质红，苔微黄。

治法：解风寒，祛湿痰，标本兼顾。

处方：炒青蒿6克 前胡6克 制半夏6克 白前6克
苏子6克 茯苓皮9克 冬瓜子皮各6克 海浮石9克 丝瓜络6克
远志6克 橘红3克

方解：半夏、橘红降逆利气，除湿化痰。苏子、海浮石降气润肺，定喘止嗽，润下降火。前胡解风寒，下气降火，止咳喘，白前降气下痰止嗽。炒青蒿芳香清热。茯苓皮、冬瓜子皮行水消肿胀止咳。丝瓜络除风化痰，行血通络。远志交通心肾，泄热散郁。

张某某，女，18岁。

辨证：咳喘。

病因：痰热郁结。

症候：咳喘月余，胸闷，纳呆，月水已见三天，色泽不正，头痛。

脉细濡。舌质红，苔黄腻。

治法：清热化痰，佐以调血。

处方：白前 6 克 前胡 6 克 苏子 6 克 大贝母 6 克 赤芍 6 克
通草 3 克 延胡索 6 克 川芎 3 克 银杏 9 克 焦稻芽 9 克
冬瓜子 9 克 海浮石 9 克 益母草 9 克

方解：以白前、前胡宣肺气。大贝母、银杏清肺定喘。苏子以平降肺气。海浮石化痰涎。赤芍、益母草清血热调血分。通草、冬瓜子以通水道。焦稻芽以醒脾开胃。

张某某，女，30 岁。

辨证：咳喘。

病因：痰火郁结。

病候：咳喘痰多且黄，自汗，口角生疮，脸肿，牙痛。脉弱滑。舌质红，苔微黄布刺。

治法：清火化痰，止咳定喘。

处方：冬瓜皮子各 9 克 大贝母 9 克 桑白皮 6 克 茯苓皮 9 克
苏子 9 克 橘红 6 克 前胡 6 克 海浮石 9 克 黛蛤散 9 克，包
白前 6 克 炒银杏 9 克

方解：冬瓜皮、茯苓皮利湿消肿。苏子、海浮石、橘红、桑白皮、银杏止嗽定喘，清火化痰。前胡、白前、黛蛤散清热化痰止咳定喘。

孙某某，女，38 岁。

辨证：咳喘。

病因：气水不化。

症候：咳嗽作喘，脸肢均肿，腹胀而臌，恙经九月。脉细迟。舌质红，苔薄黄。

治法：宣肺行气利水。

处方：冬瓜子皮各 9 克 茯苓皮 9 克 陈缘皮 6 克 桑白皮 6 克
五加皮 9 克 春砂花 3 克 沉香曲 6 克 车前子 9 克，包
炒银杏 9 克 大腹皮 9 克 文竹 9 克

方解：冬瓜子皮、茯苓皮、五加皮、桑白皮、文竹润肺止咳，宁心行水消胀。炒银杏定喘咳，益气降痰。春砂花、香橼皮、沉香曲行气消胀以治腹膨胀。车前子利小便而消肿。

二诊：

症候：咳嗽喘止，少胀微肿，脸肢肿消。脉细弦。舌质红。苔微黄。

处方：按前方去五加皮 桑白皮，加鸡内金 6克 怀牛膝 6克

方解：鸡内金能消水谷。朱膝引药不行，益肝肾强筋骨。

马某某，女，52岁。

辨证：咳喘。

病因：肺肾虚弱，气水不化。

证候：咳喘，脸肢作肿，溲色深。脉细濡。舌质红，苔黄腻。

治法：理气化水，补肾利尿。

处方：冬瓜皮 6克 橘红 6克 猪赤苓各 6克 茯苓皮 6克
竹沥半夏 6克 黛蛤散 6克 川通草 3克 枇杷叶 9克 银杏肉 七个
苏子 6克 海浮石 9克

方解：冬瓜子皮、茯苓皮、猪赤苓、通草宣肺行水，清热利水便，引热下行以消脸肢浮肿。橘红、竹沥半夏、黛蛤散、枇杷叶、银杏、苏子、海浮石化痰理气，清热宣肺以定喘止咳。

二诊：

症候：咳喘已减，仍气短，脸肢肿，溲色深而少。脉细数。舌红，苔黄。

处方：按初诊之方去竹沥半夏 枇杷叶 加黑豆衣 6克
熟女贞子 6克

方解：服前药后，咳嗽已减，故去燥湿化痰之半夏，宣肺止嗽之枇杷叶。换加黑豆衣、熟女贞子以补肝肾利水下气。

三诊：

症候：咳喘轻而痰化，夜眠不安，脸肢左肿见消，溲仍色深而不

利，气短略减，口臭。脉细数。舌质红，苔薄黄。

处方：按二诊之方去茯苓皮 银杏 加茯苓茯神各6克
白茅根12克

方解：服二诊方后，因夜眠不安去茯苓皮、银杏，加茯苓、茯神，宁心渗湿，定志安神，因口臭加白茅根，除伏热利小便。

四诊：

症候：咳喘已止，纳少腹胀痛，溲仍不利，脸肢肿，时消时起，夜眠见安，口臭已退。脉细数，舌质红，苔微黄。

处方：按三诊之方去白茅根 冬瓜子皮 茯苓
茯神加焦稻芽15克 广木香3克 大腹皮9克

方解：焦稻芽调肠胃利小便，去湿热。广木香泄肺气，疏肝气，和脾气。大腹皮泄肺和脾，下气行水消胀。

五诊：

症候：左肢时肿，脸肿、腹胀痛见消，纳增，溲多。脉细弦。舌质红，苔薄黄。

处方：按四诊方去猪赤苓 川通草 加江枳壳6克
陈香橼6克

方解：陈香橼下气消食，快膈化痰，江枳壳宽肠胃，化痰止喘消痞胀。

六诊：

症候：左肢肿已消，腹胀疼已止，惟仍夜眠不安。脉细。舌质红，苔微黄。

处方：按五诊之方，去广木香 陈香橼 江枳壳 大腹皮
加云茯神9克 白芍6克 远志6克 菖蒲3克

方解：云茯神宁心益智安神。白芍泻肝火安脾胃、和血脉。远志、强志益智利窍。菖蒲宁心利窍，除痰消积而治失眠。

七诊：

症候：夜眠见安，诸恙均愈。脉细。舌质红，苔微黄。

处方：按六诊方去苏子 海浮石 加焦苡米 12克 炙甘草 3克
方解：苡米益胃健脾渗湿。炙甘草补中益气解毒。

陈某某，女，43岁。

辨证：咳喘。

病因：心肾两虚，气逆上攻。

症候：心悸，夜眠不安，咳喘，小便频数，畏冷，头晕，手足浮肿，麻而酸困。脉沉数。舌质红，苔薄黄。

治法：交心肾，止咳喘。

处方：云茯神 9克 冬瓜子 6克 杭甘菊 6克 杭白芍 6克
煨益智 6克 远志肉 6克 苏子 6克 丝瓜络 6克 炒青蒿 6克
炒枣仁 6克 海浮石 6克 鲜枇杷叶 6克 炒银杏 6克

方解：云茯神、远志、益智宁心、安神。缩泉以交心肾。苏子、海浮石、枇杷叶、银杏降气化痰，止嗽定喘。杭甘菊、青蒿除头风，清虚热。白芍和血敛阴。丝瓜络通经和血脉以治手足浮肿，麻而酸困。

《陆观虚医案》

赵海仙

肺脾肾交虚，遂致咳喘并见，甚至形动气喘。肾气不纳可知。

东洋参一钱五分 野于术一钱五分 淮山药三钱 粉甘草五分
法半夏一钱五分 紫石英一钱五分 大蛤蚧三钱，去头足蜜炙
云茯苓三钱 橘橘红一钱 菟丝子一钱五分 胡桃肉一钱五分

复诊：加扁豆衣三钱 兼服黑锡丹八分

坤贞本能，载物自征，厚重不迁。然土之所赖以生者，出于离火之先天元阳，亦为离火五行禀赋。火分为二：君火为主，相火为佐。劳力伤脾，伤脾即伤土；土为火子，子虚累母。书云：脾胃者，仓廩之官，掌职出入。仓廩失职，则转输不捷，由是积谷成饮，积饮成痰，痰饮凌心。每遇劳碌外感，致宿饮上干，咳逆气短。人身之三焦，心肺居上，脾胃居中，肝肾居下。呼吸之所过，出心肺，纳肝肾。脾胃中

任转运。命火藏于肾，真阳寓于真阴，阴败即火败耳。火弱则不能纳气，故气入则短。种种见症，阴长阳消，火弱土虚之象。至于脉象、舌苔，皆属阴霾之势。病延有年。治难骤效，拟方徐图之。

云茯苓三钱 冬白术一钱五分，土炒 粉甘草五分 川桂枝五分
炙紫菀一钱五分 橘皮一钱五分 南烛叶一钱五分 炙冬花一钱五分
乌扇片一钱五分 北细辛二分 淡干姜五分 五味子七粒同拌
法半夏一钱五分 银杏叶二十四片 枇杷叶二片，去毛

圣济射干丸二钱

复诊：即用前方。

去紫菀 加朴花四分

注：如喘甚用黑锡丹五分

《寿石轩医案》

叶熙春

钱，男，七十六岁。十一月。上海。耄耋之年，下元久虚，入冬以来，咳喘频发，痰多稀白，行动气逆，形寒怕冷，饮食少进。今午突然口张息促，额汗如珠，面青足冷，俯伏几案，不能平卧，按脉两手沉细近微，舌淡苔薄。真气衰惫，孤阳欲脱，亟拟扶元镇固，以挽危急。

别直参9克，另煎和入 蛤蚧尾1对，研细末，分二次吞 淡熟附块9克
炮姜5克 北五味子5克 局方黑锡丹12克，杵，包煎

二诊：昨进扶元救脱之剂，喘息略平，额汗已收，足冷转温，面容苍白，脉象细弱，精神疲乏。虚喘在肾，再当温摄下元。

熟附块12克 熟地炭15克 牛膝炭9克 煨补骨脂9克
炒葫芦巴9克 制巴戟9克 北五味子5克 沉香末2.4克，分冲
紫河车5克，焙，研细末，分吞 盐水炒紫衣胡桃肉4枚

三诊：咳喘较平，已能平卧，饮食稍进，精神见振；惟腰膝酸软，动则气逆，脉象虽细，较前应指。再拟原法续进。

熟附块 9 克 大熟地 15 克 盐水炒怀牛膝 9 克 煨补骨脂 9 克
制巴戟 9 克 潼蒺藜 9 克 炒菟丝子 9 克,包 北五味子 3 克
灵磁石 30 克,先煎 紫河车 3 克,焙,研细末,分吞

四诊:喘逆渐平,咳少痰稀,胃纳已苏,面色转正,脉来细缓,舌苔薄白。再拟固摄肾气。

金匮肾气丸,每日早晚各服 6 克,用淡盐汤送吞。

张,男,六十五岁。十一月。杭州。喘嗽已历二十余年之久,每在气候转变或过于疲劳即发。入冬以来,宿喘举发,咳嗽短气,抬肩掀肚,饮食不进,口干唇燥,脉象沉细而软,舌淡苔燥。实喘治肺,虚喘治肾,如今肺肾同亏,治拟益气补肾。

移山参 9 克,先煎 麦冬 12 克 北五味子 2.4 克 炒玉竹 9 克
川贝 6 克 熟地炭 18 克 茯苓 12 克 炒杜仲 12 克 紫石英 15 克,杵
胡桃肉 3 枚,连衣打

二诊:虽能略进饮食,而喘促未平,口干咽燥如故,小溲短少,脉象沉细,本元已虚,病深日久,难图速效,再宗原法出入。

移山参 9 克,先煎 麦冬 12 克 大熟地炭 15 克 淡苁蓉 9 克
炒杜仲 9 克 茯苓 12 克 北五味子 2.4 克 煨补骨脂 9 克
紫石英 15 克,杵 川贝 9 克 胡桃肉 3 枚,连衣打 炒怀牛膝 9 克

三诊:前方服后,气逆略平,胃纳渐增,而小溲仍然短少,脉象沉细,舌苔转润。既见效机,原意毋庸更改。

移山参 6 克,先煎 麦冬 12 克 北五味子 3 克 茯苓 12 克
炒杜仲 12 克 淡苁蓉 9 克 大熟地炭 12 克 萸肉 6 克 泽泻 6 克
米炒怀山药 9 克 胡桃肉 3 枚,连衣打

四诊:气逆已平,纳食如常,而小溲仍然不多,脉象沉细,苔白。肺气虽得肃降,而肾虚未复,再以济生肾气丸加减。

桂心 1.8 克,研粉,饭丸吞 大熟地 12 克 淡附片 5 克 萸肉 6 克
淡苁蓉 9 克 车前子 9 克 炒怀牛膝 9 克 茯苓 15 克 泽泻 9 克
米炒怀山药 12 克 甘杞子 9 克 制巴戟 6 克 胡桃肉 3 枚,连衣打

五诊：气平，小瘦增多，肾气丸12克，每日分二次送吞。

赵，男，三十六岁。八月，乔司。感邪失解，肺胃痰热郁滞，身热口渴，喉间哮喘，气逆，难以平卧，痰呈稠黄，大便秘结，脉滑数，苔黄燥。风热挟痰之证，治用麻杏石甘汤加味。

炙麻黄3克 生石膏15克，杵，先煎 白杏仁9克，杵
生甘草2.4克 炒黄芩5克 清炙桑白皮9克
炒甜葶苈子6克，杵，包 莱菔子9克，杵 旋复花9克，包 海石12克
瓜蒌皮12克 广郁金9克

二诊：热退便通，痰热已得开泄，咯痰得爽，哮喘渐平，舌苔黄薄欠润，脉滑带数，再清肺胃之热，佐以豁痰平逆。

黛蛤散12克，包 生石膏15克，杵，先煎 知母8克 川贝6克
白杏仁9克，杵 清炙桑白皮9克 淡黄芩5克 鲜竹茹9克
旋复花9克，包 天花粉9克 鲜芦根1尺，去节

三诊：哮喘已平，痰少咯爽，卧能着枕向安，苔转淡黄而润，脉来缓滑。当予清肺养胃，以撤余邪。

南沙参9克 麦冬9克 天花粉9克 川贝6克 川石斛12克
清炙桑白皮9克 鲜竹茹9克 冬瓜仁15克 蛤壳18克，杵
东白薇9克 枇杷叶12克，拭，包

王，男，十六岁。九月。杭州。哮喘自幼而起，每因外感诱发。昨起形寒肢冷，气喘不得平卧，胸闷痰多稀白，喉间如水鸡声，脉沉弦，苔白滑。拟用小青龙法。

麻黄3克 桂枝2.4克 白杏仁9克，杵 茯苓15克
生甘草2.4克 北细辛2.1克 泡射干4克 姜半夏9克
化橘红5克 炒白芥子5克，杵 炒苏子6克，杵，包 淡干姜2.4克
前胡6克

二诊：形寒已解，肢冷转暖，气喘渐平，痰咯亦松，喉中痰声已杳，夜卧尚可着枕，脉弦右滑。再守原法续进。

炙麻黄3克 泡射干4克 北细辛1.5克 炒橘红5克

姜半夏 9 克 茯苓 12 克 炙甘草 2.4 克 桂枝 2.4 克 干姜 2.4 克
五味子 2.1 克 前胡 6 克 红枣 3 只

三诊：气逆已平，痰咯亦爽，惟人倦少力，纳钝胸闷，脉缓滑，苔薄白。再拟益气健脾而化痰湿。

米炒潞党参 8 克 苏梗 6 克 枳壳 2.4 克 炒白术 6 克
茯苓 12 克 炙甘草 3 克 姜半夏 9 克 陈皮 5 克 淡干姜 2.4 克
桂枝 2.4 克 前胡 6 克 红枣 3 克

《叶熙春专辑》

施今墨

吴某某，男，38 岁。自幼即患喘嗽，至今已三十余年。每届秋冬时常发作，近两年来逐渐加重，发作多在夜间，胸间憋闷，不能平卧，咳嗽有痰，北京协和医院诊为肺气肿，支气管哮喘。昨晚又行发作，今日来诊。舌苔薄白，脉象洪数。

辨证立法：久患喘嗽，腠理不固，外邪极易入侵，遂致时常发作，脉象洪数是邪实也。当先驱邪再治其本。拟麻杏石甘汤合葶苈大枣汤主治

处方：炙白前 5 克 炙紫菀 5 克 炙前胡 5 克
葶苈子 3 克，大红枣 3 枚去核同布包 炙陈皮 5 克 炙麻黄 1.5 克
白杏仁 6 克 生石膏 15 克 苦桔梗 5 克 炙苏子 6 克
旋复花 6 克，代赭石 10 克同布包 紫油朴 5 克 炙甘草 3 克

二诊：服药二剂，喘已减轻，但仍咳嗽，唾白痰，脉象滑实，外邪初退，其势犹强，拟前方加减。

处方：炙麻黄 1.5 克 杏仁 6 克 嫩射干 5 克 细辛 1.5 克
炙白前 6 克 旋复花 6 克，代赭石 10 克同布包 五味子 5 克 炙紫菀 6 克
炙苏子 5 克 炙陈皮 5 克 莱菔子 6 克 白芥子 1.5 克

三诊：前方服四剂，昼间喘咳基本停止，夜晚即现憋气不舒，喘嗽仍有发动之势，拟定喘汤合三子养亲汤化裁治之。

处方：炙麻黄 1.5 克 生银杏 14 枚，连皮打 款冬花 5 克
炙桑白皮 5 克 莱菔子 6 克 炙白前 5 克 炙桑叶 5 克
白芥子 1.5 克 炙百部 5 克 炙紫菀 6 克 炙苏子 6 克 白杏仁 6 克
苦桔梗 5 克 炙甘草 3 克

四诊：服药六剂，夜晚胸间憋闷大减，拟用丸剂治之。

处方：每日早、午各服气管炎丸 20 粒。临卧服茯苓丸 20 粒。

五诊：服丸药一个月现已停药三月未见发作，昨日晚间又发胸
闷胀满。

处方：细辛 1.5 克 白杏仁 6 克 代赭石 6 克，旋复花 6 克同布包
五味子 5 克 半夏曲 6 克 葶苈子 3 克，布包 生银杏 14 克，连皮打
建神曲 6 克 嫩射干 5 克 炙百部 5 克 炙苏子 5 克 苦桔梗 5 克
炙白前 5 克 炙紫菀 5 克 炒枳壳 5 克 紫油朴 5 克 炙麻黄 1.5 克
生石膏 15 克 炙甘草 3 克

王某某，女，47 岁。患咳嗽多年，初时每届天气转凉即行发作，
近年来不分季节，喘嗽已无宁静之时，每觉肺气上冲，咳呛难忍稍
动即喘。去年二月发现周身逐渐浮肿，心跳、心慌，经县医院检查诊
断为肺原性心脏病。舌苔淡黄、脉细弱并有间歇。

辨证立法：夙患咳喘，肺气久虚，失其肃清之权，日久及于心
脏。心主血，肺主气，气血失调，水湿不运，遂生浮肿，拟强心以养
血，平气逆以治咳。

外方：云茯神 60 克 柏子仁 10 克 南沙参 10 克 云茯苓 10 克
龙眼肉 12 克 北沙参 10 克 炒远志 10 克 阿胶珠 10 克
炙化红 5 克 冬瓜子 25 克 代赭石 10 克，旋复花 6 克同布包
炙白前 6 克 炙苏子 5 克 炙草梢 3 克 炙紫菀 6 克 白杏仁 6 克

二诊：服药二剂后，即见症状减轻，遂连服至十剂，浮肿见消，
咳喘大减，心跳心慌亦轻，饮食睡眠均佳，拟返乡要求常服方。

处方：朱茯苓 10 克 炙白前 6 克 朱寸冬 10 克
代赭石 10 克，旋复花 6 克同布包 炙紫菀 6 克 炒远志 10 克

龙眼肉 12 克 化橘红 5 克 柏子仁 10 克 阿胶珠 10 克 广橘络 5 克
款冬花 5 克 枇杷叶 6 克 半夏曲 10 克 白杏仁 6 克
白薏仁 12 克 炙草梢 3 克

某某，喘息经常发作已有三年，秋冬较重，夏日略轻。发作时咳嗽、心跳、痰吐不利，呼吸有水鸣声，胸部胀满而闷，不能平卧，影响食眠。最近一年来病情增剧，据述曾经医院检查诊断为支气管哮喘。每日服用氨茶硷片。舌苔白稍腻，六脉均滑。

辨证立法：经云“诸气贖郁，皆属于肺”，痰湿壅阻，肺气不降，以致呼吸不利，咽喉有声如水鸡之鸣。治宜降气、定喘、止嗽、化痰法。

处方：炙苏子 6 克 莱菔子 6 克 枇杷叶 6 克 炙紫菀 6 克
白芥子 3 克 半夏曲 10 克 炙麻黄 1.5 克 嫩射干 5 克 炙甘草 3 克
细辛 1.5 克 五味子 5 克 云茯苓 10 克 云茯神 10 克
炙前胡 5 克 炙白前 5 克 陈橘红 5 克 陈橘络 5 克
葶苈子 6 克，大红枣 5 枚去核同布包

二诊：服药五剂，第二剂后诸症逐渐减轻，痰涎排出较易，呼吸畅利无声，胸部胀满尚未全除，已能平卧但睡不实，饮食乏味，大便二、三日一行，脉滑，拟原方加减。

外方：薤白 10 克 炙紫菀 6 克 葶苈子 6 克，大红枣 5 枚去核同布包
全瓜蒌 25 克 炙苏子 6 克 苦桔梗 5 克 枇杷叶 6 克 炙前胡 6 克
炒枳壳 5 克 半夏曲 10 克 炙化红 6 克 嫩射干 5 克 炙麻黄 2 克
炙甘草 3 克 莱菔子 6 克 白芥子 3 克 细辛 1.5 克 五味子 5 克

三诊：服药四剂，喘息基本消失，呼吸平稳，痰涎减少，胸满亦爽，食眠均有好转，大便虽通而不畅，脉象由滑转缓，病甫向愈，尚须当心护理。

外方：细辛 1.5 克 五味子 5 克 炙苏子 6 克 炙化红 6 克
莱菔子 6 克 白芥子 3 克 炒枳壳 5 克 枇杷叶 6 克
葶苈子 5 克，大红枣 5 枚去核同布包 苦桔梗 5 克 半夏曲 10 克

白杏仁 6 克 冬虫草 10 克 淡苡蓉 15 克 野党参 6 克 炒远志 10 克

李某某,男,38 岁。喘息已八年,近年发作频繁,稍动即喘,呼长吸短,不能自制,喘甚则不得卧,自汗、食减、身倦,消瘦,四末发凉。经西医检查诊断为支气管哮喘,慢性气管炎,肺气肿。屡经治疗,未获显效。舌有薄苔,脉虚细。

辨证立法:肺主气,肾为气之根。肾不纳气,心力衰弱则气短,身动即喘。治宜强心益肺纳肾气为法。

处方: 人参另炖兑服,3 克 陈橘络 5 克

黑锡丹 3 克,大红枣 5 枚去核同布包 陈橘红 5 克 麦冬 10 克 杏仁 6 克

云茯苓 10 克 云茯神 10 克 五味子打,5 克 炙甘草 3 克

北沙参 10 克

二诊:服药四剂,汗出止,喘稍定。前方加胡桃肉 25 克,蛤蚧尾一对,研极细粉分二次随药送服。

三诊:服八剂,喘息已平,余证均轻,机关嘱到南方疗养。改拟丸剂常服。

处方:

人参 30 克 北沙参 30 克 黑锡丹 15 克 紫河车 60 克

南沙参 30 克 胡桃肉 60 克 蛤蚧尾 3 对 云茯苓 30 克

云茯神 30 克 玉竹 30 克 冬虫草 30 克 五味子 30 克 淡苡蓉 30 克

寸冬 30 克 白杏仁 30 克 巴戟天 30 克 补骨脂 30 克 橘红 15 克

橘络 15 克 炙甘草 30 克

共研极细末,蜜丸重 10 克,每日早晚各服一丸,白开水送下。

王某某,男,38 岁。自幼即患喘息病,祖、父均有喘疾。屡经治疗,时愈时犯。近二年来绝少发作,本年五月,发现颜面足跗浮肿,经江西医院诊断为肾炎,治疗后好转,但浮肿迄未全消。半年后,于就诊前一周喘息突又发作,咳嗽、腰酸、尿量甚少,旋即全身浮肿,日益加重,入院治疗未效,遂来诊治。舌苔白厚,脉沉滑。

辨证立法:肺为水之上源,肾为水之下源,肺肾双损,水道壅

塞，小便不利，遂致全身浮肿而喘嗽。治以纳肾气，利水道，化痰降逆法。

处方：炙白前 6 克 车前草 10 克 旋复花 5 克，代赭石 10 克同布包
炙紫菀 6 克 旱莲草 10 克 北细辛 1 克 赤茯苓 12 克
冬葵子 12 克 五味子 2 克 赤小豆 12 克 冬瓜子 12 克 大腹皮 6 克
大腹子 6 克 炒远志 10 克 葶苈子 5 克，大红枣 5 克去核同布包
白杏仁 6 克 炙草梢 3 克 黑锡丹 3 克，分二次随汤药送服。

二诊：服四剂，浮肿大减，咳嗽亦轻，惟喘息气闷尚未显效。

前方去大腹皮、子，加陈橘红、络，各 5 克。

三诊：服六剂，浮肿已去十分之九，喘嗽亦大减轻，尚觉喉间发紧，痰嗽不畅。

处方：陈橘红 5 克 车前子 10 克 代赭石 10 克，旋复花 6 克同布包
陈橘络 5 克 车前草 10 克 葶苈子布包，3 克 嫩射干 5 克
炒远志 10 克 炙白前 5 克 云茯苓 10 克 北细辛 1 克 炙紫菀 5 克
云茯神 10 克 五味子 2 克 冬瓜子 25 克 白杏仁 6 克
炙甘草 3 克 冬葵子 12 克 苦桔梗 5 克

四诊：浮肿基本消失，喘嗽亦大见好，希予常服方剂。

处方：每日早服强心丹 16 粒。午服气管炎丸 20 粒。晚服金匱肾气丸 12 克。

《旋今墨临床经验集》

结胸

齐秉麓

曾治乡中一健汉患伤寒，结胸证具，烦躁不宁，胃气将绝之候。促骑求治。予与之化结汤。用天花粉五钱，枳壳二钱，陈皮二钱，麦芽三钱，天门冬三钱，桑白皮三钱，吴神曲三钱。连煎二剂。即结胸开而津液自生也。此方用天花粉代瓜蒌，不至陷胸之过猛。盖天花即是瓜

萎之根也。最善陷胸，而无性猛之忧。枳壳消食宽中。麦芽与桑皮同用，而化导最速。神曲、陈皮调胃，真有神功。天门冬善生津液，佐天花粉有水乳之合，世人鲜有知也。且天花粉得天门冬化食化痰，殊有不可测识之妙。所以既结者能开，将死者可活。若以大陷胸汤荡涤于已汗已下之后，鲜有不速其死矣！予又不得不深为告诫也。

《齐有堂医案》

方南薰

南昌杨锦云，形貌魁伟，年近四旬，从无他疾。偶患发热咳嗽，医人认为阴亏，投以熟地、白芍、而病益笃。丙戌夏，予应试江省，闵君文思力荐予治。登其堂，则举家号哭，时有四医在座，商定一方匿于砚底，以待予诊。其脉左手浮，右手滑，舌白不渴，壮热恶寒，右乳上下漫肿如盘，约高二寸，左侧不能就寝。予以麻黄附子汤加砂仁、白蔻、陈皮、神曲与之，四医诘曰：“先生视为何证，而用此等药耶？”予曰：“此夹痰伤寒，阴凝不解，寒痰结胸之证。”四医又曰：“先生年轻，我辈皆须发皓白，阅历甚多，况三人占则从二人之言，今我四人酌用大承气汤，先生何天渊至此？”余曰：“今日杨君之病不死于寒凉，必死于温表，非立担当字据不能使其再生。”四医不肯立，遂散去。令以前方煎成，对姜汁服之，下咽即咳，呛出寒痰碗许，乳肿随消。二服，汗出热退，乃去麻黄加附子、肉桂，调治月余，厥疾告瘳。闵君谓余曰：“杨君此症，绝处逢生，当有古稀之寿。”余曰：“杨君质清脉浊，人长脉短，三年之后恐难免也。”果至己丑夏月，病咳嗽汗出，延至九月，气脱而终。

《尚友堂医案》

王燕昌

一少年，四月戒烟，午节感冒。自用桂、附、燕窝，致尿赤、多汗、

谗语。医误用大黄，致大便数泻，结胸十日矣。诊其左脉沉细无力，右脉皆洪，寸上鱼际，尺下尺泽，耳聋，唇舌如常，有津而渴，喜饮热，频汗，频泻，长卧而已。知非实热，而结胸又不能补。用洋参、白芍、贝母等药无效。又十余日，问知戒烟未久，而患此病。急用洋烟泡一粒，开水化服，又用生首乌、洋参、甘草、麦冬、牡蛎、贝母等味，仍如烟泡一粒，并服。数日愈。

凡有烟瘾者，皆忌桂、附等疏肝之药，防汗也；又忌大黄等攻下之药，防泻也。瘾者，阳受烟耗而虚，阴受烟耗而竭，苟汗之，下之，难为止也。

《王氏医存》

朱增藉

戴全堂妻苏氏，病近一月，延余治。诊之，脉浮弦，舌白，胸次壅塞疼痛若石压，手不可近，匍匐床榻，刻难耐过。审系结胸证，阅所服方，皆行气导滞，间用滋补之剂；而药石究未曾下。此乃表邪传至胸中，正居少阳部分，致少阳枢机不利尔。用水柴胡汤转少阳之枢，加枳桔扩开胸次。一服小效，二三服全愈。

《疫证治例》

王旭高

吴。温邪五日，舌苔干黄，壮热无汗，胸腹板满硬痛，手不可近。此属结胸。烦躁气喘，口吐涎沫。防其喘厥。

黑山栀 豆豉 薤仁 川连 杏仁 生大黄 葶苈 柴胡
枳实 淡芩 元明粉 皂荚子

凡结胸症，烦躁气促者死。此方是大柴胡汤、大小陷胸、栀子豉汤合剂。

渊按：烦躁无汗而有气喘者，柴胡不可用。用柴胡仍蹈前人治伤寒之故辙也。幸有硝、黄、连、杏主持其间，否则坏矣。

又：下后结胸之硬满已消，而烦躁昏狂略无定刻；舌苔干燥，渴欲凉饮，壮热无汗。邪气犹在气分。以苦辛寒清里达表，冀其战汗无变为妙。幸其壮热无汗，可冀战汗。若汗出而仍壮热，则内陷矣。此方三黄石膏汤、鸡苏散与梔豉合剂。

又：战而得汗，脉静身凉，邪已解矣。舌黄未去，胃中余浊未清，尚宜和化。

川贝 赤苓 豆豉炒 连翘 黑山栀 通草 滑石 枳壳炒
竹茹

凡战汗后脉静身凉，用方大法，不外乎此。

《王旭高临证医案》

余听鸿

泰兴太平洲王姓妇，始而发热不甚，脉来浮数，舌苔薄白，因其初热，投以二陈、苏叶等，其舌即红而燥。改投川贝、桑叶等，其舌又白。吾师兰泉见其舌质易变，曰：此症大有变端。使其另请高明。王姓以为病无所苦，起居如常，谅无大患。后延一屠姓医诊之，以为气血两虚，即服补中益气两三剂，愈服愈危，至六七剂，即奄奄一息，脉伏气绝。时正酷暑，已备入木。吾师曰：王氏与吾世交，何忍袖手，即往视之，见病人仰卧正寝，梳头换衣，备入木矣。吾师偕余细看，面不变色，目睛上反，唇色尚红，其形似未至死。后将薄纸一张，盖其口鼻，又不见鼓动，气息已绝，按脉亦绝。吾师左右踌躇，曰：未有面色不变，手足尚温而死者。后再按其足上太冲、太溪，其脉尚存。曰：未有见足脉尚存，而手脉已绝者，必另有别情。即将其衣解开，按其腕中，石硬而板，重力按之，见病人眉间皮肉微动，似有痛苦之状。吾师曰：得矣，此乃大结胸症也。非水非痰，是补药与热邪抟结而成，医书所未载也。即书大黄一两，厚朴三钱，枳实三钱，莱菔子一两，芒硝三钱，瓜蒌皮一两。先煎枳、朴、莱、蒌，后纳大黄，滤汁，再纳芒硝，滤清，将病人牙关撬开，用竹箸两只插入齿中，将药汁渐渐灌

入，自午至戌，方能尽剂。至四更时，病人已有气息，至天明，稍能言语，忽觉腹中大痛。吾师曰：病至少腹矣，当服原方，再半剂，腹大痛不堪，下燥矢三十余枚，而痛即止。后调以甘凉养胃。因胃气不旺，病家又邀屠姓医诊之，曰：被苦寒伤胃，即进以姜、附等温补之品，又鼻衄如注。仍邀吾师诊之。曰：吾虽不能起死回生，治之转机，亦大不易，尔何听信他人乎。即婉言谢之而去。嗟乎，有功受谗，亦医家之恨事耳。

《余听鸿医案》

张锡纯

天津张姓叟，年近五旬，于季夏得温热结胸证。

病因：心有忿怒，继复饱食，夜眠又当窗受风，晨起遂觉头疼发热，心下痞闷，服药数次病益进。

证候：初但心下痞闷，继则胸膈之间亦甚痞塞，且甚烦热，其脉左部沉弦，右部沉牢。

诊断：寒温下早成结胸，若表有外感，里有瘀积，不知表散药与消积药并用，而专事开破以消其积，则外感乘虚而入亦可成结胸。审证察脉，其病属结胸无疑，然其结之非剧，本陷胸汤之义而通变法之可也。

处方：病者旬余辍工，家几断炊，愚怜其贫，为拟简便之方，与以自制通彻丸即牵牛乳取头次末，水泛为小丸五钱及自制离中丹两半，俾先服通彻丸三钱，迟一点半钟，若不觉药力猛烈，再服下所余二钱，候须臾再服离中丹三钱，服后多饮开水，俾出汗。若痞塞开后，仍有余热者，将所余离中丹分数次徐徐服之，每服后皆宜多饮开水取微汗。

效果：如法将两种药服下，痞塞与烦热皆愈。

天津赵某某，年四十二岁，得温病结胸证。

病因：季春下旬，因饭后有汗出受风，翌日头疼，身热无汗，心

中发闷，医者外散其表热，内攻其发闷，服药后表未汗解而热与发闷转加剧。医者见服药无效，再疏方时益将攻破之药加重，下大便一次，遂至成结胸证。

证候：胸中满闷异常，似觉有物填塞，压其气息不能上达，且发热嗜饮水，小便不利，大便日溏泻两三次。其脉左部弦长，右部中分似洪而重按不安，一息五至强。

诊断：此证因下早而成结胸，又因小便不利而致溏泻，即其证脉合参，此乃上实下虚外感之热兼挟有阴虚之热也。治之者宜上开其结，下止其泻，兼清其内伤外感热庶可奏效。

处方：生怀山药一两五钱 生莱菔子一两，捣碎 滑石一两
生杭芍六钱 甘草三钱

共煎汤一大盅，温服。

复诊：服药后上焦之结已愈强半，气息颇形顺适，灼热亦减，已不感渴，大便仍溏，服药后下一次，脉象较前平和仍微数，遂再即原方略加减之。

处方：生怀山药一两五钱 生莱菔子八钱，捣碎 滑石八钱
生杭芍五钱 甘草三钱

先用白茅根鲜者更好、青竹茹各二两，同煎数沸，取汤以之代水煎药。

效果：将药煎服后，诸病皆愈，惟大便仍不实，俾每日用生怀山药细末两许，水调煮作茶汤，以之送服西药百布圣五分，充作点心以善其且。

《医学衷中参西录》

萧伯章

工人黄某，素嗜酒而多湿，初患感冒，屡治转剧，因迭进温补，痰咳神昏，头晕耳聋，胸痞而呕不止，脉混淆不清，舌红而苔垢，口臭逼人，不可向迤，医者皆却走，啐以不治。余曰：此湿郁化热，为温

补所锢闭，胸中大气失其升降，邪热痰涎无从宣泄，故现以上险恶之症，法当清利湿热，涤除痰垢，使胸膈宽舒，肺胃清肃，则乾坤自有一番新景象，疏方用小陷胸合温胆汤加黑栀、槟榔、木通、滑石、竹茹等药三帖而诸症顿减大半，脉显滑数，小溲热赤，大便通利，复就原方稍为增减，又数帖，各恙递蠲，舌露鲜红，改授养阴清热而瘥。

《遁园医案》

周镇

王上宝子，年弱冠，住迎龙桥。甲子春正月，晚餐食饭，夜半身热，人事不知，越日招顾医按摩，并招余诊。脉右沉滞左数，气逆口噤。撬其齿，观舌色红。探其胸腹，重按至胸即呼痛。此伏温挟痰食壅胸膈，结胸闭症。何批《广温热论》谓胸膈为升降阴阳之路，食填之则气闭，宜清温涤痰，宽胸行食，小陷胸汤出入。瓜蒌仁三钱，枳实一钱，宋半夏三钱，川连三分，紫菀三钱，苏梗子二钱，乌药三钱，香豉三钱，葶苈一钱，郁金三钱，枇杷叶五片去毛，茅芦根各一两。另生明矾一分，牙皂五厘，雄丹七厘，保赤丹一分，研末，用竹沥二两、莱菔汁一杯，温热调服，引吐痰涎。得便溲，人事尚浑。继投万氏牛黄清心丸一粒，神识方省，热减旋愈。

吴妇，嘉兴，年廿余岁，甲子七月产双胞胎，均不育。避江浙战，转徙无定，甚或野处露宿。迨明春正月，感邪身热，咳嗽痰多。诊脉软不扬，苔黄而措，按其胸腹则痛且灼。病日经来即止，有血结胸之象。体虚邪实，通宵失眠，兼挟惊悸也。拟枳实、半夏、瓜蒌、雅连、黑山栀、冬瓜子、杏仁、象贝母、赤苓神、桃仁、茅芦根、莱菔汁。另月石三分，雄精一分，血珀五分，辰砂一分，保赤丹八厘，研末服。一剂，便解一次。越日再诊：寐安，咳嗽腹灼均轻，惟耳聋神乏。脉更软，苔已化。知其营气不足，无津液为汗。脉之软且涩，舌颤动，不能伸足，气血不足可知。用金石斛、粉沙参、天冬、瓜瓣、杏仁、薄荷、豆豉、花

粉、连翘、黑山栀、竹叶、茅根，助阴解肌，得汗热退。

《周小农医案》

冉雪峰

汉口雷某，患风湿痹，支节痹痛，腰脊为甚，自觉尻骨下近臀际凹处胀闷不舒，偶至我处诊视。予曰：风湿乃常有症，不足异，所可异者，尻骨下凹处为长强穴，乃督脉基缘所在，前连任脉，后贯脊髓，上通脑海，邪入此中，酝酿成患，治疗不易。后支节痹痛向愈，惟尻部痹痛转剧，难以转侧，羈延日久，诸药不效，始忆吾言，来我处诊治，多方以求，幸而获愈。越次年，患化脓性胸膜炎，于胸部右侧开口，放出秽浊腥臭脓血，但术后二阅月脓不尽，不收口，遣其爱人来我处商治，往诊，见其病虽险恶，尚在可治之例，按原方加减。拟方：栝蒌实四钱，枳实二钱，桃仁、上贝母各三钱，瓜瓣、苡仁各五钱，土茯苓四钱，桔梗一钱五分，甘草一钱，鲜苇茎一两，上十味，以水七杯，先煮苇茎取五杯，去滓，再煎栝蒌实等各药，取一杯半，分温二服，晨午各一次，晚另服雷氏六神丸五粒，白饮、银花露各半吞下。三剂，病略佳，煎剂仍用原方，丸剂六神丸为三粒。又三剂，胸次渐舒，脓出亦少，前方去六神丸，煎剂改用全栝蒌四钱，桑白皮、地骨皮、土贝母各三钱，蒲公英、土茯苓各四钱，苡仁、鲜苇茎各五钱，青木香三钱，乳没一钱五分，甘草一钱，嘱守服二星期，脓尽收口，平复如常人。

《冉雪峰医案》

肺胀

程文囿

黄敬修兄店内，有同事鲍宗海者。因感风寒，喘嗽多日。就彼地某姓老医看视，谓其证属内亏，药与地归参术。予见方劝其勿服。宗海以为伊体素虚，老医见识不谬，潜服其药，是夜喘嗽益甚。次日

复往加减，医谓前药尚轻更增黄芪、五味子。服后胸高气筑，莫能卧下呶呀不休，闭闷欲绝。敬兄询知其故，嘱予拯治。予曰：“前药吾原劝其勿服，伊不之信，况加酸敛，邪锢益坚，如何排解。”敬兄云：“渠与我同事多年，不忍见其死而不救。”揣摩至再，立方用麻黄、桂枝、细辛、半夏、甘草、生姜、杏仁、葶苈子，并语之曰：“此乃风寒客肺，气阻痰凝，因而喘嗽。医不开解，反投敛补，以致闭者愈闭，壅者愈壅，酿成肺胀危证。《金匱》云：咳逆倚息不得卧，小青龙汤主之。予于方中除五味、白芍之酸收，加葶苈、杏仁之苦泻者，盖肺苦气上逆，急食苦以泻之，如救眉燃，不容缓待也”。敬兄欣以为然，即令市药，煎服少顷，嗽出稠痰两孟，胸膈顿宽。再服复渣，又吐痰涎盞许，喘定，能卧。宗海始悟前药之误，泣求救援。予笑曰：“无妨，枉自吃几日苦耳。”次剂麻桂等味分量减轻，参入桔梗、橘红、茯苓、苏子，更为调和肺胃而痊。

《杏轩医案》

袁焯

乙巳二月，季姓妇，咳喘倚息不得卧，恶寒发热，头疼身痛，胸闷不舒，心痛彻痛，脉沉而滑，舌苔白腻，此风寒痰饮内外搏结，肺气不得下降而成肺胀也。乃用小青龙汤合瓜蒌薤白汤：麻黄、细辛各四分，干姜、五味子各五分，瓜蒌、薤白各三钱，甘草五分，余药各一钱五分，服后得汗，而寒热喘息俱平，惟身痛咳嗽未已。易方以桂枝汤和营卫，加干姜、五味子各五分，细辛三分以治咳。一剂效，因贫不复延医诊，遂渐愈。

《丛桂草堂医案》

周镇

李女，十月十五日诊：热经半月，无汗，咳喘，鼻扇，口渴，痰多，面浮足肿。脉濡数，苔白。风邪挟饮上袭，有肺胀之险。昨尚进新

米,腹常作痛,兼有积也。净麻黄、杏仁、玉泉散、射干、枳实、郁金、甜葶苈、冬甜瓜子、生薏仁、通草、薄荷、桑皮、兜铃、茅芦根、枇杷叶。另西月石、生明矾、礞石、槟榔,研末,冲。服药得汗,吐稠痰碗许,气喘鼻扇大减;转清肺涤痰,愈。

《周小农医案》

施今墨

班某某,女,50岁。高热四日,咳嗽喘息胸胁均痛,痰不易出,痰色如铁锈。经西医诊为大叶性肺炎,嘱住院医治,患者不愿入院,要服中药治疗。初诊时体温 39.6°C ,两颧赤,呼吸急促,痰鸣漉漉,咳嗽频频。舌苔白,中间黄垢腻,脉滑数,沉取弱。

辨证立法:风邪外束,内热炽盛。气逆喘满,是属肺胀。热迫血渗,痰如铁锈。气滞横逆,胸胁疼痛。急拟麻杏石甘汤合泻白散,葶苈大枣汤主治,表里双清,泻肺气之胀满。

处方: 鲜苇根 30克 炙前胡 5克
葶苈子 3克,大红枣 5枚去核同布包 鲜茅根 30克 炙白前 5克
半夏曲 6克 炙麻黄 1.5克 炒杏仁 6克 生石膏 15克,打,先煎
炙陈皮 5克 冬瓜子 打,15克 旋复花 6克,代赭石 12克同布包
炙苏子 5克 苦桔梗 5克 鲜杷叶 12克 地骨皮 6克
西洋参另炖服,10克 鲜桑皮 5克 炙甘草 3克

二诊:服二剂痰色变淡,胸胁疼痛减轻,体温 38.4°C ,咳喘如旧。

拟麻杏石甘汤、葶苈大枣汤、旋复代赭汤、竹叶石膏汤、泻白散诸方化裁,另加局方至宝丹1丸。

三诊:服药二剂,体温 37.5°C ,喘息大减,咳嗽畅快,痰易吐出,痰色正常,肋间仍痛,口渴思饮。

处方: 鲜杷叶 10克 肥知母米炒,10克 天花粉 12克
鲜桑白皮 5克 大红枣 3枚,去核,葶苈子 2.1克同布包 鲜地骨皮 6克

旋复花 6 克,代赭石 10 克同布包 半夏曲 6 克 炙紫菀 5 克
 生石膏打先煎,12 克 黛蛤散 10 克,海浮石 10 克同布包 炙白前 5 克
 冬瓜子打,15 克 苦桔梗 10 克 青橘叶 5 克 炒杏仁 6 克
 淡竹叶 6 克 焦远志 6 克 梗米百粒,同煎

四诊:前方服二剂,体温已恢复正常,咳轻喘定,痰已不多,胁痛亦减,但不思食,夜卧不安。病邪已退,胃气尚虚,胃不和则卧不安,谓理肺胃,以作善后。

处方:川贝母 10 克 炒杏仁 6 克 冬瓜子打,12 克 青橘叶 6 克
 酒黄芩 6 克 苦桔梗 5 克 生谷芽 10 克
 旋复花 6 克,海浮石 10 克同布包 半夏曲 5 克,北秫米 10 克同布包
 生麦芽 10 克 炙紫菀 5 克 广皮炭 6 克 佩兰叶 10 克 炙白前 5 克
 焦远志 6 克

《施今墨临床经验集》

肺痿

何世仁

久嗽失音,喉中哽痛,津液内损,不司上承,是为肺痿重候。

北沙参二钱 麦冬二钱 生米仁四钱 紫菀二钱
 枇杷叶去毛,二钱 人中白一钱 川贝一钱五分 冬瓜子二钱 甘草四分
 橘白一钱五分

久嗽咽干,频吐涎沫,此肺火清肃,不能输津四布也。症属肺痿,不易收效。

北沙参二钱 紫菀二钱 生甘草四分 白芨二钱 白花百合三钱
 生米仁四钱 麦冬二钱 天竺黄二钱 橘白一钱五分
 生鸡子白一钱

久咳膈痛,右脉弦数无力,肺痿之渐,莫作轻视。

沙参 紫菀 川贝 苡仁 云苓 桑叶 蛤壳 冬瓜子

《清代名医何元长医案》

何书田

肺家郁热蒸痰，痰多气秽。防吐 脓血而成肺痿。

小生地 桑白皮 地骨皮 川贝母 橘白 生石膏 肥知母
甜杏仁 天花粉 芦根

先曾失血，咳久音哑，纳食咽痛。乃木火铄金、金破无声之象。
肺痿已成，难治也。

川连蜜水炒 鸡子黄 人中白 川贝母 天花粉 阿胶蛤粉炒
牡丹皮 甜杏仁 干百合 枇杷叶

阴虚火炽，肺金被铄，咳吐脓血，已成肺痿。高年患此，不易治也。

清阿胶 马兜铃 北沙参 知母 天花粉 橘白 原生地
冬桑叶 麦冬肉 白芨 枇杷叶

六脉弦数，浮阳铄金，金碎无声，咳呛音闪。肺痿之候，难许全愈。

羚羊片 炒阿胶 甜杏仁 花粉 西洋参 梨肉 牡丹皮
人中白 麦冬肉 川贝 枇杷叶

《解山草堂医案》

曹存心

咳嗽而见臭痰络血，或夜不得眠，或卧难着枕，大便于结，白苔满布，时轻时重，已病半年有余。所谓热在上焦者，因咳为肺痿是也。左寸脉数而小，正合脉数虚者为肺痿之训。而右关一部不惟数疾，而且独大独弦独滑，阳明胃经必有湿生痰，痰生热，熏蒸于肺，母病及子，不独肺金自病，此所进之药，所以始效而总不效也。夫肺病属虚，胃病属实。一身而兼此虚实两途之病，苟非按部就班，循循

调治，必无向愈之期。

紫菀一钱 麦冬二钱 桑皮钱半 地骨皮钱半 阿胶一钱
薏仁五钱 忍冬藤一两 川贝钱半 蛤壳一两 橘红一钱 茯苓三钱
炙草三分

治按：论病选药，俱极精到。此方亦从苇茎汤套出，可加芦根。

再诊：诸恙向安，右脉亦缓。药能应手，何其速也。再宁之，观其动静。

前方加水飞青黛三分

三诊：右关之大脉已除，弦滑未化，数之一定，与寸相同，湿热痰三者，尚有熏蒸之意，肺必难于自振。

前方加大生地 蛤粉炒，三钱 沙参三钱 蜜陈皮一钱

四诊：迭进张氏法，肺金熏蒸，日轻一日，金性渐刚，颇为佳兆。然须振作，以著本来之清肃乃可。

前方去薏米 加麻仁

五诊：夜来之咳嗽，尚未了了。必得肺胃渐通乃愈。

前方去蛤壳 茯苓 加川斛 百合

六诊：肺虚则易招风，偶然咳嗽加剧，而今愈矣。脉数右寸空大，阴气必虚。自当养阴为主；然阳明胃经，湿热熏蒸之气，不能不兼理之。

前方去百合 加知母

七诊：右脉小中带数，肺阴不足，肺热有余；其所以致此者，仍由胃中之湿热熏蒸也。

前方加丝瓜络 冬瓜仁 苇茎

八诊：肺属金，金之母土也；胃土湿热未清，上焦肺部焉得不受其熏蒸，所谓母病及子也。肺用在右，右胸当咳作疼。未便徒补，必使其清肃乃可。

前方加薏仁 杏仁

九诊：来示已悉。因思动则生火，火刑于金则咳逆，火入于营则

吐血。此十七日以后之病，失于清化，以致毛窍又开，风邪又感，咳嗽大作，欲呕清痰，血络重伤也。事难逆料，信然，悬拟以复。

桑皮 地骨皮 杏仁 甘草 淡芩 茅根 知母 川贝 苇茎 忍冬藤

两剂后去淡芩 加麦冬 沙参 生地

又丸方：

大生地 白芍 丹皮 泽泻 沙参 茯苓 山药 麦冬 阿胶 用忍冬藤十斤煮膏蜜丸

原注：此病道理，尽具于第一案中。先生平日所言，起手立定根脚，以下遂如破竹。大约此病，拈定胃火熏蒸四字，方中得力尤在忍冬藤一味。

《柳选四家医案》

何平子

久咳膈痛，右脉弦数，肺痿之渐，其作轻视。

沙参 川贝 黄芪 云苓 冬瓜子 紫菀 蛤壳 米仁 橘白 桑叶

《壶春丹房医案》

曹存心

徐州刘。失血后咳嗽不已，痰涎不少，甚至寒热分争。左部细软，右寸关部数大不宁。饮食少纳，纳则胸脘不利。此系伏热伤胃，延及肺金。金受热伤，变为肺痿。肺既痿矣，水绝生源，则肝肾两经即使不虚者而亦虚矣。然虚则补之，本来一定章程，无如肺胃两经之伏热尚属不少，暗劫津液。若非清养肺胃以去病根，而徒补肝肾无益也。苦论所吐痰涎，本从热化，而不知胃家有热，所进食不能化为气血，亦易酿成痰饮，上泛于肺。肺又失其清肃之党，不能通调水道，下输膀胱，则肺自旋受而旋吐也。吐已多而且久，最虑气喘，喘

则肾本肺标，上下皆损而恐归虚脱。如此看来，一清一养之下稍能应手方幸。

冬瓜子 苡仁 白杏仁 芦根 炙甘草 蛤壳 丝瓜络 紫菀 海浮石 鳖甲 淡姜 渣秦艽 云茯苓

《延陵弟子纪要》

黄堂

丁，咳嗽音痹不扬，吐涎沫甚多，脉形虚数，《金匱》肺痿之象。咳逆上气，咽喉不利，止逆下气者，麦门冬汤主之。然体质素亏，最恐喘急。

茯苓 半夏 桑皮 橘红 炙甘草 麦冬 粳米 地骨皮 竹茹 枇杷叶

二诊：前进益胃生金频安，且得寐而咳减，最为佳处。但气逆未平，仍多涎沫，柔金娇脏大伤，脉形小芤，显然可征。

人参 五味子 半夏 紫石英 桑皮 枇杷叶 麦冬 茯苓 橘红 生蛤壳 杏仁 炒米汤代水

《黄氏纪效新书》

王旭高

周。咳吐臭痰，已延三月。脉数而虚，其阴已伤。面白无华，饮食渐减，肺失所恃，防成肺痿。

沙参 黄芪 麦冬 白芨 茯苓 元参 大生地 杏仁 百合 芦根尖

又：咳痰腥臭，面色青晦，脉数而虚，纳谷大减。此木火乘金，金伤及土，脏气克贼，恐延不治。

北沙参 桑白皮 麦冬 苡仁 茯苓 白扁豆 野苳根 橘红 紫菀 元参 芦根尖

《王旭高临证医案》

余听鸿

常熟西弄徐姓，金陵人，年五十余，因子不肖，动怒兼郁，咳嗽吐痰。延某医治之，进以木香、厚朴、豆豉、牛蒡等，咳更甚，面红，痰沫频吐，起坐不安。前医见其面红烦燥，进以鲜生地、鲜石斛、梔、翘、芩、连等，更甚。吾友仲鸣徐君，偕余往诊之。脉虚大无力，烦躁面赤，舌白底绛，频频吐痰，满地白腻如米饮，虽臭不甚。余曰：燥伤肺金，再进苦寒，中阳阻遏不通，肺无肃化之权，清阳不能上升，津液不能上承于肺，肺之蓄水不能下行。愈吐愈干，肺将痿矣。即用千金炙甘草汤原方，取姜、桂之辛散，开中宫阻隔之阳，引酸咸柔润之药下行，化津液救上之燥，取参、草、枣培土壮气，使土气可以生金，麦冬、麻仁，润肺而柔阳明燥金，加薏仁泄上蓄之水下行，肺气清肃下降，津液方能上承。此方为千金治肺痿屡效之方，故补入金匱。后人用此方每去姜、桂，畏其辛热也。不知大雨雪之前，必先微温，一派柔腻阴药，赖辛甘之味可以通阳，藉其蒸化之权，下焦津液上腾，肺之清气自可下降，云蒸雨施，始有效耳。照方服两帖，痰沫已尽，咳嗽已止。后服甘凉清润，生黄芪、北沙参、百合、玉竹、川贝、枇杷膏、甘草，壮气润肺清热，十余剂而痊。今已五六年，强健逾昔。古人之方，不欺后学。人言将古方治今病，如拆旧屋造新房，使后人拟古酌今，非使后学不用古方也。

《余听鸿医案》

巢渭芳

东洋桥，某左，六十一岁。形瘦，咳血腥秽，痰多，时值初春一之气中，五心烦热、面色皓白，食少脉虚，以甘凉清降为治。淡天冬、生苡仁、大贝母、甜杏仁、炙紫菀、生草、海浮石、瓜蒌皮、石斛、款冬花、黑玄参、炙鳖甲、鲜梨一两。作肺痿治之而愈。

《巢渭芳医话》

陈莲舫

冯。肺分痈痿，痿则缓也，臭痰连月，不甚咳呛，脉息滑细，治以排解。

马兜铃 生米仁 瓜蒌仁 川石斛 白茯苓 橘红 冬瓜子
光杏仁 细白前 地骨皮 川通草 枇杷叶

《蓬舫秘旨》

曹沧洲

某左。肺经伏热，痰多而臭，咳嗽神乏，百节痛，防延肺痿，不可忽。

鲜沙参五钱 桑白皮二钱，蜜水炙 茯苓四钱 甜瓜子七钱
川贝四钱，去心 竹茹三钱 甘草节四分 生米仁三钱 黛蛤散七钱，绢包
地骨皮一钱五分 白杏仁三钱，去尖 丝瓜络一钱五分
鲜芦根一两，去节

《吴门曹氏三代医验集》

陈约山

肝肺络伤，胃经失血，右肋隐痛，咳吐秽痰，属肺痈。现证迁延日久，脉形弦而带芤。经久不痊，屡被暑阳凌逼，论症论脉知痈传为痿之候也。胃伤委顿弥急，生望失成。舌苔腻白，脘次懊恼，补品与凉剂两非所宜，姑拟扶土排滞，冀其胃开络舒，再商别策。

川石斛 橘叶 紫菀 蒺藜 西瓜仁 薏苡仁 琥珀 石英
马兜铃 枇杷叶

露方：鲜石斛 谷穗 荷叶 川贝母 大豆卷

二诊：饮食加餐，胸次旋舒，舌苔清澈，姑为佳境。惟咯血痰嗽未净，左关弦而动，右寸洪而数，究系肝阳内扰，秋暑未熄，以致少寐，脾溏虚衰土弱。虽有转机，尤虚正邪难敌。仍拟扶胃生津、化痰

安神法，希图寸效。

真血珀 马兜铃 扁豆衣 桑叶 茯神 甜瓜瓣 五味子
广橘白 紫菀 米仁 陈米

《陈氏医案》

孔继炎

杨某，年二十余，病越十月，日渐羸瘦，就予求诊。音哑不能出声。问其症？曰：发热，咳嗽。问寝食何如？曰：食不能多，寝不能寐，但咳嗽痰多，兼苦气壅，喘息不利。问嗽自何时？几时失音？曰：去岁七月，骤然大嗽，塾师知医，用参、术、桂、附等药数剂，愈热愈嗽，遂失音。先生以为不治，改延他医，用地黄汤，然终觉药热。大约五六补后，必须一剂清凉，始得差安。予始接其形声，心亦以为怯症，既又讶其失音之早。诊其脉，始知为误治所致。议曰：此肺痿症也。经曰：肺热叶焦，则为肺痿。《金匱》云：热在上焦，因咳而为肺痿。其论症也，曰：风舍于肺，其人则咳，口干喘满，咽燥不渴，时唾浊沫，时时振寒。其论脉也，寸口脉浮而数。又曰：脉数虚者，为肺痿。今右寸虚大而数，正是此症。右关沉结而滑，浊痰停积胃中也。右尺虽数而平静，可知不是相火炽盛。左三部虽数，而沉取不空不涩，且不细，可知不是阴虚。惟作阴虚治，斯病加重也。何也？肺者相傅之官，治节出焉。胃为仓禀之司，脏腑资气。此因胃中痰积，不得以健运之力，全用之于熟腐之地，故谷入日少，金燥失润，相傅受病，又不能为胃行其精微，以达于五官百骸，故日益瘦损，骨节酸软无力也。夫洒淅恶寒，肺症外现也；音哑无声，脾病内症也；过午发热，阳明用事之时也；饮食减少，仓禀邪踞之征也。此时不从肺胃用药，而日以补阴为事，阴不虚，固不必补，阴果虚，尤不及补也。何为乎不及？夫补阴之品，必主下焦，然必中焦为之传送，上焦为之输灌，然后药之气味，得传达于下焦根蒂之地。今胃中痰踞，传化不灵，肺中气闭，散布难周，强用滋补，徒为痰树党耳。因补以滋痰，因

痰以滞气，气滞则胸中之清阳不宣，势将郁而益热，热日增，嗽将日甚，渐至骨立不起，乃成真弱症矣，补可及乎哉？盖此症若是阴虚，亦必先病而后热，热甚而后嗽，嗽久而后瘦，瘦极热极，嗽亦日极，乃渐至于失音，失音而不起矣。今闻此症，骤嗽数日，便尔失音，正由嗽本热嗽，又用热药，金受火灼，痰复上乘，安能复响？此时急用凉肺清金之品，犹可渐愈。而矫其失者，过用地黄滞腻之物，此所以痰日多，而病卒不愈。知其所以失，则知其所以得，谅高明何待悉言？

《孔氏医案》

翟竹亭

邑西南十五里王氏寨，王国安之妻，年三十余。产后体虚，午后恶寒，两颊发赤，饮食渐减，潮热自汗。请余往诊，肺脉微数，脾胃脉虚。乃寒化为热，金受火刑，恐肺痿将成矣。此症非服药数十剂，不能不愈，彼信任不疑。用大补脾土，以生肺金，内加清金宁肺之味。五帖后，寒热稍退，喘呛如故。又服十帖，饮食大进，喘呛渐轻。原方出入加减，共服四十余帖，始收全功。经云“虚者补其母”，信哉。

补土生金汤

西砂仁 6克 党参 10克 茯苓 10克 白术 10克 炙甘草 6克
扁豆 10克 炒薏苡仁 12克 莲子 10克 芡实 10克 百合 15克
陈皮 6克 川贝 10克 阿胶 10克 沙参 10克 马兜铃 6克
橘红 6克 五味子 6克 半夏 10克 桔梗 6克 枇杷叶 6克 水煎服。

《湖岳村叟医案》

冉雪峰

杨某，湖北武昌人，年四十。久咳，遂成肺痿。来我处诊时，病已造极，潮热盗汗，脉虚数，肌肉消脱，皮肤甲错，面目黧黑，稍动即

息賁，气不接续，浊痰胶结，浓于粘湖，不能平卧，亦不能仰靠，须两手撑床，曲背如虾状，以头向下，如小儿游戏翻筋斗然，不能寐，万分疲极时，作此状稍安。所以然者，浊痰堵塞，无力搏出，必曲背头向下，痰方稍松，气方稍平。予多方以求，清肺热，化肺痰，理肺气，润肺燥，补肺虚，遵依古方，与病消息，似效不效。一日，杨与友人闲谈，闻某病肺痿，系服樟木刨叶治愈，适邻舍木工，有用樟木者，拾其刨叶煎水服一盅，是夜小安，深信樟木之效；翌日，拾一大包约斤许，用大罐煎之，满饮两大碗，逾时腹痛泻利不已，脉弱气微，不能动弹，困憊不支，奄奄一息。急请予诊，至则现证虚败欲脱，以止泻固脱救治。方用：苡仁、芡实各五钱，石莲肉、山药各四钱，人参一钱五分，粟壳三钱，干姜炒半黑一钱，甘草一钱，二剂泻止，勉进薄粥。自此，年余未平卧者居然平卧。续用五白宁肺散、紫菀汤、百部散出入加减，热潮渐退，痰滞渐豁，约一月病人转好。后以延年贝母煎、崔氏苏子煎调摄全愈。予因此有感于中，樟木水何以能疗肺痿？盖樟木香臭甚烈，有毒，滑泻力强，能稀释胶结，搜剔幽隐，涤荡滞秽，与葶苈大枣泻肺汤类似，但葶苈大枣泻肺汤是治肺痈实证，此是肺痿虚证，何以亦能治？且前次我按法用药，何以不救？自服樟木水后，何以服用前药又有效？盖前药未达有效量耳。浊痰随来随积，去少积多，如何能效？服樟木水后，浊痰老巢已破，半疏半调足矣，所以得愈。惟杨服樟木水过量，是以变生险象，但病反因而速愈，亦未始不由于此。可见大病须用大药，不得先将一个“虚”字横在胸中。如虚劳门诸虚百不足，用大黄廑虫丸，水气门胸满惊烦，不卒死，用十枣汤，诸可推证。后友人何镜澄室及王惠桥张姓病，痿象已成，均仿此案意治愈。

《冉雪峰医案》

赵海仙

肺如悬钟，为五脏华盖，空则鸣，实则嘎破则哑。于二十五年

前，因急躁即哑，或愈或反。今年又因思虑急躁，声音遂哑，咳嗽，痰红气急。卫虚不耐风寒，呵欠则喉中作痛。脉来虚数。火郁阴伤，金伤成痿。深为可虑。

太子参三钱 老苏梗一钱五分，蜜炙 生甘草八分 半夏粉一钱
苦桔梗二钱 猪肉皮一两，去肥白 糯米粉团用蜜包内蒸透和煎

左脉细涩，右脉细数。久咳音哑，痰带血丝，喉痛色白，现已溃破。金水交伤，肺痿已着。前用八仙长寿方，未见动静。病势已深，难于调治。拟方多酌明哲。

太子参三钱 粉甘草五分 牛蒡子三钱 南沙参三钱
淮山药三钱 苦桔梗一钱五分 冬虫夏草一钱五分 陈干菜三钱
鸡子清一枚

《寿石轩医案》

肺癆

丹溪

一人，久嗽吐红，发热，消瘦。众以为瘵，百方不应。朱视之，脉弦数，日轻夜重。用倒仓法而愈，次年生子。

越州境湖邵氏女，年十八，染瘵疾累年，刺灸无不求治，医莫效。渔人赵十煮鳊羹与食，食觉内热，病寻愈。今医有所用鳊鱼煎乃此意也。

有人得劳疾，相因染，死者数人。取病者纳棺中钉之，弃于水，永绝传染之患。流之金山，有人异之，引岸开视，见一女子犹活，因取置渔舍，多得鳊鱼食之，病愈，遂为渔人之妻焉。

一人劳伤而得瘵疾，渐见瘦瘠。用童便二盏，无灰酒一盏，以新磁瓶贮之，纳猪腰子一对于内，密封泥，日晚以慢火养熟，至中夜止。五更初，更以火温之，发瓶饮酒，食腰子，一月而愈。后以此治数人，皆验。此盖以血养血，全胜金石草木之药也。

一女子十余岁，因发热，咳嗽喘急，小便少，后来成肿疾，用利水药得愈。然虚羸之甚，遂用黄芪建中汤，日一服，一月余，遂愈。盖人禀受不同，虚劳，小便白浊，阴脏人服橘皮煎黄芪建中汤，获愈者甚众。至于阳脏人不可用暖药，虽建中汤不甚热，然有肉桂，服之稍多亦反为害。要之，用药当量其听禀，审其冷热，而不可一概用也。

睦州杨寺丞有女事郑迪功，苦有骨蒸内热之病，时发外寒，寒过内热，附骨蒸盛之时，四肢微瘦，足趺踵，其病在脏腑中，众医不瘥。适处州吴医，只单石膏散，服后，体微凉如故。其方出《外台秘要》，只用石膏研细，十分似面，以新汲水和服方寸匕，取身无热为度。

无锡游氏子，少年耽于酒色，旋得疾，久而弗愈，势危甚。忽语其家人曰：常见两女子，服饰华丽，其长才三、四寸，每缘吾足而行，冉冉在腰而没，家人以为祟。一日，名医自远而至，家人扣之，医曰：此肾神也。肾气绝则神不守舍，故病者见之。

一人患劳瘵二年，一日无肉味，腹痛不可忍。其家恐传染，置于空室待自终。三日无肉食，或惠鸡子，病人自煎食，将熟，忽打喷嚏，有红线二尺许，自鼻入桃，遂以碗复煎死之，自此遂安。

《名医类案》

汪石山

一人，年逾三十，形瘦危脆，过于房劳，病息嗜嗜卧，食后腹痛，多痰，觉自胃中而上，又吐酸水，肺气不清，声音不亮。已数更医，或用补阴消导等剂。汪诊之，脉皆细濡无力，约有七至。问曰：热乎？曰：不觉。曰：嗽乎？夜间数声而已。曰：大便何如？近来带溏，粪门傍生一疔，今已溃脓，未收口耳。曰：最苦者何？夜卧不安，四肢无力而已。汪曰：脉病不应。夫脉数主热，今觉不热，乃内蒸骨髓软？或正气已竭，无复能作热软？据证似难起矣。何以故？虚劳粪门生疔，必成痿疮，脉不数者尚不可为，况脉数乎！盖肺为吸门司上，大

肠为肛门司下，肺与大肠，腑脏相通，况肺为气主，阳气当升，虚则不陷，所谓物极则反也。今病内热燔灼，肺气久伤，故下陷肛门而生疝痿，肺伤极矣，非药能济。月余寻卒。

《名医类案》

江少微

邑人方信川子，年三十余，因劳役失饥得潮热疾。六脉弦数，宛然类瘵疾，但日出气喧则热，天色阴雨夜凉则否，喧盛则增剧，稍晦则热减，已逾二年。江曰：此内伤脾胃，阴炽而阳郁耳。以补中益气汤加丹皮、地骨，嗽喘，更加阿胶、麦冬、五味子而愈。

宿按：劳瘵乃精竭血虚，火虚无水之症，脉多弦数，潮热，咳嗽，咯血。若肉脱脉细数者，不治。《经》云：心本热，虚则寒，肾本寒，虚则热。又云：心虚则热，肾虚则寒，当分别阴阳虚实。心肾虚而寒者，是气血正虚，以其禀赋中和之人，暴伤以致耗散真气，故必近于寒，宜温补以复元气；心肾虚而热者，是气血之偏虚也，以其天禀性然血少之人，贪酒好色，肾水不升，心火不降，火与元气不两立，一胜则一负，故致于热也。苟非滋阴养血，凉肝补肾则阳愈亢而成劳极偏虚之症矣。或有挟外感外热，致烁阴血枯涸者，固不可用参、芪甘温之药；若产后血虚及劳心用力失血，饮食失调，暴伤血虚之症，非血虚本病，亦正虚之类也，又兼温补其气。阳虚者，挟寒之症；阴虚者，挟热之候；内伤者，暴损元气；虚损者，累伤血气，积损成劳，病已极矣，虽良工鲜能善其后矣。

《名医类案》

秦昌遇

一友脉数而涩，肺部无力如丝，数为内热，涩为血虚，因火热不已遂成咳而潮热。总之阴分有伤，卫气无损之患。煎剂先要滋阴清肺，阴得所滋则身热自愈，肺得清化则咳嗽自平。但禁用寒凉之品。

橘红 麦冬 天冬 知母 柴胡 丹皮 地骨皮 秦艽 丹参 玄参 甘草 贝母 生姜 怀地黄

按：秦艽、柴胡，风药也。热极生风，骨蒸潮热，此不能。非此不能引邪走毫窍而出也。凡遇骨蒸潮热者必兼知母、丹皮而用之也。又方服四，五剂，随宜此四帖。

北五味 陈皮 知母 麦冬 地骨皮 贝母 柴胡 当归 怀地黄 白芍药 紫苑 紫苏子 人参

十二月十四复诊之：脉数已减，重按有神，病减十之六矣。但有带数而微，则血分尚虚，脾气尚弱，肺部尚有虚痰也，又立后两方：

煎方：熟地二钱 陈皮二钱 白芍二钱 人参一钱 贝母二钱 白术一钱 茯苓一钱 五味九粒 麦冬二钱 甘草二钱 豆蔻一钱

丸方：当归四两 熟地四两 橘红二两 知母三钱 丹参二两 茯神二两 杏仁二两 杜仲三两 山萸三钱 山药三钱 续断三两 半夏二两 炼蜜为丸

一男子六脉微数，重按少力，此正气虚而精滑也。自今咳嗽身热，脾胃不实，饮食少进，系肝木乘脾，脾土受制，则肺失其所养。所以咳嗽未止，触之便发。所谓母病而子亦病矣。治宜保中州之土，滋肾中之水。土旺则万物生，阴旺则心火降，痰自不生，咳嗽自愈，热不清而亦除矣。六君子汤去甘草加米仁、款冬、五味、白芍、山药、生姜水煎。

膏方：生地八两、姜汁、砂仁各一半 丹皮三钱 麦冬二两 山萸四两 泽泻三两 杜仲二两 牛膝二两 茯苓三两 五味两半

照常煎膏二、三匙，白汤调化，日服数次，惟饱时不必服也。

《秦景明先生医案》

李用粹

休宁汪振先夫人。受孕八月，胎前劳瘵，肉削肌瘦，环口黧黑，舌色红润，饮食如常，六脉滑利，状若无病。予曰：九候虽调，形肉已

脱。法在不治，所赖者胎元活泼，真阴未散，线息孤阳依附丹田。譬之枯杨生花，根本已拔。胎前尚有生机，恐五十日后虽有神丹，总难回挽。盖分娩之时，荣卫俱离，百节开张，况处久病之躯，当此痛苦之境，恐元神无依。阴阳决绝，仅陈躯壳，而生气杳然，岂能再延耶？越二月果子存，母歿。

《旧德堂医案》

齐秉慧

曾治南邑张配先，其家殷实。年三十患劳瘵，前医乃用全真滋膏治之，一载无功。病在垂危，伊舅宋肇堂代为请视。诊之两寸浮大而空，余脉沉微，面部黑黯，毛发干燥，肤无润泽，形神俱疲，声哑无音，欲咳气紧，步履维艰。余曰：“足下初患三阴虚寒之症，法当驱阴回阳。医者不知分经辨症，一味滋阴，以致阴愈长而阳愈亏，种种难明之疾具矣。然欲治之，非数百剂之汤药，数十斤之丸饵不可。问愈期以年许，不可以月计，仆方认劳也。”彼曰：“贱躯十死，祇冀一生耳，先生怜而救之，敢不惟命是听。”爰与补中益气汤，加麦冬、五味、茯苓、半夏、诃子、杏三十余剂，病未增减。又与前药三十剂，兼服八味丸，加鹿茸去附子十二斤，咳声虽小，其音清亮。又三十剂，其气渐平。又服十全大补四十剂，前丸十二斤。是时冬至，明年仲春，汤丸服毕，皮肤光泽，声音和谐，欢笑如旧矣。又与人参养荣汤六十剂，前丸十二斤，又明年春，病已全愈。彼曰：“再服一年，庶免患。”余曰：“善。”又与补中益气四十剂，以滋化源，龟鹿地黄丸十六斤，滋补肝肾，至今十五载而无恙。计服汤药二百三十剂，丸饵五十二斤，此服药之最有恒者，予亦遇之罕矣。可为较量锱铢，不知爱身惜命者示。

《齐有堂医案》

王孟英

夏间，顾听泉邀孟英视其所视屠绿堂之恙，孟英曰：阴生可虑，果于夏至前五日而卒。

屠之五令郎，患痰嗽者数年，近因悲哀病作。徐某见其嗽甚则吐也，投以参、术，病乃益甚。润七月十七日夜，绿堂忽示梦云：汝病须延孟英诊视，服温养药可愈。觉而异之，即邀过诊。孟英曰：此阴虚劳嗽，嗽久而冲气不纳则呕吐，非胃寒也。经言：“劳者温之”，亦温养之谓，非可以温补施之者。病者见案，更为惊叹，始以父梦告焉。孟英亦为之肃然。方用西洋参、熟地、从蓉、二冬、茯苓、龟版、牡蛎、紫石英、玉竹、枇杷叶、橘皮，服之果安。予谓：凡事皆可以感天地，格鬼神，况医为性命之学耶？即此一案，可以知孟英之手眼通天，非幸获虚名者所能仰望也。

《王氏医案》

蒋宝素

阳邪之极，害必归阴。五脏之伤，穷必及肾。肾伤水不济火，又不涵木，木击金鸣，火载血上，吐血甚涌，痰嗽频仍，面戴阳色，内热燔蒸，舌有红槽，形神不振，心烦自汗，夜寐不沉，脉来弦数少神。已入虚劳之境，殊属可虑。爰以十药神书法，观其进退。

花蕊石 大小蓟尖 茜草根 大生地 黑山栀 大白芍 犀角片 粉丹皮 十二制大黄 侧柏叶 新荷叶 白茅草根 白藕节 陈京墨 童子小便

四进神书法，涌吐之血竟止。痰嗽未平，戴阳蒸热，自汗，心烦少寐，舌上红槽等症均皆未减，弦数之脉未缓，总是阴亏水火不济，心肾不交。岂旦夕之故，所从来远矣。仍以稚川法加以三才意。

天门冬 大生地 人参 紫苑茸 川贝母 五味子 马兜铃 百部 川百合 炙甘草 桔梗

连进稚川法加以三才汤，诸症未见退机，反觉痰嗽更甚。良由肾室久亏，子盗母气。肺损于上，清肃之令不行，金衰不能平木，反为肝火所烁，将成肺痿危疴。仍以稚川法参入紫庭方。

大生地 大熟地 天门冬 麦门冬 白知母 川贝母 当归身 款冬花 杏仁泥 肥桔梗 诃黎勒 十三制大黄

两进稚川法合紫庭方，痰嗽减半，夜寐颇安，虚烦亦定，戴阳之色稍退，燔蒸内热稍减，自汗渐收。药合机宜，依方进步。

大生地 大熟地 天门冬 大麦冬 川黄柏 白知母 人参 五味子 诃子肉 地骨皮

依方进步又服二剂，痰嗽全止，骨蒸亦除，戴阳亦退，饮食亦增，形神亦振，弦数之脉亦缓，都是佳征。惟舌上红槽更阔，自汗仍多，润下之水不足以济炎上之火，再以清上实下主之。

大生地 赤茯苓 白知母 天门冬 大麦冬 川黄柏 北沙参 五味子 玄武板

昨进清上实下之剂，舌上红槽较淡，自汗亦觉渐收。症属阴亏，阴难骤补。《经》言无阳则阴无以生，无阴则阳无以化。再以阴阳相引之剂主之。

大生地 人参 女贞子 旱莲草 鹿角霜 玄武板 大麦冬 五味子 附子水炒川黄柏 肉桂水炒川黄连

服阴阳相引之剂，因合机宜，遂连服八剂，舌上红槽十退八九，自汗尚未全收。汗为心液，舌为心苗。阴难来复，乃因已月纯阳，天地之阴亏极，而况于人。用药迎夏至——阴来复可也。

大生地 人参 大麦冬 五味子 粉丹皮 建泽泻 怀山药 云茯苓 白知母 川黄柏 玄武板

连服迎夏至——阴来复之剂，已交夏至，反觉虚炎之火上腾，亦山偶遇心感神伤之事。舌上红槽未减，自汗依然。《经》言：阴气者，静则神藏，躁则消亡。静不胜动，恐来复之阴如牛山之木。宜乎澄心息虑，恬澹无为。再以壮水济火，补阴潜阳为主。

大生地 玄武板 九肋鳖甲 川黄柏 白知母 人参 大麦
冬 五味子 犀角片 羚羊片

壮水济火，补阴潜阳，又服四剂，虚炎之火已平，舌上红槽全退，自汗全收，脉神形色俱起，眠食俱安。惟真阴虽复未固。以阴液难成易亏，况值五阳一阴时令，切戒烦劳、动怒，清心静养为宜。再以《医话》介潜丸加减，杜其反复。

大生地 玄武板 九肋鳖甲 左牡蛎 石决明 蚌珠粉 人
参 麦门冬 五味子

水叠丸。早服三钱。

《问斋医案》

张锡纯

天津陈某某，年十八岁。自幼得肺劳喘嗽证。

病因：因其母素有肺劳病，再上推之，其外祖母亦有斯病。是以自幼时，因有遗传性亦患此病。

证候：其证，初时犹轻，至热时即可如常人，惟略有感冒即作喘嗽。治之即愈，不治则两三日亦可自愈。至过十岁则渐加重，热时亦作喘嗽，冷时则甚于热时，服药亦可见轻，旋即反复。至十六七岁时，病又加剧，屡次服药亦无效，然犹可支持也。迨愚为诊视，在一九三〇年仲冬，其时病剧已难支持，昼依伏几，喘而且嗽，咳吐痰涎，连连不竭，无论服何中药，皆分毫无效。惟日延西医注射药针一次，虽不能止咳喘而可保当日无虞。诊其脉左右皆弦细，关前微浮，两尺重按无根。

诊断：此等证原因，肺脏气化不能通畅，其中诸细管即易为痰涎滞塞，热时肺胞松缓，故病犹轻，至冷时肺胞紧缩，是以其病加剧。治之者当培养其肺中气化，使之闾辟有力，更疏沦其肺中诸细管，使之互通无滞，原为治此病之正规也。而此证两尺之脉无根，不但其肺中有病，其肝肾实亦有病，且病因又为遗传性，原非一蹴所

能治愈，当分作数步治之。

处方：生怀山药一两 大甘枸杞一两 天花粉三钱 天冬三钱
生杭芍三钱 细辛一钱 射干三钱 杏仁二钱，去皮 五味子二钱，捣碎
葶苈子二钱，微炒 广三七二钱，捣细

药共十一味，前十味煎汤一大盅，送服三七末一钱，至煎渣再服时仍送服余一钱。

方解：方中用三七者，恐肺中之气窒塞，肺中之血亦随之凝滞，三七为止血妄行之圣药，更为流通瘀血之圣药，故于初步药中加之。

复诊：将药连服四剂。咳喘皆愈三分之二，能卧睡两三点钟。其脉关前不浮，至数少减，而两尺似无根，拟再治以纳气归肾之方。

处方：生怀山药一两 大甘枸杞一两 野党参三钱
生赭石六钱，轧细 生怀地黄六钱 生鸡内金钱半，黄色的捣
净萸肉四钱 天花粉四钱 天冬三钱 牛蒡子三钱，捣碎 射干二钱
共煎汤一大盅温服。

方解：参之性补而微升，惟与赭石并用，其补益之力直达涌泉。况咳喘之剧者，其冲胃之气恒因之上逆，赭石实又为降胃镇冲之要药也。至方中用鸡内金者，因其含有稀盐酸，原善化肺管中之瘀滞以开其闭塞，又兼能运化人参之补力不使作满闷也。

三诊：将药连服五剂，咳喘皆愈，惟其脉仍逾五至，行动时犹觉气息微喘，此乃下焦阴分犹未充足，不能与阳分相维系也。此当峻补其真阴，俾阴分充足自能维系其阳分，气息自不上奔矣。

处方：生怀山药一两 大甘枸杞一两 熟怀地黄一两
净萸肉四钱 玄参四钱 生远志钱半 北沙参四钱 怀牛膝三钱
大云苓片二钱 苏子二钱，炒捣 牛蒡子二钱，捣碎 生鸡内金钱半
共煎汤一大盅温服。

效果：将药连服八剂，行走动作皆不作喘，其脉至数已复常。从此停药汤药，俾日用生怀山药细末，水调煮作茶汤，少调以生梨自

然汁，当点心用之以善其后。

天津徐某某，年三十四岁，得肺劳痰喘证。

病因：因弱冠时游戏竞走，努力过度伤肺，致有喘病，入冬以来又兼咳嗽。

证候：平素虽有喘证，然安养时则不犯，入冬以来，寒风陡至，出外为风所袭，忽发咳嗽。咳嗽不已，喘病亦发，咳喘相助为虐，屡次延医，服药不愈，夜不能卧。其脉左部弦细而硬，右部濡而兼沉，至数如常。

诊断：此乃气血两亏，并有停饮之证，是以其左脉弦细者，气虚也。弦细兼硬者，肝血虚津液短也。其右脉濡者，湿痰留饮也。濡而兼沉者，中焦气化亦有所不足也。其所以喘而且嗽者，亦痰饮上溢之所迫致也。拟用小青龙汤，再加滋补之药治之。

处方：生怀山药一两 当归身四钱 天冬四钱 寸麦冬四钱
生杭芍三钱 清半夏三钱 桂枝尖二钱，五分 五味子二钱，捣碎
杏仁二钱，去皮 干姜钱半 细辛一钱 甘草钱半 生姜三片

共煎一大盅温饮下。

方解：凡用小青龙汤，喘者去麻黄加杏仁，此定例也。若有外感之热者，更宜加生石膏，此证无外感之热，故但加二冬以解姜桂诸药之热。

复诊：将药煎服一剂，其喘即愈，又继服两剂，咳嗽亦愈强半，右脉已不沉，似稍有力，左脉仍近弦硬，拟再以健胃养助滋生血脉之品。

处方：生怀山药一两 生百合五钱 大枸杞子五钱 天冬五钱
当归身三钱 苏子钱半，炒捣 川贝母三钱 白术三钱，炒
生薏米三钱，捣碎 生远志二钱 生鸡内金钱半，黄色的捣 甘草钱半

共煎汤一大盅温服。

效果：将药连服四剂，咳嗽全愈，脉亦调和如常矣。

天津罗某某，年三十四岁，得肺劳喘嗽病。

病因：数年之前，曾受肺风发咳嗽，治失其宜，病虽暂愈，风邪锢闭肺中未去，致成肺劳喘嗽证。

证候：其病在暖燠之时甚轻，偶发喘嗽一半日即愈，至冬令则喘嗽连连，必至天气暖和时始渐愈。其脉左部弦硬，右部濡滑，两尺皆重按无根。

诊断：此风邪锢闭肺中，久而伤肺，致肺中气管滞塞，暖时肌肉松缓，气管亦随之松缓，其呼吸犹可自如；冷时肌肉紧缩，气管亦随之紧缩，遂至吸难呼易而喘作，更因痰涎壅滞而嗽作矣。其脉左部弦硬者，肝肾之阴液不足也。右部濡滑者，肺胃中痰涎充溢也。两尺不任重按者，不焦气化虚损，不能固摄，则上焦之喘嗽益甚也。欲治此证，当先宣通其肺，俾气管之郁者皆开后，再投以滋阴培气，肺肾双补之剂以拔除其病根。

处方：麻黄钱半 天冬三钱 天花粉三钱 牛蒡子三钱，捣碎
杏仁二钱，去皮捣碎 甘草钱半 苏子二钱，炒捣 生远志二钱，去心
生麦芽二钱 生杭芍二钱 细辛一钱

共煎汤一大盅，温服。

复诊：将药煎服两剂，喘嗽皆愈，而劳动时仍微喘。其脉左部仍似弦硬，右部仍濡，不若从前之滑，两尺犹虚，此病已去而正未复也。宜再为谋根本之治法，而投以培养之剂。

处方：野台参三钱 生赭石八钱，轧细 生怀山药一两
熟怀地黄一两 生怀地黄一两 大云苓片二钱 大甘枸杞六钱
天冬六钱 净萸肉五钱 苏子三钱，炒捣 牛蒡子三钱，捣碎

共煎一大盅温服。

方解：人参为补气主药，实兼具上升之力。喻嘉言谓：“气虚欲上脱者专用之转气高不返。”是以凡喘逆之证，皆不可轻用人参，惟重用赭石以引之下行，转能纳气归肾，而下焦之气化，遂因之壮旺而固摄。此方中人参、赭石并用，不但欲导引肺气归肾，实又因其两尺脉虚，即借以培补下焦之气化也。

效果：将药连服十余剂，虽劳动亦不作喘。再诊其脉，左右皆调和无病，两尺重按不虚，遂将赭石减去二钱，俾多服以善其后。

天津于某某，年近五旬，咳嗽有痰微喘，且苦不寐。

病因：夜间因不能寐，心中常觉发热，久之，则肺脏受伤，咳嗽多痰，且微作喘。

证候：素本夜间不寐，至黎明时始能少睡。后因咳嗽不止，痰涎壅盛，且复作喘，不能安卧，恒至黎明亦不能睡。因之心中发热益甚，懒于饮食，大便干燥，四五日一行，两旬之间大形困顿，屡次服药无效。其脉左部弦而无力，右部滑而无力，数愈五至。

诊断：此真阴亏损，心肾不能相济，是以不眠。久则心血耗散，心火更易妄动以上铄肺金，是以咳嗽有痰作喘，治此证者，当以大滋真阴为主，真阴足则心肾自然相交，以水济火而火不妄动；真阴足则自能纳气归根，气息下达，而呼吸自顺。且肺肾为子母之脏，原相连属，子虚有损于母，子实即有益于母，果能便真阴充足，则肺金既不受心火之铄耗，更可得肾阴之泽润，自能复其清肃下行之常，其痰涎咳嗽不治自愈也。若更辅以清火润肺化痰宁嗽之品，则奏效当更捷矣。

处方：沙参一两 大枸杞一两 玄参六钱 天冬六钱
生赭石五钱，轧细 甘草二钱 生杭芍三钱 川贝母三钱
牛蒡子一钱，捣碎 生麦芽三钱 枣仁三钱，炒捣 射干二钱

共煎汤一大盅，温服。

复诊：将药连服六剂，咳嗽痰涎愈十分之八，心中已不发热，食欲已振，夜能睡数时，大便亦不甚燥。诊其脉至数复常，惟六部重按仍皆欠实，左脉仍有弦意。拟再峻补其真阴以除病根，所谓上病取诸下也。

处方：生怀山药一两 大枸杞一两 辽沙参八钱 生怀地黄六钱
熟怀地黄六钱 甘草二钱 生赭石六钱，轧细 净萸肉四钱
生杭芍三钱 生麦芽三钱 生鸡内金钱半，黄色的捣

共煎汤一大盅，温服。

效果：将药连服二剂，诸病皆愈。俾用珠玉二宝粥常常当点心服之，以善其后。

或问：两方中所用之药，若滋阴、润肺、清火、理痰、止嗽诸品，原为人所共知，而两方之中皆用赭石、麦芽，且又皆生用者其义何居？答曰：胃居中焦，原以传送饮食为专职，是以胃中之气，以息息下行为顺，果其气能息息下行，则冲气可阻其上冲，胆火可因之下降，大便亦可按时下通，至于痰涎之壅滞，咳嗽喘逆诸证，亦可因之递减，而降胃之药，固莫赭石若也。至于麦芽，炒用之善于消食，生用之则善于升达肝气。人身之气化原左升右降，若但知用赭石降胃，其重坠下行之力或有碍于肝气之上升，是以方中用赭石降胃，即用麦芽升肝，此所以顺气化之自然，而还其左升右降之常也。

邻村许某某，年十八岁，于季春得劳热咳嗽证。

病因：秉性刚强，劳心过度；又当新婚之余，或年少失保养，迨至春阳发动，渐成劳热咳嗽证。

证候：日晡潮热，通夜作灼，至黎明得微汗其灼乃退。白昼咳嗽不甚剧，夜则咳嗽不能安枕。饮食减少，身体羸瘦，略有动作即气息迫促。左右脉皆细弱，重按无根，数逾七至。夫脉一息七至，即难挽回，况复逾七至乎？犹幸食量犹佳，大便干燥此等证忌滑泻，知犹可治。拟治以峻补真阴之剂，而佐以收敛气化之品。

处方：生怀山药一两 大甘枸杞八钱 玄参六钱 生怀地黄六钱
沙参六钱 甘草三钱 生龙骨六钱，捣碎 净萸肉六钱 生杭芍三钱
五味子三钱，捣碎 牛蒡子三钱，捣碎

共煎汤一大盅，温服。

方解：五味入汤剂，药房照例不捣。然其皮味酸，核味辛，若囫圇入煎则其味过酸，服之恒有满闷之弊。故徐录胎谓宜与干姜之味辛者同服。若捣碎入煎，正可借其核味之辛以济皮味之酸，无事伍以干姜而亦不发满闷。是以欲重用五味以治嗽者，当注意令其捣

碎。或说给病家自检点。至于甘草多用至三钱者，诚以此方中不但五味酸，萸肉亦味酸，若用甘草之至甘者与之化合，可增加其补益之力如酸能龋齿，得甘则不龋齿是明证，是以多用至三钱。

复诊：将药连服三剂，灼热似见退，不复出汗，咳嗽亦稍减，而脉仍七至强。因恍悟此脉之数，不但因阴虚，实亦兼因气虚，犹若力小而强任重者其体发颤也。拟仍峻补其真阴，再辅以补气之品。

处方：生怀山药一两 野台参三钱 大甘枸杞六钱 玄参六钱
生怀地黄六钱 甘草三钱 净萸肉五钱 天花粉五钱
五味子三钱，捣碎 生杭芍三钱 射干二钱 生鸡内金钱半，黄色的捣

共煎一大盅温服。为方中加台参恐服之作闷，是以又加鸡内金以运化之。且凡虚劳之甚者，其脉络间恒多瘀滞，鸡内金又善化经络之瘀滞也。

三诊：将药连服四剂，灼热咳嗽已愈十之七八，脉已缓至六至，此足征补气有效也。爰即原方略为加减，多服数剂，病自除根。

处方：生怀山药一两 野台参三钱 大甘枸杞六钱 玄参五钱
生怀地黄五钱 甘草二钱 天冬五钱 净萸肉五钱 生杭芍三钱
川贝母三钱 生远志二钱 生鸡内金钱半，黄色的捣

共煎一大盅温服。

效果：将药连服五剂，灼热咳嗽全愈，脉已复常，遂停服汤剂。俾日用生怀山药细末煮作茶汤，兑以鲜梨自然汁，当点心服之，以善其后。

《医学衷中参西录》

陈莲舫

韩。劳伤，百节疼痛，胁腰尤甚，咳嗽，溏稀，脉息濡细，治以和养。

旋覆花 白茯苓 半夏曲 冬瓜子 桑寄生 补骨脂 炙款冬
冬 细苡米 广陈皮 生白芍 川杜仲 沉香屑 丝瓜络

沈。咳呛日久，营卫偏则潮热盗汗，升降阻则气怯便溏，脉息濡滑，病势至此，不知能否转机。

吉林须 补骨脂 北五味 生白芍 金石斛 枇杷叶 野於术 菟丝子 甘枸杞 冬虫夏草 新会皮 银柴胡 红枣

任。咳呛绵延，潮热。经阻。上虚下损，日久过中作泻，肢肿纳呆。脾胃一伤至怯，病无可治法。脉息细弦，拟用和补。

吉林须 补骨脂 北五味 生白芍 白茯苓 金石斛 野於术 制香附 炒夏曲 焦谷芽 新会皮 银柴胡 红枣

角直，某。据述咳呛痰多，仍潮热形寒，仍泻减而未除，纳食依然未旺，脾胃损伤属虚极过中，本难调治，再拟和中而摄上下。

吉林须 补骨脂 北五味 生白芍 白茯苓 金石斛 野於术 炙款冬 炒夏曲 焦谷芽 新会皮 生绵芪 红枣

嘉善，鞠垒二兄。久咳不已，营卫偏胜，形寒形热，气息少痰。营阴内亏，肺肾渐欲过中。越人谓：过中难治。如此脉濡无力，色眊，便溏，恐冬春更加。

吉林须 生绵芪 旋覆花 紫石英 淮朱膝 金石斛 炒夏曲 枇杷叶 黄防风 炙款冬 冬虫夏草 生白芍 广陈皮 红枣

上海，某。旧咳复发，必因感受而起，发于三月之后。由肝及脾，司令肝阳内炽，脾气内困，遂至五心燔灼，出汗频频，或为呕逆，或为自利，致土不培金，肝反侮脾，咳呛之根淹缠。脉数带弦，两尺无力。诸脏之虚，牵制肠胃，腑邪由传送失职而成。总核病机，腑实脏虚最难调理。若论咳病至纳少使溏，即越人所谓过中之势。拟培养肝木，兼调肺气。

吉林须 银柴胡 淮山药 白苡米 半夏曲 生白芍 金石斛 柔白薇 白茯苓 姜竹茹 广陈皮 绿萼梅 洋佩兰

复方：咳呛之根，虽发不重，入夏至秋，脾胃易损，或痢或溏，纳少不饥，渐至色眊，足肿，行动气怯，掌热，舌剥，口渴喜饮。营卫出

于中焦，病久入中，致营卫为偏，升降愆度。脉象细软，重按带弦。拟先理脾胃，以冀纳开泻止，且土能生金，与咳嗽亦有关涉。

吉林参 金石斛 白茯苓 白苡米 生白芍 厚朴花 西洋参 野於术 扁豆衣 生谷芽 炒竹茹 干佩兰

黎里，某。痢咳俱止，气虚液亏，脉息细弦，舌糙，治以和养。

吉林参须 西洋参同煎 大丹参 制女贞 白茯苓 白苡米 生白芍 川石斛 炒苑子 黑料豆 扁豆衣 炒夏曲 红枣

《蓬舫秘旨》

邵兰荪

大西庄马。病损成劳，呛咳，形寒盗汗，曾经失血，脉小数，舌黄。肺气受戕，非轻藐之症。

北沙参三钱 云母石三钱 紫菀钱半 光杏仁三钱 生牡蛎四钱
茯神四钱 川贝二钱 橘络钱半 清炙芪皮八分 五味子十粒
冬虫夏草钱半 加红枣三枚

四帖。

又：案列于前，顷脉仍属小数，咳痰脓厚带红。总之，肺气受戕，形寒，属虚劳重症。

北沙参三钱 白芨片钱半 煅蛤壳四钱 紫菀钱半 生牡蛎四钱
橘络钱半 光杏仁三钱 白薇钱半 川贝二钱 侧柏炭三钱
冬虫夏草钱半 引枇杷叶五片，去毛

四帖。

史介生评：肺主皮毛，肺伤则失其卫护之职。热伤元气，气伤不能生津而敛液，以致呛咳形寒而盗汗。但虚劳而至于失血，诚属重极之症。照此症候，宜用黄芪建中汤急建中气，俾饮食增而津液汪，以至充血生精，而复其真阴之不足。惟此人肺气受戕，故初方全是清肺生津之品，又佐以善治肺劳之冬虫夏草，最益肺经之云母石，确治肺劳之妙剂。据戴氏白芨枇杷丸，（用白芨一两，枇杷叶、藕节

各五钱，为细末。另以蛤粉炒阿胶五钱，生地汁调之，火上顿化，入前药为丸，如龙眼大，每服一丸。）为治咳咯肺血之专方。今次诊仿佛戴氏之意以拟治，真是异曲而同工。

蜀阜马妇。劳嗽潮热，脉涩，左细数，舌白，中心红，经阻形怯，非轻藐之症。

生玉竹钱半 紫菀钱半 丹参三钱 黄草三钱 川贝钱半
橘红一钱 白石英三钱 省头草钱半 地骨皮三钱 白前钱半
谷芽四钱 枇杷叶三片，去毛

四帖。

又：咳嗽未除，形怯潮热，脉虚细右弦，舌微黄，脘闷便泻。究属重险之症，宜清气和中。候正。

南沙参三钱 藿梗二钱 谷芽四钱 银胡一钱 扁豆衣三钱
川贝钱半 茯苓四钱 地骨皮三钱 桔梗钱半 新会皮钱半
砂仁七分 江西术一钱

清煎三帖。

史介生评：冲任皆损，二气不交，五液消耗，延为劳怯。初方镇冲活血，清肺养胃，双方兼顾，未能应验。次诊又见便泻，是属脾气虚弱，虽于清养脾胃之中，参用扶脾理气之品，究属难愈之疴。

《邵兰荪医案》

王仲奇

张，衢州。冲年失血后，咳呛气急，右肘引痛，日晡寒热，夜寝盗汗，形瘦肤燥，脉濡弦数。肺劳病深，未易疗治。

海蛤粉包 金钗斛 生苡仁 香白薇炒 地骨皮炒 紫菀
百部蒸 款冬花炙 马兜铃炙 茯苓 茜根炒 枇杷叶去毛布包

二诊：寝汗已戢，晡热未除，右肘引痛见瘥，咳呛较减，侵晨尚甚，前尝失血，形瘦肤燥，脉弦滑而虚。冲年肺劳病深，未可疏忽。

海蛤粉包 金钗斛 地骨皮炒 香白薇炒 马兜铃炙 百部蒸

款冬花^炙 紫菀 桑白皮^炙 杏仁^{去皮尖} 玉苏子
枇杷叶^{去毛布包}

三诊：寝汗已戢，咳呛较减，右肘引痛见瘥，唯日晡潮热，鼻窍多涕，时清时浊，形瘦，脉濡弦。仍以保肺、宁心、清脑，肺劳病深，证药相安，仍守原意。

香白薇^炒 地骨皮^炒 百部^蒸 款冬花^炙 紫菀 桑白皮^炙
金钗斛 野料豆 野茯苓 辛夷 甘草 紫贝齿^煨

四诊：寝汗已戢，夜热未除，咳呛稀微，右肘引痛见愈，唯鼻窍多涕，时清时浊，脉率滑。再以保肺清脑可也。

香白薇^炒 地骨皮^炒 百部^蒸 白蒺藜 香白芷 桑白皮^炙
蔓荆子 紫菀 款冬花^炙 金钗斛 辛夷 紫贝齿^煨 野茯苓

五诊：肺病较瘥，脑力虚弱，寝汗已戢，夜热亦减，咳呛尚安，鼻窍已较清利，唯右肋下欠舒，脉濡滑。肾气将盛，精气溢泄之际，强肾清脑可也。

香白薇^炒 香白芷 蔓荆子 白蒺藜 金钗斛 野料豆 丝瓜络 冬青子 野茯苓 辛夷 紫贝齿^煨 凌霄花

六诊：寝汗已戢，夜热轻微未净，鼻窍较清利，咳未罢休，痰或爽或不爽，右肘肋稍有欠舒，脉虚滑。仍以强肾、肃肺、清脑。

香白薇^炒 香白芷 蔓荆子 白蒺藜 金钗斛 百部^蒸
款冬花^炙 紫菀 丝瓜络 辛夷 野茯苓 玫瑰花

叶，浦江，四月廿日。咳呛失血，痰中带红，间有遗泄，腹痛，大便不调，或秘或泻，晡热，盗汗，形瘦，脉濡弦数。肾亏肺伤，肠回拘急，已成劳瘵，冲年尤属可虑，幸勿疏忽。

海蛤粉^{布包，三钱} 金钗斛^{二钱} 香白薇^{炒，二钱} 地骨皮^{炒，三钱}
北沙参^{三钱} 茯苓^{三钱} 罂粟壳^{钱半} 紫菀^{钱半} 款冬花^{炙，钱半}
甘草^{八分} 白扁豆^{炒，二钱} 杭白芍^{炒，二钱}

二诊：四月廿四日，大便较调，腹痛未已，咳呛较减，痰红未净，晡热、盗汗如昔，形瘦、神疲、力乏，脉虚弦数。肺伤肠急，已成劳瘵，

冲年尤难治。

海蛤粉布包,三钱 金钗斛二钱 生苡仁三钱 苏芡实三钱
茯苓三钱 白扁豆炒,二钱 香白薇炒,二钱 北沙参三钱 紫菀钱半
罌粟壳钱半 夜交藤四钱 淮小麦三钱

三诊:四月廿八日,咳呛较减,痰红已净,大便较调,腹痛未已,晡热、盗汗未戢,形瘦纳减,力乏神疲,脉濡弦稍数。肺伤肠急,已成劳瘵,前方虽尚安,仍须慎摄为妙。

海蛤粉布包,三钱 白扁豆炒,二钱 香白薇炒,二钱
地骨皮炒,三钱 金钗斛三钱 生苡仁四钱 淮山药三钱
杭白芍炒,二钱 甘草清炙,八分 茯苓三钱 夜交藤四钱 紫菀钱半
罌粟壳钱半

包右,小南门。孱瘦体弱,能食而肌不充,咳呛胸闷,痰中不时带血,经事失常,带下频仍,夜卧微觉肤热,脉濡弦稍数。治以清络保肺,年轻人怯极易,宜注意。

海蛤粉布包 金钗斛 生苡仁 茜根炒 香白薇炒 丹参
款冬花炙 紫菀蒸 百部蒸 霜桑叶 杏仁去皮尖 玫瑰花

二诊:痰红已弭,肤热亦退,带淋较减,惟咳呛未罢,有声无痰,脉濡滑微弦。仍以保肺宁金,用防入怯。

海蛤粉布包 金钗斛 生苡仁 马兜铃炙 紫菀蒸 款冬花炙
杏仁去皮尖 百部蒸 茜根炒 茯苓 乌鲗骨炙 鸡冠花

唐,善钟路,四月十八日。久咳肌肉渐瘦,神疲力乏,声欠清扬,痰曾带血,右卧咳甚而欠逸,脉濡弦。有肺坏叶焦之虑,幸勿疏忽。

海蛤粉布包,三钱 马兜铃炙,钱半 川石斛三钱 野料豆三钱
冬青子三钱 南沙参三钱 木蝴蝶四分 甘草八分 紫菀蒸,钱半
枇杷叶去毛布包,三钱 生苡仁四钱 琼玉膏分冲,四钱

二诊:四月廿四日,声音较亮,卧得转侧,咳呛、痰多,气急如旧未减,腰俞作酸,左胁肋内痛,脉濡弦。仍以保肺,参以强肾,以防肺坏叶焦。

海蛤粉布包,三钱 马兜铃炙,钱半 川石斛三钱 紫菀蒸,钱半
白前钱半 丝瓜络三钱 生苡仁四钱 霜桑叶二钱 粉丹皮炒,钱半
款冬花炙,钱半 续断炒,二钱 枇杷叶去毛布包,三钱 琼玉膏分冲,四钱

三诊:五月七日,腰酸、左肢肋内痛皆已见愈,卧得转侧,喉痛且痒较减,咳呛、痰多、气急如故,声欠清扬,小溲澄澈有粉,脉濡弦。肾亏肺伤,有金碎失音之虑,慎旃切切。

海蛤粉布包,三钱 款冬花炙,钱半 金钗斛三钱 野料豆三钱
冬青子三钱 天冬三钱 大麦冬二钱 百药煎钱半 木蝴蝶四分
甜百合三钱 干苇茎三钱 琼玉膏分冲,四钱

康右,同孚路。初诊:(佚)

二诊:咯血痰红已愈,咳呛卧下益甚,胸宇闷痛,腰俞作酸,音欠清扬,午后掌跖内热,脉虚数而弦。肺伤成劳,慎旃切切。

海蛤粉包 金钗斛 生苡仁 马兜铃炙 白前 紫菀蒸
百部蒸 款冬花炙 杏仁去皮尖 茜根炒 枇杷叶去毛布包 十大功
劳 琼玉膏分冲

三诊:胸宇闷痛较愈,声音亦稍清扬,咳呛卧下较甚,咳甚腰肋引痛,肺失清肃,金令不及,木寡于畏,致呕逆吐苦,脉濡弦稍数。肺伤成劳,宜慎毋忽。

海蛤粉包 金钗斛 生苡仁 马兜铃炙 霜桑叶 杏仁去皮尖
紫菀蒸 旋复花包 百部蒸 款冬花炙 罂粟壳 十大功劳
枇杷叶去毛布包

四诊:咳呛较减,呕逆吐苦已平,胸宇闷痛较愈,声音亦见清扬,唯近来左乳生疔赤肿而痛。肺伤成劳,务宜自慎,照述再拟一方。

海蛤粉包 金钗斛 生苡仁 马兜铃炙 紫菀蒸 杏仁去皮尖
象贝母 夏枯草 忍冬藤 茯苓 橘络 十大功劳

江,婺源,四月十九日。脾运委顿,清阳不升,肺苦气逆,肠回拘急,咳嗽已经一载,腹胀,大便溏泻,形瘦,神疲,畏寒,夜寝汗出,脉

濡弦。病机入瘵，宜慎勿忽。

生于术二钱 茯苓三钱 益智仁一钱 白果煨，钱半
杭白芍炒，二钱 川桂枝钱半 白扁豆炒，二钱 紫菀蒸，钱半
款冬花炙，钱半 生苡仁三钱 罂粟壳钱半

二诊：四月廿一日，咳嗽乍疏乍数，已经一载，腹胀，食难消受，形瘦容黄，大便溏泻，精神疲惫，惟寝汗畏寒稍愈，脉濡滑而弦。脾钝肠急，肺苦气逆，病机入瘵，未易疗治。

生于术二钱 茯苓三钱 川桂枝钱半 杭白芍炒，二钱
肉果煨，钱半 益智仁炒，一钱 陈六神曲炒，三钱 新会皮二钱
百部蒸，八分 佩兰三钱 罂粟壳钱半 荷叶三钱

三诊：四月廿六日，舒肠运脾，腹胀溏泻较愈，容黄略有津泽，咳嗽未休，仍稍畏寒，脉濡弦。脾钝肠急，肺苦气逆，病机入瘵，仍须慎摄为妙。

生于术二钱 茯苓三钱 川桂枝钱半 杭白芍炒，二钱
白扁豆炒，二钱 益智仁一钱 肉蛤煨，钱半 佩兰三钱 紫菀钱半
百部蒸，八分 生苡仁四钱 罂粟壳钱半 陈六神曲炒，三钱

何，震泽。脾少健运，肠急未舒，腹胀痛，肠鸣便溏，食难消受，日来咯痰见血，掌跖内热，形瘦，脉濡弦。病机渐入瘵途，及早注意可也。

生于术 野茯苓 白芍炒 益智仁炒 肉果煨 陈六神曲炒
茜根炒 左牡蛎煨先煎 佩兰 川楝子煨 陈大麦炒拌去外层粗皮
使君子肉

二诊：痰红已弭，掌跖内热亦退，腹胀痛、肠鸣、便溏未已，食难消受，形瘦，脉软弦。病机入瘵，慎旃勿忽。

生于术 野茯苓 肉果煨 补骨脂炒 川楝子煨 佩兰
鸡内金炙 广皮 陈六神曲炒 罂粟壳 陈大麦炒拌去外层粗皮 使君子肉

王右，华格臬路。失血之后，咳呛不已，胸闷气急，掌心内热，月

事三阅月不来，形瘦，脉濡弦数。病机入瘵，未易疗法。

海蛤粉包 金钗斛 生苡仁 丹参 茜根炒 香白薇炒
款冬花炙 紫菀 马兜铃炙 甜百合 茯苓 枇杷叶去毛布包

二诊：咳呛见减，气急亦安，掌心内热已净，惟经停四月未行，脉软弦。病机入瘵，守原意出入之。

海蛤粉包 金钗斛 马兜铃炙 生苡仁 香白薇炒 百部蒸
杏仁去皮尖 紫菀 款冬花炙 白前 鬼箭羽 续断炒 益母草
月季花

蒋姑，城内，八月十三日。年前经来淋漓，数月方净，胞脉既伤，嗣后月事不来已经载余，骨蒸盗汗，渐成干血，近复加以怫郁，伤风，咳嗽胸痛，舌赤无苔，脉弦数。治以清肝保肺，养心调营，宜慎毋忽。

香白薇炒，二钱 茯苓二钱 丹参二钱 金钗斛二钱 绿萼梅八分
川郁金钱半 紫菀蒸，钱半 川贝母去心，钱半 杏仁去皮尖杵，三钱
玫瑰花两朵 枇杷叶去毛布包，三钱

二诊：八月廿三日，经事淋漓之后，胞脉为闭，月事不来，已经载余，骨蒸较减，盗汗未戢，咳嗽有痰，右胁肋引痛，舌绛赤较淡，脉弦数。劳瘵干血，至不易治。

香白薇炒，二钱 地骨皮炒，二钱 海蛤粉包，三钱
川贝母去心，钱半 金钗斛二钱 茯苓三钱 生苡仁三钱 丹参二钱
丝瓜络三钱 紫菀蒸，钱半 新绛钱半 玫瑰花两朵

三诊：八月卅日，寒热未除，盗汗仍泄，精神气力虚乏，咳痰仍有气味，痰中血筋已净，右软肋引痛，月事未来，舌苔腻、中露绛剥，脉濡弦数。仍以清蒸养营，保肺凉肝。

海蛤粉包，三钱 川贝母去心，钱半 香白薇炒，二钱
地骨皮炒，三钱 银柴胡炒，一钱 鳖甲先煎，三钱 金钗斛二钱
生苡仁四钱 青蒿二钱 紫菀钱半 冬瓜子四钱 淮小麦四钱

四诊：九月初十日，寒热已瘳，盗汗亦戢，痰中血筋已净，咳嗽

亦较轻微，舌腻露绛均减，惟月事未行，足肢酸麻。再以养营清肝，兼肃肺金。

金钗斛二钱 生苡仁三钱 丝瓜络三钱 丹参二钱
羌蔚子炒，二钱 泽兰三钱 紫菀蒸，钱半 淮牛膝蒸，二钱
续断炒，二钱 野茯苓三钱 玫瑰花两朵 月季花三朵

时右，太仓。肠鸣便溏，由来已久，经常愆期，带下频仍，劳顿吃力则子脏下坠，腰酸，头眩，咳呛声欠爽适，只得偃卧，不可侧眠，脉濡弦。肺肠并病，劳瘵是虑，幸勿忽也。

生干术 茯苓 白扁豆炒 肉果煨 赤石脂煨 续断炒 潼沙苑 紫菀 款冬花炙 乌鲂骨炙 罂粟壳 鸡冠花

二诊：便溏转硬，肠鸣未息，带淋缠绵，子脏下坠较愈，咳呛亦减，但仍只可偃卧，不可侧眠，脉濡滑而弦。肺肠并病，劳瘵是虑，前方尚安，守原意为之。

生干术 茯苓 白扁豆炒 生米仁 赤石脂煨 肉果煨
杏仁去皮尖 紫菀 款冬花炙 罂粟壳 乌鲂骨炙 鸡冠花

刘，棋盘街，十月十七日。右肱内痛，呼吸不畅，劳动即觉气逆，咳呛失血，此属肺伤，络为迸裂，日前色红，昨则紫而成块，盖血已离络，忍而后出也，脉芤数而弦。治以清络保肺，然宜少毋躁为要。

仙鹤草三钱 甜：七八分 丝瓜络三钱 蒲黄炒，钱半 丹参二钱
降香一钱 茜根炒，钱半 小蓟炒，钱半 玉苏子二钱 粉丹皮炒，钱半
生苡仁四钱 藕节四钱

二诊：十月廿日，血少痰多，咳呛较减，右肱内痛未瘥，惟呼吸稍畅，少寐多梦，脉弦数略平。仍以清络保肺，用戢阴火。

仙鹤草二钱 茜根炒，一钱二分 蒲黄炒，钱半 海蛤粉包，三钱
生苡仁三钱 丝瓜络三钱 橘络一钱 丹参二钱 野茯苓三钱
金钗斛二钱 淮牛膝炒炭，三钱 藕节四钱

三诊：十月廿八日，血静，咳休，右肱内痛已愈，呼吸畅适如常，脉濡缓微弦。再以清络保肺，为调理之计。

生地黄四两 茯苓二两 金钗斛二两 丝瓜络两半 丹参两半
仙鹤草两半 旱莲草二两 淮山药三两 女贞子二两 野料豆二两
北沙参三两 藕节三两 海蛤粉三两 川贝母一两 生苡仁三两
陈阿胶烱化,二两

上十六味,除阿胶外,入铜锅内,慢火熬透,去渣取汁,将阿胶烱化和入,加冰糖一斤收膏。每早空心开水冲服一羹匙。

四诊:十一月廿八日。清络保肺调理,颇觉相安,惟胸膈中尚有隐痛,仍有轻微痰嗽,脉弦象减退。守原意制膏。

北沙参三两 淮山药二两 生苡仁三两 金钗斛二两
旱莲草二两 女贞子二两 茯苓三两 甘草炙,八钱 川郁金一两
野料豆二两 海蛤粉三两 丹参二两 橘络六钱 紫贝齿煨,二两
红枣三两 枇杷叶去毛布包,二两

上药入铜锅内,慢火熬透,去渣取汁,另用阿胶二两烱化和入,再加冰糖一斤收膏。每早开水冲服一羹匙。

放 三洋泾桥 七月廿二日 咳嗽轻微,晨起痰内带红三月之久,仍未获弭,裂痕在肺叶深处,心肺相依为用,故心悸,汗易泄,不耐烦劳,向有遗精,脉虚滑。治以清络养阴,肃肺宁心。

旱莲草三钱 女贞子三钱 丝瓜络三钱 海蛤粉包,三钱
陈阿胶蒲黄炒珠,二钱 丹参二钱 生苡仁四钱 藕节五钱 滇三七六分
淮牛膝炒炭,钱半 驪仙琼玉膏分冲,三钱

二诊:七月廿九日,精神稍振,心悸略宁,汗泄亦减,惟肺叶深处裂痕仍未平复,晨起咯痰仍带紫血,咳嗽轻微,今日头脑又觉不清,脉虚细而数。仍以清络养阴,保肺宁心。

旱莲草三钱 女贞子三钱 白及片八片 丝瓜络三钱
滇三七六分 生苡仁四钱 海蛤粉包,三钱 淮牛膝炒炭,二钱
血余炭包,六分 陈阿胶蒲黄炒珠,二钱 地榆炒,三钱
驪仙琼玉膏分冲,四钱

三诊:八月十三日,痰中血丝渐淡渐少,肺络裂痕有平复之联,

惟阴虚阳强不密，时觉火热上炎，心悸，头眩，脉细稍数。心肺相依为用，仍守原意以治。

旱莲草三钱 女贞子三钱 金钗斛二钱 海蛤粉包，三钱
淮牛膝炒炭，二钱 地榆炒，三钱 陈阿胶蒲黄炒珠，二钱 丹参二钱
滇三七六分 合欢皮三钱 淡秋石钱半

下，虹口，七月廿一日。咳痰带血之后，阴亏肺燥，继以头脑剧痛，既而肌瘦形羸，气力虚乏，咳不减而痰多，声音殊失清扬，脉濡弦稍数。防有肺痿叶焦之患。

海蛤粉包，三钱 白石英煨先煎，三钱 金钗斛二钱 南沙参三钱
生苡仁四钱 冬瓜子四钱 野料豆三钱 甘草一钱 冬虫夏草一钱
款冬花炙，钱半 玫瑰花两朵

二诊：七月廿七日。阴亏肺燥，咳呛痰曾带血，血弭后咳不休而痰多，形瘦，纳食未减，舌燥口干，咳声未能清扬，久延肺痿叶焦是虑。更以肃肺保金可矣。

海蛤粉包，三钱 杏仁去皮尖，三钱 金钗斛二钱 生苡仁三钱
冬瓜子四钱 川贝母去心，一钱二分 款冬花炙，钱半 紫菀钱半
北沙参三钱 甘草炙，一钱 枇杷叶去毛布包，三钱 玫瑰花两朵

三诊：八月初六日。咳呛已减，痰亦渐少，气力略强，大便溏薄，脉濡弦滑。仍以肃肺保金，兼养脾胃。

北沙参三钱 金钗斛二钱 生苡仁三钱 淮山药三钱 茯苓三钱
罂粟壳钱半 川贝母去心，钱半 款冬花炙，钱半 紫菀钱半
杭白芍炒，钱半 甘草八分 白扁豆炒，二钱 玫瑰花两朵

四诊：八月十二日。咳痰渐瘳，胃纳略强，惟脾元运化未健，夜卧腹胀欠适，大便仍溏，形瘦，脉濡弦。仍以健脾胃、肃肺气，蔓延仍非所宜。

金钗斛二钱 茯苓三钱 益智仁一钱 生苡仁三钱 橘红衣一钱
紫菀二钱 款冬花炙，钱半 杭白芍炒，二钱 罂粟壳钱半
禹余粮制先煎，三钱 生熟谷芽各五钱

五诊：八月廿四日。腹痛、便溏、纳食胀闷皆已见愈，惟饮食仍不知味，水谷酿痰，故咳嗽甚剧，而肌瘦形羸，蔓延殊属不宜。

于术蒸，一钱二分 杭白芍炒，二钱 益智仁八分 生苡仁三钱
金钗斛二钱 茯苓三钱 橘红衣八分 百部蒸，八分 款冬花炙，钱半
紫菀蒸，钱半 杏仁去皮尖，二钱 罂粟壳钱半 生熟谷芽各四钱

六诊：八月卅日。腹痛见愈，大便仍溏，咳嗽如旧未减，纳食胀闷虽瘳，但酿痰而不生血，以致肌瘦形羸，脉弦搏。蔓延防肠劳，宜慎勿忽。

于术蒸，一钱二分 金钗斛二钱 橘红衣一钱 使君子肉钱半
茯苓三钱 款冬花炙，钱半 百部蒸，八分 益智仁八分 生苡仁三钱
白鲜皮二钱 白芍炒，二钱 榧实炒，二钱

七诊：九月初六日。腹痛已瘳，大便稍硬，咳嗽较前略减，纳食微觉胀闷，肌瘦形羸如故，脉弦劲有力。防延肠劳，仍以和中扶羸，幸勿疏忽。

于术蒸，一钱 杭白芍炒，钱半 益智仁八分 金钗斛二钱
白鲜皮二钱 茯苓三钱 橘红衣一钱 苡仁炒，二钱 杏仁去皮尖，二钱
百部蒸，八分 金沸草布包，二钱 前胡钱半 使君子肉钱半

《王仲奇医案》

杨左，松江 初诊：少阴肾脉循喉，喉鼻为呼吸出入之道，上通于脑。脑虚肾弱，清空失清，作强弗强，咳呛声欠爽适，曾见痰红鼻衄，左耳下颈间鼠痿累累。脉濡滑而弦。摇精走泄，务宜自慎，饮食冷物亦当注意也。

左牡蛎四钱 苏芡实三钱 茯苓四钱 紫菀一钱五分 海藻三钱
莲须一钱五分 夜交藤四钱 白蒺藜三钱 炙甘草八分 橘核二钱
淮山药三钱 夏枯草三钱 月季花四朵

复诊：左耳下颈间鼠痿累累较消，遗精清泄亦止。惟咳呛时轻时剧，迄未罢休，日来痰中又复带血，面色不泽，足跗微浮，午后脉数有潮热。病机渐入瘵途，以能食便实为贵。

海蛤粉三钱,包 香白薇三钱,炒 丝瓜络三钱 茯苓四钱
麻黄根一钱 紫菀一钱五分 凌霄花二钱 陈赤豆四钱 川石斛三钱
地骨皮三钱 甜百合三钱

三诊:痰中带血已弭,咳亦稀微,跗浮减退,遗精滑泄获止,左耳下颈间鼠痿累累较消。惟午后脉数,稍有潮热,鼻窍恒欠清利。喉鼻为呼吸出入之道,上通于脑,守原意以治。病机入瘵,以能食便实为贵。

海蛤粉三钱,包 香白薇三钱,炒 巴戟天三钱 甜百合三钱
川石斛三钱 白蒺藜三钱 丝瓜络三钱 苏芡实三钱 茯苓三钱
夜交藤四钱 陈赤豆四钱 辛夷仁一钱五分

四诊:痰红已弭,咳亦稀微,左耳下颈间鼠痿累累较消。惟潮热依未见退,鼻窍仍欠清利,形色精神仍未愉快,踝跗午夜复见浮肿。脉濡数。病机入瘵,再以固精消瘵,退热止咳,扶羸调元,应机为幸。

海蛤粉三钱,包 茯苓四钱 地骨皮三钱 甜百合三钱
左牡蛎四钱 巴戟天三钱 鳖甲六钱 苏芡实三钱 川石斛三钱
辛夷仁一钱五分 夜交藤四钱 陈赤豆四钱

五诊:踝跗浮肿业已见退,形色精神亦稍稳起,大便已调,鼻较清利,咳嗽未罢,潮热依然未除,鸡鸣平旦仍有寝汗,左耳下颈间鼠痿较消,微有未弭。脉虚数。再以清骨扶羸,以俟机宜。

鳖甲八钱 地骨皮三钱 银柴胡一钱五分,鳖血拌炒 炒知母三钱
海蛤粉三钱,包 青蒿三钱,鳖血拌炒 麻黄根一钱 茯苓四钱
香白薇三钱,炒 左牡蛎四钱 夜交藤四钱 甜百合三钱

六诊:潮热略淡,寝汗亦戢,咳呛见瘥,形色稍起。惟日来肠腑又翕辟失常,腹痛肠鸣便溏。脉濡弦微数。再以腑脏兼调。

鳖甲八钱 左牡蛎四钱 制禹余粮三钱 霞天曲四钱
煨肉果一钱五分 青蒿三钱,鳖血拌炒 乌梅肉八分 地骨皮三钱
香白薇三钱,炒 茯苓四钱 甜百合三钱 制蛇含石二钱

七诊：潮热寝汗已戢，大便已调，小溲亦清。惟肠鸣未息，腹中仍稍作痛。近日来又曾遗泄。骨少髓养，作强弗强，致足肢痿软乏力。跗又微浮，色夭不泽。脉濡滑微弦。再以扶羸强肾，腑脏兼调。

大有芪四钱 霞天曲四钱 巴戟天三钱 茯苓四钱 煅牡蛎四钱
广皮白一钱五分 乌梅肉八分 淮山药三钱 煨肉果一钱五分
补骨脂二钱 夜交藤四钱 莲须一钱

八诊：原方去霞天曲、夜交藤、广皮白，加甜百合三钱
款冬花一钱五分，炙 紫苑一钱五分

《近代中医流派经验选集》

袁焯

城内红旗口王善余之子，十九岁，由常州病归，头疼身重，肢节痠痛，发热谵语，咳嗽痰中带血，面色晦暗，脉息滑数，盖湿温而兼肺病也。用小陷胸汤加青蒿、黄芩、贝母、苡仁、连翘、滑石、生地、茅根、枇杷叶等。一剂头面得汗，咳少减；二剂热退神清，夜间能睡矣。复以原方减轻其剂，接服两日，得大便一次，每餐能进粥碗许，遂改用北沙参、扁豆、苡仁、白术、麦冬、白芍、黑豆、甘草、茯苓等养胃之品而瘳。未见日，因口腹不慎，复病。胸闷不饥，饮食大减，乃与二陈汤加沙参、麦冬、佩兰、桔梗、苡仁等消补之品。两剂，饮食能进矣，但消瘦日甚，复用六君子汤加麦冬、枸杞子、苡仁、红枣等补养之剂，并戒其勿食煎炒油腻等难消之物，但以米粥、蔬菜，调养半月，而康复如初。

孙姓妇年四十余，素有肺病，咳嗽痰中带血，头晕心悸，彻夜不寐，精神疲惫，心内觉热，饮食不多，脉息细弱，此平日劳神太过，血液衰耗。肺病日久，将成肺癆也。拟方用百合、枣仁、茯神、柏子仁各三钱，沙参、麦冬、地黄各二钱，阿胶一钱五分，服后血止能寐。但汗多气喘，原方去百合加黄芪五分，枸杞子二钱，浮麦三钱，胡桃肉三钱。接服两剂，汗收喘定，但尚有咳嗽而已，原方去黄芪，加地骨皮、贝母、

枇杷叶。服三剂后，咳大减，精神亦健，能乘车出门。遂改用集凝膏，令其常服而痊。

《丛桂草堂医案》

陈良夫

金女。初诊：肝气宜疏，肝阴宜养，此不易之治法也。气郁则生火，阴弱则阳浮，寐醒必有咳痰，时或气升头眩，块耕体灼，脉来细滑兼数，舌苔易脱，此由阴阳不充，肝气郁而化火上乘，肺金受灼。拙拟疏降柔养并行不悖，徐图效力。

细生地 女贞子 稽豆衣 紫石英 金铃子 煅石决 川贝母 霍石斛 玉蝴蝶 广郁金 蛤壳 谷芽

二诊：肺为柔金，最畏者火，肝者火之母也，亦为多气多郁之乡。脾与胃皆属土，谓主纳而喜降，脾主运而喜升，一脏一腑为后天之根本，尤关紧要也。平素咳痰间作，偶因失血，咯痰愈粘，气易升逆，耳常鸣响，甚则欠聪，形瘦神乏，便下有时溏污，杳不思纳，脉来细滑兼弦，苔糙尖光。种种现象，良由肝郁化火，柔金受制，木来乘土，久之而土不生金，此纳呆、便溏之所由来也。且人之气阴，依胃为养，纳食呆滞，则生化之源不旺，腑腑皆失其禀受，形疲神乏，职是之故。拙拟培土以生金，平肝以降火，冀其肺降有权，斯木有所畏，中土不再受侮，庶免积虚成损之虑，特见效殊非易易耳。

北沙参 制冬青 甜冬术 稽豆衣 煅蛤壳 原石斛 煅石决 焦白芍 焦谷芽 炙紫菀 盐水炒橘白

三诊：昔人谓土旺则金生，勿泥泥于保肺，金清则木畏，毋啖啖于平肝。昨宗此意立方，投以培土保肺，平肝降火之剂，便溏稍实，而夜分频咳，痰粘气逆，耳仍鸣响，体子灼而手指易震，脉弦细，苔糙光剥。良由阴液不足，肝经气火，化风旋扰，金受火刑，土受木侮，证势颇觉淹缠，不易速效，再以前法出入主治。

北沙参 女贞子 川贝母 焦白芍 桑皮 鳖甲 霍石斛

云茯神 稻豆衣 蛤壳 生石决 谷芽 黛灯芯

赵男。肺为金脏，最畏者火。心者火之主，肝者火之母也。咳已累月，咯痰粘薄，胸胁均有引痛，体子灼热，午后为甚，迨日又见汗疹，口常干燥，咽喉作痛，形疲神乏，脉来弦滑带数，舌苔花糙尖脱。证由阴液损伤，心肝之火内亢，津液炼为痰沫，有积虚成损之势。考肺胃之阴，津液是也，肝肾之阴，精血是也。咳久痰粘，汗疹频见，肺胃之津液、肝肾之精血，均受损伤矣，治之殊非易易。姑以润养清化主治，从上下并顾，觐其动静，然必得咳呛递缓为吉。

霍石斛 麦冬 炙鳖甲 炙桑皮 川贝母 黛蛤壳 女贞
川百合 辰茯神 地骨皮 玄参心 冬瓜子

《陈良夫专辑》

金子久

脉静舌光，气急痰嗽，起于已久，确是损症，当用清宣肺气，滋养真阴。

别直参 大生地 毛燕 盐水炒牛膝 灵磁石 青龙骨 煅牡蛎 麦冬去心 炙甘草 叭杏仁 川贝 冬虫夏草

二诊：前方清养肺气、滋补真阴，诸恙较减，脉亦柔和，正气之虚未复，仍宗前意出入。

别直参 茯苓 炙甘草 川贝 冬虫夏草 麦冬去心 毛燕根 炒谷芽 盐水炒大生地 於术 煅青龙骨 蒺藜

咳呛无痰，非脾湿是肺燥，腹痛气逆，是肝气非胃寒，晡有面红目糊，定是阴虚阳亢，经停一年不转，显然血虚气滞，脉象细弦而数，舌苔薄黄而腻。清轻养肺阴而滋肾水，介类潜肝阳而泄肺火。

紫丹参 叭杏仁 白芍 牛膝 橘红 毛燕 旋复花 玄参
牡蛎 枇杷叶

《金子久专辑》

丁泽周

徐先生。痰血渐止，咳呛气逆，潮热晚甚，小渡短赤，口干不多饮，左脉弦小而数，右脉滑数，舌苔薄黄。肺经早伤，肝火内炽，风温燥邪乘隙而入，还虑增剧。今拟清燥救肺，清温祛邪。

南沙参 生甘草 霜桑叶 嫩白薇 朱伏神 金银花 连翘壳 冬瓜子 光杏仁 茜草根 川象贝 侧柏炭

二诊：吐血渐止，咳嗽依然，潮热纳少，舌中剥绛，苔薄腻而黄，脉弦细而数。肺阴已伤，湿热酿痰，留恋宿瘀，郁蒸为热，损症根萌已著，非易图治。再拟培土生金，养肺去瘀，未识能得挽回否，尚希明正。

南沙参三钱 抱伏神三钱 淮山药三钱 嫩白薇一钱五分
茜草根二钱 丹参二钱 通草八分 生苡仁四钱 川象贝各二钱
瓜蒌皮二钱 甜杏仁二钱 冬瓜子四钱 生熟谷芽各四钱

《丁甘仁晚年出诊医案》

陈在山

病者：家慈，五十五岁。

病名：肺癆

原因：少年时，劳碌过度，损伤气血，而肺气不得气血营养，津液遂枯矣。

证候：遇冬必犯咳嗽，气喘痰多，减食少眠，甚则寒热往来，舌干口渴，大便秘结，小水红涩，每犯时，昼轻夜重，睡不得卧，如此七年之久，痰中或带血痕。

诊断：详诊六脉，独右寸洪滑有力，余脉数而弦软，邪热在肺无疑，盖心火炽盛，消烁肺中津液，金燥不能生水，水涸阴虚，而阳必亢矣。通俗治法，一有内热，不问虚实，即用苦寒败胃之品，殊不知胃为肺之母，胃败则土气衰，而乏生生之理，故有食减口渴之症；按

肺邪有升无降，浊痰随气上涌，肺主皮毛司气，肺气不降，则皮毛闭固不开，或因时邪外袭，或因郁火内燃，故有寒热便秘之症；要欲理肺，先当补脾，古人有言曰：虚则补其母也。然而肝不平，则脾土受制；胃不清，则肺金难生。而浊痰何以化，气息何以调，久则成痼成痿，不可救药也。速宜疏通肝木，淡润脾土，俾肝宁脾健，而肺脏自清，庶克有济矣。

疗法：仿俞氏清燥救肺汤加减，拟用当归、生地理血润肺，茯神、枣仁宁心摄气，醋芍、枳壳平肝，沙参、阿胶补肺，薏苡、皮苓淡润脾气，寸冬、花粉生津止渴，橘红、杷叶化痰益气，杏仁、双花润肺驱邪，甘草和中，桑叶泻肝经之邪，藕节消瘀，羚羊散肺部之热，以上诸药次第加减用之。

处方：橘红三钱 桑叶二钱 醋芍三钱 阿胶三钱 皮苓三钱
寸冬三钱 花粉三钱 藕节三钱 生地三钱 甘草二钱 杷叶蜜二钱
杏仁三钱 双花三钱 引用白糖一匙后同。

又方：橘红三钱 生地三钱 茯神三钱 焦枣仁三钱 阿胶三钱
薏苡米四钱 甘草二钱 花粉三钱 藕节三钱 沙参三钱
蜜杷叶二钱 甜杏仁三钱

又方：橘红三钱 羚羊钱半 白人参沙参换二钱 生白芍醋芍换
茯神三钱 当归三钱 蜜杷叶二钱 熟地生地换三钱 寸冬三钱
甘草二钱 阿胶三钱 焦枣仁三钱

结果：以上三方，前后共服三十余剂，满一月之期，诸症霍然全愈，次年病热如失，永不再犯。

《医学杂俎》

孔继炎

姻戚马芝亭，年近六十，久病癆嗽，肢体羸瘦。癸丑仲冬，为病增剧，延予诊视。时饮食不下，已数日矣。诊毕，书案曰：此本癆嗽症，阴阳久已两亏，日下吐脓血而不咳，肺病尽移于胃矣。夫胃水谷

之海，五藏六腑所资以受气，败血浊痰入而踞之，则上焦纳谷之道不顺，饮食何以能下？中焦腐熟之力不充，强食安得不膈？经云：安谷者昌，绝谷者亡。谷入日少，何所资以为奉生之地？以故阴虚阳乘，而发热之症现；阳虚阴乘，而恶寒之症作。阴阳并虚，进退互乘，遂致倏尔恶寒，倏尔发热。且败血浊痰由阳络下注者，得从清道溢出而为吐；由阴络下注者，以传送无力，河车路涩，块结小腹，聚而不出，此所以有若覆盆、若覆碗之形也。今脉左三部微细无力，犹是阴阳两虚之诊。右尺沉而涩，少腹之停积未去也；右关沉滑而搏，浊痰败血尤多也；右寸虽微而沉部带结，上焦余滞未尽也。具此余邪，而当气血两亏之候，补气则生热，补血则生痰，不补而用攻，正气又不能支。不得已斟酌其间，惟用疏气利痰之品，先从肺胃立治。肺气运则余邪可以渐去，胃气转则谷物不患难容。缓缓调之，使正气不伤，真阴无损，庶几邪退正复，犹是回春之机，然非一朝一夕所能奏功矣。如法治之，以羸甚，卒不能康健。数月，仅能起，亦不复言治矣。岁余，病复作，时予在曲阜，求予不获，遂以病歿。

《孔氏医案》

贺季衡

周男。呛咳有年，肺络已伤，屡次失血，咽痛音嘶，痰鸣咯之难出，内热自汗，脉细数。症现一派传尸癆瘵之象，图治不易。

北沙参三钱 生诃子肉一钱五分 大麦冬二钱 五味子七分
川贝母一钱五分 冬桑叶一钱五分 炙乌梅一钱 肥玉竹四钱
白桔梗一钱 淮山药三钱，炒 枇杷叶三钱，去毛炙 凤凰衣一钱五分

二诊：咽痛虽减，音嘶如故，呛咳痰鸣，咯之难出，潮热自汗，屡次失血，脉细数，舌红。肺络大伤，肾阴复损，金水不相生，虚阳上灼，入怯已深，图治不易。

北沙参四钱 大麦冬二钱 五味子七分 大熟地四钱，蛤粉炒
马勃八分 白桔梗一钱 乌玄参三钱 川贝母一钱五分 肥玉竹四钱

叭杏仁三钱 榧子肉二钱

注：另嘱吃独瓢大蒜头，炖加麻油冰糖。又嘱吃榧子肉。

三诊：日来咽痛潮热虽减，而音嘶如故，呛咳痰鸣，屡次失血，今又腹痛使溏，脉细数无力，舌赤如朱。肺脾肾三经大亏，虚阳内灼，入怯已深，收效不易耳。

北沙参四钱 生诃子肉一钱五分 五味子八分 大麦冬二钱
川贝母一钱五分 白桔梗一钱 大熟地五钱，蛤粉炒 冬桑叶一钱五分
肥玉竹五钱 炙乌梅一钱 榧子肉二钱 凤凰衣一钱五分

膏方：以上方加紫河车三两酒洗净 莲子五两 川百合三两
淮山药三两 大杏仁三两

《贺季衡医案》

历代中医资料大全分享

你好，我是**逢原**，你现在看到的这本资料是我从网上收集整理的。

本人自学中医多年，耗时多年搜集珍藏了众多的中医资料，包括了目前已经出版的大多数中医书籍，以及丰富的视频教程，而这些中医资料，是博览群书，勤求古训之必备。

只需要在下面输入你的邮箱并确认就可以直接下载中医资料：

http://list.qq.com/cgi-bin/qf_invite?id=03157beabc6d50e0b64029a2715966596d94dcac7ed0cfd7

如果有你也喜欢中医，需要一些学习中医的资料；或者是学习中医的路上碰到了什么问题需要交流；或者碰到一些疾病的困扰，需要求助，可以通过以下方式联系我：

一、发邮件：fyzy999@qq.com

二、加我 QQ/微信：**2049346637**

三、关注微信公众平台——逢原中医，经常有中医文章更新。

四、关注我的空间：<http://user.qzone.qq.com/2049346637>

免责声明：所有资源均是网上搜集，本人收集整理这些中医资料，仅仅为了方便中医同道中人私下交流学习之用，不为营利，将不对任何资源负法律责任。所有资源请在下载后 24 小时内删除，任何涉及商业营利目的均不得使用，否则产生的一切后果将由您自己承担！如果您觉得满意，请购买正版资源。



私人微信号：2049346637



公众平台：逢原中医